

*Bible. O.T. Mortlock. Revision. 1900*

PUK AN

JENESIS, EKSOTOWS,  
LIFITIKOWS, RUT  
ME ESTER;

POPUN TESTAMENT AN LOM,

AULI SOWNI KAPAS AN IPRU,

AULI NGANI KAPAS AN

TRUK ME MORTLOK.

---

NEW YORK:  
AMERICAN BIBLE SOCIETY,  
INSTITUTED IN THE YEAR MDCCLXVI.

1900.

[*Ruk Scriptures, 8vo.*]

7-7-192

# JENESIS.

---

**L**E popun Kot feria ta lang o fanufan.

1 2 Fanufan a sor ununun o me pen; a rotopuak uawn matau. O ngun an Kot onopengi uawn tran kana.

3 Kot a apasa, A pue saram; o me saram la.

4 Kot a na ngani saram a me etipuar; o Kot a aimu feseni saram me rotopuak.

5 Kot a aitan ngani saram ran; o rotopuak a aitan ngani puin. A ken lekuniol o lesor, popun ran.

6 Iue, Kot apasa, A pue kianin lefinan tran kana, aimu feseni tran kana me tran kana.

7 Kot a feria ta eue kianin, aimu feseni tran kana me nom fan lang sowni tran kana me nom uawn lang: iue, a fis.

8 O Kot a aitan ngani eue kianin Lang. A ken lekuniol o lesor aruonan ran.

9 Kot apasa, Tran kana me nom fan lang ra epue amuit fengeni uawn ekis eu, o puun epue pue ta: iue, a fis.

10 Kot a aitan ngani puun Fanufan; o muit an tran kana a aitan ngani Matau; Kot ap kawton a me etipuar.

11 Iue, Kot a apasa, Puun epue amara ta fetil, o petuel me ken ua, o ira me ken ua, me ken feri an sawkun ua, o faun a nom lawn: iue, a fis.

12 Puun a amara ta fetil, petuel me ken feri an sawkun ua, o ira me ken ua, o an sawkun faun a nom lawn; Kot ap kawton a me murinna.

13 A ken lekuniol o lesor auluan ran.

14 O Kot apasa, Atitin kana pue nom uawn kianin lang pue ra pue aimu feseni ran me puin; o ra pue asinan fansoun kana, o ran kana, o lefeng kana:

15 O ra pue atitin kana uawn kianin lang pue ra pue asarama fanufan : iue, a fis.

16 Iue, Kot feria ta atitin trapur ruo ; atitin trapur mown a epue nemani leran, o me kisakis a pue nemani lepuin : I a pual puakeni fu kana.

17 Kot ap isa te ir uawn kianin an lang pue ra pue asarama fanufan ;

18 O ra pue nemani leran o lepuin, o ra pue aimu feseni saram me rotopuak ; Kot a na ngani a me etipuar.

19 A ken lekuniol o lesor aruanuan ran.

20 Kot pual apasa, Tran kana ra pue tuk la ren man me ken mowkit, me manau, o man su pue ra pue akas uawn fanufan uawn kianin an lang.

21 O Kot a feria ta rau trapur kana, o man me mowkitikit me manau me inisin, le sawkun ar me tran kana ra tuk la ren, o man su inisin le sawkun ar : Kot a na ngani a me etipuar.

22 Kot a afaiatru ir, apasa, Au pue aupua tu, o nutra la, o tuk la tran an leset kana ; o man su kana ra pue aupua tu uawn fanu.

23 A ken lukuniol o lesor alimouan ran.

24 Iue, Kot a apasa, Puun epue amara ta man me manau le sawkun ar, man fetal, o man tete fetal, o man mawtro uawn fanufan, le sawkun ar ; iue, a fis.

25 O Kot a feria ta man mawtro uawn fanufan le sawkun ar, o man fetal kana le sawkun ar, o man tete fetal inisin me ken tete fetal uawn fanufan le sawkun ar : Kot ap na ngani a me etipuar.

26 Kot a pual apasa, Sa pue feria ta aramas sawkun kitr, langalang an kitr : o ir ra pue nemani ik kana leset, o man susu kana uawn lang, o man fetal kana, uawn fanufan inisin, o man tete fetal inisin me ken tete fetal uawn fanu.

27 Iue, Kot a feria ta aramas sawkun pusin I, langalang an Kot a ken feria ta i, muan me fefin a ken feria ta ir.

28 Kot a afaiatru ir, o Kot a ken kapas ngani ir, Au pue aupua tu, o nutra la, o autane ta fanufan, o

puaratro i; o au pue nemani ik kana leset, o man susu kana, o man me manau inisin me ken fail fetal uawn fanufan.

29 Kot ap apasa, Na ngani, Ngang I a ngani ami uan petuel inisin, me nom uawn fanufan inisin, o uan ira inisin me ken feri faun; a pue an ami mownga.

30 O fetal inisin o petuel inisin ngang I ngani man inisin o man susu inisin, o man tete fail inisin uawn fanufan, me manau, a pue an ar mownga: iue, a fis.

31 Kot ap na ngani awt inisin a feria ta, a, atiau me etipuar. A ken lekuniol o lesor auownou an ran.

## SOPON 2.

**A**UESI la lang o fanufan o autan ir monison.

2 Afusu an ran aues angang inisin me Kot feria ta; a ap asese afusu an ran sowni an angang inisin a feria ta.

3 Kot ap afaiatru afusu an ran o puauna la i; pue lawn i a ken asese sowni an angang inisin a feria ta o puakeni.

4 Ien kapas an lang o fanufan fansoun ir me feria ta, lawn ran an Jioua Kot a feria ta fanufan o lang,

5 O ira an lemalemal me inisin mown a nom le puun, o petuel an lemalemal inisin mown a mare ta; pue Kot a sap amawra tu uit uawn fanufan, o a sor aramas me pue awtawt le puun.

6 Topatop eu fai ta sowni fanufan, o atretrenu lepuun inisin.

7 Jioua Kot a feria ta aramas sowni puun, ap nisi lawn puawtan ngasangas an manau; aramas me uor ngun an me manau.

8 Jioua Kot ap feria ta eu malemal lawn masauran an Iten; o a isana tu ie aramas me a feria ta.

9 Kot a amare ta sowni lepuun ira etipuar me inisin, o ira me murinna mownga uan me inisin; o pual iran kamanau letretren malemal, o iran asilei oson me etipuar o me ingan.

10 Tran pupu me pupu sowni Iten a pue atre-trenu eue malemal; a ap keang feseng feria ta keang fawso.

11 It an afawtr Pison: iei me ken pueli fetale fanu an Afila inisin, me uor kol ie.

12 O kol an eue fanu a etipuar; me uor teliom o fau onika.

13 It an aruofawtr an tran pupu Kaion; iei me ken pueli fetale fanu an Itiopia inisin.

14 It an aulufawtr an tran pupu Itekel; iei me ken pupu ngani masanran an Asiria. Afawso an tranpupu Infretis.

15 Jioua Kot a ken angai eue muan, isana tu lawn malemal an Iten, a pue nimeti o atanaki.

16 Jioua Kot a ken fanau eue muan, apasa, En ko pue ani sowni ira an Iten me inisin;

17 A eue ira me asilei ta me murinna o me ingau, ko sap ani sowni; pue lawn ran an om ani i en epue me la.

18 O Jioua Kot apasa, A sap murinna eue muan epue i etrek; ngang I epue feri ngani i trawn alisi aman.

19 Kot me feri sowni puun man an le malemal me inisin, o man susu me inisin: a ap amoana to ren Atam a pue ueri me ni a pue aitan ngani ir: o me ni Atam aitan ngani man manau me inisin, iei me it ar:

20 Atam me aitan ngani man fetal me inisin, o man susu kana, o man an le malemal kana; a Atam, a samo ueri trawn alisi i.

21 Jioua Kot a ken amaura kinamue eue muan, i a maur: o a angai eu tru an raran, ap apatr fengeni fituk le kinaws an;

22 Jioua Kot a ken puakeni aman fefin ren eue trun leraran mi a angai sowni eue muan, o a ken na to i ren eue muan.

23 Eue muan apasa, trun trui o fituk an fituk ai; it an epue Fefin, pue a ua sowni Muan.

24 Ie mi ne aman muan epue liki sakaru saman o in an, ap patr ngani trawniman; o ir ra pue fituk eu.

25 Ir ruoman me sele la, eue muan o trawniman, o ra sap sau.

SOPON 3.

**S**ERPENT a ken tipaman mown man malemal me inisin me Jioua Kot a feria ta. A ken kapas ngani eue fefin, Atiau Kot a ken apasa, Au te momownga sowni ira an iei malemal me inisin?

2 Eue fefin ap kapas ngani eue serpent, Sa pue momownga uan ira an iei malemal kana.

3 A nan ira me nom letretren malemal, Kot a ken apasa, Au te momownga i, au te fenu i, pue an te me la.

4 Eue serpent a kapas ngani eue fefin, Au sap epue me la:

5 Pue Kot a ken silei me ran an ani momownga, mas ani epue ane la, o ani epue oson trek anu kana silei me etipuar o mie ingau.

6 Eue fefin apuap ueri me eue ira me murinna an mownga, o etipuar an kawton, o a etipuar pue tipatrem ren, a ken angai uan ira, ani, o pual ngani trawniman etei i; a pual ani.

7 Lemas an ir ruoman ap ane la, ra puap silei me ir sele la; o ra ken tei fengeni tren fik, feri ngani pusin ir atrowk.

8 Ir rong mangungu an Jioua Kot a fetal lawn eue malemal lekuniol: Atam me trawniman ra op sowni Jioua Kot lein petuel an eue malemal.

9 O Jioua Kot a kokowri Atam, kapas ngani i, Ia en?

10 A apasa, Ngang rong om inangungu lawn malemal, o ngang I masak, pue sele la; o ngang op la.

11. A ken apasa, Ia me kapas ngan uk me en sele la? Ea me ani uan ira me ngang I kapas ngan uk ko te momownga?

12 Atam ap apasa, Enan fefin me en ngani iei, a ken ngan iei uan ira, o ngan ani.

13 O Jioua Kot kapas ngani eue fefin, Meita ei en feria ta? Eue fefin ap apasa, Enan serpent atapu ai, o ngang ani.

14 O Jioua Kot kapas ngani eue serpent, Powkitan om feria ta ei, en me anumamau mown man fetal inisin, o mown man an fanu me inisin; o pue seras la uawñ lukom, o ani puun ran an om manau me inisin.

15 Ngang pue tina to aput lefin an en o eran fefin, o lefin an murimur om o murimur an; a pue ata la maker om, o en ko pue ata la apinapim an pitran.

16 A pual kapas ngani eue fefin, Ngang I pue anutra la trapur om riafau o om naunau; lawn riafau o pue naunau la menikol; en ko pue mowtren trawnimom, o a pue nemani en.

17 A ap kapas ngani Atam, Powkitan om auseling alon trawnimom, ani uan ira me ngang I kapas ngani en, O te ani sowni: puun me anumamau powkitan en; o pue riafau ani uan, ran an om manau me inisin;

18 Puun epue amare ngan uk ira felafel o petuel ingau; o en ko pue ani petuel an malemal.

19 Ken molon an mas om o epue ani mownga tawra tu ran an om epue luini ti eue puun me a angai en sowni; pue puun en, o en epue uili ti puun.

20 O eue muan aitan ngani trawniman If, pue a ken inan me inisin ra manau.

21 Jioua Kot a feri ngani Atam o trawniman jakit unutran man, ap faute ngani ir.

22 Jioua Kot ap apasa, eue muan a ken nene trek aman kitr, silei me etipuar o me ingau; a pue a te etia ta paun, angai uan iran amanau, momownga, manau failfail la trek:

23 Ie me Jioua Kot a alaua la i sowni malemal an Iten, a pue uotei puun me a ken angai sowni.

24 Iue, a ken tina la eue muan; a ap isana tu masanran an malemal an Iten, Jerupim kana, o kotlas pulapul me sep fetal, a pue amanamani al an ira amanau.

#### SOPON 4.

**E**UE muan a silei If, trawniman; a ken puopuo, ap nauna ta Kein; a ken apasa, Nang I angai sowni Jioua aman muan.

2 A pual nanna ta Epel puin. Epel me trawn amaniman an sip, a Kein me trawn awtawt aman.

3 A failfailo, Kein a ua to uan ira, asawron ngani Jioua.

4 Epel a pual ua to mownnaun naun man kana, o iui ar. Jioua a asitr Epel o an asawr;

5 O Kein o an asawr a sap asitr. Kein a sawng trapur, o mas an afatafat ingau.

6 O Jioua kapas ngani Kein, Meita en me sawng ren? o meita mas om afatafat ingau ren?

7 Are en feru murinna o sap epue tren ren? o are en sap feru murinna tipis a kakawn unukin asam: A pue mur me uawn uk, o en ko pue nemani i.

8 Kein a ken kapas ngani Epel, puin: iue, me feru fansoun ar nonom lawn malemal, me Kein a ken u ngani puin, o ni la i.

9 Iue, Jioua kapas ngani Kein, Ia puim Epel? A ken apasa, Ngang sisilei; ngang trawnmas an pui?

10 O a apasa, Meita en feru? mangungu an tran puim a ken asawre iei sowni le puun.

11 En me anumamau sowni fanu, me ken amassau au an a pue angai tran puim sowni paum;

12 En ko puap tu puun, a sap epue amar ngan uk tetre la; ko pue muanason o munkupue uawn fanufan.

13 Kein ap kapas ngani Jioua, Ai tipis asaki rei.

14 Na ngani en tin iei la sowni uawn fanufan ikanei; ngang epue amown sowni mas om; o ngang I epue muanason o munkupue uawn fanufan; a epue feru, manu me kuna iei me inisin ra pue ni iei la.

15 Jioua ap kapas ngani i, Ie me anan a pue ni la Kein, a pue luini ngani i fan fusu. Kot a Kein isate mak uawn Kein, pue aman a ueri i a te ni la i.

16 Kein a fai la sowni ren Kot, ap nonom trek uawn fanu an Not, masanran an Iten.

17 Kein a silei trawniman; o a puopuo, o nanna ta Kanok; a ap aua ta teluim, o ngani it an eue telinim Kanok; it sowni naun.

18 Kanok a nauna ta Irat: Irat nauna ta Meusael;



Meusael nauna ta Metusael; o Metusael nauna ta Lemek.

19 Lemek ap apupuiluani fefn ruoman; itan aman Eta, o itan aman Silla.

20 Eta a naunan Jepal; i me saman ir me nonom trek lawn im mangaku, o me atanaki kau kana.

21 O puin me it an Jupal; i me saman ir me atiki arp o kasowng.

22 Pual Silla a naunau Tupalken; i me trawn feria ta metra pras o aion; mowngai an Tupalken itan Nama.

23 Lemek kapas ngani trawniman koe, Eta o Silla, Ami puilian Lemek kana an auseling ai mangungu, rong ai kapas, pue ngang ni la aman muan are a ni iei, o alual aman are a fiu ngani iei;

24 Are ra pue luini ti fan fusu ar ni la Kein, atiau ra pue luini ti fan fik me fusu ar ni la Lemek.

25 Atam pual silei trawniman; o a naunau amazi atamuan, o ngani it an Set; a ken apasa, Pue Kot ngani iei aman at, niuilin Epel me Kein a ni la.

26 Set a pual nauna ta atamuan; o ngani itan Inos: iue aramas ap popua ta iawtok ngani itan Jioua.

#### SOPON 5.

**I**EI tawropuan murimur an Atam kana. Lawn ran an Kot a feria ta aramas, a ken feria ta i ununun Kot;

2 A feria ta ir muan o fefn; o a afaiatru ir, o ngani itar Atam, le ran a ken feria ta ir.

3 Manau an Atam lefeng apuku ilik fansoun a ken nauna ta aman atamuan ununun trek i, o langalang an; a ngani itan Set.

4 Manau an Atam murin an nauna ta Set, lefeng ualupuku; a ken nauna ta kana atamuan o atafefn.

5 Manau an Atam me inisin, lefeng tuopuku ilik: o a me la.

6 Manau an Set lefeng apuku limou o a nauna ta Inos.

7 Manau an Set murin an nauna ta Inos me lefeng ualupuku fusu, o a ken nauna ta kana atamuan o atafein :

8 Manau an Set me inisin, lefeng tuoupuku engawl me ruo : o a me la.

9 Manau an Inos lefeng tue o a nauna ta Kenan :

10 Manau an Inos murin an nauna ta Kenan me lefeng ualupuku engawl me limbu, o a ken nauna ta kara atamuan o atafein :

11 Manau an Inos me inisin, lefeng tuoupuku limou : o a me la.

12 Manau an Kenan lefeng fik o a nauna ta Malalil :

13 Manau an Kenan murin an nauna ta Malalil me lefeng ualupuku faik ; a ken nauna ta kana atamuan o atafein :

14 Manau an Kenan me inisin, lefeng tuoupuku engawl : o a me la.

15 Manau an Malalil lefeng uowne me limou o a nanna ta Jeret :

16 Manau an Malalil murin an nauna ta Jeret me lefeng ualupuku ilik ; o a ken nauna ta kana atamuan o atafein :

17 Manau an Malalil me inisin, me lefeng ualupuku tue me limou : o a me la.

18 Manau an Jeret lefeng apuku uowne me ruo o a nauna ta Inok.

19 Manau an Jeret murin an nauna ta Inok me lefeng ualupuku, o a ken nauna ta kana atamuan o atafein.

20 Manau an Jeret me inisin me lefeng tuoupuku uowne me ruo : o a me la.

21 Manau an Inok lefeng uowne me limou o a nauna ta Matusela :

22 Inok a ken fail fetal etei Kot lefeng ulupuku murin an nauna ta kana atamaun o atafein :

23 Manau an Inok me inisin me lefeng ulupuku uowne me limou :

24 Inok a ken fail fetal etei Kot ; o a se nom ; pue Kot a angai i.

25 Manau an Matusela lefeng apuku ualik me fusu, o a nauna ta Lemek :

26 Manau an Matusela murin an nauna ta Lemek me lefeng fupuku ualik me ruo, o a ken nauna ta kana atamuan o atafefin :

27 Manau an Matusela me inisin me lefeng tuoupuku towne me tuou : o a me la.

28 Manau an Lemek lefeng apuku ualik me ruo, o a nauna ta aman atamuan :

29 A ken ngani it an Noa, apasa, Iei i me pue atripa kitr oson am angang o fefer an pautr, powkitan puun me anumamau ren Jioua.

30 Manau an Lemek murin an nauna ta Noa me lefeng limoupuku tue me limou, o a ken nauna ta kana atamuan o atafefin :

31 Manau an Lemek me inisin me lefeng fupuku fik me fusu : o a me la.

32 Manau an Noa me lefeng limoupuku ; a nauna ta Sem, Am, o Jefet.

#### SOPON 6.

**I**UE a fis, aramas ra popua ta aupua ta uawn fanufan, o ir nauna ta atafefin kana.

2 O naun Kot atamuan kana ra na ngani naun aramas nengin kana, liowtr, o ra apupuiluani me inisin me ra afitriek.

3 O Jioua a apasa, Nguni a sap epue nonom ngani aramas failfail la trek, pue i me fituk etrek ; a manau an epue lefeng apuku rue.

4 Me uor atitam fanufan lawn ene fansonn ; o pual murin, lupuan naun Kot kana ra apupuiluani naun aramas nengin kana, ir ap naunau ngani ir, muan puara me lom, aramas me fau la.

5 Jioua a na ngani me aramas me ingau trapur fanufan, o rekirekin leluar me inisin me ingau trek ran inisin.

6 O Jioua a lamalam la an feria ta aramas uawn fanufan, o lelukan trou ren.

7 O Jioua apasa, Ngang pue ata la aramas me

ai feria ta, sowni uawn fanufan; aramas o pual man, o man tete fail, o man susu fail lang kana; pue ngang I lamalam la ai feria ta ir.

8 O Noa a ueri an tren ren Jioua.

9 Iei faws an Noa: Noa muan etiptar aman, me uenauen trek an fefer kana, o Noa a fail fetal etei Kot.

10 Noa nauna ta atamuan uluman, Jem, An, o Jefet.

11 Fanufan pual me ingau trapur ren Kot; o fanufan me ur an flu.

12 Kot a na ngani fanufan, a, atiau, me ingau; pue aramas me inisin ra ingaua la ar fefer uawn fanufan.

13 O Kot a kapas ngani Noa, Ngang I ueri lesoponan aramas me inisin; pue fanufan a ur an flu rer; o atiau, ngang epue ata la ir sowni fanufan.

14 En ko pue feria ta sowni ira kofer, uaim afawtr, o pue feria ta kana ueip lawn, o apatr lukin o pual lawn.

15 A iei oson en ko pue feria ta i: Aleilain epue seingan paun ulupuku, o trelap an seingan paun lime, o towkian seingan paun ilik.

16 Kana asamawtro en ko pue feri lawn uaim, asam epue seingan paun eu sowni sasaran uawn.

17 A, atiau, ngang I epue tina to nawter tran kana, uawn fanufan, a pue ata la fituk o manau me inisin sowni fan lang; me inisin me nom fanufan ra pue me la.

18 Iue, ngang epue anukua tu ai puon rem; en ko pue fai lawng lawn uaim, en o nom muan kana, puilum o puiluar kana et uk.

19 O ruoman sowni sawkun man me inisin en ko pue uai la lawn uaim, pue amanaua ir et uk; ra pue muan me fefin.

20 Sawkun man susu, o man fetal, o man tete fail me inisin, ruoman sowni eu sawkun ra pue et to rem pte ra pue manau.

21 En ko pue pusin angai mownga me inisin me ra ken momownga, uai fengen rem; a epue an om, o an ar.

22 Iue, Noa a feria ta; oson ue trek Kot a kapas ngani i, iei oson a feria ta.

## SOPON 7.

**I**UE, Jioua a kapas ngani Noa, En ko pue et to lawn uaim, o trawnimom me inisin: pue ngang I ueri en uenetrar rei lawn pilawn aramas ei.

2 Ko pue angai fuman sowni sawkun inisin man aniafitr, niamuan o fefin an; o sawkun man kana me aniaput ruoman trek, niamuan o fefin an.

3 Pual fuman sowni sawkun man susu kana, niamuan o niafefin; pue ra pue aupua ta uawn fanufan me inisin.

4 Pue murin ran fusu ngang I epue tina to uit uawn fanufan ran faik, puin faik; o ngang epue ata la man manau me inisin sowni uawn fanufan.

5 Iue, Noa a feria ta me inisin me Jioua kapas ngani i.

6 Manau an Noa lefeng uownupuku lupuan nawter uawn fanufan.

7 Noa a to lawng lawn uaim, naun muan kana, trawniman, o trawniman naun muan kana, ra fitei i, powkitan nawter.

8 Man aniafitr kana o man aniaput kana o man susu kana o man tete fail uawn fanufan me inisin,

9 Me ruoman sowni eu sawkun, niamuan, o niafefin, oson Kot a kapas ngani Noa.

10 Iue, a fis murin ran fusu a et to nawter uawn fanufan.

11 Lawn lefeng uownupuku an manau an Noa, arnou an maram, ran engawl me fusu, ran ue trek set a purapura ta o asamawtro an lang kana ra suk.

12 A ap uit uawn fanufan ran faik, puin faik.

13 Lawn ran ue trek Noa, o Sem, Am o Jefet, naun Noa koe, o trawniman pual trawniman naun koe etei ir, fai la lawn uaim;

14 Ir, o sawkun man mawtro inisin, o sawkun man fesir me inisin, o sawkun man tete fail uawn fanufan me inisin, o sawkun man susu me fesir me inisin, o sawkun man susu me inisin.

13 Ruoman me ruoman sowni man manau me inisin ra epue to lawng lawn ren Noa.

16 A to lawng kana, niamuan o niafehn sowni man inisin, ir ra to lawng lawn oson Kot a kapas ngani i; Jioua a pinia la i lawn.

17 O eue nawter me trapur uawn fanufan ran faik; set a purapura ta, amana ta uaim, me pi ta sowni fanufan.

18 Tran kana a pualuo la, anownnawn trapur uawn fanufan; uaim a man la uawn tran kana.

19 Tran kana ap purapura ta trapur uawn fanufan; o ra pualuo la trukatruk ta towkia me inisin me nom fan lang.

20 Tran kana me anownnawn seingan paun engawl me limou uawn, trukatruk ta kana me pualuo la me inisin.

21 Manu manau me inisin me mowkitikit uawn fanufan ra me la, man susu, o man fesir, o man mawtro, o man tete fail me inisin me ken tete fail uawn fanufan, o aramas inisin :

22 Me inisin me ngasangas an manau nom lawn puawtar, me nom uawn fanu, ra me la.

23 Awt metawt a manau me inisin me nom uawn fanufan ra ata la, aramas, o man fetal, o man tete fail o man susu fail lang; ir ra ata la sowni fanufan : Noa etrek a manau o ir me etei i lawn uaim.

24 Tran kana ap purapura ta uawn fanufan, ran apuku lime.

#### SOPON 8.

**I**UE, Kot a tremani Noa o awt metawt me manau, o man inisin me etei i lawn uaim : o Kot tina to asapual a eng to uawn fanufan; tran kana ap kisakis tu;

2 Puuot an set kana me pinia la, o asam an lang kana me apunga la, o uit sowni lang uk tu :

3 Tran kana, a fawkun lulin la sowni fanufan; o murin ran apuku lime, tran kana kisakis tu.

4 O uaim a fan ta uan trukatruk ta an Ararat, afusu an maram, ran engawl me fusu.

5 Tran kana ra fawkun kot la tawrei engawl an

maram : unungan trukatruk ta kana me puepue la popun ran an engawl an maram.

6 Murin ran faik, Noa a suka la asamawtro an uaim, me a ken feria ta.

7 A ap tina la aman refen me as fetal etrek tawrei tran kana mawr sowni fanufan.

8 A pual tina la aman muraw a pue pi are tran kana kisakis tu sowni fanu ;

9 Eue muraw a sap ueri ekis ren pitran, a puap luin to ren lawn uaim, pue tran kana ra nom uawn fanufan me inisin ; a ap eti la paun, angai i, aluina to i ren lawn uaim.

10 A uitauit pual ran fusu, i a puap tina sowni uaim eue muraw ;

11 Lekuniol eue muraw a luin to ren ; o atiau tren olif, a kini, a nom le au an ; Noa ap silei tran kana ra kot la sowni fanufan.

12 A uitauit pual ran fusu, o tina la eue muraw, me sap luin to ren.

13 A ap feri, auownupuku me eu an lefeng, le popun maram, le popun ran an maram, me tran kana mawr sowni fanufan : Noa a suka la uaim, o pi, a, atiau, a puas la uawn fanufan.

14 Aruou an maram, arue me fusu an ran an maram a puas la puun.

15 Iue, Kot a kapas ngani Noa, apasa,

16 En fai la sowni uaim, en o trawnimom, nom muan kana o trawnimar et uk.

17 En uai la et uk awt metawt me manau a nom rem, man inisin, man susu o man fetal o man tete fail me inisiu me ken tete fail uan fanufan ; pue ir ra pue aupua to trapur uawn fanufan, o nutra la.

18 Noa ap fai sowni, o naun muan kana o trawniman, o trawniman naun koe fitei i :

19 Sawkun man fetal, o man tete fail o man susu, me inisin ra fai sowni uaim.

20 Noa ap apawsa ta eu rong ngani Jioua ; a ap angai man fetal aniafitr me inisin, o man susu aniafitr me inisin, keni asawr uawn eue rong.

21 O Jiona a tini awt a pokus; o Jiona a apasa leluk an, Ngang I sap epue pual anumamaua fanufan powkitan aramas; pue rekirekin leluk an aramas, me ingau sowni an menikol; ngang I sap epue pual ni awt metawt me manau oson trek ngang a feri.

22 Lupuan fanufan epue nonom, a sap epue uk tu fetoka tu o fasoun kini, afou o puitikar, ras o feng, ran o puin.

## SOPON 9.

**I**UE Kot a afaiatru Noa o naun muan koe, o kapas ngani ir, Au pue aupua to, o nutra la, o trawna la fanufan.

2 Man fetal inisin, o man susu inisin, o me inisin me mowkitikit uawn fanufan, o ik inisin leset, ra pue masak ami o nuokus ami; ngang likit ngani ir inisin le paumi.

3 Awt metawt mowkitikit inisin me manau a pue an ami mownga; oson ira araurau ngang I ngani ami me inisin.

4 A fituk etei tran me ken manau an, au te mownga.

5 A atiau ngang epue kitta luinin tran an ami manau; ngang epue kitta luinin ren man kana, o ren aramas kana; ren puin aramas aman, ngang epue kitta luinin an tran.

6 Aman me ken ni la aramas, aramas ra pue ni la i; pue Kot a feria aramas ununun trek I.

7 A ami au pue aupua to, o nutra la; au pue naunau me trawmowng fanufan, o nutra la uawn.

8 Kot ap kapas ngani Noa, o naun muan kana etei i, apasa,

9 Atiau ngang I pue anuka tu ai puon re ami, o ren naumi murimur murin ami;

10 O ren man manau me inisin me nom ren ami, man susu kana, o man fetal kana, o man mawtro kana etei ami; me inisin me ken to sowni lawn uaim, o man an fanufan me inisin.

11 Ngang I ken anuka tu ai puon re ami; fituk



inisin a sap epue ukifi sowni ren nawter; a sap epue pual nawter a pue ata la fanufan.

12 O Kot a apasa, Iei asinan puon me ngang ngani lefinan ngang me ami o man manau me inisin me nom re ami, tawra tu pilawn aramas failfail la trek;

13 Ngang isa ta ai resim uawn kutru, a epue asinan eu puon lefinan ngang o fanufan.

14 O epue feru lupuan ngang tina to kutru uawn fanufan, o resim epue puepue lawn kutru;

15 O ngang epue tremani ai puon, me lefinan ngang o ami o man manau sawkun inisin; o tran kana sap epue pual nawter pue ata la fituk inisin.

16 Eue resim epue nom lawn kutru; ngang I epue na ngani i o epue tremani puon a se uk tu lefuan Kot o fituk inisin me manau me nom uawn fanufan.

17 Kot a kapas ngani Noa, Iei asinan puon me ngang anuka tu lefinan ngang o fituk inisin me nom uawn fanufan.

18 Naun Noa me fai la sowni uaim, Sem o Am o Jefet; Am me saman Kenan.

19 Ikei naun Noa, uluman; o sowni ir fanufan me inisin a trawna la.

20 Iue, Noa a popua ta angang an trawn awtawt, o a ken fetoka tu malan krep.

21 O a un uain an, o putr la; a ken sele la le iman.

22 Am, Saman Kenan, a ueri sam an a sele la, o arani puin ruoman me nom lukin.

23 Sem o Jefet ra angai eu mangaku, isa ta uawn afarar, o limaramar sakirir, pualuo la sam ar an sele la; mas ar selei sowni, o ra sap na ngani samar an sele la.

24 Noa a ne la sowni an uain o silei manu naun meakis a feru ngani i.

25 O a apasa, Me anumamau Kenan; a epue trawnang an trawnang kana ngani puin kana.

26 A pual apasa, Me faiatr Jioua Kot an Sem; o Kenan epue naun trawnang.

27 Kot epue afis ta Jefet, o a epue nonom lawn iman Sem kana; o Kenan epue naun trawnang.

28 Manau an Noa murin nawter lefeng ulupuku lime.

29 Manau an Noa me inisin me lefeng tuoupuku lime : a puap me la.

SOPON 10.

**I** KEI faws an murimur an naun Noa, Sem, Am, o Jefet : ir me nauna ta atamuan murin nawter.

2 Naun Jefet kana ; Komer, Makok, Matai, Jafan, Tufal, Mejek, o Tiras.

3 O naun Komer kana ; Askenas, Rifat, o Tokarma.

4 O naun Jafan kana ; Elisa, Tarsis, Kitim, o Totanim.

5 Ekoe ra aimu feseni fanu an Jentail kana arawn set, oson ar kapas o ar puipui kana o ar ainang kana.

6 O naun Am kana ; Kus, Misreim, Fut, o Kenan.

7 O naun Kus kana ; Sepa, Afla, Sapta, Rama, o Saptaka : o naun Rama, Sepa o Tetan.

8 O Kus a nauna ta Nimrot : i a popun muan puara uawn fanufan.

9 I me trawn kitta man mawtro, fan masan Jioua ; ie mi ni ra ken apasa, Oson trek Nimrot, trawn kitta man mawtro fan masan Jioua.

10 Popun meun me Pepel, Irek o Akat o Kalna lawn fanu an Sainar.

11 A pual fai sowni eue fanu uawn fanu an Asiria, o a aua ta Ninefa, o al an eue telinim kana, o Kala,

12 O Resen lefin an Ninefa me Kala ; eue a ken telinim trapur.

13 Misreim a nauna ta Lutim, Anamim, Leapim, o Naftuim,

14 O Patrusim, Kasluim, (me nauna ta Filistim,) o Kaftorim.

15 Kenan a nauna ta Saiton moan naun, o Et,

16 O Sepusi, Amor, o Kirkas,

17 O Ini, Arki, o Sini,

18 O Arfati, Semari, o Amati : ainang an Kenan kana ra ken fail feseng murin.

19 Kianin an re Kenan kana me sowni Saiton lupuan

om fai la Kerar, tawrei Kesa, o lupuan om fai la Sotom o Komora o Atma o Sepoim, pual tawrei Lasa.

20 Ekoe me naun Am kana lawn ar traw kana, ar kapas kana, fanu ar kana, o ar ainang kana.

21 Pual Sem, puin Jefet alap, sam an ainang an Iper me inisin, a pual naunau.

22 Naun Sem kana; Ilam, Ajur, Arfaksat, Lut, o Eram.

23 O naun Eram; Us, Ul, Keter, o Mas.

24 Arfaksat a nauna ta Sala; Sala nauna ta Iper.

25 Iper a nauna ta muan ruoman; it an aman Pilek; pue lawn manau an fanufan me inet feseni; o it an puin Joktan.

26 Joktan nauna ta Almotat, Selef, Asarmafet, o Jira,

27 O Atoram, Ujal, o Tikla,

28 O Opal, Apimeil, o Sepa,

29 O Ofer, Afla, o Jopap; ekoe me inisin me naun Joktan.

30 O fanu ar me peiki lan Mesa, a fai la tawrei Sefar eu trukatruk ta masanran.

31 Ekoe naun Sem kana lawn ar traw kana, ar kapas kana, uawn fanu ar kana, lawn ar ainang kana.

32 Ekoe ainang an naun Noa kana, lawn pilawn ar, lawn ar ainang kana: ir me inet feseni fanufan kana ngani ar ainang kana murin eue nawter.

### SOPON 11.

**F**ANUFAN me inisin aua eu o kapas eu.

2 Iue a feri, lupuan ar su sowni masanran, ra ueri eu fanapei lawn fanu an Sainar; o ra nonom trek ie.

3 Ir ra kapas fengen le ir, Au et to, sa pue feria ta fauum, umeni ir trapur. Ar fau kana me fauum, o ar puetr me pitumen.

4 O ir ra apasa, Au et to, sa pue aua ta am telinim, o im towkia, me unungan epue tawrei lang; sa pue feri pue sa pue fau la ren, pue sa te fail feseng uawn fanufan me inisin.

5 Iue, Jioua a fai tu nana ngani eue telinim o im towkia me aramas aua ta.

6 O Jioua a apasa, Atiau aramas kana eu trek ainang, o ar kapas eu trek; a iei popun ar fefer; o a sor awt metawt me sap epue fis ta ren fefer me ir lamana ta.

7 Au et to, sa pue fai tu, auil feseni ar kapas, pue aman epue sisilei an aman kapas.

8 O Jioua a mina feseni ir, sowni ene fanu, uawn fanufan me inisiu; ra ap uk tu sowni ar ana ta eue telinim.

9 Ie mi ni ra aitan ngani eue pinim Pepel; pue Jioua auili feseni kapas an fanufan me inisin: o sowni eue fanu, Jioua a mina feseni uawn fanufan me inisin.

10 Ikei faws an murimur an Sem kana; manau an Sem lefeng apuku, o a nauna ta Arfaksat lefeng ruo murin nawter:

11 O Sem a manau murin a naunau Arfaksat lefeng limou puku, pual naunau atamuan o atafefin.

12 Manau an Arfaksat lefeng ilik me limou o a nauna ta Sala:

13 Manau an Arfaksat murin an nauna ta Sala lefeng fapuku uluat; o a ken nauna ta kana atamuan o atafefin.

14 Manau an Sala lefeng ilik, o a nauna ta Iper:

15 Manau an Sala murin an nauna ta Iper lefeng fapuku uluat; o a ken nauna ta kana atamuan a atafefin.

16 Manau an Iper lefeng ilik me ruanu, o a nauna ta Pilek:

17 Manau an Iper murin an nauna ta Pilek lefeng fapuku ilik; o a ken nauna ta kana atamuan o atafefin.

18 Manau an Pilek lefeng ilik, o a nauna ta Reu:

19 Manau an Pilek murin an nauna ta Reu lefeng ruonpuku tuou; o a ken nauna ta kana atamuan o atafefin.

20 Manau an Reu lefeng ilik me ruon, o a nauna ta Seruk:

21 Manau an Reu murin an nauna ta Seruk lefeng

ruoupuku fusu ; o a ken nauna ta kana atamuan o atafefin.

22 Manau an Seruk lefeng ilik, o a nauna ta Neor ;

23 Manau an Seruk murin an nauna ta Neor lefeng ruoupuku ; o a ken nauna ta kana atamuan o atafefin.

24 Manau an Neor lefeng rue me tuou, o a nauna ta Tira :

25 Manau an Neor murin an nauna ta Tira me lefeng apuku engawl me tuou ; o a ken nauna ta kana atamuan o atafefin.

26 Manau an Tira lefeng fik, o a nauna ta Epram, Neor, o Aran.

27 Ikei faws an murimur an Tira ; Tira nauna ta Epram, Neor, o Aran ; Aran a nauna ta Lot.

28 Aran a me la mown sam an Tira, le popun fanu an, Ur, eu sopan fanu an re Kaltia.

29 Epram o Neor ra apupuilu ; it an puiluan Epram Serai ; o it an puiluan Neor Milka, naun Aran, sam an Milka, o sam an Iska.

30 A Serai me rit, sor naun menkol.

31 Tira ap angai naun muan Epram, o Lot naun naun muan Aran, o Serai puiluan naun muan Epram ; ir ra fai la etei ir sowni Ur an re Kaltia, ra pue fai la uawn fanu an Kenan ; ra et to Aran o nonom trek ie.

32 Manau an Tira lefeng ruopuku limou : Tira ap me la uawn Aran.

### SOPON 12.

**J**IOUA a kapas ngani Epram, En fai sowni fanu om, o sowni puim kana, o sowni ainang an sam om, fai la uawn eu fanu ngang epue apuawra ngan uk :

2 O ngang epue feria ta sowni uk eu ainang lapalap, o ngang epue afaiatru en, o it om epue fau la ; o en ko pue faiatr :

3 Ngang I epue afaiatru ir me ken afaiatru en, o anumamaua ir me ken anumamaua en ; o puipui an fanu me inisin ra pue faiatr rem.

4 Iue, Epram a su, onon Kot a kapas ngani i ; o Lot

a etei i: manatu an Epram lefeng fik me limou lupuan a su sowni Aran.

5 O Epram a angai Serai trawniman, o Lot naun puin, o peirak insin ra peirakini, o aramas inisin ra nauna la uawn Aran; o ra su, ra pue fai la uawn fanu an Kenan; o ra et to uawn fanu an Kenan.

6 Epram a fai la uawn eue fanu tawrei telinim an Jekem, arawn ira ok an More. Kana murimur an Kenan ra nonom trek uawn eue fanu.

7 Jioua pue to ren Epram, o a apasa, Fanu ei ngang epue ngani murimur kana: a ken apawsa ta ie et rong an Jioua, me pue to ren.

8 Iue, a su sowni ie, fai uawn eu trukatrukta masanran an Petel, o aua ta an im unangaku, Petel a nom apinan o Eai masauran an: a puap apawsa ta eu rawug an Jioua ie, o iawtok ngani Jioua.

9 Epram pual asauel, fai la pali owr.

10 O a maileng ta uawn eue fanu: Epram a fai la uawn Ijip, a pue siamu ie; pue eue fanu a maileng trapur.

11 A me feri lupuan a arep ngani Ijip, a ken kapas ngani Serai trawniman, Atiau, ngang I silei me en liowtr;

12 Ie mi ni epue feri, lupuan re Ijip ra na ngani en ra pue apasa, Iei trawniman; o ra epue ni la ngang, a ra epue amanaua en.

13 Ko pue apasa me en mowngai ai; pue ngang epue faiatr powkitan en; o ngang epue manau powkitan en.

14 O a feri, lupuan Epram a et to uawn Ijip, re Ijip na ngani eue fefin me liowtr trapur.

15 Naun Ferao samol ra pual na ngani i, o mareiti i ren Ferao: o ra angai eue fefin, ua la lawn in an Ferao.

16 O a ken kisasou ngani Epram powkitan i: me uor naun sip, o kap, o as niamuan, o trawnatgang muan; o trawnatgang fefin, o as niafepin, o kamel.

17 Jioua a tina to somau trapur uawn Ferao o naun kana powkitan Serai trawniman Epram.

18 Ferao a kera to Epram, o apasa, Meita ei en feri ngani iei ? puemeta en sap kapas ngani iei me li enan a ken trawnimom ?

19 Puemeta en kapas ngani iei, A ken mowngai ai ? o ngang i angai i -ren trawnimai; en na ngani trawnimom, angai i, ko pue le la.

20 O Ferao a kapas ngani naun kana oson Epram: ir ap tina la i, o trawniman, o peirak an me inisin.

### SOPON 13.

**E**PRAM su sowni Ijip, i o trawniman, o naun peirak me inisin, o Lot etei i, o fai la pali owr an Kenan.

2 Epram me pisekasek trapur ren man, o silfer, o kol.

3 A ken siamu tawrei Petel, ekis me naun im mangaku nom uawn lom, lefnan Petel me Eai ;

4 Ekis me rong a ken apawsa ta lom a nonom ie: Epram a puap fel ngani Jioua ie.

5 O pual Lot, me etei Epram, me uor naun muit an kau o sip, o kana im mangaku.

6 Eue fanu a sa tuft re ir, pue ra pue nonom trek fengen: pue ar pisek me tramowng; ie mi ni ra soto ngani nonom trek fengen.

7 Trawnmas an naun Epram man kana o trawnmas an naun Lot man kana ra ken flu fengen. Kana murimur an Kenan o aingan an Peris ra nonom trek uawn eue fanu.

8 Iue Epram a kapas ngani Lot, ngang tungor rem, kitr sa te flu fengen, ngang me en, o nai trawnmas o nom trawnmas; pue pulpui kitr.

9 A sap fanu me inisin a nom mom ? ngang tungor rem en ko pue aimn sowni iei: are en ko pue fai la pali-ifefn, ngang epue fai la pali-imuan; are en ko pue fai la pali-imuan, ngang epue fai la pali-ifefn.

10 Lot ap satre ta, nana ngani fauapei an Jortan me inisin, me trawmong trek tran pupu an ekis inisin; mown Jioua ata la Sotom o Komora, oson trek malemal an Jioua, oson trek fanu an Ijip unukin Soar.

11 O Lot a fila ta fanapei an Jortan me inisin; o Lot fai la masanran; ir ra fail feseng aman sowni aman.

12 Epram nonom trek uawn fanu an Kenan, o Lot a nonom trek lawn kana telinim an eue fanapei, o aua ta naun im mangaku unukin Sotom.

13 A re Sotom me tipis, me ingau trapur ren Jioua.

14 Jioua a kapas ngani Epram murin Lot a fai sowni i, Ko pue satre ta, nana ngani sowni ekis en nonom uawn, nana ngani afowng, o owr, masanran, o apinan:

15 Pue fanu inisin en ueri ngang epue ngan uk, o murimur om, failfail la trek.

16 O ngang epue feria ta murimurom oson trek puun moramor an fanufan; are aman a to ngani aleani puun moramor an fanufan, murimurom a puap epue to ngani aleani.

17 Ko pue uta, fail fetal uawn aleilain fan ei, o trelap an; pue ngang epue kisan ngan uk.

18 Iue Epram a ua la an im mangaku, fai la nonom trek lein kana ira ok, me uawn Ipron; o a apawsa ta rawngan Kot ie.

#### SOPON 14.

**I**UE, a feri lawn manau an Amrafel samol an Sainar, Ariok samol an Elasar, Ketarleomer samol an Ilam, o Taital samol an ainang kana;

2 Me ir maun ngani Pera samol an Sotom, o Powrja samol an Komora, Jainap samol an Atifa, Jemper samol an Sepoim, o samol an Pela me pual it an Soar.

3 Ir inisin maun fengen lawn lemawlun Sitim, me set an sawlt.

4 Lefeng engawl me ruo ra samoluni Ketarleomer, engawl me uluat an lefeng ra tripuong.

5 Engawl me ruanu an lefeng Ketarleomer o trianan samol kana, ra fai to, puaratro Refeim kana lawn Asterot Karneim, o Susim kana lawn Am, o Imim kana lawn fanapei an Kirieteim;



6 O Awrait kana lawn ar trukatruk Siir tawrei El-Peran, me unukin fanu pen.

7 Ir ap luin to, fai la uawn Enmijpat, me pual it an Ketes, o ra puaratro fanu an re Amalek inisin, o pual re Amor kana, me nonom lawn Hasasin Tamar.

8 Samol an Sotom, o samol an Komora, o samol an Atma, o samol an Sepoim, o samol an Pela (me pual itan Soar;) ir ap maun lawn lemawlun Sitim;

9 Ra maun ngani Ketarleomer samol an Ilam, o Taital samol an ainang kana, o Amrefel samol an Sainar, o Ariok samol an Elasar; samol faman ra maun ngani samol liman.

10 Lemawlun Sitim me uor trawmong puang an pitumen; samol an Sotom o Komora ra su sowni, kok tu ie; kana me lusun ra su la uawn trukatrukta.

11 Ir ra angai pisek an Sotom o Komora me inisin, o ar mownga kana, rap le la.

12 O ra angai Lot, naun puin Epram, me nonom trek Sotom, o naun pisek kana, rap le la.

13 Aman me ngas la a fai to arani Epram eue Ipru; pue a nonom trek lein kana ira ok an Mamer an Amor, me puin Eskol, o puin Aner; ir ra ken feri puon ren Epram.

14 Epram a rong me puin a liape la, o a moana la naun trawn angang mireit, me up tu le im an, ulupuka engawl me ualouman, o a tapue la tawrei Tan.

15 O a aimu ngani ekawt muit naun trawn angang koe, le pung, o aua ta ir, tapue ir la tawrei Opa me pali-ifein an Tamaskos.

16 Iue a luin to, na to pisek me inisin, o pual puin, Lot, o naun pisek kana, o pual fefin kana, o aramas kana.

17 Samol an Sotom a fai la a pue truri i lemawlun Jafa, lemawlun samol, lupuan a luin to sowni an puaratro Ketarleomer, o trianan samol kana.

18 Melkisetek samol an Seilem, prist an Kot lapalap, a na to pret o uain.

19 A ken afaiatru i, o apasa, En me faiatr, Epram, ren Kot lapalap, me naun lang o fanufan:

20 O faiatr ngani Kot lapalap, me ngani kana ra aput en le pom. O a ngani i engawl an peirak inisin.

21 Samol an Sotom a kapas ngani Epram, Ko pue ngan iei aramas kana, o angai ngani pusin en pisek kana.

22 Epram a kapas ngani samol an Sotom, ngang I uta pai ngani Jioua Kot lapalap, me naun lang o fanufan,

23 Ngang I sap epue angai kisakis tret are sal an sut, sowni nom me inisin pue en te apasa, Epram me pisekasek ren ai pisek;

24 A ie trek me at kana ra momonga o uis an trianai kana, Aner, Eskol, o Mamer; ir ra pue angai uisar.

## SOPON 15.

**M**MURIN fefer kei kapas an Jioua fai to ren Epram lawn an tan, apasa, O te masak, Epram, pue ngang me nom silt o om lunin me trapur.

2 O Epram a apasa, Samol Jioua, meita en ko pue ngani: iei, pue sor nai at, o samol an nai kana, me Eliesar an Tamaskos?

3 Epram pual apasa, Atiau en sap anaunau ngang; o aman a up tu lein nai kana a pue souani murin ngang.

4 Iue, kapas an Jioua a fai to ren, apasa, At enan a sap epue souani murom; pue aman me en ko pue pusin nauna ta, i epue souani murom.

5 O a amoana la i lukin, o apasa, En satre ta lang, o itetriki fu kana, are en to ngani aleani ir: a ap kapas ngani i, Kana murimurom epue oson trek.

6 O a ken enleta ta Jioua, o i rekireki me an tupuel.

7 I a kapas ngani i, Ngang I Jioua me ua to en sowni Ur an re Kaltia, pue ngang pue ngani en fanu ei a pue nom.

8 O i a apasa, Jioua Kot, ren meita U pue silei me a epue nai?

9 O a ken kapas ngani i, En angai ngani iei kau niafehin me manan an lefeng uluat, o kout niafehin

me manau an lefeng uluat, o sip niamnan me manau an lefeng uluat, o towf aman o apan an muraw.

10 Iue, a angai kei me inisin, ukifi feseni, o isa tu epeik a paluan ngani epeik: a man su koe a sap ukifi feseni.

11 Man susu ra puap fai tu uawn ekoe fituk; Epram a tapue sowni.

12 Lekuniol Epram a maur trou trapur; o a masak, a rotokitrapur lelukan.

13 Kot a kapas ngani Epram, Ko pue silei enlet me murimurom ra pue trawniamu uawn eu fanu me sap naur, o ra pue naur trawnangang; o ir ra pue angang o riafau lefeng fapuku;

14 O pual eue ainang ra pue angang ngani, ngang epue enleta ta ir: o murin ra pue su sowni etei peirak trapur.

15 A en ko pue kinamue fai la ren sam om kana; en ko pue paiasani lupuan om atamuk trapur.

16 Aruanuan pilawn murimurom ra pue luin sefal to; pue a se uas tipis an re Amor kana.

17 Iue a feri, akar a puap tup tu, o a puini ti, ekei a atuata ta, o lamp a punapun, ra ken fai la lefin an epeik koe.

18 Lawn eue ran trek, Kot a ken puon ngani Epram, apasa, Ngang I kisan ngani murimurom kana fan ei, sowni tran pupu an Ijip tawrei eue tran pupu Iufretis:

19 Re Keni, o Kenisi, o Katmon,

20 Re Iti, o Perisi, o Refeim,

21 Re Amori, o Kenani, o Kirkasi, o Jepusi.

### SOPON 16.

**S**ERAI trawniman Epram a sap naunau: me uor naun trawnangang, finen Ijip aman, it an Ekar.

2 Serai kapas ngani Epram, Atiau, Kot a amatru sowni iei naunau: ngang tungorai rem o pue apu-puiluani nai nengin; are ngang sap epue puanua ta ren. Epram a auséling alon trawniman.

3 Murin Epram a nonem trek uawn Kenan lefeng

engaw1, Serai, trawniman, a angai naun nengin Ekar, finen Ijip aman, o a ngani Epram trawniman a pue apupuiluani i.

4 O i apupuilu Ekar, o a puopuo: i a ueri an puopuo a ken turunufasi Serai.

5 O Serai a kapas ngani Epram, Uk om ai riafau: ngang ngan uk nai nengin puiluom; a puap ueri an puopuo a ken turunufas iei; Jioua pue enleta ta lefin om me ngang.

6 O Epram a kapas ngani Serai, Atiau, nom nengin a nonom trek le paum; en ko pue feri ngani i me ni ko afitr. Serai a puap pitrakil ngani li enan o a su sowni.

7 Eue trawnlang an Jioua a ueri i unukin tran puowti ta lawn fanu pen, tran me nom unukin al me ala la Sur.

8 O a apasa, Ekar, naun Serai nengin, ko et to me ia? ko pue fai la ia? A ken apasa, Ngang su sowni in ai Serai.

9 Eue trawnlang an Jioua a kapas ngani i, Ko pue luin ue ren in om, o auseling alon.

10 Iue, eue trawnlang an Jioua a kapas ngani i, Ngang epue anutra la murimurom trapur, a sap epue tufit ra pue aleani, pue me trawmowng.

11 Eue trawnlang an Jioua a pual kapas ngani i, Atiau, en me puopuo, en epue naunau atamuan, ko pue ngani it an Ismael; pue Jioua a auseling om riafau.

12 A epue muan mawtro; a epue puara ngani aramas inisin, o aramas inisin puara ngani i; o a epue nonom trek fan masan puin me inisin.

13 A ken ngani it an Jioua me ken kapas ren, En Kot nana ngani ngang; o ikei trek ngang I na ngani i mi ken na ngani ngang.

14 Ie mi ni eue tran me it an Pirlaairoi: a nonom lefin an Ketes me Peret.

15 Ekar a naunau ngani Epram atamuan aman: Epram a ngani it an naun muan me Ekar a nauna ta Ismael.

16 Manau an Epram lefeng ualik me uownou lupuan Ekar a nauuau Ismael ngani Epram.

## SOPON 17.

**F**ANSOUN manau an Epram lefeng tue me tuou Jioua a pue to ren, kapas ngani i, Ngang Kot Lapalap; en amatru ai kapas, tipe eu trek.

2 Ngang I epue feria ta ai puon lefinan ngang o en, o ngang epue anutra la en trapur.

3 Epram a trape tu uawn mas an: Kot a kakapas ren, apasa,

4 Oson ngang, atiau, I a puon ngan uk, o en ko pue sam an ainang trawmowng.

5 It om a sap epue Epram, pue it om epue Epream; pue ngang a feria ta uk sam an ainang trawmowng.

6 Ngang epue aupua to en trapur; ko pue nauna ta kana ainang, o pual nauna ta kana king.

7 O ngang I epue anuka tu ai puon lefinan ngang o en o murimurom kana lawn pilawn ar, puon a se uk tu, pue ngang epue nom Kot, o Kot an murimurom kana.

8 O ngang epue kisan ugan uk, o murimurom kana, fan ei me en siamu uawn, fanu an Kenan me inisin, a pue naur failfail la trek; o ngang I epue naur Kot.

9 Kot a pual kapas ngani Epream, O en ko pue amatru ai puon, o murimurom kana lawn pilawn ar.

10 Iei asinan ai puon me au pue amatru, lefin an ngang o en, o murimurom kana; Atamuan inisin le ami ra pue sirkomsais.

11 Au pue sirkomsaisi uawn fituk an mo ami; a epue asinan puon lefin an ngang o en.

12 A up tu ran ualou au pue sirkomsaisi atamuan me inisin le ami failfail la trek, kana me up tu lawn in ami o kana me ami epue luini to sowni re uawu, me sap murimur ani.

13 Me up tu le in om, i o me nom moni luini to ra pue sirkomsais: asinan ai puon epue nom lawn fituk ami, puon a sa uk tu.

14 Atamuan a sap sirkomsais, me fituk an mown a sap sirkomsais, i a epue ukufi sowni ren puin kana; a ken ata la ai puon.

15 O Kot a kapas ngani Epream, Oson Serai, tranim om, en sap aitan ngani Serai, pue it an epue Sera.

16 O ngang epue afaiatru i, o ngani en atamuan aman sowui i; ngang epue afaiatru i, o a epue inan kana ainang; king an aramas kana epue popu sowni i.

17 Iue, Epream a trape tu uawn masan, o a kekel, o apasa lelukan, At epue naunau ngani i me manau an lefeng apuku? O Sera, me manau an lefeng tue a pue naunau?

18 Epream a kapas ngani Kot, ngang pue afitr Ismael a pue tren rem.

19 O Kot a apasa, Sera, trawnimom a epue atiau naunau ngan uk aman atamuan; ko pue ngani it an Aisak: ngang epue anuka tu ai puon a se uk tu ren o murimur an kana.

20 O ngang I rong uk oson Ismael: atiau ngang epue afaiatru i, o aup ngani i, o aupua to i trapur; o i a epue nauna ta samol engawl me ruoman, o ngang epue feria ta i ainang eu me trapur.

21 A ai puon ngang epue anuka tu ren Aisak, me Sera a epue naunau ngan uk fansoun ei trek lawn eu lefeng.

22 A uk tu sowni an kapas ren, Kot a fai ta sowni ren Epream.

23 Iue, Epream a angai naun atamuan Ismael, o me inisin me naunau le iman, o me inisin me an moni luini to, muan inisin lein naun Epream kana; o a sirkomsaisi fituk an moar ran ue trek, oson Kot a ken kapas ngani i.

24 Manau an Epream lefeng tue me tuou lupuan a ken sirkomsais.

25 O Ismael, naun, me lefeng engawl me uluat lupuan a ken sirkomsais.

26 Epream me naun Ismael ra sirkomsais lawn eu trek ran.

27 O naun Epream muan me inisin, me poputan

naun, o me luini to sowni re uawn, ra ken sirkomsais etei i.

## SOPON 18.

**J**IIOUA a pue to ren Epream lein kana ok an Mamer: a mamawt le asam an naun im mangaku leawlauas;

2 I a satre ta, nana ngani, a, atiau, uluman muan ra u ta arep: a puap na ngani ir a ken trekai sowni asaman im mangaku, o trape tu,

3 O apasa, Maing, are ngang ueri ai tren rem, en sap fai la sowni nom trawnangang:

4 Sa pue ua to tran, pue au pue tutu pitr ami, o ami au pue asese fan enan ira:

5 Ngang epue ua to ekis pret, o ami au pue apitrikila, ta leluk ami; a murin au pue le la: pue ie me ni ami fai to ren naumi trawuangang. O ra apasa, En feria ta oson om kapas.

6 Epream a failakai le im ren Sera, o apasa, Ko pue muitir puakini uluat sepei an flaur etipuar, ana, o umeni uawn ekei.

7 Epream a failakai ren kana kau, o ua to apanan kau me aumanau, ngani alual aman, me ken muitir amowla ta i.

8 A pual angai powter, o milk, o apanan kau me amowla ta o isa tu moir; o a u ta arawn ir fan eue ira, o ra ken momownga.

9 Iue, ra kapas ngani i, Ia puiluom Sera? I a apasa, Lawn enan im.

10 O a apasa, Enlet ngang epue luin to rem a puap tawrei fansoun, o, atiau, puiluom Sera epue naunau atamuan. Sera a nom lawn asaman im murin i, o a rong.

11 Epream me Sera ra muk la, o a uk tu ren Sera somau an fefin.

12 Ie me ni Sera a kekei leluk an, apasa, ngang epue puapua lupuan ai niamuk, o puiluai a pual atamuk?

13 Jioua a kapas ngani Epream, Puemeta Sera kekei, apasa, Enlet ngang niamuk aman, epue naunau?

14 Awt metawt a se tufit ren Kot ? Ngang epue lwin to rem lawn fansoun asine ta, a puap tawrei fansoun, o Sera epue nauna ta atamuan.

15 Sera a anitrou apasa, ngang sap kekei ; pue a ken masak. Eue trawulang a apasa, Ap ; pue en me kekei.

16 Ekoe muan a la, ra pue fai la Sotom ; Epream a etei ir, amoana la ir lawn al.

17 Jioua ap apasa, Ngang pue opaw sowni Epream mini ngang epue feri ?

18 Pue atiau Epream epue feria ta ainang lapalap o mauaman, o ainang an fanufan me inisin ra pue faiatr ren.

19 Pue ngang silei i me a epue nemani naun kana o naun trawnangang kawa murin i, o ra pue amatru al an Jioua, fefer kirakiratr o uenauen ; pue Jioua epue to ngani tina to uawn Epream mini koe a apasa ta oson i.

20 Jioua a apasa, Powkitan mangungu an re Sotom o Komora a ken lapalap, o powkitau ar tipis me trou trapur,

21 Ngang epue fai tu ikanei, pi are ar fefer oson ue trek peraus me ua to rei ; are sor ngang epue silei.

22 Ekoe muan ra sele sowni ra pue fai la Sotom ; a Epream a nonom trek mown Jioua.

23 Epream a arep to, apasa, En ko pue pual ni la me lamalam murinna fitei me lamalam ingau ?

24 Ikanei me lamalam murinna lime nonom lawn eue telinim ; en ko pue pual ata la telinim, sap amanaua i powkitan me lamalam murinna lime me nom lawn ?

25 A pue toau sowni en fefer oson me, ni la me lamalam murinna etei me lamalam ingau ; o me lamalam murinna kana ra pue oson ue trek me lamalam ingau kana, iei me toau sowni en ; Sap Trawn Enleta ta au fanufan me inisin, I a pue feri me uenauen trek ?

26 Jioua a apasa, Are ngang ueri lime me lamalam murinna lawn eue telinim, ngang epue amanaua me inisin powkitan ir.



27 Epream a paluani apasa, Atiau ngang me puun etrek o fanang, ngang i pusin angai kapas ngani Jioua :

28 Ikanei a sa tawrei lime ren limman ; en ko pue ata la telinim inisin powkitan limman etrek a sa tawrei ren ? Jioua a apasa, Are ngang ueri faik me limman ngang semen epue ata la.

29 A pual kapas ngani Kot, apasa, Ikanei faik etrek epue nonom ie. O a apasa, Ngang sap epue ata la i powkitan faik.

30 O a apasa, Jioua a te sawng rei o ngang epue kapas ; ikanei ilik etrek epue ueri lawn. A ken apasa, Ngang sap epue ata la are ngang ueri ilik ie.

31 Epream a apasa, Atiau, ngang pusin angai ai pue kapas ngani Jioua : Ikanei me rue epue ueri ie. A ken apasa, Ngang a sap ata la i powkitan me rue.

32 A pual apasa, Jioua a te sawng rei, o ngang epue kapas iei etrek ; Ikanei engawl epue ueri ie. O a apasa, ngang sap ata la i powkitan me engawl.

33 Aues an kakapas ren Epream, Jioua a muitir a la ; o Epream a nonom trek uawn lenian.

#### SOPON 19.

**T**RAWNLANG ruoman et tu Sotom lesantik ; Lot a mawt tu le asam an Sotom ; Lot a na ngani ir, o u ta pue truri ir ; o a trape tu le puun ;

2 Iue a apasa, Maing koe, ngang i tungorai remi, au et tu le iman naumi trawnangang ngang, au pue maur ie, o tutu pitr ami, o au pue pue ta le sor ap a la. Ir ra apasa, Ap, pue sa pue maur lawn al.

3 I a ariani ir trapur ; o ra etei i fai lawng lawn iman ; i a feri ngani ir aulau, o umeni pret a sap lefen ; o ir momownga.

4 A mown ar maur, trawn eue telinim, trawn Sotom, atakukun, atamuk, aramas inisin sowni sop inisin :

5 Ir ra kokowri Lot, kapas ngani i, Ia ekoe mtian me et to rem lepuin ei ? uai ir to re am pue sa pue silei ir.

6 Lot a fai la re ir sowni asam, o apunga la asam murin,

7 O a apasa, Ngang tungorai remi, pui, au sap feri ingau trapur ei.

8 Nai nengin me ruoman ra sap silei muan; ngang tungorai remi, ngang pue uai ir to re ami, o ami epue feri ngani ir me ni au pue afitr; a au te feri awt metawt ngani ekoe muan; pue ie me ni ra fai lawng lawn imai ren.

9 Ir ra apasa, En fai la. Ra pual apasa, At enan a fai to a pue siamu re atr, o a feri pusin i samol: sa pue feri ngan uk me ingau a lap sowni mini sa pue feri ngani ir. Ir ra fail ngani at enan, Lot, o arep to ra pue ata la asam.

10 Ekoe muan ra eti la paur atakena to Lot le im re ir, o apunga la asam.

11 O ra atruna la masan kana aramas lukin asaman im, atakukun, atamuk: ir ra tripuang ren ar kitta asam.

12 Iue, ekoe muan ra kapas ngani Lot, Me uor pual nom ikei, atamuan are nengin are trawniman nom? ko pue ua la sowni fanu ei nom me inisin me nom lawn ie telinim:

13 Pue sa pue ata-la fanu ei, pue naur tipis me lapa-lap la fan masan Jioua; o Jioua a tina kitr to sa pue ata la.

14 Iue Lot a fai la, kapas ngani naun muan me apupuilu naun nengin apasa, Au pue ta, fai la sowni fanu ei; pue Jioua epue ata la ei telinim. A an kapas me oson ue trek atunanu ren naun muan koe.

15 A ran la, ekoe trawnlang ra apatraua Lot, apasa, Ka pue ta, angai trawnimom, o nom nengin ruoman me nom kei; pue ko te ni la ren tipis an ei telinim.

16 A ken trek trau, ekoe muan ra angai paun, o paun trawniman, o paun naun nengin ruoman; pue Jioua a ken tongei i; o ra ua la i, isat tu lukin telinim.

17 Iue a feri, ra puap ua la ir lukin, a ken apasa, Ko

pue su ngani mananom ; ko sap ne sefal to ; ko sap uitauit lawn fanapei me inisin ; en su la uawn truka-trukta pue ko te ni la.

18 Lot a kapas ngani ir, A sap ina Maing :

19 Atiau nom trawnangang a ueri an tren me rem, o en me atrapura la om kirakiratr ngani iei, ren om amanaua ngang ; o ngang se tufit epue su la uawn trukatrukta pue me ingau a te souni iei, ngang epue me la :

20 Atiau enan telinim me arep pue ngang epue su la lawn, o me kisakis ; U pue su la ie, (a sap i me kisakis erek ?) o ngang I epue manau.

21 Iue, a kapas ngani Lot, Na ngani, Ngang I afowna en ren pual iei, ngang I sap epue ata la enan telinim me en tungorai.

22 En ko pue muitir su la lawn ; pue ngang so to ngani feri awt metawt ko puap nom lawn. Ie me ni eue pinim itan Soar.

23 Akar a te te uawn fanufan lupuan Lot a fai lawng lawn Soar.

24 Iue, Jioua a amawra tu uawn Sotom o Komora primston o ekei sowni Jioua uawn lang ;

25 Ata la ekoe telinim, o eue fanapei inisin, o trawn ekoe telinim me inisin, o pisek inisin me mare ta uawn fanu.

26 A trawniman a ne sefal, o a uili ngani ur an sawlt.

27 O Epream a fai ta lesor ekis a nonom ren Jioua ie ;

28 I a nana ngani uenauen an Sotom o Komora, o uenauen an eue fanapei me inisin, o a ueri, atiau, atan ekei an fanu a ati ta oson ue trek atan ekei an um trapur.

29 Iue, a feri, lupuan Kot ata la kana telinim an eue fanapei, me Kot a ken tretremani Epreau, o tina Lot sowni letretren ata la, lupuan a ken ata la telinim kana me Lot nonom lawn.

30 Lot a ken fai sowni Soar, o nonom trek uawn trukatrukta, o naun nengin ruoman etei i ; pue a ken

masak nonom trek Soar; a ken nonom trek lawn puang an fau, i o naun nengin ruoman.

31 Iue, ealap a kapas ngani eakis, Samatr a muk la, o a sor muan a pue et to retr oson fefer uawn fanufan me inisin:

32 Kitr sa pue aunu ngani samatr uain, sa puap epue kawm ren, pue sa pue naunau murimur an samatr.

33 Ir ra aunu ngani samar uain lepuin ue trek: ealap a fai lawng kawm ren saman; i a sisilei fansoun a kawm la, o fansoun a pue ta.

34 Iue, a feri soratan me ealap a kapas ngani eakis, Atiau ngang i kawm la lepuin ue ren samatr; sa pue pual aunu ngani uain lepuin ei; en ko puap fai lawng lawn, kawm la ren, pue sa pue naunau murimur an samatr.

35 Ir ra pual aunu ngani samar uain lepuin ue trek; eakis a pue ta, o kawm la ren; i a sisilei fansoun a kawm la o fansoun a pue ta.

36 Ie oson naun Lot nengin me ruoman ra puopuo asile samar.

37 Ealap a nauna ta atamuan, o ngani it an Moap: i me saman ainang an Moap tawrei ikanei.

38 Eakis pual nauna ta atamuan, o ngani it an Penami; i me saman ainang an Amon tawrei ikanei.

## SOPON 20.

**E**PREAM a su sowni ie fai la pali owr, o a nonom lefinan Ketes me Jur, o siamu uawn Kerar.

2 O Epream a apasa oson Sera trawniman, i me mowngai ai: Apimelek, samol an Kerar a tina la, angai Sera.

3 Kot a fai tu ren Apimelek lawn tau lepuin, a kapas ngani i, En muan me la trek, powkitan eue fefin me en angai; pue a uor trawniman.

4 Iue, Apimelek a sap kawm ren: o a apasa, O Kot en ko pue ni la eu ainang me lamalam owtr?

5 At enan a sap kapas ngani iei, Nemin enan mowngai ai? o pual pusin fefin a ken apasa, At enan

me mowngai ai : ren lelukai uenauen o pai limowtr  
ngang I feria ei.

6 Kot a kapas ngani i lawn tan, Euar, ngang silei  
lelukom uenauen etrek; pue ngang pual amatru en  
sowni fefer putak ngani iei : ie me ni ngang amatru  
en sowni atowpa i.

7 Iue ko pue aluin ngani at enan puiluan; pue i  
soufaws aman, o a epue iawtok uawn en, o en epue  
manau : are en ko sap aluina la i, en silei pue ko pue  
enlet me la, o pual nom me inisin.

8 O Apimelek a ken pue ta unimueran, kera to naun  
trawnangang inisin, o arani ir metawt kei me inisin :  
kana muan ra masak trapur.

9 Iue, Apimelek a kera to Epream, kapas ngani i,  
Meita en feri ngani kitr? meita ingau ngang I feri  
ngan uk pue en tina to uawi o nai aramas kana tipis  
lapalap ren? om fefer ngani iei ra sap uenauen.

10 Apimelek a kapas ngani Epream, Meita en ueri  
pue en feria ta metawt ei ren?

11 Iue, Epream a apasa, Powkitan ai owkiowki,  
Enlet trawn ikei ra sap masak Kot, o ra pue ni iei la  
powkitan trawnimai.

12 O enlet a ken mowngai ai, pue naun samai, a sap  
naun inai; ngang I puiluan.

13 O a feri, Kot a ken uai iei la sowni im an samai,  
ngang pue siamu fetal, ngang puap kapas ngani i, Ie  
kirakiratr ko pue feri ngani iei, uawn fanu inisin sa  
pue fai la ie, en ko pue apasa pue ngang mowngai  
om.

14 Iue Apimelek a angai sip, o kau, o trawnangang  
muan, o trawnangang fefin, o a kisan ngani. Epream,  
o aluin ngani i Sera, trawniman.

15 Apimelek a pual apasa, Atiau fanuai a nom  
mom; en ko pue nonom trek ekis en ko pue afitr.

16 A pual kapas ngani Sera, Atiau ngang I ngani  
mowngai om moni silfer engerou; i a epue mangaku  
an pualu la mas om ren me nonom rema me inisin; o  
ren aramas inisin a ken mireit la.

17 Epream a iawtok ngani Kot : Kot a apitrakila ta

Apimelek, o trawniman, o naun trawnangang fefin kana : ir ra naunau.

18 Pue Jioua a ken arita la naun Apimelek fefin kana, powkitan Sera, trawniman Epream.

## SOPON 21.

**J**IOUA a fai to ren Sera oson trek an kapas, o Jioua a ken feri ngani Sera oson trek an puon.

2 Pue Sera a puopuo, o naunau ngani Epream atamuan aman lupuan a muk la, fansoun ue trek me Kot lamène ta, kapas ngani i.

3 Epream a aitan ngani naun atamuan me up ngani i, me Sera naunau ngani i, Aisak.

4 Epream sirkomsalsi naun muan Aisak a up tu ran ualou, oson Kot kapas ngani i.

5 Manau an Epream lefeng apuku lupuan naun atamuan Aisak a up ngani i.

6 Sera a ken apasa, Kot a ken akekei iei, me inisin me ken rong ra pue etei iei kekei.

7 O a apasa, Ia i me pue kapas ngani Epream me Sera epue anpu menkol ? pue ngang I naunau ngani i naun atamuan lupuan an muk la.

8 At enan a lapalap la, o mou ti sowni inan, Epream a puap feria ta aulau trapur ran ue trek me Aisak a mou ti sowni inan.

9 Sera a ueri eue atamuan, naun Ekar, finen Ijip, me a naunau ngani Epream, a ken kekei.

10 Ine, a ken kapas ngani Epream, En kusua la enan fefin trawnangang o naun atamuan : pue naun eue fefin trawnangang a sap epue etei nai atamuan souani murom.

11 Leluk an Epream a trou trapur ren eue kapas, powkitan naun atamuan.

12 Kot a kapas ngani Epream, Ko sap trou leluk om powkitan at enan, o powkitan nom trawnangang fefin ; en ko pue ausing an Sera kapas inisin ; pue Aisak epue feria ta murimurom.

13 O ngang epue pual feria ta eu ainang sowni naun eue trawnangang fefin, powkitan pual i a ken nom.

14 Iue, Epream a pue ta unimueran, angai pret o rume an tran, o ngani Ekar, isa te uawn afarani; pual eue atamuan, a tina la i: i a la, siamu fetal lawn fanu pen an Pirsipa.

15 Aros tran lawn rume, i a likita la eue at fan eu ira kisakis.

16 O a fai la, mawt tu akasengan i, a touau ekis asafitr epue tawrei; pue a ken apasa, Pue ngang te na ngani an atamuan a me la. A mawt tu akasengan i, o a ketru.

17 Kot a auseling mangungu an eue at; trawnlang an Kot a kera ngani Ekar sowni lang, kapas ngani i, Meita en ketru ren Ekar? o te masak; pue Kot a auseling mangungu an at enan ekis a nonom ie.

18 Ko pue pue ta, eki ta eue at, o amatru i le pom; pue ngang epue feria ta ren i ainang trapur.

19 Iue Kot a ane la masan, o a na ngani tran eu; o a fai la alelau tran eue rume, o aunu ngani at enan.

20 Kot a ken etei eue atamuan; o a lapalap la, o nonom trek fanu pen, a ken trawn lekasik asafitr.

21 I a ken nonom trek fanu pen Paran; in an a angai trawniman sowni fanu an Ijip.

22 Iue a feri fansoun ue trek, me Apimelek o Faikol, samol an naun trawnfu, ra kapas ngani Epream, apasa, Kot me et uk ren om fefer me inisin;

23 Ko pue akapel ngani iei ren Kot ikei, me en sap atupu ei, are nai kana, are naun nai kana: en ko pue kirakiratr ngani iei, o fanu ei me en siamu uawn, oson trek ngang I ken kirakiratr ngan uk.

24 Epream a apasa, Ngang epue akapel.

25 Epream a apungu Apimelek ren eu tran me naun Apimelek trawnangang kana ra amatru sowni.

26 O Apimelek apasa, Ngang I sisilei mini me feria ta; en sap kapas ngani iei, ngang sap pual rong, ikanei trek.

27 Epream a angai sip o kau, ngani ir Apimelek; ir ruoman ra puon fengen.

28 Epream a aimu sowni sip kana apan an sip niafehin me fuman.

29 Apimelek kapas ngani Epream, Renmet apan an sip niafeſin me fuman me en aimu sowni ?

30 A ken apasa, Apan an sip niafeſin me fuman kei, en ko pue angai sowni pai pue ra pue asinan rei me ngang I tua ta tran ei.

31 Ie me ni a aitan ngani eue fanu Pirsipa ; pue ir ruoman ra ken akapel.

32 Iei oson ar puon fengen uawn Pirsipa ; Apimelek a u ta, etei Faikol samol an naun trawnſiu kana, o ra luin ue uawn fanu an re Filistia.

33 Epream a fetoka tu ira uawn Pirsipa, o kera ngani itan Jioua, Kot an manau asamutr.

34 Epream a siamu uawn fanu an re Filistia ran nutra.

## SOPON 22.

**I**UE, a feri murin awt kei me Kot a ken sawtuni Epream, kapas ngani i, Epream : o a apasa, Iei ngang.

2 O a apasa, En ko pue angai nom alaman Aisak me en tongei, o fai la uawn fanu an Moraia ; ko puap keni i, asawr eu, uawn eu trukatrakta me ngang kapas ngan uk.

3 Epream a pue ta unimueran, faute naun as, o angai naun alual ruoman etei i, o naun at Aisak, o isa te amutr an keni asawr, su la, fai la uawn ekis me Kot kapas ngani i.

4 Auluan ran Epream a satre ta, ueri ekis ikenan a touau.

5 Epream a kapas ngani naun ekoe alual, Au nonom trek ikei ren as ; ngang o at enan sa pue fai la ikenan, fel, o puap luin to re ami.

6 Epream a angai amutr an keni asawr, isat ta uawn naun, Aisak ; o a angai ekei le paun o sapasap aman ; ir ruoman ra tian fai la.

7 Aisak a kapas ngani Epream, saman, apasa, Samai : o a apasa, Iei ngang, nai. I a apasa, ikei ekei o amutr : a ia apan an sip a pue keni ?

8 Epream a apasa, Nai, Kot epue pusin angai apan



an sip, naun asawron a pue keni; ir ruoman ra tian fai la.

9 Ir ra tawrei eue ekis me Kot arani i; Epream a apawsa ta eu rawng ie, sona ta amutr uawn, o ri Aisak naun, pung ta uawn amutr, uawn eue rawng.

10 Epream a eti ta paun, angai eue sapesap, a pue ni la naun.

11 Trawnlang an Jioua a asawre ngani i sowni lang, apasa, Epream, Epream: o a apasa, Iei ngang.

12 A pual apasa, Ko te pung ta pom uawn at enan, ko sap feri awt metawt ngani i; pue ngang I silei me en masak Kot, pue en sap amatru sowni iei nom at alaman.

13 Epream a satre ta na ngani, o, atiau, murin i aman sip muan mowt lein petuel ren metran: Epream a fai la angai eue sip muan, o a keni i ngani Kot asawron eu, niulli naun.

14 Iue Epream a ngani it an eueia, Jioua epue na ngani; oson ra pual apasa tawrei ikanei, Uawn truk an Jioua a epue na ngani.

15 Trawnlang an Jioua a pual asawre ngani Epream sowni lang,

16 Apasa, Jioua a ken apasa, Ngang I akapel ren pusin ngang, powkitan om feria ta me, sap amatru sowni iei nom at alaman:

17 Ngang epue atiau afaiatru en, o ngang epue atiau atrawmownga la murimurom oson fu kana lang, o oson faunipi: o murimurom kana ra pue puaratro me aput ir kana;

18 O ainang an fanufan me inisin ra pue faiatr ren murimurom; powkitan om auseling aloi.

19 Iue Epream a luin ue ren naun at koe, ir ra su, fai la uawn Pirsipa; Epream a nonom trek Pirsipa.

20 O a feri murin awt kei, ra arani Epream, apasa, Atiau Milka a naunau ngani puim Neor;

21 Us mown naun, Pus puin, o Kemuel saman Eram,

22 Kiset, Aso, Piltas, Sitlaf, o Petuel.

23 Petuel a nauna ta Repeka: kei me ualuman Milka a naunau ngani puim Epream.

24 O aman trawniman, itan Reuma a pual nauna ta Tapa, Kaam, Taas o Maka.

## SOPON 23.

**M**ANAU an Sera lefeng apuku rue me fusu: iei alean lefeng an manau an Sera.

2 Sera a me la uawn Kirsat Arpa, me pual itan Ipron eu sop an Kenan: Epream a et to a pue ketrue ngungu ngani Sera, o ketrue ti i.

3 Epream a u ta sowni i a me la, o a kapas ngani murimur an Et kana, apasa,

4 Ngang I re uawn aman me siamu trek re ami: au ngani iei fanu ai, lenian paias re ami, pue ngang epue irei la trawnimai me me la.

5 Murimur an Et kana ra paluani Epream, kapas ngani i,

6 En ko pue auseling kitr, Maing: en me samol lapalap re atr: en ko pue irei la nom a me la lawn me etipuar an am lenian irei la; semen mo re atr epue amatru sowni en naun lenian irei la, pue ko sap irei la ie nom a me la.

7 Iue Epream a u ta, trape ngani trawn enan fanu, murimur an Et.

8 I a kakapas re ir, apasa, Are iei leluk ami me ngang I epue irei la nai a me la, ami pue auseling aloi, o tungorai ren Efron naun Soar,

9 Pue a pue ngani iei puang an fau an Makpila, me naun, me nom lesopolan fanu an; ren moni, luin etipuar, a pue ngani iei, pue ngang pue angai lenian irei la re ami.

10 Efron a nonom trek ren murimuran Et kana: Efron, aman ainang an Iti, a ken paluani Epream mown murimuran Et kana me inisin me ken fai lawn asam an telinim an, apasa,

11 Ap, Maing, en auseling iei: Ngang kisan ngan uk, ekis enan, o puang me nom lawn, kisang ngan uk; mown pui kana ngang kisan ngan uk: ko pue irei la nom a me la.

12 O Epream a trape ngani re fanu ue.

13 I a kapas ngani Efron mown re fanu ue, apasa, Are ko mowtren, ngang tungorai rem ko pue auseling aloi: ngang epue ngani en moni luinin eue fanu; en angai sowni iei, o ngang epue irei la nai a me la ie.

14 Efron a paluani Epream, kapas ngani i,

15 Maing, en auseling iei: eue fanu a tawrei mown moni silfer fapuku; meita ei lefin an en me ngang? ko pue irei la nom a me la.

16 Epream a auseling Efron; Epream a atroun ngani Efron silfer me a asine ta mown murimuran Et kana, moni silfer fapuku, moni etipuar ren trawnkame.

17 O fanu an Efron, Makpila sopan Mamer, fanu o puang an fau me nom lawn, o ira inisin me nom uawn eue fanu, me nom lawn kianin inisin, ir me anuka tu,

18 Ngani Epream ra pue naun mown murimuran Et kana, mown me inisin me fai lawng asam an telinim an.

19 Iue, murin, Epream a irei la Sera, trawniman lawn puang an fau an Makpila sopan Mamer: me pual it an Ipron, en sopan Kenan.

20 Murimur an Et kana ra anuk ngani Epream eue fanu, pue fanu an, lenian irei la.

#### SOPON 24.

**E**PREAM a muk la trapur: Jioua a afaiatru Epream ren awt metawt me inisin.

2 O Epream a kapas ngani elap an naun trawnngang kana, me nemani naun peirak me inisin, Ngang tungorai rem en ko pue seika lawn paum fan pitrai:

3 O ngang mowtren en ko pue akapel ren Jioua, Kot an lang, o Kot an fanufan, me en sap angai trawniman nai at lein finen Kenan me ngang nonom ren:

4 Pue en ko pue fai la uawn popuian fanuai, ren ai traw kana, angai puiluan nai muan Aisak.

5 Eue trawnngang a kapas ngani i, Ikanei eue fefin epue uet etei iei fai to ikei: ngang I epue pual ua la nom muan uawn eue fanu en fai to me ie?

6 Epream a kapas ngani i, Feratru pue ko sap pual ua la nai at ie.

7 Jioua Kot an lang me ua la ngang sowni iman samai, o sowni fanu an ai ainang, me ken kapas rei, o me ken akapel ngan iei, apasa, ngang epue ngani murimurom kana fanu ei; I epue tina la trawnlang a epue okom mom, o ko epue angai trawniman nai at sowni ie.

8 Are feffin a uet et uk, ko puap epue amusa sowni om akapel ei; a ie trek, ko sap pual ua la nai at ie.

9 Iue, eue trawnngang a seika lawng paun fan pitran naun samol Epream, o akapel ngani i oson awt kei.

10 Eue trawnngang a angai kamel engawl sowni kamel kana an naun samol, o a su; pue peirak an naun samol me inisin me nom le paun; a su, o fai la Mesopotemia, lawn telinim an Neor.

11 A ken afetapuku naun kamel lukin telinim, unukin kaw nuk lesautik, fansoun ekoe feffin trawn ufi kaw nuk, ra ken fai la.

12 O a apasa, O Jioua Kot an ai samol Epream, ngang tungorai rem, en ko pue afis iei ta ikanei, o kirakiratr ngani ai samol Epream.

13 Iue, ngang I u ta unukin kaw nuk; o nengin kana, naun trawn enan telinim, ra fai to ufi kaw nuk:

14 En ko pue feri pue aman nengin me ngang epue kapas ngani, Ati tu nom per pue ngang pue un; a aman me epue apasa, Unimi, o ngang epue pual aunu nom kamel kana: a pue ie trek me en lamene ta a pue trawniman nom trawnngang Aisak; o ren iei ngang epue silei me ko ken kirakiratr ngani ai samol.

15 Iue a feri, mown a uk tu an kapas, atiau, Repeka, naun Petuel, me naun Milka, trawniman Neor, puin Epream, a fai to, per an uawn afaran.

16 Eue nengin masa murinna trapur, me lipit, a samo tup ren muan: a ken fai tu lawn kaw nuk, alelau per, a fai ta.

17 Eue trawnngang a fai la truri i, o apasa, Ngang

tungorai rem ngang pue un ekis kawruk sowni nom per.

18 I a apasa, Un, Maing; o a muitir ati tu naun per uawn paun, o aunu ngani i.

19 Auas an aunu i, a ken apasa, Ngang pue pual ufi kawruk ngani nom kamel kana ra puap met.

20 I a muitir niena lawn naun per lawn sapei an man, o failakai la lawn kawruk a pue ufi, o a ufi ngani naun kamel inisin.

21 Eue muan a ueitifengeni ren, nauenauen la trek, pi are Jioua a puanua ta an fai to, are sor.

22 Iue a feri, auas an kamel kana ar un, eue muan a ken angai lele kol me atroun esop an sekel, o nukum ruou uawn paun, me atroun sekel kol engawl;

23 A pual apasa, Naun ia nengin en? Ngang tungorai rem ko pue kapas ngani iei: iman samom me trapur, sa pue to ngani nonom trek lawn?

24 O a kapas ngani i, Ngang naun Petuel me naun Milka, me a naunau ngani Neor.

25 A pual kapas ngani i, A or re atr fetil puas o flour, o me trapur im, au pue to ngani nonom trek lawn.

26 Eue muan a trape tu, fel ngani Jioua,

27 O a apasa, Ngang mareiti Jioua Kot an ai samol Epream, me sap amatu sowni ai samol naun kirakiratr o milet: oson ngang, Jioua a amoana iei la tawrei iman puin ai samol kana.

28 Eue nengin a fai la, kapas ngani trawn ut an inan kana awt kei.

29 A or mowngai an Repeka, itan Lapan; Lapan a fai la a pue truri eue muan, ren eue kawruk.

30 Iue a feri, a puap na ngani lele, o nukum uawn paun mowngai an, o a puap rong an mowngai an Repeka an kapas, apasa, Ie oson an eue muan kapas ngani iei; i a fai la ren eue muan; a, atiau, a ken nonom ren kamel kana unukin kawruk.

31 A pual apasa, Ko et to lawn, en me ken atrena-tren ren Jioua; puemeta en nonom trek lukin? pue ngang I amowla ta im enan, o lenian kamel kana.

32 Eue muan a et to lawn im : o a uai sowni peirak an kamel kana, o amownga ir, o na to kawruk an talu pitran eue muan o pitran tian an kana.

33 O ra isa tu mownga mown eue muan, a pue ani ; a apasa, Ngang sap momownga ngang puap apasa ta me ni ngang et to ren. A ken apasa, Ko pue apasa ta.

34 O a apasa, Naun Epream trawnangang ngang.

35 Jiona a ken afaiatru trapur ai samol ; i me lapa-lap : I a ngani i muit an sip o kau kana, o silfer, o kol, o trawnangang muan o fefin, kamel kana o as kana.

36 O Sera, puiluan ai samol a naunau atamuan ngani ai samol fansoun a niamuk : ai samol a lifang ngani i naun peirak me inisin.

37 Ai samol a kapas ngani iei ngang pue akapel, apasa, Ko sap angai puiluan nai atamuan sowni nengin an re Keuan kana me fanu ar, ngang nonom trek uawn :

38 Pue ko pue fai la ren traw an samai, o ainangai, o angai puiluan nai atamuan.

39 Iue, ngang kapas ngani ai samol, are eue fefin a sap etei iei ?

40 O a kapas ngani iei, Jioua me nang I aniatrotis, a pue tina la naun trawnlang et uk, o afis ta om fefer ; ko puap epue angai puiluan nai at sowni ainangai, o traw an samai.

41 En ko pue amusa sowni om akapel ngan iei, ko puap fai la ren ainangai, are ra sap ngan uk, ko puap amusa sowni om akapel.

42 Ikanei ngang et tu unukin enan kawruk, o ngang apasa, O Jioua, Kot an ai samol Epream, are en afis ta me ni ngang et to ren ;

43 Nang I nonom unukin kawruk ; o a epue feri lupuan nengin lipit, a et to ufi kawruk, ngang epue kapas ngani i, ngang tungorai rem ko pue aunu ngani iei ekis kawruk sowui om per ;

44 Eue nengin me pue kapas ngani iei, En ko pue un, o ngang epue pual ufi ngani nom kamel kana ; a pue ie trek nengin me Jioua asine ta a pue trawniman naun ai samol.

45 Ngang sap uk tu kapas leluk ai, Repeka a puap fai to naun per uawn afaran; o a fai tu lawn eue kawruk ufi: ngang I kapas ngani i, Ngang tungorai rem en ko pue aunu ngani iei.

46 I a muitir isa tu naun per sowni afaran, o apasa, Un, o ngang epue pual aunu ngani nom kamel kana: ngang unimi o a pual aunu ngani kamel kana.

47 Iue, ngang ais ren, apasa, Naun ia nengin en? A ken apasa, Ngang naun Petuel, naun Neor, me Milka naunau ngani i: ngang I ngani eue lele lawn puawtan, o nukum koe uawn paun.

48 Ngang a trape tu, fel ngani Jioua, o mareiti Jioua, Kot an ai samol Epream me auena to ngang lawn al uenauen, pue ngang epue angai nengin naun puin ai samol, ua la ren naun atamuan.

49 Iue are au pue kirikiratr ngani ai samol au pue kapas ngani iei; are sor au pue kapas ngani iei, pue ngang pue fai la pali-imuani, are pali-ifefini.

50 O Lapan me Petuel ra paluani, apasa, A popu sowni Jioua: sa soto ngani kapas ngan uk awt me ingau are me etipuar.

51 Atiau ie Repeka fan masom, ko pue angai i, fai la, o i epue puiluan naun nom samol, oson alon Jioua.

52 Iue, a feri, naun Epream trawnangang a puap rong ar kapas, a ken fel ngani Jioua, trape tu lepuun.

53 Eue trawnangang a ua to sapei silfer, o sapei kol, o mangaku, kisan ngani ir Repeka: a pual kisan ngan mowngai an o inan peirak me autrei.

54 Ir ra momownga o unimi, i o tian an muan kana: o ra maur ie: ra pue ta lesor, o a apasa, Au pue tina ngang ren ai samol.

55 Mowngai an o inan ra apasa, Nengin enan epue nonom trek re atr ekawt ran, atiau engawl ran; murin a epue su.

56 O a kapas ngani ir, Au te amatru iei, pue Jiona a ken afis ta ai et to; au tina la ngang pue ngang pue luin ue ren ai samol.

57 Ir ra apasa, Sa pue kera to nengin enan, ais ren pusin i.

58 Ir ra asawra to Repeka, kapas ngani i, Ko mowtren etei at enan? A ken apasa, Ngang mowtren etei.

59 O ra tina la Repeka mowngai ar, o naun fefin atumun, o naun Epream trawnangang, o tian an muan koe.

60 Ra afaiatru Repeka, kapas ngani i, Ko pue inan aramas engeron an faunipi kana, o murimurum pue puaratro me aput ir kana.

61 Repeka a u te o naun nengin kana, o ra te te uawn kamel o etei eue muan: eue trawnangang a angai Repeka ap su.

62 Aisak et to sowni al an kaw nuk an Laairoi, pue a nonom trek fanu an owr.

63 Aisak a fai la iawtok lekuniol: o a satre ta, nana ngani, a, atiau ekoe kamel ra fai to.

64 Repeka a satre ta, ueri Aisak, o a te tu sowni uawn kamel.

65 Pue a ais ren eue trawnangang, Ifa at enan me fai to lawn malemal, a epue truri kitr? Eue trawnangang a apasa, Ie nai samol; ie me ni a angai mangaku an pualu la, pualu ngani i.

66 Eue trawnangang a arani Aisak awt metawt inisin a feria ta.

67 Iue, Aisak a ua la i lawn iman inan, Sera, o a angai Repeka, puiluani i; a ken tongei: Aisak a kinamue la murin inan a me la.

#### SOPON 25.

**E**PREAM pual angai aman trawniman, it an Ketura.  
2 A ken naunau ngani i Jimran, Joksan, Metan, Mitian, Ispak, o Jua.

3 Joksan a nauna ta Jipa, o Titan. O naun Titan kana, Asur, Letuf, o Leumi.

4 O naun Mitian kana; Ifa, Ifer, Anok, Apita, o Elta. Ikei inisin me naun Ketura.

5 Epream a ngani naun peirak me inisin Aisak.

6 A naun ekoe trawniman Epream, Epream a kisan ngani ir ekawt pisek o tina la ir sowni naun,



Aisak, uawn fanu an masanran, fansoun manau an Epream.

7 Ikei ran an lefeng an manau an Epream, lefeng apuku fik me limou.

8 Iue Epream a me la; a muk la trapur, atamuk me ur an lefeng kana; i a ua la ren naun ainang kana.

9 Naun, Aisak o Ismael ra irei la i lawn puang an fau an Makpila, fanu an Efron, naun Soar, ainang an Iti, me sop an Mamer;

10 Fanu me Epream amowni sowni murimuran Et kana; Epream a paiasini ie, pual Sera trawniman.

11 Iue, murin Epream a me la, Kot a afaiatru naun, Aisak; Aisak a nonom trek unukin kawruk Laairoi.

12 Ikei kapas an murimuran Ismael kana, i me naun Epream me Ekar, finen Ijip, naun Sera trawnangang, a naunau ngani Epream:

13 Ikei it an naun Ismael kana, ren it ar, oson pilawn ar kana: mown naun Ismael, Nepasot; o Kitar, Atpil, o Mipsam;

14 Misina, Tuma, o Masa;

15 Atar, Tema, Ietur, Nafj o Ketema:

16 Ekoe naun Ismael kana, itar, ren fauu ar kana o ar telinim kana; samol engawl me ruoman lawn ar ainang kana.

17 Ikei lefeng an manau an Ismael, lefeng apuku ilik me fusu. I a me la; i a ua la ren an ainang kana.

18 Ir ra nonom trek lefu an Afla me Jur, me mown Ijip, uawn al me ala ngani Asiria: Ngang a nonom ngani puin inisin.

19 Ikei kapas an Aisak naun Epream: Epream a nauna ta Aisak:

20 Manau an Aisak lefeng faik a puap apupuiluani Repeka naun Petuel, re Siria, uawn Patan Aran; me mowngai an Lapan, re Siria.

21 Iue, Aisak a iawtok ngani Jioua uawn Repeka, puiluan, pue a rit: Jioua a auseling an iawtok, Repeka, puiluan ap puopuo.

22 Menkol koe ra fiu fengen letipan; o a apasa, Are ie oson puemeta rei? I a fai la ais ren Jioua.

23 Jioua a kapas ngani i, Ainang ruo a nom lelukom ; o ruawt aramas epue naunau sowni lelukom ; awt aramas epue puaratro mown awt ; ealap epue angang ngani eakis.

24 A tawrei fansoun a epue naunau, atiau menkol ruoman nom lelukan.

25 Eue lom a up tu a parapar uawn unutkan inisin, a unaunau ; ra ngani itan Isaw.

26 Puin a up tu murin ; o paun amatru pitran Isaw ; ra ngani itan Jekop : manau an Aisak lefeng uowne lupuan a naunau ir.

27 At koe ra fafai ta : Isaw a sileilap lekasik man mawtro, trawn lein petuel aman ; a Jekop muan kira-kiratr, me nonom trek lawn im kana.

28 Aisak afowna Isaw, powkitan a ken mownga fituk an man mawtro : a Repeka afowna Jekop.

29 Jekop a feri aionpot ; Isaw a et to sowni lein petuel, o me apowngapowng :

30 Isaw a kapas ngani Jekop, Ko pue amownga iei enan aionpot a parapar ; pue ngang apowngapowng ; ie me ni a ken itanai Itom.

31 Jekop a apasa, Ko pue amowni ngan iei souani om.

32 Isaw a apasa, Atiau ngang epue me la ; meita ngang epue faiatr ren souani ai ?

33 Jekop a apasa, Ko pue akapel ngani iei ikanei ; o a akapel ngani i : a ken amowni ngani Jekop souani an.

34 Jekop a ngani Isaw pret o aionpot an lentil ; a ken mownga o unimi, o u ta, a la : ie oson Isaw a turunufasi souani an.

### SOPON 26.

**I**UE a leng ta uawn eue fanu, murin maileng an lom lawn ran an Epream. Aisak a ken fai la ren Apimelek, samol an re Filistia uawn Kerar.

2 Jioua a pue to ren, apasa, Ko te fai tu Ijip ; ko pue nonom trek uawn eu fanu ngang epue arani uk :

3 En ko pue nonom trek fanu ei, ngang epue et uk,

o afaiatru en ; pue ngang epue ngani en o murimurom kana fanu kei me inisin, o ngang epue afis ta akapel me ngang akapel ngani samom Epream ;

4 O ngang epue aup ngani murimurom oson fu an lang, o ngang epue ngani murimurom kana kei fanu monison ; o ainang an fanufan me inisin ra pue faiatru ren murimurom ;

5 Powkitan Epream a auseling ai mangungu o amatru ai fanau kana, ai kapas kana, ai amireit kana, o aloi kana.

6 Aisak a nonom trek Kerar.

7 Re Kerar ra aiseni i trawniman ; o a apasa, Mongai ai : pue a ken masak apasa, Trawnimai ; pue, a ken apasa, re fanu ei ra te ni iei powkitan Repeka ; pue masa murinna.

8 Iue, a puap nonom ie fansoun aleilai, Apimelek samol an re Filistia a nana ngani sowni asamawtro, ueri, atiau, Aisak a ken urumawt ren Repeka trawniman.

9 Apimelek a asawra to Aisak, o apasa, Enlet nengin enan trawnimom : ifa oson om apasa, A ken mowngai ai ? Aisak a kapas ngani i, Pue ngang apasa, Pue U te me la ren.

10 O Apimelek a apasa, Melita ei me en feri ngani kitr ? aman aramas a to ngani apupuiluani trawnimom, en puap tina to tipis uawn kitr.

11 Apimelek a fanau naun aramas me inisin, apasa, Aman me pue feri awt metawt ngani at enan are trawniman, a pue me la.

12 Aisak a ken fetoka tu lawn eue fanau ap kini lefeng ue trek fan apuku : Jioua a afaiatru i.

13 At enan a lapalap la, fafai ta, trette la, tawrei a ken lapalap trapur.

14 Pue a naunau muit an sip o kout, o muit an kau, o trawnangang trawmowng : trawn Filistia ra lowluo ngani i.

15 Pue kawruk inisin me naun saman kana tua ta lawn ran an Epream, saman, trawn Filistia pinai ir, masoan ngani puun.

16 Iue Apimelek a kapas ngani Aisak, En ke pue fai sowni kitr, pue en me lapalap trapur mown kitr.

17 Aisak a fai sowni ie, aua ta naun im mangaku lemawlnun Kerar, nonom trek ie.

18 Aisak a tua sefal kana kawruk, me ra tua ta lawn ran an saman, Epream; pue re Filistia pinai ir murin Epream me la: i a ngani itar oson ue trek itar ren saman.

19 Naun Aisak trawnangang kana tua ta lemawlnun, o ueri kawruk a manau.

20 Trawnmas an man, re Kerar ra angingi ngani naun Aisak trawnmas, apasa, Am ei kawruk: i a ngani itan eue kawruk Esek; powkitan ar angingi ngani i.

21 Ra pual tua ta eu kawruk; me ra pual angingi ngani ir ren; i a ngani itan Sitna.

22 Iue a su sowni ie, tua ta pual eu kawruk; ra sap angingi ngani i ren eue; o a ngani itan eue kawruk Riopot; a ken apasa, Pue Jioua a feria ta leniatr, o kitr sa pue aupua tu uawn fanu ei.

23 O a fai sowni ie, fai la Pirsipa.

24 Jioua a pue to ren le puin ue trek, apasa, Ngang Kot an samom Epream: ko te masak, pue ngang I et uk, o afaiatru en, o aup ngani murimurom kana powkitan nai trawnangang Epream.

25 O a apawsa ta eu rawng ie, fel ngani Jioua, o aua ta naun im mangaku ie: naun Aisak trawnangang kana ra tua ta eu kawruk ie.

26 Apimelek a et to ren sowni Kerar, o Aosat, aman puin, o Faikol samol alap an naun trawnfu kana.

27 Aisak a kapas ngani i, Meita ami et to rei ren, pue ami aput ai, o tina la ngang sowni ami?

28 Ir ra apasa, Sa ueri pue enlet Jioua a nonom rem; sa ken apasa, Sa pue akapel lefin atr, lefin an am me en, o sa pue puon rem;

29 Pue en sap feri ingau ngani kitr, oson trek kitr sa sap feri me ingau ngan uk, oson am feri ngan uk me murinna trek, o tina la en kinamue: en me trenatren ren Jioua.

30 O a feri ngani ir aulau, ra ken momownga o unimi.

31 Iue, ra pue ta lesor, o akapel fengen; Aisak a tana la ir, ra su sowni i, ra kinamue.

32 Iue ran ue trek naun Aisak trawnangang ra et to kapas ngani i oson kawruk me ra tua ta, kapas ngani i, Sa ueri kawruk.

33 I a ngani itan Sipa: ie me ni itan eue telinim a ken Pirsipa tawrei ikanei.

34 Iue, Manau an Isaw lefeng faik a puap apu-puiluani Jutit naun Piri ainang an Iti, o Pasimat naun Ilon ainang an Iti:

35 Me leluk an Aisak o Repeka me trou ren.

#### SOPON 27.

**I**UE Aisak a muk la, o masan a top la, a soto ngani ueri; a puap asawra to Isaw mown naun, kapas ngani i, Nai atamuan? I a paluani, Iei ngang.

2 A pual apasa, Atiau, ngang I muk la, ngang sisilei ran an ai me la:

3 Ie me ni ngang tungorai rem ko pue angai om kowtlas o asefitr, fai la lein petuel, angai ai fituk;

4 Ko pue puakini a me anna sawkun ngang I afitr, o ua to rei pue ngang epue momownga; pue nguni pue afaiatru en mown ai me la.

5 Repeka a rong lupuan Aisak a kapas ngani Isaw naun. Isaw a fai la lein petuel a pue kitta fituk, ua to.

6 Repeka a kapas ngani Jekop, naun, apasa, Atiau, Ngang I rong samom a kapas ngani Isaw, puim, apasa,

7 Ko pue ua to fituk, o puakini a me anna, pue ngang pue momownga, o afaiatru en fan masan Jioua mown ai me la.

8 A. ie me ni en, nai, ko pue auseling ai kapas ngan uk.

9 Ko pue fai la ren kout kana, ua to apan an aumanau me ruoman; ngang I pue puakini ir fituk me anna, sawkun samom a ken afitr:

10 En ua la ren samom pue a pue momownga, pue a pue afaiatru en mown an me la.

11 Jekop a kapas ngani Repeka inan, Atiau, pui Isaw, a ken unaun, o ngang I se unaun :

12 Ikanei samai a pue atowpa ai, ngang epue muan atup ren ; o ngang pue tina to anumamau uawi, a sap faiatr.

13 Inan a kapas ngani i, Ngang trek pue anuma-  
man, nai ; en ko auseling aloi trek, fai la uai ir to.

14 Iue, a fai la, angai, ua to ren inan : inan a pua-  
kini fituk me anna, sawkun saman a ken afitr.

15 Repeka a angai an mown naun Isaw faut an eti-  
puar, me nom ren le im, o faute ngani naun me kisakis :

16 O a ngani unutan apan an kout koe uawn paun,  
o uawn u an ;

17 O a ngani le paun naun Jekop, fituk me anna o  
pret, me a ken amowla ta.

18 Iue, a fai la ren saman, apasa, Samai : i a palu-  
ani, Iei ngang ; ia en, nai ?

19 Jekop a kapas ngani saman, Ngang Isaw, mown  
nom : ngang I feria ta oson om kapas ngan iei : ngang  
tungorai rem en ko pue pue ta, mawt ta, o momownga  
sowni ai fituk pue ngunom epue afaiatru ngang.

20 Aisak a kapas ngani naun, Ifa oson om muitir  
ueri i, nai ? A ken apasa, Pue Jioua nom Kot, a uai  
to rei.

21 Aisak a kapas ngani Jekop, Ngang tungorai rem,  
ko pue et to rei, pue ngang pue atowpa en, nai, are en  
uasauas an nai Isaw, are sor.

22 Jekop a fai la ren saman Aisak ; a ken atowpa i,  
o apasa, Mangungu an Jekop, a paun Isaw.

23 A sap silei i, pue paun me unaun, oson trek paun  
puin Isaw ; o a afaiatru i.

24 A ken apasa, En uasauas an nai, Isaw ? o a apasa,  
Ngang i.

25 A ap apasa, Ua to rei, o ngang epue momownga  
sowni an nai at fituk, pue nguni pue afaiatru en. I  
a ua la ren, o a momownga : a pual ua to uain, o a  
unimi.

26 Saman Aisak a kapas ngani i, Kin to, o metiri  
iei, nai.

27 Iue, a fai to, metiri i; a ken tini po an fautan, o afaiatru i, apasa, Atiau, po an nai at a oson ue trek po an malemal me Jiona afaiatru:

28 Ie me Kot pue ngani en amoran puun an lang, o me etipuar an fanufan kana, o trawmowng mownga o uain:

29 Aramas pue angang ngan uk, o ainang kana pue trape ngan uk: ko pue samol lein puim kana, o naun inom kana pue trape ngang uk: a ir ra anumaman me asita en, a me faiatr, ir me afaiatru en.

30 Iue Aisak auasa la an afaiatru Jekop, o Jekop a la sowni ren Aisak saman, ekis etrek, Isaw a puap luin to sowni an lekasik.

31 A pual puakini fituk me anna, ua to ren saman, kapas ngani saman, Samai ko pue pue ta, momownga sowni an nom fituk, pue ngunom pue afaiatru ngang.

32 Aisak, saman, kapas ngani i, Ia en? A ken apasa, Ngang mown nom, Isaw.

33 Aisak a tretretr trapur, apasa, Ifa? ia i me ken angai fituk, ua to rei, ngang I momownga mown om et to, o afaiatru i? euar, a epue faiatr.

34 Isaw a rong kapas an saman, a ken ketru trapur, kapas ngani saman, Ko pue afaiatru ngang, pual ngang, O samai.

35 O a apasa, Puim a et to atupu ai, o uai sowni om faiatr.

36 A ken apasa, A se enlet itan Jekop? pue a ken atupu ai fan ruou: a uai sowni iei souani ai; a, atiau, ikanei a ken uai sowni iei ai faiatr. O a apasa, A sor pual faiatr en isana ngani iei?

37 Aisak a paluani, kapas ngani Isaw, Atiau, ngang seika ta i nom samol, o puin me inisin ngang ngani i ra pue naun trawnangang; ngang pual apitrakila ta i ren mownga o uain: meita ngang I pue pual feri ngan uk, nai?

38 Isaw a kapas ngani saman, Eu etrek faiatr, sam ai? ko pue afaiatru ngang, pual ngang, O samai. O Isaw a ketru.

39 Aisak, saman, a paluani kapas ngani i, Atiau

uisom epue manu etipuar an fanufan kana, o amoran puun sowni lang uawn :

40 O pue manau ren om kowtlas, o angang ngani puim ; iue, a epue feri lupuan om fail fetal, en epue ngas sowni nemanian.

41 Isaw a aput Jekop powkitan faiatr me saman afaiatru i ren : Isaw a apasa lelukan, Ran an katrue ti samai arep to ; ngang puap ni la pui, Jekop.

42 Aman a arani Repeka kei kapas an mown naun Isaw ; i a tina la, asawra to Jekop naun akis, o kapas ngani i, Atiau puim Isaw a ken atripa lelukan oson en, lamana ta a epue ni la en.

43 Ie me ni, nai, ko pue auseling aloi ; ko pue su, failakai la ren mowngai ai, Lepad, uawn Aran ;

44 Ko pue nonom trek ren ran trawkisakis, sawng an puim a puap kisakis tu.

45 An puim sawng ngan uk a puap kisakis tu, o a ken manuki me ni en feri ngani i : ngang epue tina la uai uk to sowni ie : puemeta ami me ruoman pue uai sowni iei lawn eu trek ran ?

46 Repeka ap kapas ngani Aisak, Ngang I tripuown ren manau ai powkitan naun Et nengin koe : are Jekop epue pual apupuiluani aman naun Et kana, oson fefin an fan ei, meita murinna ai manau epue tina to rei ?

#### SOPON 28.

**A** ISAK asawra to Jekop, afaiatru i, o fanau i, kapas ngani i. Ko sap angai puiluom fefin an Kenan.

2 Ko pue su fai la Patan Aran, le im an Petuel, saman inom ; ko pue angai trawnimom ie, aman nengin, naun Lepad mowngai an inom.

3 Kot an manaman pue afaiatru en, o aup ngan uk, o atrawmownga la en, pue ko pue muit an aramas ;

4 O ngani en faiatr an Epream, en, o pual murimurum kana etei en ; pue en pue fanuanai fanu me en siamu uawn, fanu me Kot a ngani Epream.

5 Aisak a tina la Jekop ; I a fai la Patan Aran, ren Lepad, naun Petuel re Siria, mowngai an Repeka, inan Jekop me Isaw.



6 Isaw a ueri me Aisak a afaiatru Jekop, tina la i uawn Patan Aran, a pue angai puiluan ie; o fansoun a ken afaiatru i, a ken fanau i apasa, Ko te angai puiluum fefin an Kenan;

7 O me Jekop auseling saman, inan, fai la Patan Aran;

8 O Isaw a ueri Aisak, saman, a aput finen Kenan kana;

9 Isaw a fai la ren Ismael, o apatr ngani trawniman kana, Maelat naun Ismael naun Epream, mowngai an Nepajot, a pue pual trawniman.

10 Iue Jekop a fai la sowni Pirsipa, a pue fai la Aran.

11 A ken tawrei eue ekis, a maur ie, pue a tup tu akar; o a angai fau an ekis enan, isa tu ul an, o a kawm uawn ekis enan; a epue maur.

12 I a tan, lenien tete u ta uawn fanufan, o lesopolan a tawrei lang: trawnglang au Kot kana ra ken te tu o te te uawn.

13 Iue, Jioua a nonom sopolan, a ken apasa, Ngang Jioua Kot an samom Epream, o Kot an Aisak: fanu me en kokawn uawn ngang epue ngani en, o murimurom kana.

14 O murimurom ra epue trawmowng oson ue trek puun moramor an fanufan; ko pue tawropas fetil uawn apinan o masanran, afowng o ovr: o ainang an fanufan me inisin ra pue faiatr rem, o ren murimurom.

15 O atiau ngang epue etei en, o amanimani en ekis inisin en ko pue fai la ie, o ngang epue aluina to en uawn fanu ei; pue ngang sap likita la en ngang puap feri ngan uk me ni ai kapas ngan uk.

16 Jekop a mou ta sowni an maur, o apasa, Enlet Jioua a nom ikei; o ngang I sisilei.

17 A ken masak apasa, Me amasak ekis ei! enlet fel an Kot iei, o iei asam an lang.

18 Jekop a pue ta uksor, angai fau a ken isa tu ul an, o aua ta ur, a niena la le uawn ungan.

19 Iue, a ngani itan eue fanu Petel: a itan eue teli-nim lom, Lows.

20 Jekop a akapel, apasa, Are Kot epue etei iei, o amanimani iei lawn al ngang pue fai la uawn, o epue ngani iei mownga o faut ngani ai,

21 Ngang luin la le iman samai kinamue : o Jioua epue, ai Kot :

22 Fan ei, me ngan I aua ta ur uawn, a epue fel an Kot : o peirak inisin me en ko pue ngani iei ngang epue enlet asawron engawl an ngani en.

## SOPON 29.

**I**UE, Jekop a fai la, et to uawn fanu an re masanran kana.

2 A ken nana fetal, ueri eu kaw nuk lawn malemal, o uluat muit an sip ra kokawn unukin ; pue iei kaw nuk ra aunu naur man sowni : o fau mowng a nom uawn lellan.

3 Ra ken iown fengeni muit an man me inisin ie : o ra ken akunlu fau sowni lellan eue kaw nuk, o aunu sip kana, ra ap aluin ngani fau lellan kaw nuk, uawn lenien.

4 Jekop a kapas ngani ir, Pui, re ia ami ? Ir ra apasa, Re Aran kitr.

5 A pual apasa, Ami silei Lepan naun Neor ? Ir ra apasa, Sa silei.

6 O a kapas ngani ir, A pitrakil ? Ir ra apasa, A ken pitrakil : o naun Rejel a et to ren sip kana.

7 O a apasa, A leawlauas trek, a se tawrei fansoun me man kana ra pue iown fengeni : au pue aunu kaw nuk sip kana, o fai la amownga ir.

8 Ir ra apasa, Sa soto ngani ; muit an man inisin iown fengeni ra puap akunlu fau sowni lellan kaw nuk ; o sa aunu kaw nuk sip kana.

9 Lupuan an kapas re ir, Rejel a et to ren sip an saman kana : pue i a ken amanimani ir.

10 Iue, Jekop a na ngani Rejel, naun Lepan mowngai an inan, o sip an Lepan mowngai an inan, Jekop a et to, akunlu sowni fau uawn lellan eue kaw nuk, o aunu kaw nuk muit an man, naun Lepan mowngai an inan.

11 Jekop a metiri Rejel, o a ketru.

12 Jekop a kapas ngani Rejel, me i puin saman, o me i naun Repeka: i a failakai la, arani saman:

13 Iue, Lapan a puap rong an Jekop, naun mown-gai an, i a failakai la truri i, foropowtra o metiri i, o ua la i le iman. I, a arani Lapan kei kapas inisin.

14 Lapan a kapas ngani i, Enlet en trui o fitukai. A ken nonom ren maram eu.

15 Lapan a kapas ngani Jekop, Powkitan en me pui a etipuar en ko pue angang ngani iei a se luin? en ko pue arani iei me ni ngang epue luini ngan uk.

16 Naun Lapan nengin me ruoman; itan i alap Lia, o itan i akis Rejel.

17 Lia a ingau faun masan; a Rejel a masa murinna, o liowtr.

18 Jekop a tongei Rejel; o a apasa, Ngang epue angang ngan uk lefeng fusu ren Rejel nom nengin akis.

19 Lapan a apasa, A etipuar ngang epue ngani en i, mown ai epue ngani i aman muan: en ko pue nonom trek rei.

20 Jekop a angang lefeng fusu ren Rejel; a oson trek ran traw kisakis etrek powkitan an tongei i.

21 Jekop a kapas ngani Lapan, Ko pue ngani iei puiluai, ngang pue apupuiluani, pue auas ai angang kana.

22 Lapan a iown fengeni re Aran me inisin feria ta aulau.

23 Iue, lefaf a ken angai naun nengin Lia auena to ren Jekop; i a apupuiliani.

24 Lapan a kisan ngani naun Lia, naun trawna-ngang fefin Silpa a epue naun Lia.

25 Iue, lesor atiau a ken Lia: o a kapas ngani Lapan, Meita ie en me feri ngani iei? Ngang sap angang ngan uk ren Rejel? pumeta en atupu iei?

26 Lapan a apasa, A sap sawkun am fefer fanu am ei, me akis a pue apupuilu mown alap.

27 En ko pue apuanua ta angang an uik an ien,

o pual angai li enan ren om angang ko pue angang ngani iei pual lefeng fusu.

28 Jekop a feri, apuanua ta angang an uik an ien : o a ngani i naun Rejel a pue pual puiluan.

29 Lepad a kisan ngani naun Rejel, naun trawna-  
ngang Pila a epue naun.

30 Jekop a pual fai lawng lawn ren Rejel ; a tongei Rejel lap mown Lia ; o a angang ngani Lepad pual lefeng fusu.

31 Jioua a ueri me Lia a ken sotraul o a anaunau i : a Rejel me rit.

32 Iue, Lia a puopuo, o nauna ta atamuan, o ngani itan Bupen : pue a ken apasa, Enlet Jioua a ken na ngani ai riafau ; a iei puiluai epue tongei iei.

33 I a pual puopuo, o nauna ta atamuan aman ; a ken apasa, Powkitan Jioua a ken rong me ngang I sotraul a ken ngani iei pual atamuan ei : a ap ngani itan Simion.

34 O a pual puopuo o nauna ta atamuan ; a ken apasa, Ikanei puiluai a epue apatr ngani iei powkitan ai naunau ngani i uluman atamuan : ie me ni a itani Lifai.

35 I a pual puopuo, o nauna ta aman atamuan ; o a apasa, Ikanei ngang epue mareiti Jioua : ie me a ngani itan Juta ; iue, a uk tu sowni naunau.

### SOPON 30.

**R**EJEL a ueri me a sap naunau ngani Jekop, Rejel a lowluo ngani puin ; o a kapas ngani Jekop, Ko pue ngani iei menkol, pue ngang te me la.

2 Jekop a sawng ren Rejel : a ken apasa, Ngang siuilin Kot, me ken amatru sowni en menkol ?

3 I a apasa, Iei nai nengin Pila, en ko pue to lawn ren ; a epue naunau uawn pitrai, pue ngang epue puanua ta ren.

4 Iue, a ngani i naun nengin Pila a pue trawniman : Jekop a to lawn ren.

5 Pila a puopuo, o naunau ngani Jekop aman atamuan.

6 Rejel a apasa, Kot a enleta ta ngang, a pual auseling ai mangungu, o ngani iei aman atamuan: ie me ni a ngani itan Tan.

7 Pila naun Rejel trawnangang, a pual puopuo, o naunau ngani Jekop pual aman atamuan.

8 Rejel a apasa, Ngang I aulap ngani pui ren aulap trapur, o puaratro: a puap ngani itan Naftalai.

9 Lia a puap ueri me a uk ta sowni naunau, o a angai naun trawnangang Silpa, ngani Jekop a epue trawniman.

10 Silpa naun Lia trawnangang, a naunau ngani Jekop aman atamuan.

11 Lia a apasa, Faiatr a et to: o a ngani itan Kat.

12 Silpa, naun Lia trawnangang a naunau ngani Jekop pual aman atamuan.

13 Lia a apasa, Ngang I puapua, pue nengin kana ra ken apasa me ngang I faiatr: o a ngani itan Aser.

14 Rupen a fai la le ras an uit, o a ueri mantrakora? le malemal, o ua to ren inan Lia. Rejel a kapas ngani Lia, Ngang tungorai rem, ko pue ngani iei ekawt nom at mantrakora.

15 I a paluani, me kisakis om angai trawnimai? en ko pue pual uai sowni nai at mantrakora? Rejel a apasa, I epue maur rem lepuin ei powkitan nom at mantrakora.

16 Jekop a fai to sowni le malemal lekuniol, Lia a fai la truri i, apasa, Ko pue et to lawng rei; pue enlet ngang luini to en ren nai at mantrakora. Iue a ken maur ren eue puin.

17 Kot a auseling Lia, o a puopuo, naunau ngani Jekop alimman an atamuan.

18 Lia a apasa, Kot a ken luini ngani iei ren ai ngani trawnimai nai nengin: o a ngani itan Isakar.

19 Lia a pual puopuo, o naunau ngani Jekop auow-nuan atamuan.

20 Lia a apasa, Kot a ken kisan ngani iei peirak autre; trawnimai epue nonom trek rei, pue ngang nau-

nau ngani i atamuan uownuman; a ap ngani itan Sepulon.

21 Murin, a pual naunau aman nengin, o ngani itan Taina.

22 Kot ap tretremani Rejel, o Kot a ken auseling i, o anaunau i.

23 A puopuo, o naunau aman atamuan; o apasa Kot a uai sowni iei me ni ngang sau ren:

24 Iue, a ngani itan Josef apasa, Jioua epue apatr ngani iei pual aman atamuan.

25 Iue, Rejel, a puap naunau Josef, Jekop a kapas ngani Lepan, En tina la ngang pue U pue fai la uawn leni ai, o popuitan fanu ai.

26 Ko pue ngani iei puiluai kana o nai at kana me ngang angang ngan uk ren, o tina la ngang: pue en silei ai angang me ngang feri ngan uk.

27 Iue, Lepan a kapas ngani i, Ngang tungorai rem, are ngang ueri tren rem, ko pue nonom trek: pue ngang ueri me Jioua a ken afaiatru ngang powkitan en.

28 O a apasa, Ko pue asine ngani iei luinin om angang. O ngang epue ngani en.

29 Jekop a kapas ngani i, En silei oson ai angang ngan uk, o oson nom man kana ra nonom trek rei.

30 Pue peirak om me kisakis mown ai et to, o tramownga la tawrei muit trapur; Jioua a afaiatru en murin ai et to; inet ngang epue feria ta ren nai kana?

31 I a apasa, Meita ngang epue ngan uk? Jekop a apasa, Ko sap epue ngani iei awt metawt: ngang epue pual amanmani nom man kana arc ko pue feri ngani iei ai kapas;

32 Ngang epue fail fetal lein nom man kana ikanei, aimu sowni ir me makowlakowl o me trikeniken ren sip kana, o me trawl ren lam kana, o me trikeniken o me makowlakowl ren kout kana: o ir ra epue luinin ai angang.

33 Ie oson ai lepunkowtr epue puara ta ngang murin ikanei, fansoun luinin ai angang epue puepue la mown

mas om : me inisin me sap makowlakowl o trikeniken ren kout kana o trawl ren sip kana me pue nom rei, a epue puara ta ai solei.

34 Lapan a apasa, Atiau ngang afitr a pue oson trek om kapas.

35 I a aimu sowni, ran ue trek, kout muan me trikeniken o makowlakowl o kout niafeffin me makowlakowl o trikeniken o me inisin me ekis unan me potapot, o me trawl inisin lein lam kana, o a ngani ir le paun naun atamuan kana.

36 O a ua la ir fetal an ran ulnat a touau sowni Jekop ; Jekop amanimani me lusun koe ren an Lapan man kana.

37 Jekop a angai fanup an poplar a manau o almont o plen, a ulei unutan, pue me powtrapowtr epue puepue la.

38 O a fetoka tu fanup an ira koe peiki lan sapei an kawruk fansoun man kana et to ra pue un, pue ra pue puopuo la fansoun ar et to ra pue un.

39 Man kana ra puopuo mown fanup an ira koe a naunau man makowlakowl, o trikeniken.

40 Jekop a aimu feseni lam kana, o ngani me trikeniken o me trawl kana mown mas an naun Lapan man kana ; o naun man kana a ken aimu la, a sap apatr ngani ir naun Lapan man kana.

41 Iue, man aumanau ra ken puopto, Jekop a isa ta fanup an ira koe mown masan man koe uawn sapei an un, pue ra pue puopuo lein fanup an ira koe.

42 I a sap isa ta fanup an ira koe mown man me aumeme kana ; ie me ne me apowngapowng kana ra ken naun Lapan, o me pitrakil kana naun Jekop.

43 Jekop lapalap la trapur, naun man me trawmowng, pual trawnangang muan o trawnangang feffin, o kamel, o as.

#### SOPON 31.

**J**EKOP a rong kapas an naun Lapan muan kana, apasa, Jekop a uai sowni peirak an samatr me ini-

sin; o sowni peirak an samatr a ken angai ling ei me inisin.

2 O Jekop a ueri uawnmas an Lepad a sap etipuar ngani i oson trek lom.

3 Jiona a kapas ngani Jekop, Ko pue luin ue uawn fanu an samom kana ren ainang om; ngang epue et uk.

4 Jekop a tina la, asawra to Rejel o Lia lawn malemal ren naun man kana,

5 A kapas ngani ir, ngang I ueri uawnmas an samami me a sap etipuar ngani iei oson trek lom; a Kot an samai a etei iei.

6 Ami mai silei me ngang I angas trapur ngang ngani sam ami.

7 O sam ami a ken atupu ai, o auili la luinin ai angang fan engawl; a Kot amatru sowni i ata la ai faiatr.

8 Are aken apasa, Me makowlakowl kana ra pue luinin om angang, man inisin ra ken naunau me makowlakowl; are a ken apasa, Me trikeniken kana ra pue luinin om angang, man inisin ra ken naunau me trikeniken kana.

9 Ie oson Kot a ken uai sowni kana man an samami, o kisan ngani iei.

10 Iue, fansoun man kana ra ken puopuo ngang I satre ta ueri lawn tan, a, atiau, man muan kana me ken te te uawn man kana ir me trikeniken, o makowlakowl etrek.

11 Eue trawulang an Kot a kapas ngani iei lawn tan, apasa, Jekop: ngang apasa, Iei ngang.

12 A ken apasa, En ko pue satre ta, nana ngani, me man muan inisin me te te uawn man kana ir me trikeniken o makowlakowl etrek: pue ngang I ueri au Lepad fefer ngan uk me inisin.

13 Ngang Kot an Petel, ekis enan me en trelif eue ur ie, o akapel ngan iei: iue en ko pue pue ta, su sowni fanu ei, luin ue uawn fanu an ainang om.

14 Rejel o Lia ra paluani, kapas ngani i, A or pual peirak atr lawn iman samatr?



15 A sap owkiowk an letipan me kitr fefin an uawn? pue a ken ameme la kitr, o pual arossa la atr moni.

16 Pue peirak inisin me Kot a uai sowni samatr a ken nautr, o naun nautr kana; iue, en ko pue feri awt metawt me Kot a kapas ngani en.

17 Jekop a u te, isa ta naun atamuan kana o puiluan kana uawn kamel kana;

18 A ken ua la naun man me inisin o naun peirak me inisin me a ken naunau, lawn Patan Aran, a pue fai la ren Aisak saman, uawn fanu an Kenar.

19 Lapan a la a pue rei un an naun sip: o Rejel a solei naun saman ununun anu.

20 Jekop a ken op fai la; Lapan, re Siria, a sisilei, a sap arani i a epue su.

21 Ie oson Jekop a su; a ua la pierak an me inisin; a u te fai la peiki lan eue tran pupu o fai la akasengan trukatrakta Kileat.

22 Aulu an ran aman a arani Lapan, Jekop a su.

23 I a angai puin kana etei i, tapue la Jekop ran fusu; o ra tawrei i uawn trukatrakta Kileat.

24 Kot a et tu ren Lapan, re Siria, lawn tan lepuin, o kapas ngani i, Ko pue feratru, ko sap kapas ngani Jekop sowni me etipuar tawrei me ingau.

25 Lapan a tawra ta Jekop. Jekop a ken aua ta an im mangaku uawn eue trukatrakta. Lapan etei puin kana ra aua ta ar im uawn trukatrakta Kileat.

26 Lapan a kapas ngani Jekop, Meita en feria ta, om op sowni iei fai la, ua la nai nengin koe oson trek liap an kotlas.

27 Puemeta en op su la, solei ngang; sap kapas ngani iei, pue ai to ngani tina la ami ren puapua o kowl o kasong o arp?

28 En sap likit ngani iei metiri nai atamuan o nengin; me putr om fefer.

29 Ngang I to ngani ni uk: a Kot an samom a kapas ngani iei lepuin ue, apasa, Ko pue feratru, ko sap kapas ngani Jekop sowni me etipuar tawrei me ingau.

30 Iue, en mowtren fai la pue en posiasini fituk om; a puemeta en me solei ai anu kana?

31 Jekop a paluani, kapas ngani Lengan, Pue ngang masak: pue ngang ken apasa, Ikanei en epue uaiti sowni iei nom nengin koe.

32 A aman ko pue ueri nom ununun anu ren, a pue ni la fan masan puit kei; ko pue kitta nom metawt a nom rei, ko pue angai. Pue Jekop a sisilei me Rejel a solei ir.

33 Lengan a fai lawng lawn iman Jekop, o iman Lia, o iman trawnangang fefin ruoman; a sap ueri. A ap fai la sowni iman Lia, fai lawng lawn iman Rejel.

34 Rejel a angai ununun anu koe atura tu ir lawn faut an kamel, o mawt tu uawn. Lengan a kitta lawn eue im inisin, a sap kuna.

35 Rejel a kapas ngani saman, Ko sap sawng rei Maing, ai soto ngani u ta mowm; pue somau an li a souni iei. A ken kitta, a samo kuna ununun koe.

36 Jekop a ken sawng, o a angingi ngani Lengan: Jekop a paluani, kapas ngani Lengan, Pue ia ai kilisou? ia ai tipis, me en atroutrou ngani tapue la ngang ren?

37 En me kitta lawn ai peirak me inisin; meita peirak an imom ko ueri? isa ta ikei mown pui kana, o puim kana, pue ir ra pue asina ta lefin atr.

38 Lefeng rue ngang I nonom trek rem; nom sip niafefin, o nom kout niafefin ra sap naome, o ngang sap mownga kout muan sip muan.

39 Muan me man mawtro ra ni la ngang sap ua la rem; ngang I luini ti; en me uai sowni iei luinin, are a solei leran are lepuin.

40 Ien oson ngang; leran puitrikar ani iei, o fau lepuin; o maur a su sowni masai.

41 Ina oson ai nonom trek le imom lefeng rue; ngang angang ngan uk lefeng engawl me ruanu luinin nom nengin koe, o lefeng uownou luinin nom man koe; o en me auili la luinin ai fan engawl.

42 Are Kot an samai, Kot an Epream, o amasak an

Aisak, a sap nom ngani iei, enlet en pue tina iei la pai a pen. Kot a ken ueri ai riafau, o angang an pai o amireiti en lepuin ue.

43 Lepan a paluani, kapas ngani Jekop, Nengin ikei nai nengin etrek, o at ikei nai at etrek, o man ikei nai man etrek : me inisin me en ueri a ken nai : meita ngang epue to ngani feri ngani nai nengin koe are naur at kana me ra ken naunau ?

44 Iue, en et to, sa pue puon fengen, ngang o en ; a epue asinan lefinan en o ngang.

45 Jekop a angai eu fau, o aua ta afawtr ur.

46 Jekop a kapas ngani puin koe, Ua to fau ; ir ra angai fau sena ta, feria ta oror : ir ap mownga ie uawn oror.

47 Lepan a ngani itan Jekar-saatuta : a Jekop a ngani itan Kalit.

48 Lepan a apasa, Oror ei a ken asinan lefinan ngang o en ikanei, ie me a itani Kalit ;

49 A pual itani Mispa ; pue a pual apasa, Jioua pue mamasa lefinan ngang o en, lupuan sa nom feseng, aman sowni aman.

50 Are en ko ninni nai nengin koe, are o pue pual angai ekawt puiluom, apatr ngani nai nengin koe, a sor aramas a nom re atr ; na ngani, Kot a ken asine ta lefinan ngang o en.

51 Lepan a kapas ngani Jekop, En na ngani oror ei, o na ngani ur ei, me ngang I isa ta lefinan ngang o en ;

52 Oror ei pue asine ta, o ur ei pue asine ta, me ngang I sap tako ngani oror ei fai la rem, o me en ko sap tako ngani oror ei o ur ei fai la rei, ren me ingau.

53 Kot an Epream, o Kot an Neor, Kot an samar a pue enleta ta lefin atr. Jekop ap akapel ren amasaku an saman Aisak.

54 Jekop a keni asawr uawn eue trukatrukta o kera to puin koe ra pue mownga : ir ra mownga, ap maur lepuin uawn trukatrukta.

55 Lepan a pue ta uningatr, o metiri naun at koe

o naun nengin koe, o afaiatru ir: Lapan ap su, luin ue uawn fanu an.

## SOPON 32.

**J**EKOP a fai la lawn al, trawnlang an Kot ra truri i. 2 Jekop a puap ueri ir a ken apasa, Iei naun Kot muit; a ap ngani itan ekis enan, Maanaim.

3 Jekop a tina la trawntini ra pue okom ren Isaw, puin, uawn Sir, fanu an Itom.

4 O a fanau ir, apasa, Ien oson ami epue kapas ngani ai samol Isaw; Iei alon nom trawnangang Jekop, ngang I siamu ren Lapan nonom to ikanei.

5 Ngang I naunau kau o as, kout o sip, trawnangang muan o trawnangang fefin: ngang tina la arani ai samol, pue U pue ueri ai tren rem.

6 Trawntini koe ra luin to ren Jekop, apasa, Sa fai la ren puim Isaw, a ken pual et to a pue truri en, o muan fapuku etei i.

7 Jekop a masak trapur o apinkuueiuei: i a aimu feseni aramas kana me nom ren, o sip kana, kout kana, kau kana, o kamel kana, feri muit ruou;

8 A ken apasa, Are Isaw a et to ren eu muit, ni la, eu muit a epue su.

9 Iue, Jekop a apasa, O Kot an samai Epream, o Kot an samai Aisak, Jioua me ken kapas ngani iei, Ko pue luin ue uawn popuitan fanu om, ren fituk om, o ngang epue feri me etipuar rem:

10 Ngang I kisakis fau me kisakis an om kirakiratr kana, o om uenauen kana, me en feri ngani nom trawnangang; pue ren aurai ngang ken fai to sowni iei tranpupu Jortan; a ikanei ngang me muit ruou.

11 Ngang tungorai rem en ko pue amanaua ai sowni paun pui, sowni paun Isaw; pue ngang masak i, a et to ni iei, o in ar etei at kana.

12 En me apasa, Ngang pue enlet feri ngan uk me etipuar, o anutra la murimurom oson trek fau an pi, me soto ngani aleani pue me trawmowng.

13 A maur ie lepuin ue trek; o a angai sowni peirak an me ni a epue kisan ngani Isaw, puin;

14 Kout niafehin ruopuku o kout muan rue, sip niafehin ruopuku o sip muan rue;

15 Kamel niafehin ilik o apan ar, kau niafehin faik, o kaumuan engawl, as niafehin rue o apan ar engawl.

16 A ken ngani ir le paun naun trawnangang, eu etrek muit, eu etrek muit; o a kapas ngani naun trawnangang, Au pue okom mown ngang o muit kana ra pue touau feseng ekis.

17 O a kapas ngani me ken okom mown inisin, Lupuan Isaw, pui, a truri en o ais rem, apasa, Naun ia en ? o, Ko pue fai la ie ? o naun ia ekoe man ?

18 En epue apasa, Naun nom trawnangang Jekop; an kisan ngani ai samol Isaw: atiau i a pual et to murin kitr.

19 Iei oson an pual kapas ngani aruomanan o aulu-manan o me inisin me fai la murin muit kana, apasa, Iei oson au pue kapas ngani Isaw ami puap ueri i.

20 Ami epue pual apasa, Atiau nom trawnangang Jekop a nom murin kitr. Pue a ken apasa: ngang epue amurinau la letip an ren peirak kana me okom mown ngang, a murin ngang epue na ngani mas an; eli a epue tra ngani iei.

21 Iei oson kisan ngani Isaw a okom mown peiki lan; a pusin i a ken nonom trek eue puin ren muit.

22 Iue, a pue ta eue puin, angai puiluan ruoman o naun trawnangang fehin ruoman, o naun atamuan engawl me aman, o fai la peiki lan tranpupu Japok.

23 Iue a angai ir, tina la ir peiki lan eue tranpupu, o tina la peirak an me inisin.

24 Jekop a nonom, i etrek, o muan aman a ken aulap ngani i tawrei a ran.

25 A puap ueri me a sap fuaratro i, a ken tiki leuolan afown; leuolan afown Jekop a sowk fengen trun lupuan an aulap ngani i.

26 O a apasa, Ko pue likit iei la, pue a ran. Jekop a apasa, ngang sap likit uk la are en sap afaiatru ngang.

27 O a kapas ngani i, Ia itom ? A ken apasa, Jekop.

28 A ap apasa, Itom a sap epue Jekop, pue Israel :

pue en me pitrakil ren Kot o aramas oson trek samol aman, o en me puaratro.

29 Jekop a ais, apasa, Ngang tungorai rem ko pue kapas ngani iei itom. O a apasa, Puemeta en ais itai? A ap afaiatru i ie.

30 Iue, Jekop ngani itan ekis enan Penaiel; Pue, a ken apasa, Ngang I nana ngani masan Kot, o pual manaua ta.

31 Lupuan an fai sowni Penaiel akar a pue ta uawn i; o a ken fetal rikarik uawn afown.

32 Ie me ni murimur an Israel kana ra sap mownga ua me ruru fengen, me ken nom uawn leuolan afown, tawrei ikanei; powkitan an tiki leuolan afown Jekop uawn ua me ruru fengen.

## SOPON 33.

**J**EKOP a satre ta nana ngani, a, atiau, Isaw a et to o muan fapuku etei i. A ap ainet ngani Lia, o Rejel, o trawnangang fefin ruoman, naun at kana.

2 O a kapas ngani trawnangang fefin koe o naur kana ra pue okom, o mur ir Lia o naun koe, o Rejel me Josef murin inisin.

3 I a okom mown ir, o trape tu tawrei lepuun fan fusu, a puap arep ngani puin.

4 Isaw a failakai to truri i, o foropawtra i, trape tu uawn uan, o metiri i: ir ra ketru.

5 I a satre ta, ueri fefin kana o at kana; o apasa, Ia ir me nom rem? A ken apasa, At kana me Kot a kirakiratr ngani nom trawnangang.

6 Ekoe fefin trawnangang ra arep to, ir o naur kana, o ra trape tu.

7 Lia o naun kana ra pual arep to, o trape tu: mur ir Josef a pual arep to o Rejel, ir ra trape tu.

8 Isaw a apasa, Meita rem eue muit inisin, me ngang I ken truri. Jekop a apasa, Pue ngang pue ueri ai tren ren ai samol.

9 Isaw a apasa, Peirak rei me trawmowng pui; peirak om epue nonom rem.

10 Jekop a apasa, Ap, ngang tungorai rem are

ngang ueri ai tren rem, en ko pue angai sowni pai manu ngang kisan ngan uk; pue ngang I ueri masom oson ngang ueri masan Kot, o en me afowna ngang.

11 Ngang tungorai rem, ko pue angai ai faiatr me ua la rem; pue Kot a ken kisasou ngani iei, o pual ai peirak me trawmowng. A ken ariani, Isaw a angai.

12 Iue a apasa, Sa pue su, sa pue fai la, o ngang I epue moanana la en.

13 I a kapas ngani i, Ai samol a ken silei me at kana ra mowk, o ai sip o kout kana o kau kana ra naunau; are aramas ra pue auena la a touau ran eu trek, ir inisin ra pue me la.

14 Ngang I tungorai ren ai samol a pue okom mown naun trawngang: ngang I pue fetal trau sawkun man kana me ngang ua la, o at kana ra pue tufit, ngang puap tawrei ai samol uawn Sir.

15 Isaw a apasa, Ngang pue likit ngan uk ekawt aramas me nom rei. I a apasa, Puemeta? Ngang I ueri ai tren ren ai samol.

16 Iue Isaw a su eue ran, a pue fai la uawn Sir.

17 Jekop a fai la Sowkowt, o aua ta iman, o feria ta lenian naun man kana: ie me ni ekis enan a itan Sowkowt.

18 Jekop a fai to a kinamue, fai la telinim an Jekem me nom uawn fanu an Kenan, lupuan a fai to sowni Patan Aran; a ken aua ta an im mangaku mown eue telinim.

19 A ken amowni ekis fanu me a keng aua ta an im mangaku uawn, amowni sowni murimuran Amor saman Jekem, luini ngani moni apuku.

20 Iue a sena ta eu rawng ie, o ngani itan El-eloe-Israel.

#### SOPON 34.

**T**AINA, naun Lia nengin me a naunau ngani Jekop, a ken fai la a pue pi nengin an eue fanu.

2 Jekem, naun Amor, murimuran Iui, samol an eue fanu, a puap ueri i, a angai i, kawng ren, ingaua la i.

3 Ngunan a patr ngani Taina, naun Jekop, a ken

tongei eue nengin, o a ken kapas kirakiratr ngani eue nengin.

4 Iue Jekem a kapas ngani saman, Amor, apasa, Ko pue angai eue nengin a pue puiluai.

5 Jekop a rong me a ken ingaua la Taina, naun: iue, naun atamuan koe ra nom ngani naun man kana lawn malemal: Jekop a nauenauen trek ra puap et to.

6 Amor, saman Jekem, a fai la ren Jekop, a pue kapas ren.

7 Naun Jekop muan koe ra et to sowni le malemal ra puap rong: leluk ar ra trou, o ir me sawng trapur, pue Jekem a feri me ingau lein Israel, kawm ren naun Jekop nengin; me ingau aman epue feri.

8 Amor a kapas re ir, apasa, Ngunan nai a ken mowtren naumi nengin: ngang tungorai remi au pue ngani i a pue trawniman.

9 Ami au pue apupuil re atr, ngani kitr naumi nengin kana, o angai am nengin kana trawnimami.

10 Au pue nonom trek re atr: fanu ei epue nom mown ami; au pue nonom trek o ameame uawn, o pual fanuani fanu uawn.

11 Jekem a kapas ngani saman Taina, o mowngai an koe, Au pue afowna ai, ngang pue ueri ai tren remi, o awt metawt au pue kapas ngani iei ngang epue ngani ami.

12 Au pue ais rei peirak trapur o kisan trapur, ngang epue ngani ami oson trek ami epue kapas ngani iei; ie trek, au pue ngani iei eue nengin a pue puiluai.

13 Naun Jekop koe ra atupu Jekem, o Amor saman, apasa, powkitan an ingaua la mowngai ar Taina,

14 Iue, ra kapas ngani ir, Sa soto ngani feri me, ngani mowngai atr aman me sap sirkomsais; pue sa pue tipis ren:

15 A pue tuft re atr are ami epue oson trek kitr, muan inisin re ami ra pue sirkomsais;

16 Sa epue ngani ami am nengin kana, o kitr sa pue angai ami nengin kana, o kitr epue nonom trek remi, o sa epue oson ue etrek ainang eu.



17 Are ami sap auseling kitr, pue au pue sirkomsais, sa epue angai am nengin, o a la.

18 Amor o Jekem naun, ra sani ar kapas.

19 Eue atamuan a sap trau feria ta me ni pue a ken tawngei trapur naun Jekop nengin: a i me kirakiratr mown ainang an saman me inisin.

20 Amor o Jekem, naun, ra fai la le asam an ar telinim, o kapas ren muan an ar telinim kana, apasa,

21 Ekoe aramas ra tawngei kitr; sa pue tiri ngani ir ra pue nonom trek uawn fanu ei, o amowauow; pue atiau fanu ei me trapur; sa pue angai naur nengin kana puilum kana, o sa pue ngani ir am nengin kana.

22 A ie trek, ra pue auseling kitr pue ra pue nonom trek re atr, pue sa pue ainang eu, are muan inisin re atr sa pue sirkomsais oson trek ir me sirkomsais.

23 Sap ar kau kana o ar peirak kana, o naur man me inisin ra pue naur? ie trek, sa pue auseling ir, ra epue nonom trek re atr.

24 Me inisin me ken fai la sowni eue telinim ra ken auseling Amor o Jekem, naun; muan inisin ra ken sirkomsais, re telinim me inisin.

25 Iue, auluan ran lupuan ar soman, ruoman naun Jekop, Simion o Lifai mowngai an Taina, ra angai ar kowtlas, a sor masak, fai la ngani eue telinim, o ni muan inisin.

26 Ir ra ni la Amor o Jekem naun, ren kowtlas, o angai Taina sowni iman Jekem, ra ap fai la sowni.

27 Naun Jekop kana fai to ren me ni la kana o ua la peirak an eue telinim, powkitan ar ingaua la mowngai ar.

28 Ra angai ar sip kana o kau kana o as kana, peirak me nom lan telinim, o peirak me nom le malemal.

29 Naur pisek me inisin, o naur menkol me inisin o puiluar kana ra liape la, o uai sowni me inisin me nom lawn im.

30 Jekop ap kapas ngani Simion o Lifai, Ami atrouiei pue ngang pue po ingau ren trawn fanu ei, ren ainang an Kenan, o ainang an Peresi: ngang I traw

kisakis etrek, ra pue mou fengen ngani iei, ap ni iei; ngang I pue ta la o ai ainang.

31 Ir ra apasa, A pue feri ngani mowngai atr, oson trek fefin ingau ?

## SOPON 35.

**K**OT a kapas ngani Jekop, U ta, fai la Petel, nonom trek ie: ko pue sena ta ie eu rawng ngani Kot me pue to rem lupuan om su sowni Isaw, puim.

2 Jekop a kapas ngani naun kana, o me inisin me nom ren, Au pue pauta la anu eu sawkun kana me nom re ami, o amurinnau la ami, o anieni ami mangaku :

3 Sa epue su fai la Petel; ngang epue sena ta eu rawng ngani Kot, me ken auseling iei lawn ran an ai riafau, o pual nom ngani iei lawn al ngang fai la lawn.

4 Ir ra ngani Jekop anu eu sawkun me inisin me nom le paura, o seowk me nom le seling ar kana; Jekop a opaw la ir fan ira ok me nom arawn Jekem.

5 Iue ra su: masak an Kot a nom ngani telinim me arep ngani ir kana, ra sap tapue la naun Jekop koe.

6 Jekop a tawrei Lows, telinim an Kenan, me pual itan Petel, i o pual aramas me nom ren me inisin.

7 I a sena ta eu rawng ie, o ngani itan ekis enan, Elpetel; pue Kot a ken pue to ren ie lupuan an su sowni puim.

8 A Tepora, fefin aunu an Repeka a me la, o irei la Petel fan ira ok: o ra ngani itan eue ira, Allonpakut.

9 Kot a pual pue to ren Jekop lupuan an luin to sowni Patan Aran, o afaiatru i.

10 Kot a kapas ngani i, Itom Jekop; itom a sap epue pual Jekop, pue itom epue Israel; o a ngani itan Israel.

11 Kot a kapas ngani i, Ngang Kot me oleni metawt inisin; ko pue aupua tu o trawmowng la; ainang eu o muit an ainang ra pue popu sowni en, o king kana epue popua ta sowni en;

12 O eue fanu me ngang I ngani Epream o Aisak, ngang epue ngani en, fanu ue trek o murimurom kana murin en.

13 Kot a fai ta sowni i, sowni ekis enan a ken kapas ren uawn.

14 Iue Jekop a aua ta ur uawn ekis enan me a ken kapas ren uawn, ur an fau: i a niena la asawr an un uawn, o pual niena la le uawn.

15 Jekop a ngani itan ekis enan me Kot aken kapas ren uawn, Petel.

16 Ra fai la sowni Petel; ekis etrek a ap epue tawrei Efrata: Rejel a ken naunau, o me feria trapur.

17 Iue, lupuan an matok trapur trawn afam a ken kapas ngani i, Ko sap masak; ko pue pual nauna ta atamuan ei.

18 Iue, lupuan ngunan a ken su, (pue a me la) a ken ngani itan Penoni: a saman a ngani itan Penjamin.

19 Rejel a me la, ir ra irei la i arep ngani Efrata, me itan Petliem.

20 Jekop ap aua ta ur uawn paias an: ie me ur an paias an Rejel tawrei ikanei.

21 Iue Israel a fai la, o aua ta an im mangaku peiki lan iman Itar.

22 Iue, lupuan Israel nonom trek uawn eue fanu, Rupen a ken fai la kawn ren Pila, puiluan saman: Israel a rong. Naun Jekop muan engawl me ruoman:

23 Naun Lia kana; Rupen, mown naun Jekop, Sion, Lifai, Juta, Isakar, o Sepulon:

24 Naun Rejel kana; Josef o Penjamin:

25 Naun Pila an Rejel trawnangang fefin; Tan, o Naftalai:

26 Naun Silpa an Lia trawnangang fefin; Kat o Aser: ekoe naun Jekop muan kana, me naunau ngani i uawn Patan Aran.

27 Jekop a et to ren Aisak saman uawn Mamer, uawn Kiriatarpa, pual itan Ipron ekis me Epream o Aisak ra siamu ie.

28 Ran an manau an Aisak me lefeng apuku ualik.

29 Aisak a tina la ngunan, me la, o me ua la ren saman kana, a muk la trapur, ur an ran kana: naun koe, Isaw me Jekop ra ken irei la i.

## SOPON 36.

**I** KEI kapas an murimuran Isaw, me pual itan Itom.  
2 Isaw a puiluan fefin an Kenan; Eta naun Ilon, ainang an Iti, o Aolipama naun Ana me naun Sipeon, ainang an Iui;

3 O Pasemat naun Ismael, me mowngai an Nepaiot.

4 Eta a naunau ngani Isaw Elifas; o Pasemat a naunau Ruel;

5 Aolipama a naunau Jeus, Jalam, o Kora: ekoe naun Isaw muan me naunau ngani i uawn fanu an Kenan.

6 Isaw a angai pillu an koe, o naun atamuan koe, o naun nengin kana, o naun trawnangang me inisin, o naun kau kana, o naun man inisin, o peirak an me inisin me a ken naunau uawn fanu an Kenan; o a fai la uawn eu fanu sowni mas an Jekop, puin.

7 Pue peirak ar me trapur ra soto ngani nom fengen; o fanu ra siamu uawn a sa tufit ngani ir powkitan ar man kana.

8 Ie oson Isaw a ken nonom trek uawn trukatrakta Sir: Isaw a pual itan Itom.

9 Ikei kapas an murimuran Isaw me saman re Itom uawn trukatrakta Sir:

10 Ikei itan naun Isaw atamuan kana; Elifas naun Eta puiluan Isaw, o Ruel naun Pasemat puiluan Isaw.

11 Naun Elifas atamuan Timan, Omar, Sefo, Katam o Kenas.

12 Aman puiluan Elifas, naun Isaw, a itan Timna; a ken naunau ngani Elifas Amalek: ekoe naun Eta puiluan Isaw.

13 Ikei naun Ruel: Neat o Sira, Jama o Misa: ekoe naun Pasemat puiluan Isaw.

14 Ikei naun Aolipama, naun Ana me naun Sipeon, puiluan Isaw: a naunau ngani Isaw Jeus, Jalam, o Kora.

15 Ikei samol an naun Isaw kana: naun Elifas mown naun Isaw; kapin Timan, kapin Omar, kapin Sefo, kapin Kenas,

16 Kapin Kora, o kapin Katam, o kapin Amalek: ekoe samol kana me popua ta sowni Elifas uawn fanu an Itom; ekoe me naun Eta.

17 Ikei naun Ruel me naun Isaw; kapin Neat, kapin Sira, kapin Jama, kapin Misa; ekoe samol kana me popua ta sowni Ruel uawn fanu an Itom; ekoe naun Pasemat puiluan Isaw.

18 Ikei naun Aolipama puiluan Isaw: kapin Jeus, kapin Jalam, kapin Kora; ekoe samol kana me popua ta sowni Aolipama naun Ana, me puiluan Isaw.

19 Ekoe naun Isaw me pual itan Itom, o ekoe naun samol kana.

20 Ikei naun Sir ainang an Ori me nonom uawn eue fanu; Lotan, Jopal, Sipeon, o Ana,

21 Tison, Eser, Tisan: ekoe samol an ainang an Ori, me naun Sir, uawn fanu an Itom.

22 Naun Lotan Ori me Emam; o mowngai an Lotan Timna.

23 Ikei naun Jopal; Alfana, Manaas, Epal, Jefa, o Onam.

24 Ikei naun Sipeon; Asa o Ana; iei Ana me kuna tran puitikar a puoti ta uawn fanu pen, lupuan an amownga as kana naun Sipeon, saman.

25 Ikei naun Ana; Tison, o Aolipama naun Ana nengin.

26 Ikei naun Tison; Emtan, Espan, Itran, o Keran.

27 Ikei naun Eser; Pilan, Safan, o Akan.

28 Ikei naun Tisan; Ows o Aran.

29 Ikei samol kana popuitan aingan an Ori; kapin Lotan, kapin Jopal, kapin Sipeon, o kapin Ana,

30 Kapin Tison, kapin Eser, o kapin Tisan: ekoe samol a Ori, lein kapin kana uawn fanu an Sir.

31 Ikei king kana me oleni uawn fanu an Itom, mown king aman a oleni murimuran Israel kana.

32 Pila naun Pior a nemani Itom: itan teliniun an, Tinapa.

33 Pila a me la, Jopap naun Sira re Posra a siuli i nemani.

34 Jopap a me la, Usam re fanu an Temani a siuli i nemani.

35 Usam a me la, Atat naun Petat, me ninni Mitian uawn malemal an Moap, a siuli i nemani; itan telinim an, Afit.

36 Atat a me la, Samla re Masreka a siuli i nemani.

37 Samla a me la, Sawl re Riopot unukin tranpupu a siuli i nemani.

38 Sawl a me la, Pealanan naun Akpor a siuli i nemani.

39 Pealanan naun Akpor a me la, Atar a siuli i nemani: itan telinim an Pau; trawniman itan Meeta-pel, naun Matret me naun Mesaap.

40 Ikei itan samol kana me popu sowni Isaw lein ar ainang kana, oson fanu ar kana, ren it ar kana; kapin Timna, kapin Alfa, kapin Jetet,

41 Kapin Aolipama, kapin Ila, kapin Pinon,

42 Kapin Kenas, kapin Teman, kapin Mipsar,

43 Kapin Maktiel, kapin Iram: ekoe samol an Itom kana oson ar pinim kana, uawn fanu ar kana: ie Isaw saman re Itom.

### SOPON 37.

**J**EKOP a nonom trek uawn fanu me saman a ken siamu uawn, fanu an Kenan.

2 Ikei kapas an naun Jekop kana. Manau an Josef lefeng engawl me fusu, a ken amanimani muit an man etei puin koe; eue alual a nom ren naun Pila kana, o naun Silpa kana, trawniman saman koe: Josef a ua to ren saman kapas an ar me ingau.

3 Israel a tongei Josef lap mown naun me inisin, powkitan a naun an mukla: a ken puakeni ngani i jakit makowlakowl.

4 Puin koe ra ueri me samar a ken tongei i lap mown puin inisin, o ra aput i, ra soto ngani kapas etipuar ngani i.

5 Josef a ken tan, o a kapas ngani puin koe; ir ra aput i lap sowni.

6 A ken kapas ngani ir, ngang tungorai remi au pue rong ai tan me ngang I tan :

7 Pue, sa ken ri pinakin uit le malemal, a, atiau, ai pinakin uit a ken u ta, o ami pinakin uit kana ra ken u, puenifetale, ap trape sowni ai pinakin uit.

8 Puin ra kapas ngani i, A enlet ko pue oleni kitr? Ra ap aput i a lap sowni powkitan an tan kana, o an kapas kana.

9 A pual tan, o kapas ngani puin kana an tan, apasa, Iue ngang pual tan; iue akar o maram o fu engawl me eu ra trape sowni iei.

10 A ken kapas ngani saman o puin kana an tan : saman a amireiti i, kapas ngani i. Meita ei tan me en tan? A enlet ngang o inom o puim kana sa pue et to pue sa pue trape tu ngani puun sowni en?

11 Puin koe ra ken noluo ngani i: a saman a ken owkiowki an kapas.

12 Puin koe fai la ra pue amanimani naun samar muit an man uawn Jekem.

13 Iue Israel a kapas ngani Josef, A sap puim koe ra ken amanimani muit an man uawn Jekem? ko et to pue ngang pue tina uk la ngani ir. Josef a kapas ngani i, Iue trek.

14 Israel a kapas ngani i, Ko pue fai la pi are me etipuar ren puim koe, o pual etipuar ren muit an man kana; o puap ua to rei kapas. Iue a tina la i sowni lemawlnun Ipron, a ap et tu Jekem.

15 Aman muan a ueri i, o atiau a trukawlnel: eue muan a ais ren, apasa, Meita ko kitta?

16 Josef a apasa, Ngang I kitta pui kana; ngang tungorai rem ko pue arani iei ekis ra amanimani ie.

17 Eue muan ap apasa, Ra a la sowni iei; pue ngang I rong ar kapas, Sa pue fai la Totan. Josef a fai la murin puin koe, a ueri ir uawn Totan.

18 Ra puap ueri i a touau, mown a sap arep ngani ir ra amowl fengeni ar ra pue ni la i.

19 Ir ra kapas, aman ngani aman, Na ngani, enan samol an tan a et to.

20 Ie me au et to sa pue ni la i, o atura tu i lawn eu puang; sa puap epue pi lesopalan an tan kana.

21 Rupen a rong, o amanaua i sowni le paur; a ken apasa, Sa te ni la i.

22 Rupen a kapas ngani ir, Sa sap ni la, sa pue atura tu i lawn enan puang me nom lawn fanu pen; sa sap fiu ngani; pue Rupen a mowtren angai sowni i le paur, pue a pue pual ua la i ren saman.

23 Iue, Josef a puap et to ren puin koe, ra ken uai sowni Josef an mangaku, eue jakit makowlakowl me a faute ngani;

24 Ir ra angai i, atura tu lawn eu puang; eue puang a pen, a sor tran lawn.

25 Ir mawt tu ra pue mownga: ra satre ta, nana ngani; a, atiau, muit an ainang an Mitian ra fai to sowni Kileat, etei naur kamel kana me ua me po kus, palsam, o mowr, ra pue ua tu Ijip.

26 Juta a kapas ngani puin koe, Meita faiatr are sa ni la puitr o opaw la tran?

27 Sa pue amowni ngani i re Mitian, sa te fiu ngani i; pue i me puitr, fituk am. Puin koe ra auseling.

28 Trawn kame, re Mitian ra fail fawtafawt la; o ra efa ta Josef sowni eue puang, ekia ta i, o ra amowni ngani Josef re Mitian, luinin moni silfer rue: re Mitian koe ap ua la Josef Ijip.

29 Rupen a luini ngani eue puang; o, atiau, Josef a se nom lawn puang; a ap kamue feseni an mangaku.

30 O a luin ue ren puin koe o apasa, At enan a se nom, o ngang, I pue fai la ie?

31 Ir ra angai an Josef jakit, o ra ni la aman ap an kot, o atua lawng eue jakit lawn tra;

32 Ir ra tina la eue jakit makowlakowl, o ua la ren samar, o apasa, Ueri am ei; ko pue pi are an nom atamuan jakit are sor.

33 A kuna i, o apasa, An nai atamuan jakit; enlet Josef a tawropas faili.

34 Iue, Jekop a kamue feseni an mangaku, faute



ngani mangaku an ngungures, katrué ti naun ran nutra.

35 Naun muan inisin o naun nengin inisin ra u ta ra pue atripa i; a uet atripa; a ken apasa, Ngang pue katru tawrei ai et tu lawn paias ren nai at. Ie oson sam an a ken katrué ti i.

36 Re Mitian ra amowmow la Josef ren Potifar, aman samol ren Ferao, kapin an naun trawnfiu.

### SOPON 38.

**I**UE a feru lawn eue fansoun, me Juta a et tu sowni puin koe, o a tawkei ti re Atowlam aman a itan Aira.

2 Juta a ueri ie nengin aman, naun aman re Kenan a itan Jua; a ap angai i, apupuilu ngani.

3 I a puopuo, nauna ta atamuan; a ngani itan Er.

4 O a pual puopuo, nauna ta atamuan; a ngani itan Onan.

5 A pual puopuo, nauna ta atamuan; o a ngani itan Jila: I a nonom Resip fansoun a nauna ta i.

6 Juta a angai nengin itan Temar, a pue puiluan mown naun, Er.

7 Er, mown naun Juta a ken me ingau fan masan Jioua; Jioua a ni la i.

8 Juta a kapas ngani Onan, Ko pue angai puiluan puim, apupuil ngani, ko puap anaunau ngani puim murimuran.

9 Onan a silei me menkol a sap epue naun; iue a puap et to lawn ren puiluan puim, a ken niena tu le pun, pue a te anaunau ngani puim murimuran.

10 Jioua a ken aput an fefer; ie me ni a pual ni la i.

11 Juta a kapas ngani Temar, puiluan naun, Ko pue nom lipit etrek le iman samom, nai atamuan Jila a puap masamuan; pue a ken apasa, Pue Jila a te pual me la oson trek puin koe. Temar ap fai la nonom trek le iman saman.

12 Failfailo puiluan Juta, naun Jua nengin, a me la; Juta a kinamue la, o a fai la Timnat ren nsun

trawnrei unan sip kana, i o naun muan atren Aira, re Atowlam.

13 Iue, Aman a arani Tamar, apasa, Saman pui-luom a pue fai la Timnat a pue rei naun sip.

14 I a puili ta ue an mangaku an lipit, o pualuo ngani masan mangaku eu, o faute i, o mawt tu le asaman Enaim unukin al an Timnat; pue a ueri me Jila a masamuan o a samo apupuilu i.

15 Juta a ueri i, a owkiowki pue i fefin nu ingau aman, powkitan an pualuo la masan.

16 I a tawkei ti i, unukin al, o apasa, Et to, ngang tungor rem, pue ngang pue et to lawng rem; (pue a sisilei pue i puiluan naun). Tamar a apasa, Meita ko pue luini ngani iei, pue ko pue et to lawng rei?

17 I a apasa, Ngang epue tina to rem kitt aman sowni eue muit an man. Nemin a apasa, Ko pue ngani iei asinan om puon ko puap tina to i?

18 Iue a apasa, Meita I pue ngani en asinan ai puon? Nemin a apasa, Nom metra an asine ta, o treimon, o uawk me nom le paum. O a ngani i me ni koe, o et to lawn ren, i a puopuo ren.

19 I a u ta, fai la, o puil ta ue mangaku me pualuo la mas an, ap pual faute ngani mangaku an lipit.

20 Juta a tina la naun muan atren, eue re Atowlam, a pue ua la kitt pue a pue angai sowni eue fefin asinan an puon; a sap ueri i.

21 I a ais ren re ekis enan, apasa, Ia fefin nu ingau me puepue la unukin al? Ir ra apasa, A sor fefin nu ingau fan ei?

22 I a luin to ren Juta, apasa, Ngang soto ngani ueri i; o pual re ekis enan ra ken apasa, a sor fefin nu ingau fanu ei.

23 Juta a apasa, A pue amatru, pue sa te trawn asau: ngang tina la iei kitt, a en sap ueri i.

24 Iue, murin maram uluat, aman arani Juta, apasa, Nom nengin Tamar a paut la; a pual puopuo ren an fefer ingau. Juta a apasa, Au pue ua to, a epue keni.

25 Ra puap ua to, i a ken tina to, arani saman, apasa, Ngang I puopuo asile muan me naun peirak

kei : a pual apasa, Ngang tungorai rem ko pue pi naun ia kei, metra an asine ta, o treimon an, o uawk.

26 Juta a pi pue naun, a apasa, Nengin enan me etipuar mown ngang ; powkitan ai sap apupuillu ngani nai atamuan Jila. A sap pual fai lawng lawn ren fail-fail la.

27 Iue, lupuan a epue naunau, atiau lipue a nom lukan.

28 Iue, lupuan an naunau aman a seika sowni paun ; a trawnafam angai, ri ngani paun ekis tret parapar, apasa, Iei a up tu lom.

29 Iue, a aluina lawng paun, a, atiau, puin a up tu ; i a apasa, Ifa oson om pusin rupie la ? ie me ni ra ngani itan Rupii.

30 Puin me tret parapar nom uawn paun a up tu murin ; ra ap ngani itan Sara.

#### SOPON 39.

**R**A ua tu Josef lawn Ijip ; Potifar naun Ferao samol aman, kapin an naun trawnmas, re Ijip aman, a ken amowni i sowni paun re Mitian koe me ua to i.

2 Jioua a ken etei Josef, i a muan faiatr ; a ken nom trek le iman naun samol, eue re Ijip.

3 Naun samol a ueri me Jioua a ken etei i, o me Jioua a ken apuanua ta an angang inisin.

4 Josef a ueri an tren me ren, o angang ngani i ; Potifar a seika ta i trawn souan uawn iman inisin o likit ngani paun naun pisek me inisin.

5 Iue, murin an seika ta i trawn souan le iman, o uawn naun pisek me inisin, Jioua a afaiatru iman eue re Ijip powkitan Josef ; faiatr an Jioua a nom uawn naun pisek me inisin le iman, o lawn malemalan.

6 A ken likit ngani paun Josef naun peirak me inisin ; a sap silei awt metawt me naun, Iei trek an an me a ken momownga. Josef muan aumanau, me masa murinna.

7 Iue, murin ikei, trawniman Potifar atawla ngani Josef ; o a apasa, Ko pue kokawn la rei.

8 Josef a uet, o kapas ngani trawniman naun samol, Na ngani, ai samol a sap owkiowki awt me nom rei lawn ei im; a ken likit ngani pai naun peirak me inisin;

9 A sor aman lawn ei im a lap mowai; i a sap amaturu awt sowni iei, en etrek, pue en me trawniman: ifa oson ngang epue to ngani feri ei me ingau trapur, o feri putak ngani Kot?

10 Iue, a kakapas ngani Josef ran inisin, a sap auseling i, kawen ren, are nonom ngani.

11 Iue, eu fansoun Josef a fai lawng lawn im a pue feri an angang, a sor muan an eue im a nonom lawn im.

12 I a turfi i ren an mangaku, apasa, Ko pue kokawn la rei; Josef a likit ngani naun mangaku le paun o su sowni, fai la lukin.

13 Iue, a puap ueri me Josef a ken likita la an mangaku le paun, o su la lukin,

14 I a asawre ngani muan an iman, o kapas ngani ir, apasa, Na ngani, i a ken ua to aman Jus a pue turunufasi kitir; a ken et to lawng rei a pue feri me ingau ngani iei, ngang ap asawre trapur;

15 Iue, a puap rong ai asawre, a ken likita la naun mangaku rei, o su, fai la lukin.

16 O a isana naun Josef mangaku, naun samol a puap lun to.

17 A ap kapas ngani i oson kei kapas, apasa, Eue trawnangang, Jus aman me en ua to re atr, a ken et to lawng turunufasi ngang;

18 Iue, ngang puap asawre trapur, i a likit ngani iei. naun mangaku su sowni.

19 Iue, naun samol a puap rong kapas an trawniman me a ken kapas ngani i, apasa, Ie oson nom trawnangang a ken feri ngani iei, a ap kinisa.

20 Naun Josef samol a angai i atura tu i le iman fetok, ekis me trawn fetok an Ferao ra me fetok ie; i a nonom trek ie lawn iman fetok.

21 A Jioua a ken etei Josef, o afowna i, atreni i ren samol an iman fetok.

22 Samol an iman fetok a mout ngani le paun Josef trawn fetok inisin me nom lawn iman fetok; o nemani an ar fefer inisin.

23 Samol an iman fetok a sap tumunu awt metawt me nom lawn paun; pue Jioua a etei i, o apuanua ta an fefer kana.

#### SOPON 40.

**I**UE, murin fefer ikei, naun king an Ijip putler o naun kuk ra ken tipis ngani naur samol eue king an Ijip.

2 Ferao a ken sawng ren naun samol ruoman, samol an naun putler kana, o samol an naun kuk kana.

3 I a fetokini ir lawn iman kapin an naun trawnmas kana, lawn eue iman fetok me Josef a fetok lawn.

4 Eue kapin an trawnmas kana, a ken seika ta Josef etei ir, i a tumunu ir: ir ra nonom trek le iman fetok.

5 Ir me ruoman ra ani awt tan lepuin eu trek, aman oson aueuean an tan, eue putler, o eue kuk, an king an Ijip me fetokini le iman fetok.

6 Josef a fai lawng lawn re ir lesor, nana ngani ir, o ir me afawtafawt.

7 Josef a aiseni naun Ferao samol koe me nonom ren lawn ueip an iman naun samol, apasa, Meita ami afawtafawt ren ikanei?

8 Ir ra kapas ngani i, Sa ani awt tan, o a sor me epue aueue. Josef a kapas ngani ir, A sap aueue kana ren Kot? Au pue arani lei ami tan.

9 Eue samol an putler kana, a arani Josef an tan, kapas ngani i, Lawn ai tan ira krep a nom mowai.

10 Keangan eue ira krep me ulufawt; a oson trek a ken mown uan, tren a mara ta, o a nup krep koe:

11 An Ferao sapei an un a nom le pai; ngang angai krep koe, o fie ngani an Ferao sapei an un, o ngang ua la eue sapei le paun Ferao.

12 Josef a kapas ngani i, Ie aueue an: Keangan me ulufawt, ir me ran uluat:

13 Auluan ran Ferao epue amusa la en, o aluini

ngan uk souani om; ko puap ua la an Ferao sapei an un le paun, sawkun fefer an lom lupuan en me naun putler.

14 A puanua ta rem ko ap tretremani ngang, kira-kiratr ngani iei, ngang tungorai rem, o arani Ferao oson ngang, o ua la ngang sowni im ei:

15 Pue atiau ra solei ngang sowni fanu an Jus koe: o uawn fanu ei ngang sap feri awt metawt ra pue atura tu ngang lawng lawn iman fetok ei.

16 Eue samol an kuk kana a ueri me aueue an me murinna, a ap kapas ngani Josef, Ngang pual tan, truk powtrapowtr me uluat nom uawn maker ai;

17 O an Ferao mownga um an trawn kuk me nom lawn eue truk me nom uawn; man su ra ken ani ir sowni truk uawn maker ai.

18 Josef a paluani, apasa, Iei aueue an: Truk uluat, ir me ran uluat:

19 Auluan ran Ferao epue enleta ta en, o uai sowni en souani om, o fawrasi en uawn ira; o man su kana ra pue ani sowni fituk om.

20 Iue, auluan ran, ran an Ferao a up tu, a ken feri aulau ngani naun trawnangang me inisin: a ap enleta ta samol an putler o samol an trawn kuk lein naun trawnangang kana.

21 O a aluini ngani eue samol an putler souani an; a ap uai ngani paun Ferao sapei an un;

22 O a fawras ngani eue samol an trawn kuk; oson trek an Josef aueue ngani ir.

23 A eue samol an putler a sap tretremani Josef, a manuki i.

#### SOPON 41.

**I**UE, le uas an iir ruou, Ferao a tan; a na ngani, a ken u unupan tranpupu Nail.

2 Iue, kau aumanau o kitinup me fuman ra fai ta sowni eue tranpupu; o ra momownga le malemal.

3 Pual kau fuman me fai ta sowni tranpupu murir, me uawuawngau, o kitrutru; ir ra u arawn ekoe kau uawn unupan kawruk.

4 Kau uawuawngau o kitrutru koe ra ken ani kau fuman koe me owtr aumanau. Ferao ap ne la.

5 Iue a maur, o ani aruan tan; iue uan korn fau mowng o murinna, me fusu ra mara ta uawn afawt trek ira.

6 Murir faun fusu me pen, me ingau ren asapual an masanran, ra mara ta.

7 Ekoe fau pen ra ani fau mowng me fusu. Ferao ap ne la, o atiau a ken tan etrek.

8 Iue lesor leluk an me lowlilin; o a tina la, kera to re Ijip me uataua me inisin, o me tipatrem me inisin: Ferao ap kapas ngani ir an tan; a semen mo to ngani aueue ngani Ferao.

9 Eue samol an putler a kapas ngani Ferao, apasa, Ngang I tretremani ai tipis ikanei;

10 Ferao a sawng ren naun trawnangang, o fet iei le iman samol an trawnmas, ngang o samol an trawn kuk:

11 Sa ken ani awt tan le puin eu trek, ngang pual i; sa ken tan aman pual aman oson aueue an an tan.

12 Aman aluowl a nom re atr, Jus aman, trawna-ngang an eue samol an trawnmas; sa arani i, a ap aueue ngani kitr am tan; a ken aueue ngani aman oson an tan.

13 Iue, a puanua ta oson trek an aueue ngani kitr; ngang a aluin ngani souani ai, o i a ken fawrasi.

14 Ferao a tina la, kowkowri Josef, ir ra amuitira to i sowni iman fetok; i a nawti alis, pual anienia an mangaku, ap et to lawng ren Ferao.

15 Ferao a kapas ngani Josef, Ngang I ani awt tan, a sor aman a to ngani aueue: ngang I rong peraus om, me en, ko ken rong awt tan ap aueue ta.

16 Iue Josef a paluani Ferao, apasa, A sap ngang; Kot epue ngani Ferao aueuean murinna.

17 Ferao a kapas ngani Josef, Lawn ai tan, ngang I u uawn unupan eue tranpupu;

18 Iue, kau fuman me aumanau ra fai ta sowni eue tranpupu; ir ra momownga le malemal:

19 Pual kau fuman fai ta murir me uawuawngau o kitrutru la trapur; ngang se ueri me ingau oson trek ir uawn fanu an Ijip me inisin:

20 Ekoe kau me uawuawngau o kitrutru ra ken ani ekoe fuman kau owtr o aumanau.

21 A murin ar ani ir, aman a soto ngani silei me ra ani ir; pue ir me pual kitrutru oson trek lom. Ngang ap ne la.

22 Ngang I na ngani lawn ai tan, iue, uan korn mowng me fusu mara ta uawn afawt trek korn.

23 Iue, uan korn fusu me kisakis, me ingau ren asapual an masanran ra mara ta murir:

24 Uan korn kisakis koe ra ani uan korn etipuar me fusu koe: ngang I arani me uataua kana, a sor me to ngani aueue ngani iei.

25 Iue Josef a kapas ngani Ferao, An Ferao tan eu trek; Kot me puar ngani Ferao meni a epue feri.

26 Kau aumanau me fuman, ir me iir fusu; pual uan korn etipuar me fusu, ir me iir fusu; tan eu trek.

27 Pual kau fuman me kitrutru me fai ta murir, ir me pual iir fusu; pual uan korn pen me fusu me ingau ren asapual an masanran, ir ra pue iir leng ta me fusu.

28 Ie me ngang I arani Ferao; meni Kot epue feri a ken puar ngani Ferao.

29 Iir fusu me fai to epue ras trapur uawn fanu an Ijip me inisin;

30 Iir fusu murin epue leng ta; ra pue manuki ras koe uawn fanu an Ijip; leng ta epue ani ei fanu.

31 Ra pue sisilei ras koe uawn ei fanu powkitan leng murin; pue a epue leng ta trapur.

32 A pue Ferao a ani aruou an tan, a powkitan Kot a lamane ta; Kot a epue muitir tina to.

33 Ie me ni a me murinna Ferao epue kitta muan aman me kitta murinna o tipatrem, o seika ta i uawn fanu an Ijip.

34 Ferao epue feri, seika ta trawn-souan kana uawn ei fanu, ra pue angai auis limou an fanu an Ijip lawn iir ras koe.



35 Ra pue iown fengeni mownga inisin lawn iir etipuar koe me fafai to, o isana mownga fan paun Ferao, o isana mownga lawn telinim kana.

36 Iei mownga epue isan ngani fanu ei lawn' iir fusu leng ta me epue fai to uawn fanu an Ijip; pue fanu a te ta la ren maileng.

37 Ferao a afitr, pual naun trawnangang me inisin.

38 Iue, Ferao a kapas ngani naun trawnangang kana, Sa pue to ngani ueri aman oson trek muan enan, me ngunan Kot a nom lawn ?

39 Ferao a kapas ngani Josef, Powkitan Kot a ken puar ngan uk ikei me inisin, a sor aman me kitamurinna o tipatrem oson trek en :

40 Ko pue samol an imai, o en ko pue feri kapas an nai aramas me inisin; uawn lenian ai mawt etrek ngang epue lap mown en.

41 Ferao a kapas ngani Josef, Na ngani, ngan I seika ta en uawn fanu an Ijip me inisin.

42 O Ferao uta ue alelan autan, o uta lawng paun Josef, faute ngani mangaku linen etipuar, o muarinei muaran kol fan u an ;

43 A pual apasa a epue te te faili uawn aruou an naun uakon; ir ra asawre mown, Au trape tu; a seika ta i uawn fanu an Ijip me inisin.

44 Ferao a kapas ngani Josef, Ngang Ferao, a sor aman uawn fanu an Ijip me inisin a pue alonga ta paun are pitran mur me uawn en etrek.

45 Iue, Ferao aitan ngani Josef Safnat-panea; o a ngani i trawniman, Asinat naun Potifera, prist an On. Josef a fail fetal uawn fanu an Ijip me inisin.

46 Manau an Josef iir ilik lupuan an u mown Ferao king an Ijip. Josef a fai la sowni Ferao, o a fall fetal uawn sop an Ijip me inisin.

47 Lawn iir fusu murinna koe, peirak me ras atamowng trapur.

48 I a iown fengeni mowngan fanu an Ijip me inisin lawn iir fusu koe, o isana mownga koe lawn telinim kana: mowngan fanu lukin telinim eu a ken isana lawn telinim ue trek.

49 Josef a iown fengeni mownga trawmowng oson trek pi uawn piapi a puap uk tu sowni aleani, pue a se tufit aleani.

50 Atamuan ruoman me naunau ngani Josef mown iir leng ta koe, me Asinat naun Potifera, prist an On naunau ngani i.

51 Josef a ngani itan mown naun Manasa; pue a ken apasa, Kot me amanuki ngani iei ai riafau inisin, o iman sam ai me inisin.

52 A ap ngani itan aruoan, Ifreim: Pue Kot a aup ngani iei lawn fanu an ai riafau.

53 Iue ra uas iir an ras me fusu lawn fanu an Ijip.

54 Iir fusu me leng ta ra popua ta oson trek an Josef kapas: fanu inisin ra leng ta, a uawn fanu an Ijip me inisin a or mownga.

55 Fanu an Ijip me inisin ra leng ta, o ra tungorai pret ren Ferao: Ferao a kapas ngani re Ijip kana, Au pue fai la ren Josef o auseling alon.

56 Fanufan me inisin a leng ta: Josef suka la iman isais me inisin, o. a ameni ngani re Ijip kana; maileng a trapur la uawn fanu an Ijip.

57 Trawn fanu me inisin ra et to Ijip amowni mownga ren Josef, powkitan maileng trapur uawn fanu me inisin.

#### SOPON 42.

**J**EKOP a puap silei a or mownga Ijip, a ken kapas ngani naun muan koe, Puemeta ami nana ngani aman aman?

2 A pual apasa, Atiau, ngang rong a or mownga Ijip: au pue fai la ie, amowni ngani kitr; pue sa pue manau, sap me la.

3 Puin Josef koe me engawl ra fai tu, ra pue amowni mownga Ijip.

4 A Penjamin puin Josef, Jekop a sap tina la etei puin koe; pue a ken apasa, Pue me ingau a te souni i.

5 Naun Israel koe ra et to ra pue amowni mownga iir me et to; pue fanu an Kenan a leng ta.

6 Josef me samol an eue fanu, o i etrek me amowni

ngani trawn eue fanu; puin Josef koe ra et to, o ra trape tu mown, uawn mas ar le puun.

7 Josef a na ngani puin koe, o a silei ir, iue a saw-runi i aman ngani ir, o kapas pitrakil ngani ir; a ken kapas ngani ir; Au et to me ia? Ir ra apasa, Sowni fanu an Kenan, sa pue amowni mownga.

8 Josef a silei puin koe, a ir ra sisilei i.

9 Josef ap tretremani tan koe me a ani oson ir, o a kapas ngani ir, Trawn op ami; au et to pue ami epue ueri am lipuakingau.

10 Ir ra kapas ngani ir, Ap, Maing; nom trawnangang kitr sa et to pue sa pue amowna to mownga.

11 Kitr inisin naun aman etrek muan; kitr aramas enlet, nom trawnangang sap trawn op.

12 I a kapas ngani ir, Ap, ami et to pue au pue ueri am lipuakingau fanu ei.

13 Ir ra apasa, Kitr, nom trawnangang, sa ken puipui eu, muan engawl me ruoman, naun aman trek muan uawn fanu an Kenan; atiau, setaputer a nom ikanei ren samatr, o a se nom aman.

14 Josef a kapas ngani ir, Atiau ai kapas ngani ami, apasa, Ami trawn op.

15 Mo manau an Ferao, au sap epue fai sowni ei, are puimi eue setaputer a sap et to; ie me ni au pue enleta ta ren.

16 Au pue tina la aman ami, a epue ua to puimi; au pue feti, pue ami kapas epue enleta ta are ami enlet; a se et to, mo manau an Ferao atiau me ami trawn op.

17 I a fetokini ir me inisin, ran ulu.

18 Josef a kapas ngani ir lawn auluan ran, Ie me au pue feri o manau; pue ngang I masak Kot;

19 Are ami me aramas enlet, aman puimi a epue fetokani lawn iman ami feti; ami au fai la ua la mownga ngani naumi kana me leng ta:

20 Ami au pue ua to rei, puimi setaputer o enleta ta ami kapas pue au te me la. Iue ra feri.

21 Ir ra kapas fengen le ir, Atiau, kitr me tipis ren puitr, pue sa na ngani riafau an lelukan, lupuan an

tungorai re atr, o kitr uet auseling; ie me ni riafau ei a tawrei kitr.

22 Rupen a paluani ir, apasa, Sap ngang kapas ngani ami, apasa, Au sap feri ingau ngani at enan; o ami uet auseling? ie me ni uk am etrek tra an.

23 Ra sisilei me Josef a silei ar kapas, pue aman a ken auili la kapas lefin ar.

24 I a sele sowni ir, ketru; a puap luin to re ir, kapas re ir, angai sowni ir Simion feti i fan masar.

25 Josef a kapas ngani aman a epue masoan ngani ar trotas kana mownga, o aluina la naun aman moni lawn an trotas, o ngani ir amatur: ien oson an feri ngani ir.

26 Iue ra eki ta naur mownga koe uawn naur as kana, ra ap su.

27 Aman a puap suka la naun trotas a epue amownga naun as ekis ra pue maur ie, o a ueri naun moni; pue atiau a nom le popun trotas.

28 I a kapas ngani puin koe, Ai moni a aluina to; a nom lawn ai trotas; leluar mawr la, ir ra masak, o kapas fengen, Meita ei me Kot a feri ngani kitr?

29 Ir ra et to ren samar Jekop uawn Kenan o fawsei te meni feri ngani ir me inisin; apasa,

30 Eue muan, samol an eue fanu a ken kapas pitrakil ngani kitr, owkiowki me kitr trawnop an eue fanu.

31 Sa ken kapas ngani i, Kittr aramas enlet; sap trawnop:

32 Sa puipui eu muan engawl me aman, naun samatr; a se nom aman, o setaputer a nom ikanei ren samatr uawn Kenan.

33 Eue muan, samol an eue fanu, a ken kapas ngani kitr, ngang pue silei are ami aramas enlet: ami pue likita la rei aman puimi, o ua la mowngan maileng an naumi kana, ap fai la:

34 Ami au ua to rei puimi setaputer; ngang epue silei me ami sap trawnop, pue ami me aramas enlet; ngang epue likit ngani ami puimi, o ami ameame uawn fanuei.

35 Iue, ra puap suk la naur trotas, atiau, naur moni me inisin nom, tikutik an aman lawn an trotas: ir o samar ra ueri tikutik an moni koe, ra ap masak.

36 Jekop, samar, a kapas ngani ir, Ami uai sowni iei nai kana; Josef a se nom, o Simion a se nom, o ami epue ua la Penjamin: me ingau ngani iei kei me inisin.

37 Rupen a kapas ngani saman, apasa, Ko pue ni la nai at ruoman, are ngang sap aluina to i rem; ko pue likit ngani pai, ngang epue pual aluina to i rem.

38 O a apasa, Nai at a sap epue etei ami fai tu, pue puin a me la, i etrek a lusun; are me ingau ueri i lawn al me ami epue fai la lawn, ami epue tina tu maker ai powtapowt lawn paias, ren ai trou lelukai.

#### SOPON 43.

**E**UE fanu a leng ta trapur.

2 Iue, ra puap arosa la mownga me ra ua to sowni Ijip, samar a kapas ngani ir, Au pue pual fai la amowni ngani kitr ekis an atr mownga.

3 Juta a kapas ngani i, apasa, Eue muan a ken akapel ngani kitr, apasa, Au sap epue ueri masai are puimi a sap etei ami.

4 Are ko pue tina la puitr etei kitr, sa pue et tu amowni an om mownga:

5 Are en uet tina la, kitr sa sap epue et tu, pue eue muan a kapas ngani kitr, Ami sap epue ueri masai are puimi a se etei ami.

6 Israel a apasa, Puemeta ami feri iei me ingau trapur ngani iei, arani eue muan a or puimi?

7 O ra apasa, Eue muan a ken epiepini ais re atr oson kitr o am traw, apasa, Samami a manau? A or aman puimi? sa ken arani i oson ekoe kapas: Sa pue to ngani silei a epue kapas ngani kitr, Ua to puimi?

8 Iue Juta a kapas ngani Israel, saman, Ko pue tina la at enan etei iei, sa pue su, fai la; pue sa pue manau, sap me la, kitr me en, pual nautr kana.

9 A epue uk ai etrek, ko pue angai i sowni iei: are

ngang sap ua to rem, o isa ta i mowm a epue uk ai etrek failfail la trek;

10 Are sa sap uitauit, atiau, sa pue uar to lom aruouan am luin to.

11 Iue samar Israel a kapas ngani ir, Are ie trek, ie me ni au pue feri; au pue angai peirak an fanu ei me murinna mown me inisin lawn ami trotas kana, ua la ren eue muan kisan eu, ekis pawlsam, ekis owni, me pokus, o mowr, nowt kana o almon kana.

12 Ami au ua la aruouan ami moni le paumi; o pual moni me aluina to lawn ami trotas kana, au pue ua la le paumi; eli an aman angang mual.

13 Au pue pual angai puimi, u te su, ren eue muan:

14 Kot Manaman pue ngani ami tren ren eue muan, pue a pue tina Simion o pual Penjamin. Are a sor nai at kana, iue, a sor.

15 Ekoe muan ra angai kisan peirak, o aruouan moni le peur, o Penjamin; o ra su, et tu Ijip, u te mown Josef.

16 Josef a na ngani Penjamin etei ir, o a kapas ngani trawn souan iman, Ko pue ua la kei aramas le imai, o ni la o amowna ta mownga; pue kei aramas ra pue mownga re i leawlauas.

17 Eue muan a aniatrotis alon Josef; eue muan a ua la ir lawn iman Josef.

18 Iue ra masak ren ar ua la lawn iman Josef; ir ra apasa, Moni me aluina ngani am trotas lom me ra uai kitr lawng lawn ie im ren; pue a epue tip ngani kitr o turfi kitr, sa pue naun trawnangang, o pual am as kana.

19 Ir ra et to ren trawn souan iman Josef, o kapas ren le asaman iman Josef,

20 Iue ra apasa, Maing, atiau sa et to lom amowni mownga:

21 O sa puap suka la am trotas ekis sa pue maur ie, atiau, moni me inisin me nom, naun aman lawn an trotas; am moni me inisin; sa ap ua to le pautr.

22 Ja ua to pual awt moni le pautr amownin

mownga; sa sisilei ia atura tu am moni lawn am trotas kana.

23 I a kapas ngani ir, Au pue kinamue, au te masak : ami Kot, Kot an samami a ken ngani ami peirak lawn ami trotas kana : ami moni a nom rei. Iue a ua to Simion re ir.

24 Eue muan a ua la ir lawn iman Josef, o a ngani ir tran, pue atutu pitrar; o a ken amownga naur as koe.

25 Ir ap amowna ta kisan peirak mown Josef epue et to leawlauas; pue ir rong me ir epue mownga ie.

26 Josef a puap et to le iman, ir ra ua la ren lawn im kisan peirak me nom le peur, o ra trape tu mown i uawn mas ar le puun.

27 I a aiseni ir oson ir, o apasa, Samami, eue atamuk ami arani iei oson, a ken pitrakil? A manau?

28 Ir ra paluani, Nom trawnangang, samatr, a ken pitrakil; a pual manau. Ir ap trape tu.

29 I a satre ta, na ngani puin, Penjamin, naun inan, a apasa, Iei puim setaputer me ami kapas ngani iei? O a apasa, Kot pue afowna en nai at.

30 Josef a failakai, pue a ken tongei trapur puin, o a kitta ekis a epue ketru ie.

31 Iue a orasi, o fai la, a poni trek an, o apasa, Au pue ua to mownga.

32 Ir ra isa ta uis an Josef ren pusin i trek, o uis ar ren pusin ir trek, o uis an re Ijip, me mownga ren i, ren pusin ir trek : pue re Ijip kana ra sap mownga ren Jus koe, pue a pin ren re Ijip.

33 Ir ra mawt tu mown, mown naun lom o setaputer murin; ir ap ueitifengeni lefin ar.

34 I a angai, ainet ngani ir uis ar me ren i; a uis an Penjamin a lap mown uis an aman ir fan limou. Ir unimi, o puapua ren i.

#### SOPON 44.

**J**OSEF a kapas ngani trawn souan iman, apasa, Masoan ngani naun ekoe muan trotas kana

mownga inisin ra to ngani ua la, o isa te lawng naur moni inisin naun aman lawn an trotas.

2 Pual isa te lawng ai sapei, kowp silfer, lawn trotas naun eue setaputer, o pual luinin an mownga. I a feri oson trek alon Josef me a ken apasa ta.

3 A puap sarem la lesor, ra tina la aramas koe, ir o naur as kana.

4 Ir puap fai la sowni eue telinim, ra sap touau, Josef a kapas ngani naun trawn souan, Ko pue u ta, tapue la aramas koe; ko puap tawrei ir, ko pue kapas ngani ir, Puemeta ami paluani murinna me ingau?

5 A sap i me ai samol a ken un sowni, o ren i a ken enleta ta? ami fefer me ingau.

6 I a tawrei ir, o kapas ngani ir kapas koe trek.

7 Ir ra kapas ngani i, Puemeta am samol a ken apasa ta kei kapas? Atiau touau sowni nom trawnangang ei fefer:

8 Atiau, eue moni me sa ueri lawn am trotas sa ken aluina to rem sowni Kenan: ifa oson am epue to ngani solei sowni iman nom samol silfer are kol?

9 Are ko ueri ren aman nom trawnangang a epue me la, o kitr sa pual epue trawnangang an am samol.

10 A ken apasa, A epue oson ami kapas; i a ueri ren aman, i etrek epue nai trawnangang; o ami au sap kilisou.

11 Ir ra muitir eki tu naur trotas me inisin, o ir inisin ap suka la naur trotas kana.

12 I a kitta, popua ta reu me alap le ir, uk tu ren setaputer: o a ueri eue sapei lawn an Penjamin trotas.

13 Iue ra kamue la naur mangaku, ir inisin o eki ta uawn naur as kana puisu ar, ap luin ue lawn eue telinim.

14 Juta o puin kana ra et to le iman Josef; pue a pual nonom ie: ir ra pung tu mown le puun.

15 Josef a kapas ngani ir, Meita ei ami au feria ta? au sisilei me aman oson ngang epue to ngani enleta ta?

16 Juta a apasa, Meita sa pue kapas ngani am



samol? meita sa pue apasa ta? ifa oson sa pue to ngani akafat? Kot a ueri me ingau an nom trawnangang; atiau, kitr sa ken trawnangang an am samol, kitr o pual i me eue sapei a ueri ren.

17 A ap apasa, Atiau tonau sowni iei ei fefer; a muan me sapei a ueri ren i epue ai trawnangang; a oson ami, au pue kinamue fai la ren samami.

18 Juta a arep to ren Josef, apasa, O nai samol, ngang tungorai rem ko pue mout ngani iei nom trawnangang apasa ta awt kapas le seling an nai samol, ko sap sawng ren nom trawnangang; pue en me nene trek Ferao.

19 Nai samol a ken ais ren naun trawnangang, apasa, A or samami, are puimi?

20 Kitr sa ken kapas ngani nai samol, A or samatr, atamuk; o naun atamuan me kisakis me naunau ngani i lupuan an muk la; puin a me la, i etrek a manau ren inan; o saman a ken tongei i.

21 En me kapas ngani nom trawnangang kana, Au pue ua to rei, pue ngang epue nana ngani.

22 Kitr apasa eue atamuan a soto ngani likita la saman; pue are a epue likita la saman, i a epue me la.

23 O en kapas ngani nom trawnangang kana, Are puimi eue setaputer a sap etei ami, ami sap epue ueri masai failfail la trek.

24 Iue, sa puap fai la ren nom trawnangang, samai, sa arani i alon nai samol.

25 Samatr a apasa, Au pue pual fai la amowni ekis an am mownga.

26 Kitr sa ken apasa, sa soto ngani fai tu: are puitr, eue setaputer, a epue etei kitr, sa epue fai tu: pue sa soto ngani ueri masan eue muan, are puitr, eue setaputer, a se etei kitr.

27 Nom trawnangang, samai, a ken kapas ngani kitr, Ami silei me trawnimai a naunau ngani iei atamuan ruoman:

28 Aman a fai sowni iei, o ngang apasa, Atiau, a tinen feseni; ngang I sap na ngani i murin:

29 Are ami pual uai sowni iei at enan, me ingau

ap tawrei i, au pue tina tu makerai powtotapowt lawn paias ren ai trou lelukai.

30 Ie me ni ngang puap fai la ren nom trawnangang, samai, at enan a se etei kitr; powkitan manau an a ri ngani manau an at enan;

31 Iue, a puap ueri me at enan a sa etei kitr, a epue me la: nom trawnangang ra pue tina tu makeran nom trawnangang samatr ren an trou lukan.

32 Pue, nom trawnangang ngang I a puon ngani samai, apasa, Are ngang sap aluina to at enan rem, a epue uk ai etrek ren samai failfail la trek.

33 Ie me ni ngang tungor rem, me nom trawnangang ngang I pue siuili at enan, nonom trek trawnangang an nai samol; at enan pue fai ta etei puin koe.

34 Pue ifa oson ngang epue to ngani fai ta ren samai, at enan a sa etei iei? pue ngang te na ngani me ingau me pue ueri samai.

## SOPON 45.

**J**OSEF a soto ngani poni trek an mown ir inisin me u arawn; o a apasa, Muan inisin ra pue fail ue sowni iei. A semen mo nom ren, lupuan Josef a puara ta pusin i ngani puin koe.

2 I a ketru trapur; re Ijip koe, o naun Ferao kana ra rong.

3 Josef a kapas ngani puin koe, Ngang Josef; samai a pual manau? Puin koe ra soto ngani paluani i, pue ra masak ren.

4 O Josef a kapas ngani puin koe, Au kin to rei. Ir ra arep to. I a apasa, Ngang Josef, puimi me ami amowni ngani Ijip.

5 Au te trungu, are sawng ren pusin ami, pun ami amowni iei to; pue Kot a tina iei to mown ami, pue ngang epue amanaua aramas.

6 Pue iir ruou me fanu a leng ta; o pual iir limou fafai to me sap ua, are ras.

7 Kot a tina la ngang mowmi, pue ngang epue amanaua ngani ami murimur ami uawn fanufan, o seleni ami ren amanau trapur.

8 Ie me ni a sap ami me tina iei to pue Kot: o a ken pual seika ta ngang I epue saman Ferao, o samol an naun traw me inisin, o, samol uawn fanu an Ijip me inisin.

9 Au pue muitir, fai ta ren samai, o kapas ngani i, Iei alon nom muan Josef: Kot a seika ta ngang samol an Ijip me iuisin: ko pue et to rei, ko sap uitaut:

10 Ko pue nonom trek uawn fanu an Kosen, ko ap epue arep ngani iei, en o nom kana o naun nom kana, o nom kau kana, o nom sip kana, o peirak om me inisin.

11 Ngang I epue atanaki ami ie; pue iir limou epue pual leng ta; pue en, o fitukom, o nom me inisin ra te pual uoingau la.

12 Atiau masami ra kuna, o masan pui Benjamin; aui etrek a kapas ngani ami.

13 Ami au pue faws ngani samai ai lingat me inisin uawn Ijip, o peraus an me inisin me ami ueri; ami au pue muitir, ap ua to samai.

14 O a pung tu uawn u an puin Benjamin, o ketru; o Benjamin a ken ketru uawn u an Josef.

15 Josef a pual mitiri puin me inisin, o ketru uawn ir: puin koe ra puap kapas ren murin.

16 Iue, ra rong peraus an lawn iman Ferao, apasa, Puin Josef ra et to; Ferao a afitr, o pual naun koe.

17 Ferao a kapas ngani Josef, Ko pue kapas ngani puim koe, Ie me ni ami au pue feri; au pue eki ta uawn naumi man kana puisi ar, o su, fai la uawn Kanan;

18 O angai samami o naumi kana, o et to rei; ngang epue ngani ami peirak an Ijip me etipuar, o ami epue momownga iui an fanu ei.

19 Ngang I kapas ngang uk, ami au pue feri mini; au pue angai uakon kana sowni Ijip, pue naumi samireit kana, o trawnimami kana ra pue tete uawn, o angai samami, fai to.

20 Au sap lowlilin peirak ami; pue naumi trek me owtr an fanu an Ijip me inisin.

21 Naun Israel koe ra auseling: Josef a ngani ir uakon, oson kapas an Ferao, o pual ngani ir amatur. |

22 A ken ngani ir inisin anienia ar an mangaku; a Benjamin, a ken ngani moni silfer ulupuku, o anienia an mangaku me limou.

23 O ie oson an tina ngani saman; as engawl me ua la pierak an Ijip me etipuar, o as niafehin me puisu ar korn o pret o fituk, amatun saman.

24 Iue a tina la puin koe, o ra su; o a kapas ngani ir, Au te angingi fengen lawn al.

25 Ir ra fai la sowni Ijip, fai la uawn fanu an Kenan ren Jekop samar,

26 O ra kapas ngani i, Josef a manau, o a ken samol an fanu an Ijip me inisin. Lelukan Jekop a me la pue a sap atrifaua ir.

27 Iue ra arani i kapas an Josef me inisin me a ken kapas ngani ir; a puap na ngani uakon koe me Josef a tina to pue ua la i, ngunan Jekop samar ap manaua ta.

28 Israel a apasa, Ie trek; nai at Josef a pual manau: ngang epue fai la na ngani i mown ai me la.

#### SOPON 46.

**I**SRAEL a su, etei naun me inisin, o et to Pirsipa, o keni asawr ngani Kot an saman, Aisak.

2 Iue, Kot a kapas ngani Israel lawn tan lepuin, apasa, Jekop, Jekop. I a apasa, Iei ngang.

3 O a apasa, Ngang Kot, Kot an samom; ko sap masak et tu Ijip; pue ngang I epue feria ta muri-murom ainang lapalap ie:

4 Ngang epue et uk fai tu uawn Ijip; o ngang epue atiau uai uk sowni: Josef epue pual pung ta paun uawn masom.

5 Jekop a su sowni Pirsipa: naun Israel koe ra ua la Jekop, samar, o naur me kiskis kana, o puiluar kana, uawn uakon koe me Ferao a tina to pue ua la i.

6 Ra ua la naur man kana, o naur pisek kana, me ir nauna la uawn fanu an Kenan, ra ap et tu Ijip, Jekop o naun koe me inisin etei i.

7 Naun muan kana, o naur at kana naun nengin kana, o an naun muan koe naur nengin, naun kana me inisin a ua la etei uawn fanu an Ijip.

8 Ikei itan naun Israel kana me et tu Ijip, Jekop o naun muan koe: Rupen mown naun Jekop.

9 O naun Rupen atamuan; Anok, Falu, Esron, o Karmi.

10 Naun Simion atamuan kana; Jemuel, Jamin, Oat, Jakin, Soar, o Jaul naun fefin an Kenan aman.

11 Naun Lifai atamuan kana; Kersom, Koat, o Merari.

12 Naun Juta atamuan kana; Er, Onan, Jila, Fares, o Sara; a Er o Onan ra me la uawn Kenan. Naun Fares atamuan me Esron o Amul.

13 Naun Isakar atamuan kana; Tola, Fufa, Jop, o Jimren.

14 Naun Sepulon atamuan kana; Seret, Ilon, o Jalil.

15 Ekoe naun Lia atamuan me a naunau ngani Jekop uawn Patan Aran, etei naun nengin Taina: me inisin naun muan me nengin kana ilik me uluman.

16 Naun Kat atamuan kana; Sifon, Akki, Juni, Espon, Eri, Aroti, o Areli.

17 Naun Aser atamuan kana; Jimna, Isua, Isui, Piraia, o Sera, mowngai ar: naun Piraia atamuan kana; Iper o Malkiel.

18 Ekoe naun Silpa me Lepan a ngani Lia naun nengin; ekoe a naunau ngani Jekop, engawl me uownuman.

19 Naun Rejel, trawniman Jekop, Josef me Penjamin.

20 O Asinat naun Potifera, prist an On a naunau ngani Josef uawn Ijip Manasa me Ifreim.

21 Naun Penjamin atamuan kana, Pila, Peker, Ajpel, Kira, Neman, Ei, Roj, Mowppim, Oppim, o Art.

22 Ekoe naun Rejel, me a naunau ngani Jekop; ir me engawl me faman.

23 Naun Tan atamuan Ujim.

24 Naun Naftalai atamuan kana, Jasil, Kuni, Jeser, o Jilem.

25 Ekoe naun Pila me Lepan ngani naun nengin Bejel, me ap naunau ir ngani Jekop; ir me fuman.

26 Ir inisin me etei Jekop fai tu Ijip, me a naunau; ir me uowne me uownuman; puiluan naun Jekop muan koe ra se etei aleani;

27 Naun Josef koe naunau ngani i uawn Ijip, ir me ruoman: fituk an Jekop me inisin me et tu uawn Ijip, ir me fik.

28 I a tina la Juta, a epue okom ren Josef, pue a pue pana la i uawn Kosen; ir ra et tu uawn fanu an Kosen.

29 Josef a amowna ta naun uakon, o a fai ta a pue truri saman uawn Kosen; a et to ren, pung tu uawn u an, ap ketru uawn u an fansoun aleilai.

30 Israel a kapas ngani Josef, ngang pue me la kina-mue, pue ngang ueri masom, pue en me pual manau.

31 Josef a kapas ngani puin koe, o fituk an saman koe, Ngang I pue fai ta, puar ngani Ferao, o kapas ngani i, Pui kana, o fituk an samai kana me nom Kenan, ra et to rei;

32 Muan koe me trawnmas an man; ar angang tumunu man; o ir me ua to naur sip kana, o kau kana, o naur pisek me inisin.

33 Iue, Ferao a puap kera to ami, o kapas ngani ami, Ifa ami angang?

34 Me ami au pue apasa, Nom trawnangang sa ken atanaki man sowni samireit tawrei ikanei, kitr o pual samatr kana: pue au pue nonom trek uawn fanu an Kosen; pue re Ijip ra pin me uawn trawnmas an man kana.

## SOPON 47.

**J**OSEF a et to, arani Ferao, apasa, Samai o pui kana, o naur sip kana, o naur kau kana, o peirak ar me inisin, ra et to sowni Kenan; ir nonom Kosen.

2 I a angai ekawt puin koe, muan limman, puar ngani ir Ferao.

3 Ferao a kapas ngani puin Josef koe, Ifa ami angang? Ir ra kapas ngani, Ferao, Nom trawnangang

kitr sa ken trawnmas an man, kitr o pual samatr kana.

4 Ra pual kapas ngani Ferao, Sa et to pue sa pue nonom trek fanu ei; pue sor mowngan nom trawn-angang naur man kana; pue a leng ta trapur fanu an Kenan: ie me ni sa ken tungorai rem ko pue mout ngani nom trawnangang sa pue nonom trek Kosen.

5 Ferao a kapas ngani Josef, apasa, Samom o puim kana ra et to rem:

6 Fanu an Ijip a nom mown; samom o puim koe ra pue nonom trek uawn eif a murinna mown inisin; ra pue nonom trek Kosen: o are en silei me kittamurinna le ir, ko pue seika ta ir uawn nai man kana.

7 Josef a ua lawng lawn Jekop, saman, ap isa ta i mown Ferao: Jekop a afaiatru Ferao.

8 Ferao a kapas ngani Jekop, Fiteu iir an manau om?

9 Jekop a kapas ngani Ferao, Iir an ai siamu me apuku ilik: me trawkukun o me ingau iir an ai manau, ra sap tawrei iir an manau an samai kana lawn ran an ar siamu.

10 Iue Jekop a afaiatru Ferao, o fai la sowni mown Ferao.

11 O Josef a ngani leni an saman o puin, ngani ir fanu ar uawn Ijip, eif me murinna mown me inisin, fanu an Rameses, oson alon Ferao.

12 Josef a ken atanaki saman o puin kana, o nann saman me inisin, amownga ir oson iteit an samireit kana.

13 A sor mownga uawn eue fanu me inisin; pue a leng ta trapur, fanu an Ijip o fanu an Kenan me la powkitan leng.

14 Josef a iown fengeni moni me inisin me nom uawn Ijip o Kenan, luinin mownga me ra ken amowni: Josef a ua la moni koe lawn iman Ferao.

15 Aros moni uawn Ijip o uawn Kenan, re Ijip kana ra et to, kapas ngani Josef, apasa, Ko pue amownga kitr: puemeta sa pue me la rem? pue aros moni.

16 Josef ap apasa, Au pue ngani iei naumi man

kana; o ngang epue ngani ami, ren ami man kana are aros moni.

17 Ir ra ua to ren Josef naur man kana; Josef a ngani ir mownga amownin naur ors kana, o sip kana, o kau kana, o as kana; i a amownga ngani ir an ar, eue iir, luinin naur man me inisin.

18 Auas eue iir, ir ra fai to ren Josef, aruonan iir, o kapas ngani i, Sa sap epue tikumi sowni am samol me aros am moni; am samol a pual nauna la an muit an man kana; a sor awt metawt lusun me en ko pue kuna, inisitr etrek, o fanu atr kana:

19 Puemeta sa pue me la mown masom, kitr o pual fanu atr? ko pue amowni kitr o fanu atr amownin mownga, kitr o fanu am sa pue an Ferao trawna-ngang kana: o ko pue ngani faun, pue kitr sa pue manau, sa sap me la, pue fanu a te pen.

20 Josef a amowni fanu an Ijip me inisin, a pue fanu an Ferao; pue Ijip me inisin ra amowni fanu ar, pue maileng a pualuo la ir; ie oson Ferao a ken nauna la fanu kana.

21 A oson aramas kana, Josef a ua la ir lawn telinim kana, sowni eu kiannin Ijip tawrei eu.

22 Fanu an prist kana i a sap amowni; pue uisan prist kana me ren Ferao, ir momownga uisar me Ferao a ngani ir: ie me ni ra sap amowni fanuar.

23 Iue, Josef a kapas ngani aramas kana, Na ngani, ngang I luini to ami ikanei, o fanu ami, pue Ferao epue nauna la: ie faun au pue angai, fetoka tu fanu ami.

24 Iue, a puap ua, au pue inet ngani uis limou; eu epue naun Ferao, o ruanu epue naumi, pue a pue faun ami fetoka tu fanu ami, o an ami mownga, o an an naumi kana, o an an naumi samireit kana.

25 Ir ra apasa; En me amanaua kitr; sa mowtren ueri am treu me rem, Maing, o sa pue an Ferao trawna-ngang.

26 Josef a make tu kapas an nemani me ra ken amatru uawn Ijip tawrei ikanei, me limasop an peirak me naun Ferao; uawn fanu an prist kana trek sor, pue Ferao a sap fanuani.



27 Israel a nonom trek uawn eif an Ijip a itan Kosen, o ra nauna la peirak ie; ir ap aupua tu, o nutra la trapur.

28 Jekop a manau uawn fanu an Ijip iir engawl me fusu: ie me ni manau an Jekop me inisin, iir apuku faik me fusu.

29 Arep to fansoun me Israel epue me la: i a kera to naun muan Josef, o kapas ngani i, Are ngang I ueri ai tren me rem, ko pue akapel ngani iei, o feru kirakiratratr o atrifau rei; ko sap irei la ngang uawn Ijip:

30 Pue ngang epue kawm la ren samai kana; ko pue uai sowni iei Ijip, o irei la ngang leni an ar paias. Josef a apasa, Ngang pue feru oson trek om kapas.

31 Jekop a apasa, Ko pue akapel ngani iei. I a akapel ngani. Israel ap trape tu uawn lesopan paw.

#### SOPON 48.

**I**UE, murin ikei, aman a kapas ngani Josef, Atiau, samom a somau: i a ua la etei i naun me ruoman, Manasa me Ifreim.

2 Aman a kapas ngani Jekop, apasa, Atiau, nom muan Josef a fafai to rem: Israel atroutrou ngani ap mawt ta uawn paw.

3 Jekop a kapas ngani Josef, Kot Manaman a pue to rei uawn Petel, uawn fanu an Kenan, o afaiatru ngang,

4 I a kapas ngani iei, Atiau, ngang epue aup ngan uk, o atrawmownga la en, o ngang epue feru sowni en aramas trawmowng; o ngang epue ngani murimur om fanu ei a epue fanu ar failfail la trek.

5 Iue nom atamuan ruoman, Ifreim me Manasa, me naunau ngan uk uawn fanu an Ijip, mown ai et to rem Ijip, ir me nai; ra pue nai, oson trek Rupen o Simion.

6 Meni en ko pue naunau la murir, ra pue nom, o ra it sowni puir koe uawn fanu ar.

7 A oson ngang, lupuan ai fai to sowni Patan Aran, Rejel a ken me la rei lawn al uawn fanu an Kenan me arep ngani Efrata: ngang ap irei la i ie lawn al an Efrata, me pual itan Petliem,

8 Israel a na ngani naun Josef koe, o a apasa, Ifa ir ?

9 Josef a kapas ngani saman, Nai atamuan, me Kot a ngani iei uawn fauu ei. Jekop a apasa, Uai ir to rei, ngang ap epue afaiatru ir.

10 Masan Israel ra trun ren an muk, a sa ueri mown. I a uai ir to ren Israel, me metiri ir, o taimawle ir.

11 Israel a kapas ngani Josef, ngang a sap owkiowki ngang epue kuna masom ; a, atiau, Kot a pual aur ngani iei nom at kei.

12 Josef a uai ir sowni lefin an pitran Israel, o a trape tu, uawn masan lepuun.

13 Josef a angai ir ruoman Ifreim le paun pali imuan ngani pali ifefin an Israel, o Manasa le pali ifefin an ngani pali imuan an Israel, ap akana to ir.

14 Israel a ati la pali imuan an paun, isa ta uawn maker an Ifreim, i me kis, o paun pali ifefin uawn makeran Manasa, owkiowki feri paun ; pue Manasa me mown naun.

15 A ap afaiatru Josef, apasa, Kot me samai kana ra ken auseling, eue Kot me ken amownga ngang iteit an manau ai tawrei ikanei,

16 Eue trawnlang me ken tumunu ngang sowni me ingau me inisin, a pue afaiatru at ikei ; itai pue aitan ngani ir, o it an samai koe, Epream o Aisak ; ra pue aupua tu trapur uawn fanufan.

17 Josef a puap silei me saman a isa ta pali imuan an paun uawn maker an Ifreim a ken aput : o a eki ta paun saman, a epue uai sowni maker an Ifreim, isa ta uawn maker an Manasa.

18 Josef a kapas ngani saman, A sap ina, samai ; pue enan mown nai ; ko pue isa ta pali imuan an paum uawn maker an.

19 Saman a uet, apasa, Ngang I silei nai muan, ngang I silei : pual i epue feria ta eu ainang o a epue lapalap ; a enlet puin a kis fan i epue lap mown, o murimuran epue ainang trawmowng.

20 I a afaiatru ir eue ran, apasa : Israel epue afaiatru rem, apasa, Kot pue feri en pue ko pue oson trek Ifreim o Manasa : a seika ta Ifreim mown Manasa.

21 Iue Israel a kapas ngani Josef, Atiau, ngang pue me la; a Kot a epue etei ami, o aluina la ami uawn fanu an samami koe.

22 Ngang I ngani en eu uisom trawmowng mown puim koe, me ngang I uai sowni le paun ainang an Amor ren ai kowtlas o ai asafit.

#### SOPON 49.

**J**EKOP a kera to naun muan koe, apasa, Au pue mou fengen, pue ngang pue arani ami me ni epue ueri ami lawn ran me epue fai to.

2 Au pue mou fengen, o rong, ami naun Jekop kana; au auseling Israel samami.

3 Rupen, mown nai en, ai puara, popun ai puake-trou, ling an manaman, o ling an nemani:

4 Me misapat oson trek tran, ko sap epue lapalap; pue en te te uawn pawan samom; en ingau la ai paw ren om te te uawn.

5 Puipui eu Simion me Lifai; naur kotlas lenian feri ingau.

6 Nguni, ko sap etei ar trulap; nguni, ko sap fai la lawn ar mou fengen, etei ir: pue lupuan ar sawng ra ni la aramas, o lupuan ar nukumatr ra sarei le uawn pitran kau.

7 Me anumamau ar sawng, pue me trapur; o ar kinisa, pue a ingau; ngang epue aimu feseni ir lawn Jekop, o tawropasa la ir lawn Israel.

8 Jufa, en i me puim kana ra pue mareiti; paum epue nom uawn u an me aput en kana; naun samom kana ra pue trape tu mown en.

9 Juta me apan an laion: nai, en me fai ta sowni liap on; a ken trape la, topuaro oson trek laion, oson trek laion niafefin; ifa epue auirairira ta i?

10 A sap a la nemani an Juta, are samol sowni murimuran, tawrei Trawn Amanau a uar to; ainang kana ra epue aniatrotis i.

11 Apan an a ken ri ngani ira krep, o apan an naun as ngani ira krep a rere la; a ken sopo an mangaku lawn uain, o faut an lawn tran krep:

12 Masan epue parapar ren uain, o ni an powtapowt ren tran an aup.

13 Sepulon epue nonom trek arawn mawt an set; a epue mawt an sip kana; kiannin fanu an epue tawrei Saiton.

14 Isakar as pitrakil me topuaro lefin an lenian man kana:

15 I a na ngani me asasa etipuar, o fanu an me murinna; i a luki tu, ap trawnangang ngani re uawn.

16 Tan epue nemani naun aramas lein ainang an Israel kana.

17 Tan epue serpent unukin al, sneik lawn al me ken ku pitran ors, aramas me te te uawn a pung sene ta.

18 Ngang I uitait om amanau, O Jiona.

19 Kat, muit epue puaratro i; a murin a epue puaratro ir.

20 Mownga sowni Aser epue etipuar, i a epue amara ta mowngan samol kana.

21 Naftalai a ken aman tir amusa la; a ken ua to poraus murinna.

22 Josef a ken ira a kitumum, iran unupan tran me kitumum; nengin kana ra trekai uawn oror.

23 Trawn lekasik kana ra ken ninni i trapur, o peki, o aput i:

24 A an lekasik a puaratro, o paun pitrakil ren Kot an Jekop me Manaman; (me trawnmas fau an Israel a ken popu sowni);

25 Ren Kot an samom, me epue alisi en; o ren Kot Manaman, me epue afaiatru en ren faiatr an lang me uawn o faiatr an ilowl me fan, faiatr an aup kana, o faiatr an leluk kana:

26 Afaiatru an samom a ken puaratro mown afaiatru an samai kana, tawrei lesopan trukatrukta me ken nonom failfail la trek: faiatr koe ra pue nonom trek uawn maker an Josef, uawn maker an i me ken aimu sowni ren puin kana.

27 Penjamin epue tinen feseni oson trek uowlf: lesor a epue ani liap an, o lekuniol a epue ineti asarkunu.

28 Ikei me inisin me ainang an Israel engawl me ruou: o ikei faws me samar kapas ngani ir o afaiatru ir; aman oson an faiatr, a ken afaiatru ir.

29 A ap fanau ir, kapas ngani ir, ngang pue fai la ren nai aramas; ko pue irei la ngang ren samai koe, lawn puang an fau me ken nom lan malemal an Efron ainang an Itai,

30 Lawn puang an fau Makpila me arep ngani Mamer, uawn fanu an Kenan, me Epream amowni etei eue fanu sowni Efron me ainang an Itai, pue a epue fanu an paias.

31 Ra ken irei la Epream ie o Sera puiluan; ra ken irei la ie Aisak o Repeka puiluan; o ngang I irei la Lia ie.

32 Iue, fanu o puang an fau me nom lawn me amowni sowni murimur an Et.

33 Jekop auasa la an fanau naun muan koe, a ap numa ta pitran uawn paw, o me la fai la ren an aramas.

### SOPON 50.

**J**OSEF a fawropatrei saman, ketrue ti i o metiri i.

2 Josef a kapas nawni naun sousefai kana, ra pue sefaiani saman pue a te for fengen; sousefai koe ap sefaiani Israel.

3 Ran faik ra ken puakeni ren; pue ie oson ran an ar puakeni ir me ra ken sefaiani pue a te for fengen: o re Ijip ra ken ketrue ti i ran fik.

4 Auas ran an ar ketrue ti i, Josef a kapas ngani naun Ferao kana, apasa, Are ngang I ueri ai tren me re ami, au pue kapas ngani Ferao, apasa,

5 Samai a ken kapas ngani iei ngang epue akapel, pue a ken apasa, ngang pue me la: ko pue irei la ngang lawn ai paias me ngang I tua ta uawn Kenan. Ie me ni ngang I tungorai rem ngang pue fai ta, irei la samai, o ngang epue luin to.

6 Ferao a apasa, Ko pue fai la, irei la samom oson om akapel ngani.

7 Josef a fai ta a pue irei la saman: naun Ferao

me inisin ra etei i fai la, samol an naun traw kana, o samol an Ijip me inisin,

8 O naun Josef me inisin o puin kana, o naun saman kana: naur samireit kana, o naur muit an sip o kau ra ken likita la Kosen.

9 Uakon o aramas me tete uawn ors ra pual etei i: a ken muit trapur.

10 Ra et to uawn naun Atat lenian puoni, me nom peiki lan Jortan, o ra ketru ie trapur; a ken ketruie ti saman ran fusu.

11 Trawn eue fanu, re Kenan, ra puap na ngani ar ketru uawn naun Atat lenian puoni, ra ken apasa, Iei ketru trapur ren re Ijip: ie me ni ekis enan a itan Apel-misraim, me ken nom peiki lan Jortan.

12 Naun koe ra ken feri ngani Jekop oson an kapas ngani ir:

13 Pue naun muan koe ra ken ua la i uawn Kenan, irei la i lawn puang an fau an eue fanu Makpila, me Epream amowni etei eue fanu, pue a epue fanu an paias, sowni Efron ainang an Iti, me nom mown Mamer.

14 Josef a luin tu Ijip, i me puin koe, o pual me inisin me etei i fai ta ra pue irei la saman, murin an irei la saman.

15 Puin Josef koe ra ueri me samar mela, ra ken apasa, Eli Josef epue aput kitr, o a epue atiau luini ngani kitr me ingau me sa feri ngani i.

16 Iue ra tina la trawn atine aman ngani Josef, apasa, Samom a ken fanau kitr mown a me la, apasa,

17 Iei oson au pue kapas ngani Josef, Ngang a tungorai rem ko pue amusa la tipis an puim kana, o ar me ingau; pue ir me feri ngan uk me ingau: iue, sa tungorai rem, ko pue amusa la tipis an trawn-angang an Kot an samom. Josef a sowngisowng lupuan ar kapas ngani i.

18 Puin koe ra pual et to trape tu mown; o ra apasa, Na ngani kitr sa ken nom trawnangang.

19 Josef a kapas ngani ir, Au te masak: pue ia oson, ngang me siuli Kot?

20 A oson ami, ami me owkiowki ingau ngani iei; a Kot me owkiowki a epue lomot murinna, pue a epue apuanua ta oson a ken puanua ta ikanei, a epue amanaua aramas me trawmowng.

21 Ie me ni au te masak: ngang I epue tumunu ami, o naumi me samireit kana. A ken tratrari ir o kapas kirakirowtr ngani ir.

22 Josef a nonom trek Ijip i o naun saman kana; manau an Josef iir apuku engawl.

23 Josef a ueri naun Ifreim kana tawrei auluan pilawn: pual menkol kana naun Makir naun Manasa ra pual nom ngani Josef.

24 Josef a kapas ngani puin koe, ngang epue me la; Kot epue atiau et to remi, o ua la ami uawn ene fanu me a ken akapel ngani Epream, o Aisak, o Jekop.

25 Iue Josef kapas ngani naun Israel kana ra pue akapel, apasa, Kot epue atiau et to remi, o ami au pue ua la trui kana sowni fanu ei.

26 Josef a me la, manau an a tawrei iir apuku engawl: ir ra sefaiani inisin o isa lawng lawn pawr uawn Ijip.

# EKSOTOWS.

---

## SOPON 1.

**I**KEI itan naun Israel kana me et tu Ijip; muan inisin o naun kana ra etei Jekop.

2 Rupen, Simion, Lifai, me Juta,

3 Isakar, Sepulon, me Penjamin,

4 Tan me Naftalai, Kat me Aser.

5 Aramas inisin, up an uawn Jekop, ir me fik; Josef a nonom Ijip mowir.

6 Josef a me la, o puin me inisin, o pual eue pilawn aramas me inisin.

7 Iue murimur an Israel kana ra naunau ta, o aupua tu trapur, o trawmowng la, feria ta ainang trapur; eue fanu a ur la ren ir.

8 Aman king me sisilei Josef, a seika ta uawn Ijip.

9 I a kapas ngani naun aramas, Na ngani, ekoe aramas, murimuran Israel kana me trawmowng o pitrakil mown kitr.

10 Et to, sa pue atupu ir; pue ra te trawmowng la, o epue feri, lupuan meun ingau ra pue trian ngani me aput kitr kana, fiu ngani kitr, ap fai la sowni fan ei.

11 Ie me ni ra ken seika ta trawn popowku ra pue akunakis ir ren angang trapur. O ra au ngani Ferao telinim an isais, Pitom me Ramses.

12 A ra akunakis ir trapur, ra ap naunau tu trapur mown, o trawmowng la; o ra ken lowlilin naun Israel koe.

13 Re Ijip ra akunakis ngani murimur an Israel kana angang trapur;

14 Ra ata la leluk ar trapur ren angang feria, angang an puetr o prik, o sawkun angang an le malemal me inisin; angang feria etrek me inisin me ra ngani ir.



15 Eue king an Ijip a kapas ngani trawn afam an Jus koe, me itan aman Jifra, o itan aman Pua ;

16 O a apasa, Lupuan ami afama finen ekoe Jus, o ueri ar naunau ; are atamuan au pue ni la, a are a ken nengin, a epue manau.

17 Iue ekoe trawn afam ra nuokus Kot, ra sap ause-ling alon king an Ijip, pue ra ken amanaua atamuan kana.

18 King an Ijip a kera to trawn afam ekoe, o kapas ngani ir, Puemeta ami feri ina, amanaua atamuan kana ?

19 Ekoe trawn afam ra kapas ngani Ferao, Pue finen Jus koe ra sap oson trek finen Ijip ; pue ra ken muitir, ra naunau mown trawn afam ra samo et to.

20 Iue Kot a feri murinna ngani trawn afam koe ; o ekoe aramas ra trawmowng la ap feri ainang trapur.

21 Iue, powkitan ekoe trawn afam nuokus Kot, I a apuanua ta murimurir kana.

22 Ferao a amurimur ngani naun aramas me inisin, apasa, Atamuan me inisin me up tu, au pue kusue tu lawn eue tran pupu, a nengin inisin au pue amanaua.

### SOPON 2.

**M**UAN aman, ainang an Lifai, a ken fai la angai puilu an naun Lifai aman nengin.

2 Eue fefin a puopuo, o nauna ta atamuan ; a ueri i at masa murinna, i a opaw la i maram uluat.

3 A soto ngani pual opaw la i, a ken angai afawt ua asat, o puetr ngani pitumen o apatr ; o a isat tu eue at lawn, ap pung tu lawn uouo unupan kawruk.

4 Mowngai an a u ta kuku la, a pue silei me ni epue feri ngani i.

5 Iue naun Ferao nengin a et to a pue tutu lawn eue tranpupu ; naun nengin kana ra kukulou unupan tranpupu ; a ueri eue ua lein uouo, i a tina la naun nengin a pue ua to.

6 A suka la, o ueri eue menkol, a, atiau eue menkol a ken ketru. A ken tongel i, ap apasa, Iei naun aman ekoe Jus at.

7 Mowngai an a kapas ngani naun Ferao nengin, Ko se mowtren ngang pue fai la kera to rem aman finen ekoe Jus a pue aupu ngan uk ei at?

8 Naun Ferao nengin a kapas ngani i, Ko pue fai la. Eue nengin a fai la, ap kera to iran eue at.

9 Naun Ferao nengin a kapas ngani i, Ko pue ua la ei at, aupu ngani iei, o ngang I pue luini ngan uk. Eue fefin ap ua la eue at, aupu i.

10 Eue at a fafai ta, a ap ua la ren naun Ferao nengin; iue a nauna la i. O a ngani itan Moses, apasa, Powkitan ai ataken sowni i lawn kaw nuk.

11 Iue, a feri lawn ekoe ran an, Moses a puap muan, a ken fai la ren puin koe, o a ueri ar riafau; iue a na ngani re Ijip aman a uutri aman ekoe Jus, aman puin.

12 I a nana fetal, a puap ueri a se nom aramas, o a uutri eue re Ijip, ap opaw la i lawn pi.

13 I a fai la aruouan ran, iue, Jus ruoman ra fiu fengen; o a kapas ngani i me ken popua ta, Pue-meta en uutri puim?

14 O a apasa, la me seika ta en samol o trawn apung re atr? En owkiowki ko pue ni iei la oson trek om ni la eue re Ijip? Moses a masak, o apasa, Enlet a puepue la.

15 Ferao a puap rong, a mowtren ni la Moses. Moses a su sowni Ferao, o nonom trek uawn Mitian, o a mawt tu unupan eu kaw nuk.

16 Iue, naun prist an Mitian nengin fuman: ra et to ufi kaw nuk, aur ngani sapei kana ra aunu naun samar sip kana.

17 Trawnmas an sip kana ra et to tapue ir sowni: Moses a u ta, pani ir, ap aunu naur sip kana.

18 Ra puap et to ren Reuel samar, a ken apasa, Ia oson ami failakai to ikanei?

19 Ir ra apasa, Re. Ijip aman a angasa sowni kitr le paun trawnmas an sip kana, a ken pual ufi ngani kitr tran, aunu sip kana.

20 I a kapas ngani naun nengin koe, Pue ia i? puemeta ami likita la eue muan? Au asawra to, pue a pue mownga.

21 Moses me afitr nonom trek ren eue muan : iue, a ken ngani Moses Sipora naun nengin.

22 I a nauna ta atamuan aman; o a ngani itan Kersom : pue a ken apasa, Ngang I siamu uawn fanu an uawn.

23 Iue, lawn ekoe ran me trawmowng, eue king an Ijip a me la : murimuran Israel koe ra ngasapuit powkitan ar riafau; ir ra asawrei, o naur asawrei a ken fai ta ren Kot, powkitan ar riafau.

24 Kot a rong ar ngungu, o Kot a ken tretremani an puon ngani Epream, Aisak, o Jekop.

25 Kot a ken na ngani murimuran Israel koe, o Kot a pual silei.

### SOPON 3.

**I**UE Moses a ken atanaki sip kana, naun Jetro saman puiluan, eue prist an Mitian : o a moanana la sip koe peiki lan eue fanu pan, ap et tu trukatrukta an Kot, Orep.

2 Trawnlng an Jioua aman a pue to ren lawn pulapul an ief uawn ira kisakis afawt : a na ngani, atiau eue ira kisakis a sap fisa la.

3 O Moses a apasa, Ngang pue tawko la nana ngani iei metawt trapur ei, me eue ira kisakis a sap fisa la ren.

4 Jioua a ueri an tawko la a pue kawton, Kot a asawrei ngani i sowni lawn eue ira kisakis, apasa, Moses, Moses. I a paluani, Ngang iei.

5 Iue, a apasa, Ko sap arep to; ko pue uti sowni om sus, me uawn pitrom, pue ekis me en u ta uawn a ken fel.

6 A pual apasa, Ngang Kot an samom, Kot an Epream, Kot an Aisak, o Kot an Jekop. Moses a opaw la mas an, pue a masak nana ngani Kot.

7 Jioua a apasa, Atiau ngang na ngani riafau an nai aramas me nom Ijip, o ngang rong ar ketru ren ar trawnmas kana; pue ngang silei ar riafau kana;

8 Ngang I fai tu I pue amanau ar sowni le paun re Ijip kana, o pue U pue moanan sowni ir eue

fanu ngani fanu etipuar me trapur, fanu me ken pupu ren tran an aup o owni; fanu an ainang an Kenan me Et, me Amor me Peres me Iui me Jepus.

9 Iue, ngang I auseling ketru an murimuran Israel koe; ngang pual ueri an re Ijip ar kunekis ir.

10 Ie me ni ko pue et to, ngang pue tina ngani Ferao en, pue ko pue uai sowni Ijip nai aramas, murimuran Israel koe.

11 Iue, Moses a kapas ngani Kot, Ia ngang, pue ngang epue fai la ren Ferao, o uai sowni Ijip murimuran Israel koe?

12 I a apasa, Enlet ngang pue et uk; iue, iei epue asisinin ngani en me ngang I tina la en; ko uai sowni ekoe aramas Ijip, au pue fel ngani Kot uawn trukatrakta ei.

13 Moses a kapas ngani Kot, Iue, ngang puap et to ren murimuran Israel koe, o kapas ngani ir, Kot an samami kana a tina iei to remi; ir ra kapas ngani iei, Ia itan? meita ai pue kapas ngani ir?

14 Kot ap kapas ngani Moses, **NGANG EPUE ME NGANG EPUE TREK**: o a apasa, Ie oson om epue kapas ngani ekoe murimuran Israel, **NGANG EPUE** a tina iei to remi.

15 Kot a pual kapas ngani Moses, Iei oson om epue kapas ngani ekoe murimuran Israel, Jioua, Kot an samami koe, Kot an Epream, me Kot an Aisak, me Kot an Jekop, a ken tina iei to remi; iei it ai failfail la trek, o iei atretremani ai ngani pilawn aramas me inisin.

16 Ko pue fai la, iown fengeni samol an Israel kana, o kapas ngani ir, Jioua, Kot an samami kana, Kot an Epream, me Aisak, me Jekop a pue to rei, apasa, Atiang ngang I et tu remi, ap nana ngani mini ra feri ngan kemi uawn Ijip.

17 O ngang apasa, Ngang pue ua la ami sowni riafau an Ijip, ua la uawn fanu an ainang an Kenan, me Et, me Amor, me Peres, me Iui, me Jebus; fanu eu me pupu ren tran an aup o owni.

18 Ir ra pue auseling alom; en ko pue fai la, samol an Israel kana et uk, ren king an Ijip; ami au epue kapas ngani i, Jioua, Kot an ekoe Jus, a ken truri kitr: iue, sa tungor rem ko pue ngani kitr kukulou an ran ulu uawn fanupen, pue sa pue keni asawr ngani Jioua am Kot.

19 Iue ngang I silei me king an Ijip a semen epue esetra la ami au pue fai la, a sap ren paun me manaman.

20 Ngang a epue aiti la pai o nini Ijip ren ai manaman me inisin me ngang pue feri paun: a murin, a epue esetra la ami au pue fai la.

21 Ngang I pue atreni aramas kei ren re Ijip kana: iue, au puap fai la, au semen epue fail pen la.

22 Pue fefin inisin ra pue tungor ren aramas unukir o ren ir me ken siamu le im ar, auownu ar silfer, o auownu ar kol, o mangaku: ami epue faute ngani ir naumi at kana o naumi nengin kana; ami epue asarakunu re Ijip kana.

#### SOPON 4.

**M**OSESES a paluani, apasa, Atiau, ra semen epue atrifaua iei, are auseling aloi: pue ir ra pue apasa, Jioua a sap pue to rem.

2 Jioua a kapas ngani i, Meita ena le paum? I a apasa, Uawk afawt.

3 O a apasa, Ko pue pauta tu le puun. Moses a pauta tu le puun, o a uili ti serpent; Moses a su sowni.

4 Jioua a kapas ngani Moses, Aiti la paum, amatra tu ren ukun: (i a aiti la paun, amatra tu i, a ap uili ti uawk le paun:)

5 Pue ir ra pue atrifaua me Jioua, Kot an samar kana, Kot an Epream, Kot an Aisak, o Kot an Jekop a pue to rem.

6 Kot a pual kapas ngani i, Ko pue isa lawng paum fan maramar om. I a isa lawng paun fan maramar an: a puap uai sowni, atiau paun a rup an puater, a powtawpawt oson trek sno.

7 O a apasa, Ko pue pual isa lawng paum fan maramar om. (Moses a pual isa lawng paun fan maramar an; a puap pual uai sowni fan maramar an, atiau, a pual uili ti oson ue trek kilin me inisin.)

8 Iue, are ra sap atrifaua en are auseling alon manaman an lom, ra pue atrifaua alon aruou an manaman.

9 Iue are ra sap atrifaua manaman ruou kei, sap pual auseling alom, ko pue angai tran sowni tranpupu, o niena la uawn fanu; eue tran me en angai sowni eue tranpupu, a pue uili ti tra uawn fanu.

10 Moses a kapas ngani Jioua, O Jioua, ngang I sap trawn kapas, sap lom are ikanei murin om kapas ngani iei nom trawnangang: pue ngang me ku ingau ai kapas, o tranauai a trau.

11 Jioua ap kapas ngani i, Ia me feria ta auan aramas? ia me amowtru auan aramas are apinga la selingan, anene la are atruna la mas an? a sap ngang Jioua?

12 Iue, ko pue fai la, o ngang I pue etei auom, o afalafala en mini ko pue apasa ta.

13 I a apasa, O Jioua, ngang tungor rem, ko pue tina la ren paun aman ko pue mowtren tina la.

14 Jioua a sawng ren Moses, o a apasa, A sor puim, Aron ainang an Lifai? ngang I silei i a ken sileilap kapas. O pual, atiau, a ken et to rem; a puap ueri en a pue puapua lelukan.

15 Ko pue kapas ngani i, o amaso ngani auan kapas kana: o ngang I pue etei auom o auan, o afalafala ami mini au pue feri.

16 O i epue nom trawn kapas ngani ekoe aramas: o i epue auom, o ko pue oson trek Kot ngani i.

17 Ko pue ua la lawn paum ei uawk, me ko pue feri ekoe manaman ren.

18 Iue Moses a la, luin ue ren Jetro saman puiluan, o kapas ngani i, Ngang tungor rem ko pue likita la ngang pue ngang pue a la, luin ue ren pui kana me nonom Ijip, pi are ra pual manau. Jetro a kapas ngani Moses, Ko pue fai la kinamue.

19 Jioua a kapas ngani Moses uawn Mitian, Ko

pue fai la, luin ue uawn Ijip: pue muan monison me mowtren ni la en ra mela.

20 Moses a angai puiluan o naun at koe, o isa ta ir uawn aman as, a ap luin ue uawn Ijip: Moses a ua la uawk an Kot le paun.

21 Jioua a kapas ngani Moses, Ko pue luin ue uawn Ijip, ko puap atanaki, feri mown Ferao manaman me inisin me ngang I isa lawng paum: iue ngang I pue aferiai lelukan, a semen epue esetra la ekoe aramas.

22 Ko pue kapas ngani Ferao, Kei me kapas an Jioua Israel me nai, mown nai:

23 Iue ngang I kapas ngan uk, Ko pue esetra la nai, pue a pue fel ngani iei: en uet esetra la i; atiau ngang pue ni la nom muan, mown nom.

24 Iue lupuan ar fai la, ekis ra ken thaur ie, Jioua a ken truri i, a pue ni la i.

25 Sipora a angai sar fau, sirkomsaisi naun atamuan, o pauta tu le pitran; o a apasa, Enlet puiluan tra en rei.

26 I a likita la i. Nemin a apasa, Puiluan tra en, powkitan sirkomsais.

27 Jioua a kapas ngani Aron, Ko pue fai la uawn fanupen, truri Moses. I a fai la, truri i uawn truka-truktan Kot, ap mitiri i.

28 Moses a arani Aron an Kot kapas inisin me a tina la Moses ren, o manaman inisin me a aiti ngani i.

29 Iue Moses me Aron ra fai la amuit fengeni samol an murimuran Israel me inisin:

30 Aron a apasa ta kapas inisin me Jioua a kapas ngani Moses, o feria ta manaman koe mown ekoe aramas.

31 Ekoe aramas ra atrifaua: o ra puap rong me Jioua a ken et tu ren murimuran Israel kana, o me a ken nana ngani ar riafau, ra ap trape tu maker ar, iawtok.

#### SOPON 5.

**M**URIN kei Moses me Aron ra fai to, kapas ngani Ferao, Iei alon Jioua, Kot an Israel, Ko pue

likita la nai aramas, pue ra pue feri fetelalap ngani iei uawn eue fanupen.

2 Ferao a apasa, Ifa i Jioua, pue ngang pue ause-ling alon, likita la Israel? Ngang sisilei Jioua, o pual ngang semen epue likita la Israel.

3 Ir ra apasa, Kot an ekoe Jus a ken truri kitr; sa tungor rem ko pue esetra la kitr sa pue fai la uawn fanupen urur an ran uluat keni asawr ngani Jioua am Kot; pue a te ni kitr ren somau me lalalap are kowtlas.

4 Eue king an Ijip a kapas ngani ir, Puemeta ami, Moses me Aron au ken apui sowni ekoe aramas ar angang kana? au pue fai la, feri naumi angang.

5 Ferao a apasa, Atiau, trawn fan ei ra me traw-mowng, o ami au ken apui sowni ir ar angang.

6 Ran ue trek Ferao a ken amurimuri ngani trawn-mas an ekoe aramas, o naur samol kana, apasa,

7 Au sap pual ngani aramas fetil ra pue feri prik ren oson trek lom: ra pue pusin fai la angai pusin naur fetil.

8 A iteit an prik kana, me ir feria ta nono to, au pue pual aleani ngani ir: au sap akisakisa tu ekis: pue ir me tumun ingau etrek; ie me ni ra ken asawrei, apasa, Likita la kitr pue sa pue fai keni asawr ngani am Kot.

9 Au pue alapa la angang au ekoe muan, pue ra pue feri; ra sap epue owkiowki kapas trawfana.

10 Trawnmas an ekoe aramas, o naur samol kana ra fai la, kapas ngani ekoe aramas, apasa, Iei alon Ferao, ngang sap epue ngani ami fetil.

11 Au pue pusin fai la, angai ami fetil ekis au pue to ngani ueri ie: pue ami angang a sap akisakisa tu ekis.

12 Ekoe aramas ra fail fetal uawn fanu an Ijip me inisin pue ra pue angai powkan siuili an fetil.

13 Ekoe trawnmas ra ken eriani ir, apasa, Au pue auasa la ami angang, iteit an angang an ran kana, oson trek lupuan a or fetil.

14 O ra ken nini samol an murimuran Israel koe,



me an Ferao trawnmas koe seika ta uawn ir; o ra ais re ir, Puemeta ami sap auasa la iteit an naumi angang nanau o pual ikanei, feria ta prik oson trek lom?

15 Samol an murimuran Israel kana ra et to asawrei ngani Ferao, apasa, Puemeta en feri ngani nom trawnangang kana oson me?

16 Ra sap ngani kitr, nom trawnangang kana, fetil, o ra apasa, Au pue feria ta prik; o ra nini kitr, nom trawnangang; a pusin nom aramas etrek me tipis.

17 Ferao a apasa, Tumun ingau etrek, tumun ingau etrek ami: ie me ni ami apasa, Ko pue likita la kitr, pue sa pue fai la keni asawr ngani Jioua.

18 Ie me ni au pue fai la, angang; sa sap ngani ami fetil, o ami epue feria ta iteit an prik kana.

19 Ekoe samol an murimuran Israel koe ra ueri me ariafau trapur ngani ir ar apasa, Au sap epue anukisakisa tu awt sowni ami prik kana iteit an angang an ran kana.

20 Iue ra truri Moses me Aron, me u lawn al lupuan ar fai la sowni Ferao:

21 Ra ap kapas ngani ir, Jioua pue nana ngani ami, ap enleta ta; pue ami feri kitr po ingau fan masan Ferao, o fan masan naun kana, isa lawn kowtlas le paur pue ra pue ni la kitr.

22 Iue, Moses luin to ren Jioua, apasa, Jioua, Puemeta en feri me ingau ngani kei aramas? puemeta en tina iei to?

23 Pue murin ai et to ren Ferao pue ngang kapas fanasengan en, a ken feri ingau ngani kei aramas; pual en sap angasa la nom aramas ren eu awtaw.

#### SOPON 6.

**J**IOUA a kapas ngani Moses, Ikanei ko pue ueri mini ngang epue feri ngani Ferao: pue ren paun a pitrakil a epue esetra la ir, o ren paun a pitrakil a epue tapue sowni ir fanu an.

2 Kot a kakapas ren Moses, kapas ngani i, Ngang Jioua:

3 Ngang I pue to ren Epream, Aisak, me Jekop ren itai Kot Manaman; a itai Jioua ngang I sap asilei ngani ir.

4 Ngang I anowkua tu ai puon re ir, ngang epue ngani ir Kenan, leni an ar siamu, me ir siamu uawn.

5 Ngang I pual rong ngungu an ekoe murimuran Israel, me re Ijip koe ra naunir amanau; ngang I tretremani ai puon.

6 Ie me ni ko pue kapas ngani ekoe murimuran Israel, Ngang me Jioua, o ngang epue uai la ami sowni naumi riafau ren re Ijip, o ngang epue angasa la ami sowni ar kunukis ngani ami, o ngang epue amanaua ami ren paun a aiti la, o nini trapur kana:

7 O ngang epue angai ami, pue au pue nai aramas, o ngang epue naumi Kot: ami au epue silei me ngang I ken Jioua naumi Kot, me ken uai la ami sowni naumi riafau kana fan re Ijip.

8 O ngang epue uai la ami uawn eue fanu me ngang I aua ta pai ren me ngang epue kisan ngani Epream, me Aisak, me Jekop; ngang I epue kisan ngani ami pue au pue fanuani: ngang me Jioua.

9 Ikei kapas Moses a fawse ngani ekoe murimuran Israel: iue, ir ra sap auseling Moses, pue ngun ar me trou, o ar angang trapur.

10 Jioua a kapas ngani Moses, apasa,

11 Ko pue fai lawng lawn, o kapas ngani Ferao, king an Ijip, a pue esetra la ekoe murimuran Israel, pue ra pue fai la sowni fanu an.

12 Moses a mangungu mown Jioua apasa, Atiau, ekoe murimuran Israel ra sap auseling iei; ia oson Ferao epue auseling iei pue auai a sap sirkom-sais?

13 Jioua a kapas ngani Moses me Aron, o fanau ir ren ekoe murimuran Israel, o pual ren Ferao, king an Ijip; pue ra pue uai ekoe murimuran Israel sowni fanu an Ijip.

14 Ikei samol lein ainang an samar kana: naun

Rupen mown naun Israel; Anok, Pallu, Esron, me Karmi: ekoe me ainang an Rupen kana.

15 Naun Simion kana; Jemuel, Jamin, Oat, Jakin, Soar, me Jaul naun finen Kenan aman: ekoe ainang an Simion kana.

16 Ikei itan naun Lifai kana lawn pilawn ar kana; Kerson, Koat, me Merari; iir an manau an Lifai kana me apuku ilik me fusu.

17 Naun Kerson kana; Lipni me Jimeai, oson ar ainang kana.

18 Naun Koat kana; Amram, Issar, Ipron, me Owssiel: iir kana an manau an Koat me apuku ilik me uluat.

19 Naun Merari kana; Mali me Musi: Ekoe ainang an Lifai kana lawn pilawn ar kana.

20 Amram a ken angai puiluan, Jokepet, mowngai an saman; a ap naunau ngani i Aron me Moses: iir kana an manau an Amram me apuku ilik me fusu.

21 Naun Issar kana; Kora, Nefek me Sikrai.

22 Naun Owssiel kana; Misael, Elsefan o Sitri.

23 Aron a puiluan Elisepa, naun Aminatap, mowngai an Nason; o a naunau ngani i Netap, Apaiu, Eliesar me Itamar.

24 Naun Kora kana; Assir, Elkena me Apiasaf; ikei ainang an naun Kora kana.

25 Eliesar, naun Aron a puiluan aman naun Putiel; i a naunau ngani i Fineas. Ekoe me samol an ainang kana lein murimuran Lifai kana.

26 Iei Aron me Moses me Jioua a kapas ngani, Au pue uai la murimuran Israel koe sowni fanu an Ijip, oson muit an trawn flu kana.

27 Iei ir me ken kapas ngani Ferao king an Ijip, pue ra pue uai la murimuran Israel koe sowni Ijip: iei etrek Moses me Aron.

28 Iue, lawn ran an Kot a mangungu ngani Moses uawn Ijip,

29 A ken kapas ngani Moses, apasa, Ngang Jioua: ko pue arani Ferao king an Ijip me inisin me ngang epue kapas ngan uk.

30 O Moses a apasa mown Jioua, Atiau, atiai a sap sirkomsais, ifa oson Ferao epue auseling iei?

## SOPON 7.

**I**UE, Jioua a kapas ngani Moses, Na ngani, ngang I feria ta en kot aman ngani Ferao: o Aron, puim, a epue nom soufaws.

2 Ko pue apasa me inisin ai kapas ngan uk; Aron, puim, a pue kapas ngani Ferao a pue tina la murimuran Israel koe sowni fanu an.

3 Iue, ngang I epue aferiai lelukan Ferao, o atraw-mownga la ai asinan kana o ai manaman kana uawn fanu an Ijip.

4 Iue, Ferao a samo epue auseling ami, o ngang I epue pung tu pai uawn Ijip, o uai sowni nai muit an trawn fiu, nai aramas murimuran Israel kana, sowni fanu an Ijip ren nini trapur.

5 Re Ijip ra pue silei me ngang I me Jioua, ngang puap aiti la pai uawn Ijip, uai sowni lepet ar murimuran Israel koe.

6 Moses me Aron ra feri me, oson trek Jioua a kapas ngani ir, ie oson ar fefer.

7 Iue, manau an Moses iir me ualik, o Aron ualik me uluat lupuan ar kapas ngani Ferao.

8 Jioua a kapas ngani Moses me Aron, apasa,

9 Lupuan Ferao epue kapas ngani ami, apasa, Au puara ta awt ami manaman: ko ap epue kapas ngani Aron, Ko pue angai nom uawk, pauta tu mown Ferao, pue a pue uili ti serpent.

10 Moses me Aron ra fai lawng lawn ren Ferao, o ra feri oson ue trek Kot a kapas ngani ir: Aron a pauta tu an uawk mown Ferao, o mown naun trawna-ngang kana, o a uili ti serpent.

11 Ferao a kera to muan tipatrem kana, o souanu kana: pual ir, trawn feri anu an re Ijip kana, ra feri oson ue trek ren ar fefer.

12 Pue ir inisin pauta tu naur uawk kana, o ra uili ti serpent: iue, uawk an Aron a oropuilu lawng naur uawk kana.

13 Lelukan Ferao a outro la, a sap auseling ir, oson trek Jioua a apasa ta.

14 Jioua a kapas ngani Moses, Lelukan Ferao a trou, a uet esetra la aramas koe.

15 Ko pue fai la ren Ferao lesor; a pue et tu le tran; ko pue u ta unukun kawruk pue ko pue truri i; eue uawk me uili ti sepent ko pue ua la le paum.

16 Iue, ko pue kapas ngani i, Jioua, Kot an ekoe Jus a tina iei to rem, apasa, Ko pue esetra la nai aramas pue ra pue fel ngani iei uawn eue fanupen: na ngani, nonom to en sap auseling.

17 Iei an Jioua kapas, Ren iei ko pue silei me ngang I ken Jioua; atiau, ngang epue uutri tran kana lawn eue tranpupu ren uawk me nom le pai, ra epue uili ti tra.

18 Ik kana lawn eue tranpupu ra pue me la, tranpupu a pue po ingau; re Ijip kana ra pue aput unimi tran an eue tranpupu.

19 Iue, Jioua a ken kapas ngani Moses, Ko pue kapas ngani Aron, Angai nom uawk auena la paum uawn tran an Ijip kana, uawn naur tranpupu kana, o naur aura kana, o kawruk kana o naur kawruk fis kana pue ra pue uili ti tra; a epue tra etrek uawn eif an Ijip me inisin, lawn sapei ira kana o sapei fau kana.

20 O Moses me Aron ra feri oson ue trek Jioua a apasa ta; a ken eki tu eue uawk o uutri tran kana lawn eue tranpupu mown Ferao o mown naun trawna-ngang kana; tran kana lawn eue tranpupu a uili ti tra.

21 Ik kana lawn eue tranpupu ra me la; tranpupu a po ingau, o re Ijip kana ra soto unimi kawruk an eue tranpupu; iue, a uor tra uawn fanu an Ijip me inisin.

22 Souanu kana an Ijip ra feri oson trek ren ar feri anu: lelukan Ferao a una feria, a sap auseling ir; oson trek Kot me apasa ta.

23 Ferao a sep la, fai la le iman, a sap tian lowlilin.

24 Re Ijip me inisin ra tua ta le peikin tranpupu.

pue ra pue un kaw nuk ; pue ra soto ngani unimi kaw nuk an tranpupu.

25 Iue ran kana a fusu, murin Kot a ken auili la eue tranpupu.

## SOPON 8.

**J**IOWA a kapas ngani Moses, Ko pue fai lawng lawn ren Ferao, kapas ngani i, Iei an Jioua kapas, Ko pue esetra la nai aramas pue ra pue fel ngani iei.

2 Iue are en uet esetra la ir, atiau, ngang epue ninni fanu om me inisin ren frok kana.

3 Eue tranpupu a pue ur an frok kana ; ra pue fai ta, fai lawng lawn imom, o om ueip an maur, o uawn om paw, o lawn iman nom trawnangang kana, o uawn nom aramas kana, o lawn om um kana, o lenian auuau pret kana :

4 Ekoe frok ra fai ta uawn en o uawn nom aramas kana, o uawn nom trawnangang kana.

5 Jioua a kapas ngani Moses, Ko pue arani Aron, Aiti la paum etei nom uawk uawn tranpupu kana, aura kana, o kaw nuk fis kana, tina to frok kana uawn fanu an Ijip.

6 Aron a aiti la paun uawn tran an Ijip kana ; frok kana ra fai ta, pualuo la fanu an Ijip.

7 Souanu kana ra feri oson trek ren naur feri anu kana, o tina to frok kana uawn fanu an Ijip.

8 Iue, Ferao kera to Moses me Aron, apasa, Au pue iawtok ngani Jioua a epue uai sowni iei, o nai aramas kana frok kana ; ngang I epue esetra la ekoe aramas, pue ra pue keni asawr ngani Jioua.

9 Moses a kapas ngani Ferao, Uown om etrek ; inet ngang pue iawtoki en me naum trawnangang kana, o nom aramas kana, pue frok kana ra pue ni sowni en o nom im kana, ap nonom trek lawn eue tranpupu etrek ?

10 I a apasa, Lao. Moses a apasa, A pue oson trek om kapas ; pue ko pue silei me a sor aman oson trek Jioua am Kot.

11 Frok kana ra pue a la sowni me rem, o sowni nom im kana, o sowni nom aramas kana; ra pue nonom trek lawn eue tranpupu etrek.

12 Moses me Aron ra fai la sowni Ferao: iue, Moses a ken iawtok ngani Jioua oson frok kana me a ken tina to uawn Ferao.

13 Jioua a feri oson trek an Moses kapas; frok kana ra me la sowni im kana, o sowni fel kana o sowni malemal kana.

14 Ir ra iown fengeni frok kana lawn ioian kana; eue fanu ap po ingau.

15 Ferao a ueri a ken ngasa la i a feri ana leluk an, a sap auseling ir, oson trek Jioua apasa.

16 O Jioua a kapas ngani Moses, Ko pue kapas ngani Aron, Aiti la nom uawk, o uitri puun moramor an fanu, pue a epue uili ti ku uawn fanu an Ijip me inisin.

17 Ir ra feri me ni; Aron a aiti la paun etei an uawk, o a uitri puun moramor an fanu, a uor ku uawn aramas o man; puun moramor me inisin uili ti ku uawn fanu an Ijip me inisin.

18 Souanu kana ra feri me ni ren naur feri anu kana, pue ra pue feria ta ku, a ra soto ngani: ku ra nonom trek uawn aramas o man.

19 Souanu kana ra kapas ngani Ferao, Iei autan Kot: leluk an Ferao ap una feria, a sap auseling ir; oson trek Kot a ken apasa.

20 Jioua ap kapas ngani Moses, Ko pue ukasor la lao, o u ta mown Ferao; a pue fai la ngani kawruk; ko pue kapas ngani i, Ie me ni Kot a ken apasa, Ko pue esetra la nai aramas, pue ra pue fel ngani iei.

21 Are ko sap esetra la nai aramas, atiau, ngang pue tina to muit an lawng uawn uk, o uawn nom trawnangang kana, o uawn nom aramas kana, o lawn imom kana: iman re Ijip kana ra pue ur an muit an lawng kana, o fanu ra nom uawn.

22 O lawn ran ue ngang I epue aimu sowni fanu an Kosen me nai aramas ra nom uawn, pue sor muit

an lawng ra pue nom ie; pue ko pue silei me ngáng I Jioua lefin an fanufan.

23 Ngang pue aimu fesengi nai o nom aramas: lao asinan ei epue puanua ta.

24 Jioua a feru me ni; muit an lawng ingau ra et to le iman Ferao, o le iman naun trawnangang kana: uawn fanu an Ijip me inisin, fanu a ingau la powkitan muit an lawng koe.

25 Ferao a kera to Moses me Aron, o apasa, An pue le la, keni asawr ngani naumi Kot uawn fanu ei.

26 Moses a apasa, A sap murinna feru me ni; pue sa pue keni ngani Jioua am Kot, me ni a fel ren re Ijip kana; sa pue keni me fel ren re Ijip mown mas ar; ra semen epue atrei kitr?

27 Sa pue fai la urur an ran uluat uawn eue fanu pen, o keni asawr ngani Jioua am Kot oson trek a epue kapas ngani kitr.

28 Iue, Ferao a apasa, Ngang I epue esetra la ami, pue ami epue keni asawr ngani Jioua ami Kot uawn eue fanu pen; a ami sap fai la kuku la: ami pue iawtoki ngang.

29 Moses a apasa, Na ngani, ngang pue fai la sowni en, ngang puap epue tungor ren Jioua me muit an lawng kana ra pue su la sowni Ferao, o naun trawnangang kana, o naun aramas kana lao: a Ferao a sap pual atupu kitr, amatra la aramas pue ra te fai la, keni asawr ngani Jioua.

30 Moses a fai la sowni Ferao, ap tungor ren Jioua.

31 O Jioua a feru oson ue trek an Moses kapas; a ken uai sowni Ferao muit an lawng kana, o sowni naun trawnangang kana, o sowni naun aramas kana; a sor aman a lusun.

32 Ferao a pual feru ana lelukan, a sap esetra la ekoe aramas.

### SOPON 9.

**J**IOUA a kapas ngani Moses, Ko pue fai lawng lawn ren Ferao, o kapas ngani i, Ie me ni Jioua,



Kot<sup>a</sup>n Jus koe a ken apasa, Ko pue esetra la nai aramas pue ra pue fel ngani iei.

2 Pue are en uet esetra la ir, amatra la ir erek,

3 Na ngani, paun Jioua a nom uawn nom man kana me nom le malemal, uawn ors kana, uawn as kana, uawn kamel kana, uawn puin kau kana, o uawn puin sip kana : ra pue somau trapur.

4 Jioua a pue aimu fesengi man an Israel kana me man an Ijip kana : a sor aman naun murimuran Israel koe a pue me la.

5 Jioua a sineli fansoun, apasa, Lao Jioua epue feru me ni uawn fanu ei.

6 Jioua a feru mini koe soretan, man an Ijip me inisin ra me la : a sor aman me la lein man an murimuran Israel koe.

7 Ferao a tina la, a, atiau, a semen mo lein man an Israel kana a me la. Leluk an Ferao a una feria, a sap esetra la aramas koe.

8 Jioua a kapas ngani Moses me Aron, Au pue raku falang an ekei, Moses a epue asupua ta lang mown Ferao.

9 A ap epue uili ti moramor an puun uawn fanu an Ijip me inisin, o a epue matr me epue suka la rup uawn man o aramas uawn fanu an Ijip me inisin.

10 Ra angai falang an ekei, o u ta mown Ferao; Moses a asupua ta lang; a ap uili la matr me suka la rup, uawn man me aramas.

11 Souanu kana ra soto ngani u ta mown Moses powkitan matr kana; pue matr kana nom uawn souanu kana o uawn re Ijip me inisin.

12 Jioua a feru ana leluk an Ferao, a sap auseling ir, oson trek an Jioua kapas ngani ir.

13 Iue, Jioua a kapas ngani Moses, Ko pue ukasor la lao, u ta mown Ferao, o kapas ngani i, Iei kapas an Jioua Kot an Jus koe, Ko pue esetra la nai aramas, pue ra pue fel ngani iei.

14 Pue iei fansoun ngang epue tina to ai ninni me inisin lelukom, o uawn nom trawnangang kana, o uawn

nom aramas kana; pue ko pue silei me a sor aman oson trek ngang uawn fanufan me inisin.

15 Pue ngang aiti la pai o ninni en me nom aramas ren ninni me lapalap, ami epue ukifi sowni fanufan;

16 A, enlet, powkitan mini, ngang I amatru en, pue ngang pue puar ngan uk ai manaman, o me itai pue puara ta uawn fanufan me inisin.

17 A en me pual pusin alapalapa en ngani nai aramas, om uet esetra la ir?

18 Atiau, lao atun iei trek, ngang epue amawra tu ut an fau trapur, a sap oson ue trek me pung tu uawn Ijip sowni popun tawrei ikanei.

19 Ie me ni ko pue tina la, amuitira to nom man kana o nom me inisin me nom lawn malemal; pue aramas o man me inisin me epue nonom trek lawn malemal, me sap uai to leni ar, ut an fau epue pung tu uawn ir, o ra pue mela.

20 Naun Ferao trawnangang kana me ken masak kapas an Jioua, ra amuitira to naur trawnangang o naur man kana lawn im kana.

21 O me sap atanaki kapas an Jioua ra ken likita la naur trawnangang kana o naur man kana lawn malemal.

22 Jioua a kapas ngani Moses, Ko pue aiti ti paum lang, pue a pue pung tu ut an fau fanu an Ijip me inisin, uawn aramas, o uawn man me inisin, o uawn petuel me inisin, uawn eif an Ijip me inisin.

23 Moses a aiti ta lang an uawk: Jioua a tina to manung o ut an fau, o ekei a mawra tu uawn fanufan; Jioua a amawra tu ut an fau uawn fanu an Ijip.

24 Iue, a ken ut an fau, o ekei tolan ngani ut an fau, a ingau trapur, a sor oson trek uawn fanu an Ijip inisin murin a popua ta ainang uawn.

25 Ut an fau a ninni uawn eif an Ijip me inisin, mini koe me nom lawn malemal me inisin, aramas o man; ut an fau a pual ni la petuel inisin, o trunaket an malemal me inisin.

26 Uawn fanu an Kosen etrek, ekis murimuran Israel kana ra nonom ie, a sor ut an fau.

27 Iue, Ferao a tina la, kera to Moses me Aron, o kapas ngani ir, Ngang I tipis ikanei: Jioua me mireit, a ngang o nai aramas kana me ingau.

28 Ko pue tungor ren Jioua; pue me trawmowng kei manung trapur kana o ut an fau; ngang I pue esetra la ami, au sap pual nonom.

29 Iue, Moses a kapas ngani ir, ngang pue fai la, ngang puap nom lukin telinim, ngang epue aiti ta pai me ruofawt ngani Jioua; manung kana ra pue uk tu, a sap pual pung tu ut an fau; pue ko pue silei me naun etrek Jioua fanufan.

30 A oson en o nom trawnangang kana, ngang I silei au sap epue auseling Jioua Kot ikanei.

31 Iue flaks o parli ra ni la, pue parli a ua, a flaks a et.

32 A uit me spelt ra sap ni la; pue ra sap lapa-lap la.

33 Iue, Moses a la sowni Ferao, fai la lukin telinim, o aiti ta paun me ruofawt ngani Jioua: manung me ut an fau ra uk tu, a sap pual pung tu ut uawn fanufan.

34 Ferao a ueri a uk tu ut me manung o ut fau, o a pual feri ingau, feri ana lelukan, i o pual naun trawnangang kana.

35 Lelukan Ferao a una feria, a sap esetra la ekoe murimuran Israel; oson trek an Jioua kapas ren Moses.

#### SOPON 10.

**J**IOUA a kapas ngani Moses, Ko pue fai lawng lawn ren Ferao: pue ngang I feri ana lelukan, o lelukan naun trawnangang kana, pue ngang epue puara ta ai asinan kana lefin ar:

2 O ko pue apasa ta le seling an nom muan, o naun nom muan mini koe ngang feria ta uawn Ijip, o ai asinan kana me ngang I feria ta lefin ar; pue au pue silei ngang me Jioua.

3 Moses me Aron ra fai lawng lawn ren Ferao, o ra kapas ngani i, Iei kapas an Jioua, Kot an Jus koe, Ia

alein ko pue uet auseling iei? ko pue esetra la nai aramas pue ra pue fel ngani iei.

4 Pue are en uet esetra la nai aramas, atiau lao ngang epue tina lokows uawn fanuom :

5 Ir ra pue pualuo la fanu, aman a soto ngani ueri puun : ir ra pue ani mini a ngas la, me lusun re ami sowni ut an fau, o ra pue ani trunaket inisin me mara ngani ami sowni malemal.

6 Imom kana ra pue ur an lokows, o iman nom trawnangang kana, o iman re Ijip me inisin; samom kana, are saman samom kana ra samo ueri oson trek ir, murin ran an ar nom uawn fanufan nono to ikanei. I a sep ue fai la sowni ren Ferao.

7 Naun Ferao trawnangang ra kapas ngani i, Ia alein muan enan epue amangaua kitr? ko pue esetra la ekoe muan pue ra pue fel ngani Jioua ar Kot: en sap silei me Ijip a ta?

8 Iue, ra aluina to Moses me Aron ren Ferao: o a kapas ngani ir, Au pue fai la fel ngani Jioua ami Kot: a ia le ami epue fai la?

9 Moses a apasa, Sa pue fai la fitei am samireit kana, o am muk la kana, atamuan kana o am nengin kana, am muit an kau kana, o am muit an sip kana ra pue etei kitr; pue sa pue feri fetelalap ngani Jioua.

10 I a kapas ngani ir, Jioua epue etei ami oson trek ai esetra la ami me naumi samireit kana; au na ngani, pue me ingau a nom fan masami.

11 A sap ina: me muan le ami au pue fai la fel ngani Jioua; pue iei trek ami mowtren. Aman a tapue ir sowni Ferao.

12 Jioua a kapas ngani Moses, Ko pue aiti la paum uawn fanu an Ijip pue lokows kana pue et to uawn fanu an Ijip, o ani uelauel an fanu me inisin, me inisin me lusun ren ut an fau.

13 Iue, Moses a aiti la an uawk uawn fanu an Ijip, Jioua a tina to asapual an masanran uawn eue fanu, anitrou to leran ue me lepuin; lesor eue asapual an masanran a ua to lokows kana.

14 Lokows kana ra pualuo la fanu an Ijip me inisin,

o nonom trek uawn eif an Ijip me inisin; me ingau trapur ir; a sor lokows oson trek ir me nom mowar, pual murir a sor me pue oson trek.

15 Pue ra pualuo la masan fanu me inisin, eue fanu a rotopuak la; o ra ani uelauel an eue fanu me inisin, o uan ira me inisin me lusun ren ut an fau; a sor awt me manau me lusun, trunaket are uelauel uawn eif an Ijip me inisin.

16 Ferao a muitir kera to Moses me Aron; o a apasa, Ngang me feri ingau ngani Jioua ami Kot, o pual ami.

17 Ie me ni ngang I tungor rem ko pue amusa la ai tipis ikanei etrek, ap tungor ren Jioua ami Kot, pue a uai sowni iei, iei me etrek.

18 I a fai la sowni Ferao, o a tungor ren Jioua.

19 Iue, Jioua a tina to asapual an apinan a maw-rakus trapur, o a ua la ekoe lokows tapue la ir lawn Set Par; a sor aman lokows me lusun uawn eif an Ijip me inisin.

20 Jioua a feri ana leluk an Ferao; a sap esetra la ekoe murimur an Israel.

21 Iue, Jioua a kapas ngani Moses, Ko pue aiti ta paum lang pue a pue rotopuak la uawn fanu an Ijip, rotopuak me aman epue to ngani atowpa.

22 Moses a aiti ta paun lang; a ap rotopuak trapur uawn fanu an Ijip inisin ran uluat:

23 Ra sap ueri aman aman, a sor me u ta sowni lenian ran uluat; a murimur an Israel me inisin a uor saram le imar.

24 Ferao a kera ngani Moses, apasa, Au pue fai la, fel ngani Jioua; ami muit an sip o kau kana trek ra pue nonom; ami samireit kana ra pue pual etei ami.

25 Moses a apasa, Ko pue pual mout ngani le pautr asawr o man me keni, pue sa pue keni asawr ngani Jioua am Kot.

26 Am man kana ra pue pual etei kitr; a sap afawt pitran epue nom muritr; pue sa pue angai sowni ir mini sa pue fel ngani Kot ren; sa sisilei mini sa pue fel ngani Kot ren sa puap tawrei enan fanu.

27 Jiona a feri ana lélukan Ferao, a sap asetra la ir.

28 Ferao a kapas ngani Moses, Ko pue fai la sowni iei, ko pue pusin atanaki en, ko sa pual tian ueri masai; pue lawn ran an om epue ueri masai ko pue mela.

29 Moses a apasa, Me etipuar om kapas; ngang samo epue pual ueri masom.

## SOPON 11.

**J**IOUA a kapas ngani Moses, Pual eu etrek ninni ngang epue tina to uawn Ferao, o uawn Ijip; a epue asetra la ami, a epue atiau tina la ami trapur.

2 Ko pue ikanei kapas le seling an ekoe aramas, mown inisin, ra pue tungor aman ren me nom arep, o fefin inisin, aman me nom arep, auownu ar silfer o auownu ar kol.

3 Jioua a atreni ngani re Ijip kana ekoe aramas. Pual eue muan Moses a ken fau la trapur uawn fanu an Ijip ren naun Ferao trawnangang kana o ren aramas kana.

4 Iue, Moses a ken apasa, Iei kapas an Jioua, Lukan pung ngang I epue fai fetal uawn fanu an Ijip.

5 Mown naun uawn fanu an Ijip me inisin ra pue me la, popu sowni mown naun Ferao naur samol, tawrei mown naur fefin trawnangang me ken poni uit; pual mown naur man me inisin.

6 Ra pue ketru trapur uawn eif an Ijip me inisin, a sap oson trek i lom, nono to, nono la trek.

7 Iue, a sor kolak epue auuu ngani aman lein murimur an Israel kana, aramas are man; pue au pue silei me Jioua a ken aimu feseni re Ijip me Israel.

8 Iue, nom trawnangang kei me inisin ra pue et tu rei, o trape ngani rei, apasa, Ko pue ala, o nom aramas me inisin; iue murin ngang I pue a la. Moses a fai la sowni Ferao, a sawng trapur.

9 Jioua a kapas ngani Moses, Ferao a sap epue auseling en; pue ai manaman kana ra pue trawmowng la uawn fanu an Ijip.

10 Moses me Aron ra feri kei manaman me inisin mown Ferao; Jioua a feri ana leluk an Ferao, a sap esetra la sowni fanu an, murimuran Israel koe.

### SOPON 12.

**J**IOUA a kapas ngani Moses me Aron uawn fanu an Ijip, apasa,

2 Maram ei epue popun maram kana re ami; a epue popun maram lawn iir kana re ami.

3 Au pue kapas ngani muit an Israel me inisin, apasa, Lawn engawl an ran an maram ei, ir inisin ra pue angai, aman muan aman lam oson ainang an samar kana, eu naunau aman lam;

4 Are me trawkiskas eu naunau, ra pue tru ngani eu naunau, oson iteit an aramas koe; oson aramas ra pue momownga au epue aleani ren eue lam.

5 Naomi lam a sap epue man afawk, a epue atamuan me manau iir eu; au pue angai apan an sip are kout:

6 Au epue utu ngani ran engawl me ruahu an maram ue trek; muit inisin an Israel ra epue ni la i lekuniol.

7 O ir ra pue angai ekis tra an, asupu ngani pan kasam ruofawt o pual pan kasam an uawn, uawn im kana me ir ra pue momownga lawn.

8 Ra pue momownga fituk an eue trek lelung, ra apuowti uawn ekei, etei pret a sor lefen; ra pue pual etei momownga uelael kupuilapuil.

9 Au sap momownga amas are um lawn tran; pue apuowti etrek uawn ekei; makeran etei pitran kana o afan.

10 A sor ekis epue lusun re ami tawrei lesor; ekis me lusun tawrei lesor au pue fisa la lawn ekei.

11 A iei oson ami au pue momownga i; lukalep ami epue nukanuk, pitrami lawn ami sus, o uak ami le paumi; au pue patrau momownga; a ken an Jioua pasofer.

12 Pue lawn eue trek pung ngang I epue fail fetal uawn fanu an Ijip, o ninni mown naur me inisin uawn

Ijip, aramas o pual man; o ngang epue ninni anu an Ijip kana: ngang Jioua.

13 Iue, tra epue asasinan uawn im kana me ami nom lawn; ngang I ueri tra, U puap fail sowni ami, a sor me epue ueri ami me pue ata la ami lupuan ai ninni fanu an Ijip.

14 Ikanei epue ran an tretremani ngani ami, ami epue feri ami aulau ngani Jioua: pilawn an murimur ami epue feria ta aulau lawn ei ranan failfail la trek.

15 Au pue momownga pret a sor lefen ran fusu; popun ran an au pue amawra sowni lefen lawn imami; pue aman me ken amownga pret a lefen sowni popun ran tawrei afusu an ran, a epue ukufi sowni Israel.

16 Lawn popun ranan au pue amuit ngani felalap; o lawn afusu an ranan muit an felalap; a sor ekis angang epue feri lawn ekoe ranan, iei trek angang; angang an mownga me aman epue ani.

17 Au pue atanaki aulau an pret a sor lefen; pue lawn ran ue trek ngang I uai sowni ami muit kana fanu an Ijip; ie me ni au pue atanaki ikanei lawn pilawn an murimur ami, ren kapas an amurimur, failfail la trek.

18 Lawn popun maram ran engawl me ruanu an eue maram, lekuniol au pue momownga pret a sor lefen tawrei rue me eu an ran an eue maram lekuniol.

19 Ran fusu a sor lefen me pue ueri le im ami: pue aman me pue momownga awt a lefen la, eue aramas epue ukufi sowni muit an Israel are i trawn siamu aman, are me up tu uawn eue fanu.

20 Au sap momownga awt me lefen la; lawn leni ami me inisin au pue momownga pret a sor lefen.

21 Moses a kera to samol an Israel kana, o kapas ngani ir, Au pue liape to ikanei, angai lam kana iteit an ami ainang kana, ap ni la pasofer.

22 Au pue angai eu pinukun isop, o atura lawng tra me nom lawn sapei, o uitriki ngani pan kasam ruofawt tra me nom lawn eue sapei; a semen mo le ami epue to sowni le asam an iman tawrei lesor.

23 Pue Jioua epue fail fetal a pue ni la re Ijip



kana; a ueri tra uawn pan kasam an uawn o pan kasam an le peikin ruofawt, Jioua a puap tawko sowni eue asam, a epue amatru trawn ninni pue a te to lawng lawn imami kana pue a pue ni la ami.

24 Au pue atanaki ei angang, kapas an amurimur ngan uk o naun kana failfail la trek;

25 Iue, ami puap et to uawn eue fanu me Jioua epue ngani ami oson trek an puon, ami epue amatru ei angang.

26 A epue feri, naumi kana ra puap ais remi, Ifa ueue an ei angang?

27 Ami epue apasa, Iei aulau an pasofer an Jioua, pue lawn Ijip, lupuan a ken ni la re Ijip, a ken tawko sowni iman murimur an Israel kana, amanaua imatr kana. Ekoe aramas ra ap trape tu, fefel.

28 Ekoe murimuran Israel kana ra fai la feri me ni; oson trek Jioua a amurimur ngani Moses me Aron, ie me ni ra feri.

29 Iue, luk an puin, Jioua a ni la mown naur me inisin uawn fanu an Ijip, popua ta ren mown naun Ferao me mawt tu uawn an lenian mawt, tawrei mown naun trawntur me nom le iman fetok; pual mown naun man kana.

30 Ferao a pue ta le puin, o pual naun trawn-angang kana o re Ijip me inisin; a ketru lawn Ijip trapur pue a sor im me aman a sap me la lawn.

31 I a kera to Moses me Aron le puin, o apasa, Au pue pue ta, fai la sowni lein nai aramas, ami o pual murimuran Israel kana; au fai la, fel ngani Jioua oson trek ami apasa.

32 Au pue ua la ami muit an sip kana, o muit an kau kana, oson trek ami kapas, o su la; au pue pual afaiatru ngang.

33 Re Ijip kana ra eriani ekoe aramas, ra pue failakai sowni eue fanu; pue ra ken apasa, Kitr inisin mela.

34 Aramas ra angai ar pret amas, mown a lefen la, ar sapei an auuou akuma fengeni lawn ar mangaku uawn afarar.

35 Iue murimur an Israel kana ra feri oson trek kapas an Moses; ra tungor ren re Ijip kana auownu ar silfer o auownu ar kol o mangaku;

36 Jioua a atreni ngani re Ijip kana ekoe aramas, ir ra fang ngani ir. O ra asarakunu re Ijip kana.

37 Ekoe murimur an Israel ra ap fai la sowni Rameses, fai la tawrei Sowkowl; ir arawn uowne kit muan, at kana ra sap aleani.

38 Pual aramas an lukin me trawmowng etei ir fai la; pual muit an sip o muit an kau, man me trawmowng.

39 Ir a umeni pret a sor lefen la sowni flaur amas me ir ua to sowni Ijip, pue a sap lefen la; pue ra tapue sowni ir Ijip, ra soto ngani uitait, o ir ra sap amowna ta amatur.

40 Iue, murimuran Israel koe ra siamu uawn Ijip, iir fapuku ilik.

41 Iue, le auas an iir fapuku ilik, eue trek ranan a feri me muit an Jioua kana ra su la sowni fanu an Ijip.

42 Iei lepuin me ir ra pue atanaki trapur ngani Jioua ren an uai ir to sowni fanu an Ijip: lepuin an Jioua iei, me murimuran Israel koe ra pue atanaki trapur lawn pilawn ar inisin failfail la trek.

43 Jioua a kapas ngani Moses me Aron, Iei kapas an amurimur oson pasofer: a sor aramas an lukin epue momownga;

44 A trawnangang an muan me inisin me moni a ken mowni a puap sirkomsais la i a epue momownga.

45 Trawn siamu o trawnangang me sap nauna la a semen epue momownga.

46 Aman epue monga lawn eu trek im; au sap uai la ekis fituk an sowni eue im; au sap punu trun.

47 Muit an Israel me inisin ra pue feri.

48 Re uawn aman me ken siamu rem, me mowtren momownga pasofer ngani Jioua, naun muan me inisin ra sirkomsais la a ap epue arep to feri; a pue oson trek

aman me up tu uawn fanu ami; a semen mo aramas me sap sirkomsais epue momownga.

49 Eu trek kapas an amurimur ngani puenitan fanu ami, o re uawn me ken siamu re ami.

50 Iei oson fefer an murimur an Israel me inisin; oson trek Jioua a kapas ngani Moses me Aroniei oson ar fefer.

51 Iue lawn ran ue trek Jioua a uai sowni fanu an Ijip murimuran Israel kana, lawn ar muit kana.

### SOPON 13.

**J**IOUA a kapas ngani Moses, apasa,

2 Ko pue puau nganiiei mown naur me inisin, mown naun me inisin lein murimur an Israel kana, aramas o pual man; a ken nai.

3 Moses a kapas ngani ekoe aramas, Au pue tretremani ran ei, ranan ami su sowni Ijip, leni an trawntur; pue ren manaman an paun Jioua a uai sowni ami fanu ei; au sap momownga ekis pret a lefen la.

4 Lawn ran ei, maram an Apip me ami su la.

5 Iue, Jioua a puap ua la ami uawn fanu an ainang an Kenan, Et, Amor, Iui, me Jepus, me a ken akapel ngani samom kana, fanu me pupu ren tranan aup o owni, ami au epue feri aulau an pasofer lawn maram ei.

6 Au pue momownga pret a sor lefen la ran fusu, a afusu an ran a epue aulau an Jioua.

7 Iteit an ran fusu koe au pue momownga pret a sor lefen la; a sor pret a lefen la epue ueri rem, a sor lefen epue ueri rem uawn eif an fanuami me inisin.

8 Ko pue arani naun lawn eue ran, apasa, Powkitan mini Jioua a feri nganiiei lupuan ai et to sowni Ijip.

9 A epue asinan rem uawn paum o tretremanian lefin an masom, pue kapas an Jioua epue nom le auom; pue ren paun a manaman Jioua a uai uk to sowni Ijip.

10 Ie me ni ko pue atanaki ei fetelalap lawn fansoun iteit an iir kana.

11 Iue, Jioua a puap ua la en uawn fanu an re

Kenan kana, oson an akapel ngan uk o samom kana, o epue ngani ami eue fanu.

12 Ami au epue puau ngani Jioua mown naun aramas inisin, o mown naun man kana; atamuan inisin le ir epue naun Jioua.

13 Au pue siuli ngani mown naun as kana aman sip; are en sap siuli mown naun as aman ko pue punu u an; mown naun aramas me inisin lein naun kana ko pue luini ti.

14 Iue, lupuan nom a ken eu ran ais rem, apasa, Meita iei? ko epue kapas ngani i, Ren paun puaratro Jioua a uai kitr to sowni Ijip, sowni leni an trawntur;

15 Iue, Ferao a net asetra la kitr, Jioua a ni la mown naur me inisin uawn fanu an Ijip, mown naun aramas o pual mown naun man; ie me ni ngang I asawron ngani Jioua mown nai me inisin, me atamuan; a mown nai aramas ngang luini ti.

16 A epue eu asinan uawn paum, o asinan lefin an mas om koe: pue ren paun a puaratro Jioua a uai kitr to sowni Ijip.

17 Iue, Ferao a puap esetra la ekoe aramas, Kot a sap moanana la ir lawn al ueneti fanu an re Filistia, me ken arep; pue Kot a ken apasa, pue aramas ra te lamalam la ra puap ueri maun, o luin la Ijip.

18 Pue Kot a ken moanana la ekoe aramas uawn fanu pen peiki lan. Set Par: murimuran Israel koe ra ua la pisek an fiu lupuan ar fai sowni Ijip.

19 Moses a ua la ren trun Josef; pue Josef a kapas ngani murimur an Israel koe, apasa, Atiau Kot epue et to remi; ami au epue ua remi trui kana sowni ikei; au pue akapel ngan iei.

20 Ir ra fai la sowni Sowkowl o aua ta ar im mangaku kana uawn Itoth uawn kiannin eue fanu pen.

21 Jioua a okom mowar leran lawn ur an kutru a pue moanana la ir lawn al; a lepuin a nom lawn ur an ekei, a pue asarami ir; pue ir epue to ngani fai la leran me lepuin.

22 Ur an kutru leran o ur an ekei lepuin, a sap fai la sowni mown ekoe aramas.

#### SOPON 14.

**J**IOUA a kapas ngani Moses, apasa,  
2 Ko pue kapas ngani murimuran Israel koe ra pue tawk la, o aua ta ar im mangaku mown Piairot, lefin an Miktol o eue set, mown Peal-sefon; peiki lan au pue aua ta ami im mangaku uawn piapi.

3 Ferao a epue apasa oson murimuran Israel kana, Ir me mowt lawn fan ei, pue eue fanu pen a souni ir.

4 Ngang I epue feri ana leluk an Ferao, o a epue tapue la ir; ngang epue fau la ren ai fefer ngani Ferao o naun muit an trawn flu; re Ijip kana ra pue silei me ngang I ken Jioua. Ir ap feri me ni.

5 Ra arani king an Ijip me ekoe aramas ra su la; leluk an Ferao o naun trawnangang kana uili ti eu sawkun ngani ekoe aramas, ir ra apasa, Meita iei me kitr sa feri, am esetra la Israel sowni ar angang ngani kitr?

6 I a amowna ta an uakon, ap moanana la naun aramas tianana la i.

7 A ken angai uakon kafil me uownupuku, o pual uakon an Ijip me inisin, o kapin kana uawn ir me inisin.

8 Jioua a feri ana leluk an Ferao king an Ijip, o a tapue la murimur an Israel koe: pue murimur an Israel koe ra fai la ren paun a manaman.

9 Re Ijip koe ra tapue la ir, naun Ferao uakon o an me inisin, o naun me tete ors kana o naun trawn flu kana; o ra tawra tu ir ra nonom uawn piapi, arawn Piairot, mown Peal-sefon.

10 Ferao a puap arep'to, ekoe murimuran Israel ra satre ta, iue re Ijip koe ra tapatapue murir; o ra masak trapur; ekoe murimur an Israel ra kowkowri ngani Jioua.

11 O ra kapas ngani Moses, Powkitan a sor paias kana lawn Ijip me en uai to kitr pue sa pue me la

uawn fanu pen? puemeta en feri mini ngani kitr, uai kitr to sowni Ijip?

12 A sap iei kapas me sa kapas ngan uk uawn Ijip, apasa, Ko pue pui sowni kitr, pue sa pue angang ngani re Ijip koe? Pue me etipuar ngani kitr sa pue angang ngani re Ijip mown am me la uawn fanupen.

13 Moses a kapas ngani ekoe aramas, Au sap masak, au pue uitautit etrek, o ueri an Jioua amanau me a epue tumunu ami ren ikanei; pue re Ijip koe me ami ueri ikanei, au sap pual ueri ir failfail la trek.

14 Jioua a epue fiu pani ami, a ami epue nauenauen trek.

15 Iue, Jioua a kapas ngani Moses, Puemeta en kowkowri ngani iei? Ko pue kapas ngani ekoe murimuran Israel ra pue su.

16 Iue, ko pue eki ta nom uawk, o aiti la paum uawn set o aimu feseni i; ekoe murimuran Israel ra pue fai la le matau uawn puun a puas.

17 A ngang, atiau ngang I epue feri ana lelukan re Ijip koe, ra epue tapue la lawn murir: o ngang epue fau la ren ai fefer ngani Ferao o naun muit an trawn fiu, naun uakon kana, o naun me te te ors kana.

18 Re Ijip kana ra pue silei me ngang I me Jioua, I puap fau la ren ai fefer ngani Ferao o naun uakon kana o naun me te te ors kana.

19 Eue trawnlang an Kot me ken okom mown muit an Israel a ap mowkit la, fai la murir; eue ur an kutru a mowkit la sowni mowir ap nonom trek murir:

20 A et tu lefin an muit an Ijip o muit an Israel: a ken kutru o rotopuak, a ken pual asarama lepuin; ra sap arep fengen eue lepuin tawrei ran.

21 Moses a aiti la paun uawn eue set; Jioua a tina la set ren asapual trapur an masanran lepuin ue tawrei lesor, feria ta eue set puun a puas, tran kana ra fail feseng.

22 Ekoe murimuran Israel ra fai la leset uawn puun a puas: tran kana ra oror ngani ir paliimuan ir o paliifefin ir.

23 Re Ijip kana ra tapue la, fai la murir leset, naun. Ferao ors kana me inisin, o uakon kana o me te te ors kana.

24 Iue lesesor Jioua a nana ngani muit an re Ijip sowni eue ur an ekei me kutru, o a amasaku muit an re Ijip kana.

25 A ken uai sowni lekasokapan an naur uakon kana o ra atak trou: ie me ni re Ijip koe ra ken apasa, Sa pue su sowni Israel: pue Jioua a ken pani ir, fiu ngani re Ijip.

26 Jioua a kapas ngani Moses, Ko pue aiti la paum uawn set pue tran kana pue pual luin to uawn re Ijip kana me naur uakon kana o naur me te te ors kana.

27 Moses ap aiti la paun uawn set, o lesesor set a luin to a nene trek lom; re Ijip koe ap su sowni; a Jioua a ken ata la re Ijip kana leset.

28 Tran kana ra luin to pualuo la uakon koe o me te te ors koe, o muit an Ferao me inisin me fai la murir le set; a samo aman re ir a lusun.

29 A murimur an Israel koe ra fetal uawn puun a puas leset; tran kana me oror ngani ir paliimuan ar o paliifefin ar.

30 Iei oson Kot a ken amanaua Israel lawn eue ran sowni paun re Ijip kana; Israel a nana ngani re Ijip koe ra mela uawn piapi.

31 Israel a na ngani manaman trapur me Jioua a feri ngani re Ijip koe, ekoe aramas ra masak Jioua: o ra luku Jioua, o naun trawnangang Moses.

#### SOPON 15.

**I**UE, Moses o murimur an Israel koe ra kowl ngani Jioua ren eu kowl, ra mangungu apasa,  
 Ngang pue kowl ngani Jioua,  
 Pue me manaman an puaratro;  
 A ken kusue tu leset  
 Ors o pual me te te uawn kana.  
 2 Jioua me ai pitrakil o ai ngawr,  
 A ken pual amanau angang.

- Iei ai Kot ngang epue mareti ;  
 Kot an samai, ngang epue apingapinga i.
- 3 Jioua trawn fiu aman,  
 Jioua me itan.
- 4 Naun Ferao uakon kana o muit an trawn fiu  
 A ken kusue tu leset ;  
 Naun kapin kafil kana  
 Ra kok tu lawn Set Par.
- 5 Tran anownawn kana ra pualuo la ir ;  
 Ra kok tu ekis anownawn oson trek fau.
- 6 Paliimuan an paum, O Jioua,  
 Me ling trapur ren manaman an ;  
 Paomuanom, O Jioua,  
 A ken aueti la trawn aput kana.
- 7 Ren om manaman trapur  
 Ko ken ata la me u ngan uk kana :  
 Ko ken tina la nom sawng,  
 A ken keni ir oson powkan kana.
- 8 Tran kana me apawsa ta  
 Ren enian an le puawt om ;  
 Ra u ta oson trek ioian ;  
 Anownawn kana ra pitrakil ta,  
 Leluk an eue set.
- 9 Me aput kitr a ken apasa,  
 Ai pue tapue la, ai pue tawra tu,  
 Ai pue amaku naur peirak kana :  
 Ai raungau epue uas uawir :  
 Ngang pue u ta ue ai kowtlas,  
 Pai epue ni ir la.
- 10 En usa to nom asapual,  
 Set a pualuo la ir :  
 Ra kok tu oson trek let  
 Lawn ekoe tran trapur.
- 11 Ia lein anu kana, O Jioua  
 Me ken nene trek en ?  
 Ia me nene trek en ?  
 Lingatr ren nom tupuel,  
 Amasaku lawn mareit kana,  
 Fefer manaman kana ?



- 12 En aiti la paomuanom,  
Fanu a oropuilu ir.
- 13 Ren nom kirakirowtr,  
En me auena la kei aramas,  
Me en amanaua ta.  
Ren om manaman en me moanana la ir,  
Lawn leni om a fel.
- 14 Ainang kana ra rong,  
Ra ap tretretr:  
Masak a turfi re Filistia kana.
- 15 Samol an Itom kana,  
Ra ueiti fengeni;  
Kapin an Moap kana  
Tretretr a uer ir;  
Trawn Kenan me inisin  
Ra tele la trek.
- 16 Nuokus o masak  
A pung tu uawr.  
Ren manaman an paum  
Ra pue oson trek fau;  
Nom kana, O Jioua,  
Ra puap fail sowni ir,  
Nom aramas me en nauna la,  
Ra puap fail sowni ir.
- 17 Ko pue ua la ir uawn trukatrukta an fanu om,  
Fetoka tu ir ie,  
Uawn fanu, O Jioua me en feria ta,  
Pue en ko pue nonom trek uawn,  
Fel an imom O Jioua,  
Me paum amowla ta.
- 18 Jioua epue nemani failfail la trek.
- 19 Pue naun Ferao ors kana etei naun uakon kana  
o me te te ors kana, ra fai la lawn eue set, Jioua a  
aluina tran an set kana uawn ir; a murimuran Israel  
koe ra fetal uawn puun a puas leset.
- 20 Iue Miriam fefin soufaws, mowngai an Aron a  
ken angai kesowng le paun; fefin inisin ra fai la  
murin, eta la kesowng o puapua.
- 21 Miriam a ken paluani ir:

Au kowl ngani Jioua,  
 Pue me manaman trapur;  
 Ors o me te te uawn kana  
 A ken kusue tu leset.

22 Moses a moanana la Israel sowni Set Par, o ra fai la uawn fanu pen itan Sur; ra fai la ran uluat uawn eue fanu pen, ra sa ueri kawruk.

23 Ra et tu Mara, ra soto ngani unimi kawruk an Mara, pue me maras; ie me ni a itan Mara.

24 Ekoe aramas ra pueni ingau ngani Moses, apasa, Meita kitr sa pue un ?

25 I a iawtok ngani Jioua; Jioua a puar ngani i afawt ira, o a atura tu lawn tran koe, ekoe tran me anna. I a feri ngani ir iei kapas o amurimuran, a ken sawtuni ir ie;

26 A ken apasa, Are au pue atrotro auseling mangungun Jioua ami Kot, o feria ta mini a uenanen ren, o auselingei etu kapas kana, o amatru an kapas an amurimur kana, ngang I sap epue tina to uawmi awt somau kana I ngang I tina to uawn re Ijip kana; pue ngang me Jioua me ken apitrakila ta ami.

27 Iue ra et tu Ilim, ekis tran puuowt ta engawl me ruou ra nom ie, o ira nu me fik: ra ken aua ta naur im mangaku ie, unupan ekoe kawruk.

#### SOPON 16.

**R**A su sowni Ilim, muit an murimur an Israel me inisin, ra fai la uawn fanu pen an Sin, me lefin an Ilim me Sainai, aruou an maram murin ar su sowni fanu an Ijip.

2 Muit an murimur an Israel me inisin ra pueni ingau ngani Moses me Aron uawn eue fanu pen;

3 Ekoe murimur an Israel ra ken kapas ngani ir, A pue etipuar ngani kitr are sa me la ren paun Jioua uawn fanu an Ijip, lupuan am mawt ngani aion pot an fituk, lupuan sa ken ani mownga a met; pue ami uai kitr to uawn fanu pen ei, pue au pue ni la muit me inisin ren atrik.

4 Jioua a kapas ngani Moses, Na ngani, ngang I

pue amora ngani ami pret me lang; aramas koe ra pue tou la iown fengeni uis an ran eu, lawn ran inisin, pue ngang epue sawtuni ir are ra pue amatru ai kapas, are sor.

5 Iue, auownu an ran ra pue amowla ta mini ra ua to, a epue trapur fan ruou mown mini ra ua to lawn ekoe ran an.

6 Moses me Aron ra kapas ngani murimur an Israel me inisin, Lekuniol ei au pue silei me Jioua a ken ua la ami sowni fanu an Ijip;

7 O lesor au pue ueri lingatr an Jioua; pue Jioua a ken rong ami pueni ingau ngani Jioua; pue ia kitr me ami au pueni ingau ngani kitr?

8 Moses pual apasa, Iei epue puanua ta lupuan Jioua a pue amownga ngani fituk lekuniol o pret lesor ami au puap met; pue Jioua a ken rong pueni kana me ami pueni ingau ngani i; pue ia kitr? ami sap pueni ingau ngani kitr, pue Jioua.

9 Moses a kapas ngani Aron, Ko pue kapas ngani muit an murimur an Israel koe, Au pue kin to mown Jioua; pue a ken rong ami pueni kana.

10 Iue, lupuan Aron a kapas ngani muit inisin an murimur an Israel koe, ir sele ngani fanu pen, a atiau lingatr an Jioua a pue ta lawn eue kutru.

11 Jioua a kapas ngani Moses, apasa,

12 Ngang I rong an ekoe murimur an Israel pueni kana: ko pue kapas ngani ir, apasa, Lekuniol au pue momownga fituk, o lesor au pue met ren pret; ami au epue silei me ngang I ken Jioua ami Kot.

13 Iue, lekuniol kueil kana ra fai to pualuo la ekis ra nom uawn; o lesor muet a nom uawn fanu pueli faili telinin.

14 Muet a puap puas la, atiau awt me kukumes a kisakis a nom uawn eue fanu pen, me kisakis oson trek frost, uawn puun.

15 Ekoe murimur an Israel ra ueri i, ra apasa lefin ar, Meita ena? pue ra sisilei mini. Moses a kapas ngani ir, Iei pret me Jioua a tina ngani ami pue au pue ani.

16 Iei an Kot kapas, Ami muan inisin epue iown fengeni me a epue momownga; eu omer epue uis an aman; aman epue angai iteit an naun etrek; aman epue angai uis an ir me nonom le iman.

17 Ekoe murimur an Israel ra ken feri mini, iown fengeni; ekawt me trapur, ekawt me kisakis.

18 Ra puap tukei lawn omer, me iown fengeni me trapur a sor lusun ren, o ir me iown fengeni me kisakis a pual ur la; ra iown fengeni me inisin mini ra mowtren momownga.

19 Moses ap kapas ngani ir, A sor aman epue isani ekis tawrei lesor.

20 A ir ra sap auseling alon Moses; pue ekawt ir ra ken isani tawrei lesor; a uor ul lawn o po ingau la: Moses a sawng re ir.

21 Ir ra iown fengeni lesor inisin, aman ren an ani; akar a puitrikar la a ken tele la.

22 Iue, auownu an ran ra ken iown fengeni pret a trapur fan ruou, omer ruou uis an aman: samol an eue muit me inisin ra et to arani Moses.

23 I a kapas ngani ir, Ie me Jioua a ken apasa ta, Lao me ran an asese a fel, ran an fel an Jioua: au pue umuni lawn um mini ami mowtren, o lawn aion pot mini ami mowtren; a me lusun au pue isani ngani ami tawrei lesor.

24 Ir ap isani ngani lesor ren alon Moses; a sap po ingau la, a sor ul lawn.

25 Moses ap apasa, Au pue momownga ei ikanei; pue ran an fel an Jioua; au sap epue ueri ikanei lawn malemal.

26 Au pue iown fengeni lawn ran uownu; a afusuan ran a ken ran an fel; a sor epue nom.

27 Iue, afusu an ran ekawt aramas ra fai la ra pue iown fengeni, a ra sap ueri.

28 Jioua a kapas ngani Moses, Ia alein au pue uet amatru ai kapas kana?

29 Na ngani, powkitan Jioua a ngani ami ran asese, ie me ni a ken ngani ami auownu an ran, mowngan ran ruou; au pue nonom trek aman, aman

lawn lenian, a semen mo epue fai sowni leni an lawn afusuan ran.

30 Ie me ni aramas kana ra asese lawn afusuan ran.

31 Re ainang an Israel ra ngani itan eue mownga, Manna; a ken oson trek faun korianter, me powtra-powtr; o nen me oson trek pret etei owni.

32 Moses a ken apasa, Iei an Jioua kapas, Eu omer epue masoan, o isani ngani pilawn murimur ami; pue ir ra pue kawton mownga me ngang amownga ngani ami uawn eue fanu pen, fansoun ai ua to ami sowni fanu an Ijip.

33 Moses a kapas ngani Aron, Ko pue angai eu pot o ise nawng lawn eu omer an manna, ap isani mown Jioua, pue a epue isani ngani pilawn murimur ami.

34 Aron a isa ta mown muit an aramas eue sop fel pue a epue isais oson trek Jioua a kapas ngani Moses.

35 Ekoe murimur an Israel ra ken momownga man-na iir faik, ra puap tawrei fanu me aramas nonom uawn; ra momownga manna ra puap et to uawn eif an fanu an Kenan.

36 Omer engawl me feria ta ifa eu.

#### SOPON 17.

**M**UIT an murimuran Israel me inisin ra fai la sowni fanu pen itan Sin, iteit an ar kukulou, oson trek an Kot kapas ngani ir, o ra aua ta ar im mangaku uawn Refitim; a se nom kaw nuk pue aramas ra pue unimi.

2 Ie me ni ekoe aramas ra ken angingi ngani Moses, apasa, Aun ngani kitr atr kaw nuk. Moses kapas ngani ir, Pueta ami angingi ngani iei? pueta ami sawtoni Jioua?

3 Ekoe ra ka ie pue sor kaw nuk; ekoe aramas ra pueni ingau ngani Moses, apasa, Puemeta en uai kitr to sowni Ijip, pue ko pue ni la kitr o nautr kana o nautr man kana ren am ka?

4 Moses a iawtok ngani Jioua, apasa, Meita ngang epue feri ngani kei aramas? pue ekis etrek ra pue atrei iei.

5 Jioua a kapas ngani Moses, Ko pue okom la mown ekoe aramas, uai la et uk ekawt samol an Israel; ko pue ua la le paum nom uawk me en uitri eue tranpupu ren, ko ap fai la.

6 Iue, ngang I epue u ta fan masom uawn eue fau uawn Orep; a en ko pue uitri eue fau, tran a epue pupu sowni, pue ekoe aramas ra pue un. Moses a feri mini mown mas an ekoe samol an Israel.

7 O a ngani itan eue ekis Massa, o pual Meripa, powkitan ekoe murimur an Israel ar angingi, o powkitan ar sawtuni Jioua, apasa, Ifa oson, Jioua a nom re atr, are sor?

8 Re Amalek ra et to fiu ngani Israel uawn Refitim.

9 Moses ap kapas ngani Jojua, Ko pue fila ta aramas o fai la fiu ngani Amalek; lao ngang I epue nom uawn eue truk, uawk an Kot le pai.

10 Jojua ap feri mini Moses a kapas ngani i, o a fiu ngani Amalek; Moses, Aron me Ur ra fai ta uawn eue truk.

11 Iue, lupuan Moses a ken aiti ta paun, Israel ra ken puaratro; a lupuan a ken aluina tu paun Amalek a ken puaratro.

12 A paun Moses me ken trou; ir ra angai awt fau, isa ta fan Moses, a ap mawt tu uawn. Aron me Ur ra amatra ta paun, aman apeik, aman apeik; paun a nuktrar tawrei akar a puap tup tu.

13 Jojua a ni la Amalek o naun aramas ren pali ken an kowtlas.

14 Iue Jioua a kapas ngani Moses, Ko pue make tu ren tretremanian lawn eu puk, me ngang I epue amawra sowni trapur atretremanian Amalek fan lang; o ko pue pual puara ta le seling an Jojua.

15 Moses a apawsa ta eu rawng, ap ngani itan, Jioua-nissi;

16 A ken apasa, Jioua a ken akapel; Jioua epue

maun ngani Amalek sowni eu pilawn aramas tawrei eu pilawn.

## SOPON 18.

**I**UE Jetro, prist an Mitian, saman-puiluan Moses, a ken rong peraus an me inisin me Kot a ken feriren Moses o ren Israel naun aramas, oson Jioua a ken uai sowni Ijip Israel.

2 Jetro, saman-puiluan Moses, a angai Sipora-puiluan Moses, murin an aluina la i,

3 O naun atamuan ruoman; me itan aman Kersom; pue a ken apasa, Ngang I trawn siamu uawn fanu an uawn;

4 O itan aman Eliesar; pue a ken apasa, Kot an samai a ken ai Trawn Tumun, a ken amanaua iei sowni kowtlas an Ferao:

5 Iue, Jetro, saman-puiluan Moses, a et to, ua to ren Moses naun atamuan koe o-puiluan uawn eue fanupen ekis a ken nonom ie, arawn truk an Kot.

6 I a kapas ngani Moses, Ngang, samom Jetro me fai to rem, pual-puiluom o naun atamuan ruoman etei i.

7 Moses a fai la a pue truri saman, o trape tu, o pual metiri i; ir ra ais fengen oson pitrakil; o ra to lawng im.

8 Moses a arani saman me inisin me Jioua a ferin ngani Ferao me re Ijip powkitan Israel, pual ar riafau inisin lupuan ar fai to, o oson Jioua a amanaua ir.

9 Jetro a puapua ren an Jioua kirakirowtr inisin ngani Israel, an amanaua ir sowni le paun re Ijip kana.

10 O Jetro a apasa, Mareiti Jioua me ken amanaua ami sowni paun re Ijip kana o paun Ferao; me ken amanaua kei aramas sowni fan paun re Ijip kana.

11 Ngang I silei Jioua a ken lap mown anu inisin; enlet ren mini re Ijip ra ken likasowng feri ngani ir.

12 Iue Jetro saman-puiluan Moses, a angai keni ngani Kot asawr; Aron a et to, o samol an Israel me inisin ra pue momownga mown Kot ren saman Moses.

13 Iue soretan, Moses a ken mawt tu a epue enleta ta aramas ren ar fefer; aramas ra mou ngani sowni lesor tawrei lekuniol.

14 Eue saman puiluan Moses a puap ueri me inisin me a ken feri ngani ekoe aramas, a ap apasa, Meita ei me ko ken feri ngani aramas kei? puemeta en etrek me mawt tu o aramas me inisin ra nom ngan uk sowni lesor tawrei lekuniol?

15 Moses a kapas ngani saman puiluan, Pue aramas kana ra et to rei ra pue murmeuawn Kot;

16 Ra me tipis ra et to rei; ngang I enleta ta lefin an aman me aman, ngang aueue ngani ir an Kot lamalam o kapas kana.

17 Eue saman puiluan Moses, a kapas ngani i, A sap murinna om fefer.

18 Enlet ko pue apowngapowng la, en o pual kei aramas me nom ngan uk; pue iei a feria ngan uk; ko soto ngani pusin feria ta.

19 Ko pue auseling aloi, ngang pue amireiti en o Kot epue et uk: ko pue trawn fer an aramas ngani Kot, ko pue kapas ngani Kot fefer kana:

20 O ko pue afalafala ir an Kot lamalam o kapas, o puar ngani ir al me ra pue fai la lawn, o angang ra pue puakeni.

21 Ko pue pual fila ta lein aramas me inisin ekawt muan mireit, me ken masak Kot, aramas atiau, me aput atupu; ko pue seika ta ir samol an engerou kana, samol an apuku kana, samol an lime kana, o samol an engawl kana.

22 Ir ra pue enleta ta lefin an aramas fansoun inisin; iue, tipis trapur ra pue ua to rem, a tipis kisakis me inisin ra pue pusin enleta ta: iei oson a sap epue feria rem, o ir ra pue alisi en.

23 Are en ko pue feri mini, o Kot epue kapas ngan uk oson ue trek, ko epue to ngani pitrakil, o kei aramas ra pue to ngani fai la leni ar kinamue.

24 Iue Moses a auseling alon saman puiluan, puakeni mini a apasa ta.

25 Moses a fila ta aramas mireit sowni Israel me



inisin, seika ta ir samol uawn ekoe aramas, samol an engerou kana, samol an apuku kana, samol an lime kana, o samol an engawl kana.

26 Ir ra enleta ta lein aramas fansoun inisin: me feria kana ra ua to ren Moses, o tipis kisakis me inisin ra pusin enleta ta.

27 Moses a tina la saman; me a la uawn poputan fanu an.

### SOPON 19.

**A**ULU an maram murin murimur an Israel koe su sowni Ijip, ran ue trek ra et tu uawn fanu pen an Sainai.

2 Ra puap su sowni Refitim, o tawrei fanu pen an Sainai, o ra aua ta ar im mangaku uawn eue fanu pen; ra nonom trek ie mown eue trukatrukta.

3 Moses a fai ta ren Kot, Jioua a kera ngani i sowni eue trukatrukta, apasa, Ie mini ko pue arani ainang an Jekop, o arani ekoe murimuran Israel;

4 Ami na ngani mini ngang I feri ngani re Ijip kana, o me ngang I asaua ami uawn paun ikel, ap uai to ami ren pusin ngang.

5 Ie mini are au pue atiau auseling aloi, o amaru ai lamalam, au pue aferiai mown ainang me inisin; pue nai fanufan me inisin:

6 Ami au epue traw an prist kana, o ainang me fel. Iei kapas ko pue arani ekoe murimur an Israel.

7 Iue Moses a et tu, kera to samol an aramas kana, o puar ngani ir kei kapas me inisin me Jioua a kapas ngani i.

8 Aramas me inisin ra paluani powku, apasa, Sa pue feri me inisin me Jioua a kapas ngani kitr. Moses a arani Jioua kapas an ekoe aramas.

9 Jioua a kapas ngani Moses, Na ngani, ugang epue fai to rem lawn kutru trawl, pue aramas ra pue to ngani rong lupuan ai kapas ngan uk, o atrifaua en failfail la trek. Moses a kapas ngani Jioua alon ekoe aramas.

10 Jioua ap kapas ngani Moses, Ko pue fai la ren

ekoe aramas, amurinnau la ir ikanei o lao ; o ra pue sopu ar mangaku ;

11 Ra pue amowl ngani auluan ran ; pue auluan ran Jioua epue et tu uawn trukatrukta Sainai mown masan ekoe aramas me inisin.

12 Ko pue asina ta kiannin, ngani ekoe aramas, pueni fetale eue trukatrukta, apasa, Au pue pusin feratru, au sap fai ta uawn eue truk are suku peikin ; aman me pue suku eue truk au pue atiau ni la i :

13 A sor me pue isa ta paun uawn, au pue atiau atrei ngani fau are powsu ngani uawk, are man are aramas au pue ni la. A puap uisi saui aleilai ra pue fai ta uawn eue truk.

14 Moses a et tu me uawn eue truk, et to ren aramas kana, o amurinnau la ir ; ir ra sopu ar mangaku.

15 A ken kapas ngani ekoe aramas, Au pue amowl ngani auluan ran : au sap kin ngani fefin.

16 Iue, auluan ran a uor mangun o fifi o kutru trawl uawn eue truk, o ung an saui a mowng trapur ; aramas me inisin lawn eue telinim ra ken tretretr.

17 Moses a moanana la ekoe aramas lukin telinim pue ra pue truri Kot ; o ra u ta trek leulan eue truk.

18 Eue trukatrukta Sainai a owtu te inisin, pue Jioua a ken fai tu uawn lawn ekei ; owt an ekei an a fafai ta oson trek owt an ekei an fowrnas, eue truk me inisin a tretretr trapur.

19 Ung an saui a puap trapura la, trapura la ; Moses a ken kapas, Kot a mangungu paluani i.

20 Jioua a et tu uawn eue trukatrukta Sainai, uawn mawngamawng an truk : o Jioua a kera to Moses uawn mawngamawng an truk ; Moses ap fai te.

21 Jioua a kapas ngani Moses, Ko pue fai tu fanau ekoe aramas pue ra te ropia to ren Jioua pue ra pue kawton, me trawmowng ra te me la.

22 Pual prist kana me ken arep ngani Jioua, ra pue amurinnau la pusin ir pue Jioua a te ropia la uawn ir.

23 Moses a kapas ngani Jioua, Ekoe aramas ra soto ngani et to uawn trukatrukta Sainai ; pue en me fanau

kitr, apasa, Au pue asina ta kiannin pueli fetale ei truk o puai i.

24 Jioua a kapas ngani i, Ko pue a la, fai tu; ko pual epue fai ta to, en me Aron et uk; a prist kana o aramas kana ra sap ropia to pue ra pue fai ta to ren Jioua, pue a te ropia la uawn ir.

25 Iue, Moses a fai tu ren ekoe aramas, arani ir.

### SOPON 20.

**K**OT a apasa ta kei kapas me inisin, apasa,  
2 Ngang I Jioua nom Kot me uai uk to sowni Ijip, sowni leni an trawntur.

3 Ko sap angai aman anu mowai.

4 Ko sap feri ngan uk ununun are langalang an awt metawt me nom lang uawn, are me nom fanu an fan, are me nom lawn tran kana fanufan.

5 Ko sap trape ngani ir, are fel ngani ir; pue ngang Jioua om Kot anu lowluo aman, me ken ninni naun kana ren me ingau an samar kana, tawrei pilawn murimur ir ulu are ruanu, ren ir me ken aput ngang;

6 O kirakirowtr ngani pilawn engerou an ir me ken tongei iei o amatru ai kapas kana.

7 Ko sap apasa ta mual itan Jioua om Kot, pue Jioua epue tip ngani i me ken apasa ta mual itan.

8 Ko pue tretremeni ran an fel, ko pue feleni.

9 Ran uownu ko pue angang, feria ta om angang inisin;

10 A, afusu an ran, ran an asese ngani Jioua om Kot; ko sap feri awt angang, en, are nom muan, are nom nengin, nom trawnangang muan, are nom trawnangang fefin, are nom man kana, are nom re uawn me ken nom ngani en.

11 Pue lawn ran uownu Jioua a feria ta lang o fanufan o set o me inisin me nom lawn ir, o a asese afusu an ran; ie me ni Jioua a ken afaiatru afusu an ran, o feleni.

12 Ko pue auseling samom me inom, pue manau om pue leilai uawn fanu me Jioua om Kot epue ngan uk.

13 Ko sap ni la aramas.

14 Ko sap nuuelael.

15 Ko sap solei.

16 Ko sap apasa ta trawfana oson aman.

17 Ko sap mowtren ani iman aman; ko sap mowtren ani puiluan aman, are naun trawnangang muan, are naun trawnangang fefin, are naun kau, are naun as, are awt metawt me naun aman.

18 Ekoe aramas me inisin ra na ngani mangun o fifi kana o ung an saui, o trukatrukta a owtu te; ekoe aramas ra puap ueri ir ra tretretr, ap nom toau.

19 Ir ra kapas ngani Moses, Ko pue kapas ngani kitr, o sa epue auseling; a Kot a sap kapas ngani kitr pue sa te me la.

20 Moses a kapas ngani ekoe aramas, Au sap masak; pue Kot a et to a pue sawtuni ami, o pue ami epue nuokus i pue au te feri ingau.

21 Ekoe aramas ra nom toau, a Moses a ken arep ngani rotopuak trapur, ekis Kot a nom ie.

22 Jioua a kapas ngani Moses, Ie mini ko pue kapas ngani ekoe murimur an Israel, Pusin ami na ngani me ngang I kakapas re ami sowni lang.

23 Au sap feria ta aman anu rei; anu silfer are anu kol au sap feri ngani ami.

24 Au pue feri ngani iei rawng puun, o kehi ngani iei uawn, ami asawran keni o asawran kinamue, ami sip o ami kau; ekis inisin me ngang I asina ta itai uawn, ngang epue et to remi o afaiatru ami.

25 Are au pue feri ngani iei rawng fau, au sap sena ta fau peraper, pue are au pue poku ngani ami sele, au pue aniaputa la.

26 Au sap pual fai ta uawn leni an tete uawn ai rawng, pue om sele la a te puepue la uawn.

### SOPON 21.

**I** KEI kapas an asina ta, en ko pue isa ta mowr.

2 Are ko pue amowna to nom trawnangang Jus aman, a epue angang ngan uk iir uownu; afusu an iir a epue musa la a sap mown an.

3 Are pusin i etrek a et to rem, pusin i etrek epue musa la; are a or puiluan, puiluan epue etei i musa la.

4 Are an samol a ken ngani i puiluan me naunau ngani i atamuan are atafein; puiluan o naun koe ra pue naun eue samol, pusin i etrek epue musa la.

5 A, are eue trawnangang epue atiau apasa ta, Ngang I tongei ai samol, puiluai o nai kana; ngang I uet musa la;

6 Naun samol epue ua la i ren Kot, o epue ua la i le asam, are ngani fan kasam; naun samol a epue unu ngani metra selingan; i a epue angang ngani i failfail la trek.

7 Are aman muan a ken amowna la naun nengin pue a epue trawnangang, a sap epue musa la oson trek trawnangang muan.

8 Are an samol a se mowtren a pue puiluan, i a epue feri pue aman luini ti i; i a soto ngani mowni ngani re uawn, pue a ken atupu i.

9 Are a ken kafawt ngani i naun muan a epue feri ngani i oson trek tretren naun.

10 Are a ken angai pual aman puiluan, a semen epue akisakisa tu an mownga, an mangaku are fefer an pupuil.

11 Are a sap feri ngani kei me uluat, eue nengin epue musa la a sor luinin, o sor moni.

12 Au pue atiau ni la aman me ken uitri aman, a pue me la.

13 Are a sap op, pue Kot a ken ngani i le paun, ngang I epue asina ta ekis a epue su la ie.

14 Iue, are aman a ken likasowng fail ngani aman, atupu i, ni la, au pue ua la sowni ai rawng, o ni la i.

15 Au pue atiau ni la aman me ken uitri saman are inan.

16 Au pue atiau ni la aman me ken solei aramas amowni, are ami kuna le paun.

17 Au pue atiau ni la aman me ken turunufasi saman are inan.

18 Are aramas ra ken flu, o aman a atrei aman are efanu i, a sap me la pue a ken kakawn trek :

19 Are a ken pual pue ta ap auraur fetal, me ken fiu ngani i a epue musa la; iue, a epue luini ngani i an nom sowni an angang, a epue apitrakila ta i enlet.

20 Au pue atiau ninni aman me ken uitri ngani nawk naun trawnangang muan are fefin are a ken me la fan paun.

21 Iue, are eue trawnangang a ken manau ran eu are ruou, au sap ninni; pue naun moni eue trawnangang.

22 Are muan ra ken fiu fengen, o ra uitri aman fefin a puopuo, naun a mawra sowni, pusin i ap pitrakila ta; me ken fiu a epue atiau luini ti iteit an moni me puiluan eue fefin epue asina ta; trawn apung ra pue asina ta me eue muan epue luini ti.

23 Iue, are eue fefin a sap pitrakila ta, au pue luini ti manau ngani manau.

24 Faun mas ngani faun mas, ni afawt ngani ni afawt, paun afawt ngani paun afawt, pitran afawt ngani pitran afawt;

25 Kar ngani kar, kinas ngani kinas, uitri ngani uitri.

26 Are aman a ken uitri masan naun trawnangang muan are fefin, atruna la eu, a epue amusa la i powkitan faun masan.

27 Are a ken tunua la ni an naun trawnangang muan are fefin, a epue amusa la i powkitan ni an.

28 Are kau a ken powsu muan are fefin ren metran, o a me la, au pue atiau atrei eue kau, ni la i, au sap mownga fituk an; a sor tipis samol an eue kau.

29 Iue, are eue kau a ken owri powsu ren metran lom, o a ken puar ngani an samol, o a sap atanaki i, eue kau a ni la aman muan are fefin; au pue atrei eue kau, ni la, o pual ni la an samol.

30 Are au pue asina ta luinin manau an, a epue ngani luinin manau an oson ami asina ta.

31 Are a powsu atamuan are nengin, oson ei kapas an apungu au pue feri ngani i.

32 Are kau a ken powsu trawnangang muan are

fefin; a pue luin ngani naun samol sekel an silfer ilik; eue kau a pue pual atrei ni la.

33 Are aman epue suku la eu kawnuuk are aman epue tua ta eu kawnuuk, o a semen pualuo la, kau are as ap pung tu lawn,

34 Samol an kawnuuk a epue luini ti; a epue luini ngani moni eue samol, o eue me la epue naun.

35 Are naun aman kau a ken ni la kau me naun aman muan, ir me ruoman ra pue mowna la kau me manau o amaku luinin; ra pue pual amaku kau me me la.

36 Iue, are a puepue la me eue kau a ken owri powsu lom, an samol a sap atanaki i, atiau eue muan epue luin ngani aman kau, o kau a me la epue naun.

#### SOPON 22.

**A**RE aman epue solei kau aman are sip aman, o ni la are mowna la a epue luini ti kau limman luinin aman, o sip faman luinin aman.

2 Are aman a ueri trawn solei a ropia lawng, o fiu ngani, ni la, a semen epue tipis ren.

3 Are iawl a te te uawn i, i a epue tipis; pue a epue luini ti; are a sor naun peirak, au pue mowni i powkitan an solei.

4 Are mini a ken solei a ueri le paun, a manau, are kau are as are sip, a epue luini ti fan ruou.

5 Are aman a ken feri pue malemal o mal an krep epue mownga o apitra la naun man, o a momownga le malemal an aman, are lawn an mal an krep a epue luini ti sowni me murinna an pusin naun malemal, o sowni me murinna an pusin naun mal an krep.

6 Are ekei a ngetanget ta, o fisa la ira falafal, o keni ioian mownga, are mownga uawn ira, are malemal; me ken sone ta eue ekei a epue atiau luini ti.

7 Are aman epue likit ngani aman, moni are pisek pue a pue nikaniki; o ra epue solei sowni iman eue muan; are ra ueri trawn solei, a epue luini ti fan ruou.

8 Are trawn solei a sa ueri, eue trawn nikanik a

epue kine to ren Kot, enleta ta are i me ken solei ekoe pisek are sor.

9 Ren sawkun tipis me inisin, are ren kau are as, are sip, are mangaku, are awt metawt a malet la, me ruoman ra ken angingi uawn, ir me ruoman ra pue et to ren Kot; iue, i me Kot a ken tip ngani a epue luin ngani eue fan ruou.

10 Are aman epue likiti ngani aman as, are kau, are sip, are awt sawkun man pue a pue nikaniki; o a me la are a punu, are a malet la, a semen mo a ken na ngani;

11 I a epue akapel ren Jioua are a ken solei peirak an eue; eue samol a epue kinamue ren; o i a semen epue luini ti.

12 Are a solei sowni trawn nikanik, a epue luin ngani an samol.

13 Are a tinani, a epue uai to puara ta; a semen epue luini ti me tinani.

14 Are aman a ken tungor awt metawt ren aman, are a punukisi, are a ken me la, an samol a sap nom ngani, i a pue atiau luini ti.

15 Are eue samol a ken nom ngani, a semen epue luini ti; are me nauna la ren mowni, an mowni epue luinin an.

16 Are muan aman epue angai fapuul aman me sap kafawt, o kawn ren, a epue atiau mowna to i a epue puiluan.

17 Are saman eue fapuul a uet a pue puiluan, a epue luini ngani moni iteit an mowni an fapuul kana.

18 Au pue ni la fefin uaiataua.

19 Au pue ni la aman me ken kawn ren man.

20 Au pue ni la aman me ken keni asawr ngani aman anu, pue Jioua trek au pue keni ngani.

21 Ko sap feri me ingau ngani re uawn, ko sap nauniamanau; pue ami me ken re uawn uawn eue fanu Ijip.

22 Au sap nauniamanau fefin lipit, are aman muenenes.

23 Are ami nauniamanau ekis etrek, are i a epue



iawtok ngani iei ekis etrek, ngang epue atiau ause-  
ling an iawtok.

24 Ngang I epue sawng trapur, o ngang epue ni  
la ami ren kowtlas; puiluami ra epue lipit, o naumi  
kana ra pue muenenes.

25 Are en fang ngani aman nai aramas a uoingau,  
moni pue a pue aia, ko sap feri ngani i oson trawn  
kame are angai sowni i luinin an.

26 Are aman a ken amatru uawn an aman mangaku  
ren an lunimang, a pue aluin ngani i lupuan akar a  
tup tu.

27 Pue ie etrek kus an; a ken fautan unutkan;  
meita a epue maur lawn? iue, a puap iawtok ngani  
iei, ngang I pue auseling; pue ngang me kirakirowtr.

28 Ko sap turunufasi Kot are amokapei samol an  
nom ainang.

29 Ko sap trau asawran mown ua an nom malemal  
o nom mal an krep. Ko pue pual likiti ngani Jioua  
mown naumi muan.

30 Ko pue pual feri oson trek ren naumi kau o sip;  
ran fusu a pue nom ren inan; aualuan ran au pue  
likiti ngani iei.

31 Au pue muan me fel rei; ie me ni au semen  
epue momownga awt fituk man mawtro ra tinani  
lawn malemal; au pue paut ngani kolak kana.

### SOPON 23.

**K**O sap kapas fetal faws makal; paum a sap epue  
etei me kirakir ingau, pue ko pue trawn puara  
ta me ingau.

2 Ko sap trian ngani muit an feri ingau; ko pual  
sap epue puara ta ren awt angingi tawko la murin me  
trawmowng, auli la apungu:

3 Ko sap pual pani me uoingau ren an angingi.

4 Are en truri kau are as naun muan me ken aput  
en, a malet la, ko pue atiau aluina la.

5 Are en ueri as me naun muan me ken aput en, a  
kawn fan os an, ko pue feratru pue ko te likita la i;  
ko pue atiau alisa ta i.

6 Ko sap auili la apungu an me uoingau kana lupuan an tungor.

7 Ko sap arep ngani fefer atupu; ko sap ni la me sor an tipis, are aramas murinna; ngang I semen epue etreni me fefer ingau kana.

8 Ko sap angai mownin me trawfana; moni a ken atruna la mas an trawn apung kana, o auili la kapas an aramas uownetrar.

9 Ko sap nauniamanau re uawn aman; pue ami au silei lelukan re uawn, pue ami me re uawn lawn Ijip.

10 Iir uownu au pue fetoka tu fanu ami, o kini ua an.

11 A, afusu an iir, fanu ami epue asasa, au sap fetoka tu; pue me uoingau lein nom aramas ra pue momownga; me lusun re ir man mawtro ra pue ani. Ko pue feri oson trek ngani nom mal an krep o mal an olif.

12 Ko pue angang ran uownu, ap asasa afusu an ran; pue nom kau o nom as ra pue asasa, pual nom trawnangang, o re uawn, ra pue mefi le tru ar.

13 Au pue feratru ren me inisin me ngang I kapas ngani ami; au sap tretremani itan aman anu, itar a sa rong sowni auom.

14 Au pue feri ngani iei fetelalap fan uluat lawn eu iir.

15 Fetelalap an pret sor lefen ko pue feri; ran fusu ko pue momownga pret a sor lefen, oson trek ngang kapas ngan uk, lawn fansoun asina ta, lawn maram an Epip, (pue iei maram an ami fai la sowni Ijip;) a sor me pue fetal pen to rei.

16 Pual fetelalap an leras, mown ua an nom angang kana me en fetoka tu lawn nom malemal: o pual fetelalap an iown fengeni ua an nom angang lawn malemal lesopon an iir.

17 Fan uluat lawn eu iir nom muan inisin ra pue mou to ren Jioua Kot.

18 Ko sap keni ngani iei tra an ai asawr etei metawt a masas: pual iui an nai fetelalap a sap epue nonom tawrei lesor.

19 Mown ua an fanu ami au pue ua la lawn iman Jioua nom Kot. Ko sap umuni apan an kot lawn tran an aup an inan.

20 Na ngani, ngang I tina la mowami aman Trawnlang me epue amanmani en lawn al, ap ua la ami uawn fanu ngang I amowla ta.

21 Au pue atanaki i, o auseling alon; au sap nukumat ngani i; a semen epue apitra la ami aleasolap; pue itai a nom uawn.

22 Are au pue atiau auseling alon, o feria ta me inisin me ngang I apasa ta; ngang I epue aput me aput en kana, o ngimaleti me ngimalet uk kana.

23 Pue ai Trawnlang a epue okom mowm, ua la en ngani ainang an Amor, me Et, me Peresi, me Kenan, me Iui, me Jepus; ngang I epue ni ir la.

24 Ko sap trape ngani naur anu kana, are iawtok ngani ir, are apiru ar fefer kana; pue en ko pue ata la trapur ir, o tawropasa la ununun naur anu kana.

25 Au pue amatru lamalam an Jioua ami Kot, o I a epue afaiatru nom mownga o nom tran; ngang I epue pual uai sowni ami somau.

26 A sor epue rit uawn fanu om: ngang epue apuanua ta iteit an nom ran kana.

27 Ngang I epue tina la ai amasaku mowm; ngang epue puaratro aramas me inisin me en ko pue fai la ren, o ngang I epue ngani ami uan ir me aput ami me inisin.

28 Ngang epue tina la ornet mowm, me epue tapue sowni re ainang an Iui, me Kenan, me Et mown ami.

29 Ngang sap epue tapue sowni mown ami lawn eu trek iir; pue eue fanu a te pen, o man mawtro trawmowng la ngani ami.

30 Ngang epue tapue sowni ekawt, a failfailo ekawt ko puap trawmowng la, o fanuani eue fanu.

31 Ngang I epue asina ta kiannin fanu om sowni Set Par tawrei set an re Filistia, o sowni fanu pen tawrei eue tranpupu; pue ngang epue fang ngani le paum trawn eue fanu; ko pue tapue sowni ir mown ami.

32 Ko sap puon fengen re ir, are ren naur anu.

33 Ra semen epue nonom trek uawn fanu om, pue ra te atupu en, ko puap tipis rei; pue are au pue atanaki naur anu kana a epue eu seran ngani ami.

## SOPON 24.

**I** A kapas ngani Moses, Ko pue fai ta to ren Jioua, en me Aron, Netap me Apaiu, o pual samol an Jus me fik; au pue fel ekis touau:

2 Moses etrek epue arep to ren Jioua; a ir ra sap arep to; o aramas kana ra sap etei i fai ta.

3 Moses a et to, arani aramas an Jioua kapas me inisin, o an apung me inisin: aramas me inisin ra paluani ren mangungu eu, o apasa, Sa pue aleasotrik kapas inisin me Jioua apasa ta.

4 Moses a make tu an Jioua kapas me inisin, o uksor pue ta, sena ta eu rawng fan eue truk, o aua ta ur engawl me ruofawt, oson trek iteit an ainang an Israel engawl me ruou.

5 O a tina la ekawt alual an ekoe murimur an Israel pue ra keni ngani Jioua asawr man, asawr an kinamue kau.

6 Moses a angai esop an tra ar, niena lawng sepei kana; o esop an tra ar a uitriki ngani eue rawng.

7 I a angai eue puk an puon, o aleani ngani ekoe aramas: ir ra apasa, Sa pue feria ta me inisin me Jioua apasa ta, sa pue aleasotrik.

8 Moses a angai eue tra, uitriki ngani ekoe aramas, o apasa, Na ngani, tra an eue puon me Jioua a ken feri re ami ren kei kapas me inisin.

9 Iue, Moses a fai ta, o Aron, Netap me Apaiu, o samol an Israel me fik.

10 Ra nana ngani Kot an Israel: fan pitran a or oson sasaran fau safair, oson trek lang an ngetanget.

11 A sap isa ta paun uawn ekoe samol an Israel; ir ra atowla Kot, o momownga o unimi.

12 Jioua a kapas ngani Moses, Ko pue fai ta to rei uawn truk, o nonom ie: ngang I pue ngani en

ekoe peikin fau o kapas kana me ngang I make tu, pue ko pue afalafala ir.

13 Moses a u ta, o Jojua naun trawnangang: Moses a fai ta uawn eue truk an Kot.

14 A kapas ngani ekoe samol, Au pue uitauit kitri ikei, sa puap luin to re ami: na ngani, Aron me Ur ra nonom trek re ami; aman me ken angingi ren awt metawt a pue et to re ir.

15 Moses a fai ta uawn eue truk, eue kutru a pualuo la eue truk.

16 Ling an Jioua a nonom uawn eue trukatrukta Sainai, kutru a pualuo la i ran uownu; afusu an ran a kowra to Moses sowni lawn eue kutru.

17 Ling an Jioua a puepue la uawn mawngamawng an eue truk oson trek ekei nget muitir, fan masan ekoe murimur an Israel.

18 Moses a to lawng eue kutru, fai ta uawn eue truk: iue, Moses a ken nonom trek uawn eue truk ran faik me puin faik.

### SOPON 25.

**J**IOUA a kapas ngani Moses, apasa,  
2 Ko pue kapas ngani ekoe murimur an Israel, ra pue ngani iei eu asawr; au pue angai ai asawr sowni muan inisin me leluk an epue afitr.

3 Iei asawr au pue angai sowni ir; kol, me silfer, me pras;

4 Mangaku arauarau, o par o aramaram, o linen me etipuar, o un an kout,

5 Kilin sip muan me par, o kilin ku, o pap an akesia;

6 Le an lamp, uawn ira a pokus me epue feria ta le an apitr, o ngas an keni;

7 Fau oniks, o fau me pue anuka tu uawn efowt o muar an.

8 Ra epue feri ngani iei ut ai; pue ngang to ngani nonom trek re ir.

9 Oson trek me inisin ngang epue puar ngan uk, apepe an eue ut, o apepe an pisek an lawn eue ut, ien oson au pue feria ta i.

10 Au pue feria ta ren pap an akesia eu pawr : leilai an epue seing an paun ruou me esop, o trelap an seing an paun eu me esop, o tokian seing an paun eu me esop.

11 Ko pue trei ngani eue pawr kol etipuar, ko pue trei ngani kol lawn o pual lukin; ko pue pual atinuk ngani kol.

12 Ko pue pual feri nenikawru kol me ruanu o anuka tu ir uawn pitran me fafawt; nenikawru ruou epue nom apeik, o nenikawru ruou uawn apeik.

13 Ko pue feria ta amuar ruofawt ren ira akesia, o trei ngani ir kol.

14 Ko pue seika lawng ekoe amuar lawn ekoe nenikawru uawn peikin eue pawr pue amuara ta pawr ren.

15 Ekoe amuar ra pue nonom trek lawn nenikawru an eue pawr; ra semen epue uai sowni.

16 Ko pue isa lawng lawn pawr kapas an puara ta me ngang I epue ngani en.

17 Ko pue feria ta ren kol etipuar leni an mawt an kirakiratr: leilai an epue seing an paun ruou me esop, o trelap an seing an paun eu me esop.

18 Ko pue pual feria ta kerowp kol me ruoman; ko pue feri ir ren kol a uisi, lesopan ruou an eue leni an mawt an kirakiratr.

19 Ko pue feria ta aman kerowp lesopan eu, aman lesop an eu; ko pue feria ta ekoe kerowp uawn lesop an ruou uawn leni an mawt an kirakiratr.

20 Ekoe kerowp ra pue auena ue pair uawn pualuo la eue leni an mawt an kirakiratr ren pair, masar sep fengen; masan ekoe kerowp ra pue sep ngani eue leni an mawt an kirakiratr.

21 Ko pue pung ta eue leni an mawt an kirakiratr uawn eue pawr a fel; ko pue pung lawng eue pawr kapas an puara ta me ngang I epue ngani en.

22 Ngang I epue truri en ie, o ngang epue mangungu rem me uawn leni an eue mawt an kirakiratr, sowni lefin an ekoe kerowp ruoman me nom uawn eue pawr an kapas an puara ta, mangungu ren

oson me inisin ngang I epue amurimur ngan uk, aloi ngani ekoe murimuran Israel.

23 Ko pue feria ta tepel ren akesia: leilai epue seing an paun ruou, o trelap an seing an paun eu, o towkian epue seing an paun eu me esop.

24 Ko pue trei ngani eue tepel kol etipuar, o atinuk ngani kol.

25 Ko pue feri ngani eue tepel penin trelap an paun eu, pueni fetale i, o atinuk ngani kol uawn penin.

26 Ko pue feri ngani eue tepel nenikawru kol me ruanu, o anuka tu ir uawn lesop an pitran me fafawt.

27 Ekoe nenikawru ra pue arep ngani eue penin, ra pue leni an amuar kana pue ra pue amuara ta eue tepel ren.

28 Ko pue feria ta ekoe amuar ren akesia, o trei ngani ir kol pue ra pue amuara ta eue tepel ren ir.

29 Ko pue feri, sepei an, o spun, o piser, o kowp pue ra pue nian sowni; ko pue feri ir ren kol etipuar.

30 Ko pue pung ta pret an puara ta uawn eue tepel fan masai failfail la trek.

31 Ko pue pual feria ta leni an lamp kol uasauas la: kol a usi epue feria ta eue leni an lamp, mawtongan me seingan; an kowp, an muaran, o etan ra pue feri oson ue trek.

32 Keangan uownufawt epue mare sowni lepeikin; keangan ulufawt sowni apeik an eue leni an lamp, o keangan ulufawt sowni apeik an eue leni an lamp:

33 A pue kowp ulu oson et an almon uawn afawt keangan o muaran me etan; kowp ulu oson trek et an almon uawn afawt keangan o muaran me etan; oson ue trek ren keangan uownufawt me mare sowni eue leni an lamp.

34 Seingan leni an eue leni an lamp epue uor kowp ruanu me oson trek et an almon, o muaran me etan:

35 Pual muaran fan popun keangan ruofawt oson trek, pual muaran fan popun keangan ruofawt oson

trek, pual muaran fan popun keangan ruofawt oson trek, fan keangan uownufawt me mare sowni eue leni an lamp.

36 Muaran kana me keangan kana ra pue oson trek eue leni an lamp: me inisin epue kol uasauas la o usi.

37 Ko pue feria ta an lamp me fusu: ra pue angeta ekoe lamp ra pue asarama falli.

38 Naun atrip kana me leni an mowr an kana ra pue kol uasauas la.

39 Ren eu talent an kol uasauas la au pue feri etei kei sepei me inisin.

40 Ko pue feratru feri ir oson ue trek apepe me puara ngan uk uawn eue truk.

#### SOPON 26.

**K**O pue pual feria ta eue ut mangaku ren mangaku engawl; mangaku linen makowlakowl me araurau, me parapar, atini ngani kerowp kana, angang an trawnangang sileilap, ko pue feria ta ir.

2 Alelai an eu mangaku epue seing an paun rue me ualu, o trelap an seing an paun ruanu; aukuk an mangaku inisin epue oson ue trek.

3 Mangaku limou epue atru fengeni, eu ngani eu, o mangaku limou lusun epue atru fengeni, eu ngani eu.

4 Ko pue feri leni an amatrun ren sikon araurau uawn uownekin alimou an mangaku lawn eu, ap feri oson trek uawn uownekin mangaku lesop an aruou an mangaku.

5 Leni an amatrun me lime uawn eu mangaku, o leni an amawtrun me lime uawn uownekin aruou an mangaku; ekoe amatrun ra pue apaluan fengeni.

6 Ko pue pual feri akuk an kol me lime, o akuk fengeni ekoe mangaku ren ekoe akuk an: eue im ap epue eu trek.

7 Ko ap epue feria ta mangaku an un an kout, me pue eu iman pualuo la eue im mangaku: mangaku engawl me eu ko pue feria ta.



8 Aleilai an eu mangaku epue seing an paun ilik, o trelap an epue seing an paun ruanu : ekoe mangaku engawl me eu epue aukuk eu etrek.

9 Ko ap epue akuk fengeni mangaku limou lawn eu, o mangaku uownu lawn eu, ap lime lawng auownu an mangaku uawn mas an eue im.

10 Ko pue feria ta leni an amatrun lime uawn uownekin mangaku lesop an eu mangaku, o leni an amawtrun me lime uawn uownekin mangaku lesop an aruou an eue mangaku.

11 Ko pue feri akuk an pras me lime, o seika lawng ekoe akuk an, lawn ekoe leni an amatrun, atru fengeni eue iman pualuo la pue a epue eu trek.

12 Esop an ekoe mangaku an eue iman pualuo la me lusun, esop a lusun a epue aitua ta uawn murin eue im.

13 O pual seing an paun eu apeik o seing an paun eu uawn apeik, me lusun aleilain mangaku an eue iman pualuo la, a epue aitua ta uawn peikin eue im, apeik o apeik, pue a pue pualuo la.

14 Ko pue pual feria ta pualuo lawn eue iman pualuo la kilin sip muan me arama, o uawn i pualuo la an kilin ku.

15 Ko pue feria ta pap an eue im ren akesia, ra pue u ta.

16 Aleilai an eue pap epue seing an paun engawl, o trelap an epue seing an paun eu me esop.

17 Ko pue feri leni an kawtup an me ruou uawn eu pap, eu atru ngani eu : ien oson ko pue feri ngani pap an eue im me inisin.

18 Ko pue feri pap an eue im, pap rue apeik an owr an.

19 Ko pue feria ta faik puang an silfer me pue nom fan ekoe pap rue ; ruou puang fan pap eu leni an me ruou kawtup an, ruou puang fan eu pap leni an me ruou kawtup an.

20 Ko pue feri ngani aruou an apeik an eue im, apeik an efeng pap rue :

21 O puang silfer me faik; puang ruou fan pap eu, o puang ruou fan eu pap.

22 Ko pue feri ngani murin im, apinan, pap me uownu.

23 Ko pue feri pap ruou an lukin pokuku an eue im murin.

24 Ekoe pap ruou epue tru fengen fan, anuka tu ngani nenikawru eu; ien oson ir me ruou; ra pue pap an lukin lepokuku ruou.

25 A epue pap ualu, o puang silfer engawl me uownu, ruou puang fan pap eu, o ruou puang fan eu pap.

26 Ko pue feri amuar an akesia, limfawt ngani pap an apeikin eue im,

27 O limfawt amuar an pap an apeikin eue im, o limfawt amuar an pap an murin eue im apinan.

28 Iue amuar an lukanepan ekoe pap epue popua ta lesop an eue im tawrei lesop an.

29 Ko pue trei ngani kol ekoe pap, o feri ar nenikawru kol, leni an ekoe amuar an; ko pue pual trei ngani kol ekoe amuar an.

30 Iue, ko pue aua ta eue im oson trek apepe an me puar ngan uk uawn eue truk.

31 Ko pue feria ta mangaku an atip araurau, me par, linen mangeranger; trawnangang sileilap a epue atini ngani kerowp kana.

32 Ko pue aitua ta uawn ur an akesia me fafawt me trei ngani kol, pual ar afanmakou kol uawn puang ar silfer.

33 Ko pue aitua ta eue mangaku an atip fan afanmakou, o ua lukin eue mangaku an etip eue pawr an mak an puara ta; eue mangaku an etip epue aimu fesenni ngani ami, ekis fel o ekis fel trapur.

34 Ko pue isa ta eue leni an mawt an kirakiratr uawn eue pawr an mak an puara ta lawn ueip me fel trapur.

35 Ko pue isa ta eue tepel mown eue etip, o eue leni an lamp pali an eue im me owr; a eue tepel epue nonom pali efeng an.

36 Ko pue feri mangaku asam an eue im an pualuo la, mangaku araurau, me par, linen mangeranger, feri an aramas sileilap.

37 Ko pue feri ngani eue asam mangaku ur akesia me limfawt, trei ngani ir kol; naur afanmakou epue kol; ko pue feri puang ar pras.

### SOPON 27.

**K**O pue feri rawng an ira akesia, alelai an seing an paun limou, o trelap an seing an paun limou; eue rawng trelapan epue oson trek aleilai an: towkian epue seing an paun uluat.

2 Ko pue feri metran kana uawn lukun pokuku an me ruanu; metran kana ra pue oson ue trek eue rawng; ko pue trei ngani pras.

3 Ko pue feri ngani eue rawng pot kana pue ra pue ua la fanang an lawn, o sowfel kana o sepei an asawr tra o le nomun fituk o sepei an ekei; ekoe sepei inisin ko pue feri ren pras.

4 Ko pue feri ngani eue rawng arawngarawng an pras, o uawn eue arawngarawng nenikawru ruanu uawn le sapon an me ruanu.

5 Ko pue isa ta arawngarawng an fan unukin pue eue arawngarawng epue tawrei lukalepan eue rawng.

6 Ko pue feri ngani eue rawng amuar an akesia, o trei ngani ir pras.

7 Amuar an epue seika lawng lawn ekoe nenikawru, ekoe amuar ra pue nom apeik an eue rawng me apeik, pue ra pue ua la.

8 Ko pue feri i me puang, ren pap, oson trek a puar ngan uk uawn eue truk, ien oson ko pue feri i.

9 Ko pue trun fengeni ekis pueni fetale eue im mangaku: owr an a epue mangaku linen mangeranger aleilai an seing an paun apuku, peikin me eu:

10 A epue ur rue, o mawtong ar rue me pras: afanmakou an ekoe ur o sal me ken taraw la uawn ir epue silfer.

11 Oson trek aleilai an efeng an, a epue mangaku aleilai an seing an paun apuku, ur rue, mawtong an

rue me pras; o akuk ar o uawk me ken taraw la epue silfer.

12 Trelap an eue trun, apilan, epue mangaku seing an paun lime, ur engawl, mawtong ar engawl.

13 Trelap an eue trun, masanran an epue seing an paun lime.

14 Mangaku an apali an asam epue seing an paun engawl me limou: ur ulufawt o mawtong ar me uluat.

15 Pual mangaku an apali an asam epue seing an paun engawl me limou: ur ulufawt o mawtong ar me uluat.

16 Asam an eue trun epue mangaku, aleilai an seing an paun rue, araurau, o par, me linen mangeranger, angang an aramas sileilap; ur me fafawt, o mawtong ar me ruanu.

17 Ur an eue trun me inisin, uawk silfer epue taraw la uawn ir; afanmakou ar epue silfer, o mawtong ar epue pras.

18 Aleilai an eue trun epue seing an paun apuku, o trelap an ekis inisin epue seing an paun lime, o towkian seing an paun limou, linen mangeranger; mawtong ar epue pras.

19 Pisek an angang an eue im mangaku me inisin ra pue pras, metra an amatrun me inisin, o metra an amatrun eue trun me inisin ra pue pras.

20 Ko pue amuramur ngani ekoe murimur an Israel, ra pue ua to rem le an olif a poni, le an lamp me fawkun angeta.

21 Aron o naun kana ra pue atanaki fan masan Jioua, mown eue mangaku an etip me nom ngani eue pawr an mak an puara ta, lekuniol tawrei lesor: a epue kapas an amuramur ren ekoe murimur, an Israel, failfail la trek lawn pilawn ar me inisin.

#### SOPON 28.

**K**O pue akin ngan uk Aron, puim, o naun muan etei i, sowni murimur an Israel koe, pue a pue angang ngani iei uawn souani an prist, Aron, Netap me Apaiu, Eliesar me Itamar, naun Aron.

2 Ko pue feri ngani Aron faut an, mangaku fel, pue a epue lingowtr o etipuar.

3 Ko pue kapas ngani me tipatrem me inisin, me ngang I autane ta ngun an tipatrem, me ir ra pue feria ta faut an Aron pue a pue muan fel, me pue angang ngani iei uawn souani an prist.

4 Ikei faut an me ra pue feria ta: muaran me epue awlopa tu le up an, eu efowt, eu mangaku paupau, eu jakit mangeranger, eu akau, o eu riri an; ra pue feri faut a fel an Aron puim, o an naun muan kana, pue a pue angang ngani iei uawn souani an prist.

5 Ra pue angai ekoe kol, me mangaku araurau, o parapar, o mangeranger o linin.

6 Ra pue feria ta eue efowt ren kol, me araurau, me parapar, me linen mangeranger, angang an aramas sileilap.

7 Leni an amatrun uawn afaran me ruou, epue atru ngani lesopon me ruou, pue a pue tru fengen.

8 Pual riri an me atini me nom uawn, pue a epue riri ren, a epue oson trek eue efowt, a epue kol, me araurau, me parapar, o linen mangeranger.

9 Ko pue angai fau oniks me ruou, ap make tu uawn ir itan ainang an Israel kana;

10 Itar me uownu uawn eu fau, o itan ainang uownu me lusun uawn eu fau, tetel la oson ar up tu.

11 Ko pue make tu ekoe fau ren mak an trawn mak an fau, oson trek mak an leni an asine ta, mak an itan ainang an Israel koe; ko pue feri ir lawn mawtong ar kol.

12 Ko pue anuka tu ekoe fau uawn ekoe leni an amatrun uawn afaran eue efowt; ra pue fau an tretremani ngani ainang an Israel: Aron a pue ua la itar uawn afaran mown Jioua, ra pue tretremanian.

13 Ko pue feria ta sanapi kol:

14 Pual sal kol etipuar me ruofawt, me pukai; ekoe sal me pukai ko pue mine ngani ekoe sanapi.

15 Ko pue pual feri muaran, leni an enleta ta, feri an aramas sileilap, oson trek angang an eue efowt ko

pue feria ta, mangaku kol, araurau, parapar, o linen mangeranger ko pue feria ta i.

16 Aleilai an epue oson ue trek trelap an, o a numi; ekumut epue aleilai an, o ekumut trelap an.

17 Ko pue anuka tu uawn tel an fau, tel an fau ruanu; fau sartios, me topas, me karpownkel epue popun tel an.

18 Aruou an tel an epue emeral, safair me taimon;

19 Aulu an tel an epue jesint, akeit, ametis:

20 Aruanu an tel an epue peril, oniks, me jasper: mawtong ar kol me ra nom lawn me ra pue anuka tu ren.

21 Ekoe fau epue iteit an naun Israel kana, engawl me ruou, iteit an itar, oson trek mak an leni an asine ta, eu fau itan eu ainang; ra pue mak an itan ainang engawl me ruou.

22 Ko pue feri ngani eue muar an sal an kol a uisi, me pukai.

23 Ko pue feri nenikawru kol me ruou, ap anuka tu ir uawn lesop an me ruou an eue muar an.

24 Ko pue anuka tu ekoe sal an kol me pukai me ruofawt lawn ekoe nenikawru ruou, lesop an eue muar an.

25 Lesop an ruou an ekoe sal pukai ruofawt ko pue anuka tu uawn ekoe sanapi ruou, o anuka tu ir uawn leni an amatrun afaran eue efowt, mown.

26 Ko pue pual feria ta lenikawru kol me ruou, o anuka tu ir uawn lesop an ruou an eue muar an, uawn unukin me nom lawn, uawn eue efowt.

27 Ko epue feria ta pual ruou nenikawru kol, o anuka tu ir uawn ekoe amatrun afaran eue efowt, fan lesop ar, arep ngani ekis ra anuka tu ie, arep ngani riri an eue efowt.

28 Ra pue anuka tu eue muar an ren an nenikawru anuka ngani nenikawru an eue efowt ren sal araurau, pue a epue nom uawn eue riri an efowt, o pue eue muar an a sap epue apiti sowni eue efowt.

29 Aron epue ua la itan ainang an Israel uawn eue muar an asine ta uawn ngasangas an, lupuan an fai

lawng lawn eue ueip fel, eu tretremani an mown Jioua fansoun inisin.

30 Ko pue isana lawng lawn eue muar an asine ta eue Saram o kapas enlet; ra pue nom uawn ngasangas an Aron lupuan an fai lawng lawn mown Jioua: Aron epue ua la uawn ngasangas an, leni an asine ta naun Israel kana mown Jioua fansoun inisin.

31 Ko pue feria ta mangaku paupau arauarau uasauas la.

32 A epue uor puang uawn lukalepan, o epue atinuk ngani ekis mangaku eue puang, oson trek puang an eu jakit pue a sap epue terengei.

33 Ko pue feria ta uawn pueni fetale lesop an unukin, powmkrant me arauarau, parapar o aramaram; o pel kol lefin an ekoe powmkrant pueni fetale:

34 Eu pel kol, eu powmkrant, eu pel kol, eu powmkrant pueni fetale uawn lesopan unukin eue mangaku paupau.

35 Aron epue faute ngani lupuan an angang; ra pue rong akurang an lupuan an to lawng ueip fel mown Jioua, o pual an to ue lukin pue a te me la.

36 Ko pue feria ta mangaku metra kol uasauas la, o make tu uawn, oson trek mak an leni an asine ta, **ME FEL NGANI JIOUA.**

37 Ko pue anuka tu i uawn sal arauarau, o a epue nom uawn eue akau, uawn et an mas an eue akau.

38 A epue nom uawn tram an Aron; Aron a pue uai tipis an peirak a fel me murimur an Israel kana epue feleni ren naur fangan a fel me inisin; a epue fawkun nom uawn tram an, pue ir ra pue tren ren Jioua.

39 Ko pue turuni eue jakit etipuar ren linen, o pual feria ta eu akau an linen etipuar, o pual feria ta eu riri, angang an trawn etini.

40 Ko pue pual feri ngani naun Aron muan koe naur jakit, o feri naur riri kana, o pual feri ngani ir naur akau, pue ra pue lingowtr o angawlangawl.

41 Ko epue faute ngani Aron puim, o naun muan etei i; ko pue apiti ir o masonan paur o feleni ir, pue ra pue angang ngani iei uawn souani an prist.

42 Ko pue feria ta trauers linen pue a epue pualuo la ar selei la; ra epue nom uawn sowni lukalepar tawrei pitrar.

43 Aron me naun koe ra pue nom lawn trauers lupuan ar fai lawng lawn fel an Kot, o lupuan ar arep ngani eue rawng pue ra pue angang lawn ueip fel; pue ra te tipis o me la: a epue kapas an amuramur ngani i o murimur an kana failfail la trek.

### SOPON 29.

**I**KEI mini ko pue feri ngani ir, feleni ir, pue ra pue angang ngani iei uawn souani an prist: ko pue angai aman kau atamuan, o sip muan me ruoman, me sor ter an,

2 Pual pret a sor lefen la, o pret a sor lefen me tolan ngani le, o pret a sor lefen le apiti ngani: flaur an uit me etipuar ko pue feria ta.

3 Ko pue isa ta ir uawn eu truk, o ua lawn eue truk etei eue kau muan o sip muan me ruoman.

4 Ko Aron o naun muan koe, pue ua to lukin asam an fel an Kot, o atutu ir lawn tran.

5 Ko pue angai ekoe mangaku, o faute ngani Aron eue jakit o mangaku paupau an eue efowt, pual eue efowt, amuarinei eue muar an, ap ri ngani i eue riri an efowt.

6 Ko pue faute ngani i eue akau, ap anuka tu uawn akau eue muar an me fel.

7 Ko epue pual angai eue le an apit, o niena tu uawn makeran, ap apiti i.

8 Ko pue ua to naun muan koe, o faute ngani ir jakit.

9 Ko pue ri ngani ir ar riri kana, Aron o naun koe, o faute ngani ir akau koe: ir ra pue angai souani an prist ren amuramur a sa uk tu: ko pue feleni Aron o naun koe.

10 O ko pue ua to eue pulok mown fel an Kot;



Aron o naun koe ra pue pung ta paur uawn maker an eue kau muan.

11 Ko ap epue ni la eue pulok mown Jioua, lukin asaman fel an Kot.

12 Ko pue angai ekis tra an eue pulok, o talu ngani ren autom leni an kamatru an eue rawng; ko ap epue niena tu tra me inisin le popun eue rawng.

13 Ko pue angai iui inisin me ken pualuo la afan, o uawn amil an, o ruo kitni, o iui me nom uawn ir, ap fisa la ir uawn eue rawng.

14 Iue fituk an eue pulok, o kilin, o alo, ko pue fisa la ren ekei lukin eue telinim : i me asawr an tipis.

15 Ko pue angai aman ram; Aron o naun koe ra pue pung ta paur uawn maker an eue sip muan.

16 Ko pue ni la eue ram, o angai tra an, uitriki pueni fetale eue rawng.

17 Ko pual rei feseni eue ram, o anna afan me pitran, ap pung ta ren ang an kana, me maker an.

18 Ko pue fisa la ang an eue ram me inisin uawn rawng: a ken asawr an keni ngani Jioua; a ken me ni a po murinna, asawr a keni ngani Kot ren ekei.

19 Ko ap epue angai aruoman an ram; Aron me naun koe ra pue pung ta paur uawn maker an eue ram.

20 Ko pue ni la eue ram, o angai ekis tra an, o talu ngani seling an Aron paliimuan an, o paliimuan an seling an naun koe, o uawn autilap an paliimuan an paur, autilap an paliimuan an pitrar, o pual uitriki tra pueni fetale uawn eue rawng.

21 Ko pue angai ekis tra me uawn eue rawng, o ekis eue le an apit, o uitriki uawn Aron, o uawn an mangaku, o uawn naun koe etei i; Aron a epue me fel, o an mangaku, me naun koe, o naur mangaku etei i.

22 Ko pue pual angai iui an eue ram, o ukun me iui, o iui kana uawn afan, o iui uawn amil an, o afaran paliimuan an : pue iei ram an feleni.

23 Ko pue pual angai pret eu a kukumes, o etra pret me uor le, o etra pret a tretrak, sowni truk an pret a sap lefen la me ken nom mown Jioua.

24 Ko pue pung ta me inisin uawn paun Aron, o paun naun koe; ko pue amua ta ir pue ra pue asawr an amua ta ngani Jioua.

25 Ko pue angai ir sowni paur, o fisa la ir uawn eue rawng, uawn asawr keni, pue a pue mini a po murinna mown Jioua: a ken asawr an keni ren ekei ngani Jioua.

26 Ko pue angai upu an sip muan an feleni Aron, o amua ta mown Jioua pue a epue asawr an amua ta; a ap epue uis om.

27 Ko pue pual feleni upu an asawr an amua ta, o afaran asawr an anusu me ken amua ta o anusu, ang an eue sip muan an feleni, eue me ken feleni Aron o me ken feleni naun koe:

28 Ekoe epue kapas an Aron me naun koe failfail la trek, ren murimur an Israel koe: pue a ken asawr an anusu; a epue asawr an anusu me ren murimur an Israel kana, kifatiu naur asawr an kinamue, naur asawr an anusu ngani Jioua.

29 Iue naun Aron mangaku fel ra pue naun muan murin i, pue a epue apiti lawn ir, o feleni lawn ir.

30 Naun muan me ken niuili i a epue faute ngani ir ran fusu, lupuan an fai lawng lawn fel an Kot pue a epue angang lawn ueip fel.

31 Ko pue angai eue ram an feleni ap amunu fituk an lawn aion pot uawn ekis fel.

32 Aron me naun ekoe muan ra pue momownga fituk an eue ram o pret me nom lawn eue truk, lukin asam an fel an Kot.

33 Ir ra pue momownga mini koe me trar ngani, me feleni ir o aimu ir: aramas an lukin aman a sap epue momownga ir, pue ir me fel.

34 Are ekis fituk an feleni, are pret a lusun tawrei lesor, ko pue fisa la me lusun lawn ekei; a sor me pue momownga, pue me fel.

35 Ien oson ko pue feri ngani Aron o naun koe, oson trek ai amuramur ngan uk me inisin: ko pue feleni ir ran fusu.

36 Iteit an ran ko pue fisa la eue pulok an tipis,

asawr an trar ngani : ko pue feleni eue rawng lupuan om trar ngani ren ; ko pue apiti i, feleni.

37 Ran fusu ko pue trar ngani Jioua ren eue rawng pue feleni i ; eue rawng epue fel trapur ; awt metawt me ken pateri eue rawng a epue fel.

38 Ikei mini ko pue keni uawn eue rawng ; lam me manau ar sap tawrei iir eu, iteit an ran failfail la trek.

39 Ko pue keni aman lam lesor ; o aman lekuniol :

40 Engawl sop an ifa eu an flaur etipuar tolan ngani le a poni, ruanu sop an in eu : o ruanu sop an uain in eu asawr an un, ra pue etei eue lam.

41 Pual aman lam ko pue keni lekuniol, oson asawr an mownga lesor, o oson asawr an un ko pue feri, pue a epue mini a po murinna, asawr a keni ngani Jioua.

42 A epue asawr a keni iteit an ran kana lawn pilawn murimur ami kana, le asam an fel an Kot mown Jioua : iei ekis ngang epue truri ami pue U epue kapas rem ie.

43 Iei ekis ngang epue truri murimur an Israel kana ; eue ekis epue fel ren ai lingatr.

44 Ngang I epue feleni eue fel an Kot o eue rawng : ngang epue pual feleni Aron o naun muan koe pue ra pue angang ngani iei uawn souani an prist.

45 Iue ngang I epue nonom trek lein murimur an Israel koe, o ngang epue naur Kot.

46 Ir ra pue silei me ngang I ken Jioua naur Kot me uai ir to sowni Ijip, pue U epue nonom trek le ir : ngang Jioua naur Kot.

### SOPON 30.

**K**O pue feri eu rawng an po murinna : ko pue feri ren ira akesia.

2 Aleilai an epue seing an paun eu, o trelap an seing an paun eu ; aleilai an epue nene trek trelap an : towkian epue seing an paun ruou : leni an amatrung epue oson ue trek.

3 Ko pue trei ngani kol uasauas la, uawn o lepeikin

me inisin, o leni an amatrun koe; ko pue atinuk ngani kol, pueni fetale i.

4 Ko pue feri ngani eue rawng lenikawru kol me ruou, fan penin; uawn peikin me ruou ko pue feri ir: ra pue leni an amuaran.

5 Ko pue feri amuaran akesia, ap atrei ngani ir kol.

6 Ko pue isa ta eue rawng mown eue mangaku me ken aitua tu mown sop an mak an puara ta, mown eue leni an kirakiratr me ken nom uawn mak an puara ta ekis ngang epue truri en ie.

7 Aron epue keni le po murinna uawn: lesor inisin lupuan an atanaki lamp kana, a epue keni eue le.

8 Aron a puap angeta lamp kana lekuniol a epue keni eue le; epue po murinna mown Jioua lawn pi-lawn ami me inisin failfail la trek.

9 Au sap keni awt sawkun le uawn eue rawng, are asawr an keni, are asawr an mownga; au sap niena tu asawr an un uawn.

10 Aron epue feleni leni an amatrun fan eu lawn eu iir: a epue feleni ren tra an tipis fan eu trek lawn eu iir: a ken fel trapur ngani Jioua.

11 Jioua a kapas ngani Moses, apasa,

12 Ko puap aleani ekoe murimur an Israel, ra pue ngani Jioua luinin manau ar, ir inisin oson iteit ar, lupuan om aleani ir: pue ingau me lapalap a te ueri ir ko puap aleani ir.

13 Aman a puap fai la ren muit an alea kana, a epue ngani esop an eu sekel, nenen sekel an fel an Kot: (rue kera, eu sekel:) esop an eu sekel asawr ngani Jioua.

14 Me inisin me ken fai la ren me alea kana, me manau an tawrei iir rue, ra pue ngani eue asawr an Jioua.

15 Me pisekasek kana ra sap atrapura la, o uoingau kana ra sap akisakisa la, a epue esop an sekel etrek lupuan ar ngani eue asawr an Jioua luinin manau ami.

16 Ko pue angai moni an luinin ekoe murimur an Israel, o asine ta i moni an angang lawn fel an Kot;

a epue lenlemanı an murimur an Israel kana mown Jioua, pue a epue luinin manau ami.

17 Jioua a kapas ngani Moses, apasa,

18 Ko pue feria ta sepei pras, o mawtong an pras, sepei an tutu: ko pue isa tu lefin an fel an Kot me eue rawng, o masoan ngani tran.

19 Aron me naun muan koe ra pue atutu paur o pitrar ie:

20 Fansoun ra pue fai lawng lawn fel an Kot ra pue tutu lawn tran pue ra te me la; pual lupuan ar arep ngani eue rawng pue ra pue angang, keni asawr ngani Jioua:

21 Ie me ni ra pue tutu paur o pitrar, pue ra te me la: a epue kapas an amuramur ngani ir failfail la trek, ngani i me murimur an kana lawn pilawn ar me inisin.

22 Jioua pual kapas ngani Moses, apasa,

23 Ko pue pual angai spais etipuar kana, mowr etipuar sekel limopuku, sinamown me anna ruopuku me lime sekel, o kalamows me anna ruopuku me lime sekel,

24 Kassia limopuku sekel, nenen sekel an fel an Kot, o le an olif eu in:

25 Ko pue ferı le an apit a fel, pokus me aman sileilap a feria ta: a epue le an apit me fel.

26 Ko pue apiti ren eue le, fel an Kot o sop an puara ta,

27 Pual eue tepel me sepei an me inisin, eue leni an lamp me sepei an me inisin, o eue rawng an le po murinna,

28 Pual eue rawng an keni asawr me sepei an me inisin; o eue sepei me mawtong an.

29 Ko pue feleni ir pue ra pue fel trapur: awt metawt me ken pateri ir a epue pual fel.

30 Ko pue apiti Aron me naun ekoe muan, o feleni ir, pue ra pue angang ngani iei uawn souani an prist.

31 Ko pue kapas ngani ekoe murimur an Israel, apasa, Iei epue le an apit me fel rei, lawn pilawn ami me inisin.

32 A sap niena tu uawn fituk an aramas, au sap pual feria ta oson trek i, sawkun an nenu fengeni; a me fel, au pue pin uawn.

33 Aman me feri oson trek i, pual aman me ken talu ekis uawn re uawn aman, a epue aimu sowni naun aramas.

34 Jioua ap kapas ngani Moses, Ko pue angai spais anna kana, stakte, onika, me kalpenowm: spais me anna kana etei frankinsens; atroun ekoe epue pokapokua la:

35 Ko pue feri ren me ni koe insens, me po murinna, feria ta sawkun fefer an me sileilap, tolan ngani sawlt, etipuar o me fel:

36 Ko pue poni kifatin amenu, o isa tu mown sop an puara ta, lawn fel an Kot, ekis ngang epue truri en ie: a epue fel trapur rem.

37 Eue insens me ko pue feri, au sap feri ngani pusin ami me tolan fengeni oson ue trek: pue a pue fel rem ngani Jioua.

38 Aman me epue feri oson eue pue a epue amisi ta, a epue aimu sowni naun aramas.

### SOPON 31.

**J**IOUA a kapas ngani Moses, apasa,  
2 Na ngani, ngang I kera to ren itar, Pesalil naun Uri, me naun Owr me ainang an Juta:

3 O ngang I autane ngani i ngun an Kot, trem o saram, o tipaman, o sileilap angang me inisin,

4 Pue a epue silei angang sileilap, angang an silfer, me kol, me pras,

5 O feri fau an muar an, o ruputi fau, o feri sawkun angang me inisin.

6 Ngang, atiau ngang, I asinea ta ren i Aoliap naun Aisamak, ainang an Tan: o ngang I atipatrema la me inisin me ken sileilap pue ra pue feria ta me inisin me ngang I amuramur ngan uk:

7 Eue fel an Kot, me sop an puara ta, me leni an kirakiratr me nom uawn, o pisek lawn fel an Kot me inisin,

8 Eue tepel o sepei an kana, leni an lamp kol uasauas la, etei sepei an me inisin, me eue rawng an insens,

9 Eue rawng an keni asawr, etei sepei an me inisin, me eue leni an rawng me mawtong an,

10 O mangaku an angang, me mangaku fel an Aron, prist, o mangaku an naun muan kana, pue ra pue angang uawn souani an prist,

11 O le an apit, me insens an spais anna kana, me pue nom lawn ueip fel: oson trek me inisin me ngang I amuramur ngan uk, ir ra pue feria ta.

12 Jioua ap kapas ngani Moses, apasa,

13 Ko pue pual kapas ngani ekoe murimur an Israel, apasa, Atiau au pue amatru ai ran an fel kana: pue asisin eu lefin an ngang me ami o pilawn ami me inisin; pue au pue silei me ngang I ken Jioua me ken afeli ami.

14 Ie me ni au pue afeli ran an fel; pue me fel remi: aman me ken amawfel, atiau a epue mela; pue aman me ken feri awt angang lawn ran an fel, iei aramas epue aimu la sowni an ainang.

15 Ran uownu au pue angang; afusu an ran a ken ran an asese fel, me pin ren Jioua: aman me ken feri awt angang ran an fel, atiau a epue me la.

16 Ie me ni murimur an Israel kana ra pue amatru ran an fel, tumunu ran an fel lawn pilawn ar me inisin, a epue puon failfail la trek.

17 A ken asisin eu lefin an ngang me murimur an Israel kana failfail la trek; pue lawn ran uownu Jioua a feria ta lang o fanufan, o asese afusu an ran, ap mefi.

18 Jioua a ngani Moses, lupuan a ken auasa la an kapas ren uawn trukatrukta Sainai, pali an amur-amur me ruou, pali an fau me autun Kot a make tu uawn.

### SOPON 32.

**E**KOE aramas ra puap na ngani me Moses a ken trau et tu sowni uawn eue truk, ra mou fengen

ren Aron, o kapas ngani i, Ko pue feria ta am anu, me epue okom mown kitr, pue oson Moses eue muan me uei kitr to sowni Ijip, sa sisilei a epue nonom ie.

2 Aron a kapas ngani ir, Au pue uai sowni nar kol me nom lawn seling an puilu ami, naumi muan kana, o naumi nengin kana, ap ua to rei.

3 Ekoe aramas me inisin ra uai sowni nar kol me nom lawn seling ar, ap ua ir to ren Aron.

4 I a angai sowni le paur, o feria ta ren pisek an angang, feria ta ununun kaf; iue, apasa, Iei ra nom anu, O Israel, me ua uk to sowni Ijip.

5 Aron a puap ueri, a ken sena ta eu rawng mown i: Aron a kowkowri, apasa, Lao sa pue fetelalap an Jioua.

6 Ra puap uxor pue ta soretan, o keni asawr, o ua to asawr an kinamue: ekoe aramas ra mawt tu momownga o unimi, ap u ta, urumawt.

7 Jioua a kapas ngani Moses, Ko pue fai tu; pue nom aramas me en ua to sowni Ijip ra ingaua la pusin ir:

8 Ra muitir tawko sowni al me ngang I amuramur ngani ir: ra feria ta naur ununun kaf, ra fefel ngani o keni asawr ngani, o apasa, Iei nom anu, O Israel, me ua uk to sowni Ijip.

9 Jioua ap kapas ngani Moses, Ngang I ueri ekoe aramas, a atiau ir me rongatrau:

10 Iei me ni ko pue pui sowni iei, pue ai sawng a pue trapur la ngani ir, pue ngang epue amawra la ir: o ngang epue feri sowni en eu ainang trapur.

11 Moses a tungor ren Jioua an Kot, apasa, Jioua, puemeta om sawng a ken trapur la ren nom aramas me en ua to sowni Ijip ren manaman trapur o paun a pitrakil?

12 Puemeta re Ijip epue to ngani fawse, apasa, A ken ua la ir ngani me ingau, pue a epue ni la ir uawn truk kana, o amawra la ir sowni mas an fanufan? Ko pue pauta la om sawng trapur, o likita la iei me ingau ko pue feri ngani nom aramas.

13 Ko pue tretremani Epream, Aisak me Israel, nom



trawnangang kana me en akapel ngani ren pusin en, kapas ngani, ngang epue atrawmownga la murimur ami oson trek fu kana lang, o fanu ei me inisin me ngang I fawse ren, ngang epue ngani murimur ami, ir ra pue fanuani failfail la trek.

14 Jiona ap pui sowni me ingau me a ken owkiewki a epue feri ngani naun aramas.

15 Moses ap sep la fai tu sowni eue truk, ekoe pali an fau an amuramur me nom le paun : fau me make tu uawn pali ruou, apeik me apeik me make tu uawn.

16 Ekoe pali an fau me feri an Kot, o eue mak me mak an Kot, make tu uawn ekoe pali an fau.

17 Jojua a puap rong akurang an aramas lupuan ar mairer, a ken kapas ngani Moses, Akurang an maun lawn enan telinim.

18 I a apasa, A sap mangungu an ir me ken mairer pue ra pue puaratro, pual sap mangungu an ir me ken masak pue ra ken kuf; pue mangungu an ir me ken kowl me ngang I rong.

19 Iue, a puap arep ngani eue telinim, a ken ueri eue kaf, o puarik : Moses a sawng trapur, o a pauta tu ekoe pali an fau sowni paun, ap ata la ir le popun eue trukatrukta.

20 A ap angai eue kaf me ir feria ta, ap kena la ren ekei, o poni, amennu, o amawra fetale uawn tran, ap aunu ngani ekoe murimur an Israel.

21 Moses a kapas ngani Aron, Meita kei aramas feri ngan uk, me en tina to tipis trapur uawn ir ren ?

22 Aron a apasa, Ai samol a sap sawng trapur ; en silei kei aramas me ir me ingau.

23 Pue ir kapas ngan iei, Ko pue feri ngani kitr anu me epue okom mown kitr : pue oson eue Moses, muan me ken ua kitr to sowni Ijip, sa sisilei a pue nom ie.

24 Ngang I kapas ngani ir, Aman le ami a or ekis kol ren a pue uai sowni ; o ra ngani iei : ngang I pauta tu lawn ekei, eue kaf ap fai la sowni.

25 Moses ueri me ekoe aramas ingau la, pue Aron

me ingaua la ir, pue me aput ir ra pue kekei asile ir:

26 Moses a u ta lawn asam an eue telinim, o apasa, Ia le ami epue pani Jioua a epue et to rei. Ainang au Lifai me inisin ra mou to ren.

27 I a kapas ngani ir, Iei alon Jioua Kot an Israel; ami me inisin epue lesarani an kotlas, o fai fetale sowni asam, tawrei asam lawn ei telinim me inisin, ap ni la muan inisin puin me trianan me muan unukin.

28 Ekoe aingan an Lifai ra auseling alon Moses: ulengeru lein ekoe aramas me la lawn eue ran.

29 O Moses apasa, Au pue feleni pusin ami ngani Jioua ikanei, me inisin uawn naun muan o puin; pue fajatr epue fai to uawn ami ikanei.

30 Iue, soretan eue ran Moses a ken kapas ngani ekoe aramas, Ami me feri tipis trapur: a ngang I pue fai ta ren Jioua; eli I pue luini ti ami tipis.

31 Iue Moses a luin ue ren Jioua, apasa, O, ekoe aramas ra feri tipis trapur, ra feri ngani ir anu kol.

32 Iue, ar ko pue amusa la naur tipis—; a are sor, ngang I tungor rem ko pue talu ngang sowni nom puk me en make tu.

33 Jioua a kapas ngani Moses, Aman me ken tipis ngani iei, ngang epue talu i sowni ai puk.

34 Iue, ko pue fai la, moanana la ekoe aramas uawn fanu me ngang I kapas ngan uk: na ngani, nai Trawn-atine aman epue okom mowm; a atiau lawn ran an ai enleta ta, ngang epue ninni ir powkitan ar tipis.

35 Iue, Jioua a ken ninni ekoe aramas powkitan ar feri eue kaf, me Aron a feria ta.

### SOPON 33.

**J**IOUA a ken kapas ngani Moses, Ko pue su, fai ta sowni ei, en me ekoe aramas me en ua to sowni Ijip, fai la uawn fanu me ngang I akapel ngani Epream, Aisak, me Jekop, apasa, Ngang epue ngani fanu ei murimur om kana:

2 Ngang I epue tina la aman trawnlang mowm; o

ngang epue tapue sowni ekoe re Kenan, re Amor, re Et, re Peres, re Iui, re Jepus;

3 Uawn fanu me pupu ren tran an aup o owni: pue ngang I sap fai la le ami, pue ami me aramas nukumatr: pue ngang te amawra la ami lawn al.

4 Ekoe aramas ra puap rong ekoe peraus ingau, ra ap sowngisowng: a semen mo muarinei ngani i.

5 Jioua a kapas ngani Moses, Ko pue kapas ngani ekoe murimur an Israel, Ami aramas nukumatr; are ngang I fai la le ami fansoun motramotr etrek ngang epue amawra la ami: ie me ni au pue punit sowni muar ami, pue ngang epue silei me ni U epue feri ngan uk.

6 Ekoe murimur an Israel ra punit sowni ir muar ar arep trukatrukta Orep.

7 Iue, Moses a ken angai im mangaku, aua ta lukin eue telinim, toau sowni eue telinim; o a ngani itan, Ut an trulap. Iue, me inisin me ken kitta Jioua ra ken fai la lawn eue ut an trulap me nom lukin eue telinim.

8 Iue, lupuan Moses a ken fai la lawn eue ut, aramas me inisin ra u ta, nonom muan me inisin le asaman iman, ap na ngani murin Moses a puap to lawng eue ut.

9 Iue Moses a puap to lawng eue ut, eue ur an kutru a ken fai tu, o u ta uawn asaman eue ut: o a ken kapas ren Moses.

10 Ekoe aramas ra na ngani eue ur an kutru a u ta uawn asaman eue ut: aramas ra u ta fefel, muan inisin le asaman iman.

11 Jioua a ken kapas ngani Moses, ra nana fengen, onon trek aman muan a kapas ren aman. Moses a luina lawn eue telinim; a naun trawnangang Jojua naun Nun, aluowl aman, a sap to ue sowni eue ut.

12 Moses a ken kapas ngani Jioua, Na ngani, en me kapas ngani iei, Ko pue ua la kei aramas: a ren sap arani iei ifa i me en ko pue tina la etei iei. A en me apasa, Ngang silei en ren itom, a en me ueri om tren me rei.

13 Iei me ni ngang I tunggor rem, are ngang I ueri ai tren me rem, ko pue puar nganiiei sawkun om fefer, pue ngang pue silei en, pue ngani epue to ngani ueri ai tren me rem: pueiei ainang, ir me nom aramas.

14 Jioua a apasa, Ngang I pue et uk, o ngang epue ngan uk asese.

15 O a apasa, Are en sap eteiiei, ko sap uei kitr sowni ei fanu;

16 Pue ren met a epue puepue la me ngang I a ueri treni me rem, ngang o pual nom aramas? A sap ren om etei kitr, sa epue aimu la, ngang o nom aramas, sowni aramas me inisin me nom uawn fanufan?

17 Jioua a kapas ngani Moses, Ngang I epue pual feriatamini en apasata; pue en me ueri om tren me rei, o ngang I silei en ren itom.

18 I a apasa, Ngang tunggor rem ko pue puar nganiiei om lingowtr.

19 A ken apasa, Ngang epue puar ngan uk ai kirakiratr me inisin, o ngang epue puara ta itan Jioua mown en: o ngang I epue muti i me ngang I mowtren muti, o epue kirakiratr ngani i me ngang I mowtren kirakiratr ngani.

20 A pual apasa, En soto ngani na ngani uawn masai: pue aramas ra sap na ngani uawn masai o manau.

21 Jioua a apasa, Na ngani, a or ekis rei, ko pue u ta uawn fau:

22 Iue, lupuan ai lingowtr a ken fai la mowm, ngang I pue isa ta en lawn eu uetin lawn fau, o pualuo ngan uk pai ai puap fai la.

23 Ngang epue ua sowni pai ko puap ueri sakuri: a masai a sap epue ueri.

#### SOPON 34.

**J**IOUA a ken kapas ngani Moses, Ko pue peraper pali an fau ruopali oson trek ekoe lom: ngang I pue make tu uawn ekoe pali an fau kapas kana me nom uawn pali an fau an lom me en aueti la.

2 Ko pue amowle ngani lesor, o fai to rei lesor uawn trukatrukta Sainai, et to rei uawn mawngamawng an truk.

3 A sor aramas epue et uk fai ta, a sor aramas epue uawn eue truk inisin; pual sip o kau ra sap momownga lepopun eue truk.

4 I a peraper pali an fau ruopali oson trek ekoe lom: o Moses uxor pue ta, o fai ta uawn trukatrukta Sainai, oson Kot amuramur ngani i, a ua la le paun pali an fau ruopali.

5 Jioua a fai tu lawn kutru, o nom ngani i ie, ap puara ta itan Jioua.

6 Jioua a fai la mown Moses, o puara ta, Jioua, Jioua, Anu Lapalap, me ur an mu o kirakiratr, me sawngatrau, me umaumatr etrek o kapas enlet etrek.

7 Me ken kirakiratr trek ngani me trawmowng, apita la fefer ingau, o fefer mual, o tipis: o a semen epue apita la me mukumatr: me ken luini ngani at kana tipis an sam ar kana, o pual ngani naun naur kana tawrei auluan pilawn, are aruanuan.

8 Moses a muitir trape ngani le puun makuran, ap fefel.

9 O a apasa, Are ngang I ueri treni me rem, O Jioua, ngang tungor rem, me Jioua a pue etei kitr fai la: pue me nukumatr ekoe aramas: ko pue apita la am tipis o am me ingau, ap nauna la, sa pue nom.

10 Iue, Jioua apasa, Na ngani, ngan I pue puon ngani ami: ngang epue feri manaman mown nom aramas me inisin, a sor oson trek me feri uawn fanufan me inisin, are ren eu ainang: aramas me inisin me en nom ngani ra pue na ngani angang an Jioua, pue awt amasak me ngang I epue feri rem.

11 Ko pue atanaki me ni ngang amuramur ngan uk ikanei; atiau, ngang tapue sowni mown en re Amor, re Kenan, re Et, re Peres, re Lui, re Jepus.

12 Ko pue feratru, ko sap puon ngani trawn eue fanu me ko pue fai la uawn, pue a te eu seran lepet ami:

13 Pue au pue amaka la naur rawng kana, o ata la naur ur kana, o ukifa tu ununun naur anu:

14 Pue ko sap pipin ngani aman anu: pue Jioua, me itan Lowluo, a ken anu lowluo aman:

15 Pue ko te puon ngani trawn eue fanu, ir ra motraisou ren lamalam an naur anu kana, o keni asawr ngani naur anu, o aman kera to en, ko puap momownga ekis naur asawr;

16 Ko pual angai naur nengin puiluan nom muan kana, naur nengin koe ra motraisou ren lamalam an naur anu kana o ua la nom muan kana pue ra pue motraisou ren lamalam an naur anu.

17 Ko sap feri nom anu metra.

18 Ko pue amatru fefer an fetelalap an pret a sap lefen la. Ko pue momownga pret a sap lefen la ran fusu, oson trek ngang amuramur ngan uk, lawn fansoun an maram an Apip: pue ami fai sowni Ijip lawn maram an Apip.

19 Mown naumi me inisin ra pue nai; pual mown naun nom man me ken atamuan, mown naun kau me sip.

20 Mown naun as ko pue mowni ren lam: are ko sap mowni ko pue punu u an. Mown naun me inisin lein nom muan kana ko pue mowni. A sor me pue et to rei a pen paun.

21 Ran uownu ko pue angang, a ko pue asese afusuan ran, lefeng me leras ko pue asese.

22 Ko pue feri fetelap an uik kana, fetelap an mown uan ras an uit, o pual fetelap an ua lawn kini ami, lesop an iir.

23 Fan ulu lawn eu iir nom muan inisin ra pue mou to mown Jioua Kot, Kot an Israel.

24 Pue ngang I epue tapue sowni ainang kana mowm, o alapa la fanuom: a sor aramas epue mowtren ani fanu om, lupuan om fai la, mou fengen mown Jioua om Kot fan ulu lawn iir eu.

25 Ko sap keni tra an ai asawr ren pret a lefen la: pual asawr an fetelalap an pasofer a sap lusun tawrei lesor.

26 Mown ua an popun ras an fanu om, ko pue ua la le ut an Jioua om Kot. Ko sap umuni kit lawn tran an aup an inan.

27 Jioua a kapas ngani Moses, Ko pue make tu ikei kapas: pue sawkun ueue an ikei kapas, ngang I puon ngan uk, o Israel.

28 I a nonom ie ren Jioua ran faik me puin faik; a sap ani mownga are un tran. O a make tu uawn ekoe pali an fau ekoe kapas an puon, kapas engawl.

29 Iue, Moses a puap fai tu me uawn trukatrukta Sainai, ekoe pali an fan an kapas an puara ta, ra nom le paun, a puap fai tu me uawn eue truk, Moses a sisilei me kilin mas an a etina powkitan Kot a mangu ngu ren.

30 Iue, Aron me ekoe murimur an Israel me inisin ra puap ueri Moses, atiau kilin mas an a etina; ir ap masak kin to ren.

31 Moses a kera to ir; Aron o samol an muit me inisin ra luin to ren: Moses ap kapas ngani ir.

32 Iue murin, ekoe murimur an Israel ra kin to; Moses a amuramur ngani ir me inisin me Jioua a kapas ngani i uawn trukatrukta Sainai.

33 Auas an Moses kapas re ir, a ken pualuo la mas an ren eu mangaku.

34 A lupuan Moses a ken fai lawng lawn ren Jioua pue a pue kapas ren, a ken puini ta ue eue mangaku a puap to ue; o a to ue kapas ngani ekoe murimur an Israel mini a amuramur ngani i;

35 Iue ekoe murimur an Israel ra ueri mas an Moses, me kilin mas an Moses a etina: Moses a pual pualuo ngani mas an eue mangaku, tawrei fansoun a pual to lawng a pue kapas ren Kot.

#### SOPON 35.

**M**OSSES a ken amuit fengeni ekoe murimur an Israel me inisin, o a kapas ngani ir, Ikei kapas me Jioua a ken amuramur ngani ami, pue au pue feria ta.

2 Ran uownu au pue angang, a afusuan ran, a epue ran fel re ami, ran an aseme me fel ren Jioua: au pue ni la aman me ken feri awt angang lawn eue ran.

3 Au sap sona ekei lawn im ami me inisin ran an fel.

4 Moses a kapas ngani muit an murimur an Israel me inisin, apasa, Ikei mini Jioua a ken amuramur, apasa,

5 Au pue angai le ami eu asawr ngani Jioua: aman me pusin leluk an me afitr, a pue ua to; asawr an Jioua: kol, silfer, me pras.

6 Mangaku araurau, parapar, aramaram o mangelanger, o un an kout;

7 Kilin ram me arama, kilin ku, o pap an akesia;

8 Le an lamp, uan ira me pokus ren le an apit, o ngas me pokus,

9 Fau oniks, o fau me pue anuka tu uawn eue efowt o eue muar an.

10 Me inisin me sileilap re ami ra pue fai to, feria ta me inisin me Jioua a amuramur;

11 Eue fel an Kot, im mangaku, me an mangaku an pualuo la, akuk an o pap kana, ainiuou kana, ur kana, o mawtong an kana;

12 Eue sop fel, ainiuou an, eue lenian kirakiratr, o apeun mangaku;

13 Eue tepel, ainiuou an, sepei an kana, o pret fel;

14 Lenian lamp me pue saramaram, sapei an kana, an lamp kana, o le an lamp;

15 Eue rawng an insens, o ainiuou an, le an apit, ngas a pokus o mangaku an uawn asam an fel an Kot:

16 Eue rawng an asawr an keni, arawngarawng an pras, ainiuou an, sepei an me inisin, o eue sepei an keni, mawtong an:

17 Mangaku an apeun trun me rawngei ngani fel an Kot, ur an eue trun, mawtong ar kana, o mangaku an asam an eue trun:

18 Akuk an fel an Kot, o akuk an eue trun, o ar sal kana;



19 Mangaku mangeranger, fautan angang lawn ekis me fel, an Aron eue prist mangaku fel, o mangaku an naun muan kana, pue ra pue angang uawn souani an prist.

20 Muit an ekoe murimur an Israel me inisin ra fai la sowni fan mas an Moses.

21 Iue, ra fai to, me inisin me leluk an a mowkit, me inisin me leluk an a pusin mowtren, ra ua to asawr an Jioua, pisek an feria ta fel an Kot, o pisek an angang an fel an Kot me inisin, o mangaku fel koe.

22 Ra et to, muan o pual fefin, me inisin me leluk ar afitr, ra ua to le nomun, o lela, o lelan asisin, o faupar o pisek an kol inisin, ir me inisin amua ta ar asawr kol ngani Jioua.

23 O muan inisin me or naun mangaku arauarau, parapar, aramaram, o linen mangeranger, o un an koat, o kilin ram me arama, o kilin ku, ra uai ir to.

24 O me inisin me uor ar asawr silfer o pras, ra ua to asawr an Jioua; o muan inisin me or naun pap an akesia murinna ngani awt angang, a ken ua to.

25 Fefin sileilap me inisin ra ken tola ren paur, o ua to me ni ra ken tola, me arauarau, parapar, arama-ram, o linen me au kisakis.

26 Pual fefin inisin me leluk ar mowkit la uawn tipatrem ra ken tola un an kout.

27 Samol kana ra ua to fau oniks, o fau me epue anuka tu uawn eue efowt o eue muar an;

28 O spais kana o le, me pue feria ta le an lamp, le an apit, o ngas an me pokus.

29 Ekoe murimur an Israel ra pusin ua to mini ra mowtren, asawr ngani Jioua; muan me fefin me inisin me leluk ar pusin mowtren ua to pisek an angang me inisin me Jioua amuramur ngani ir ren Moses ra pue feria ta.

30 Moses ap kapas ngani ekoe murimur an Israel, Na ngani, Jioua a kera to ren itar Pesalil naun Uri, me naun Owr, ainang an Juta;

31 O a ken autan ngani i ngun an Kot ren silei o trem, o saram, o sileilap me inisin;

32 O pue a epue tuft owkiowki angang sileilap, pue a epue angang an kol, silfer, me pras.

33 O angang an fau an anuka tu, o rupu ti pap, feri an angang sileilap me inisin.

34 I a pual ngani leluk an pue a pue afalafala, i o pual Aoliap naun Aisamak, ainang an Tan.

35 O a ken autan ngani ir lukatrem pue ra pue tuft ren angang me inisin, angang an make tu uawn fau, angang an niangas, o angang an atele ngani mangaku arauarau, parapar, aramaram, o linen mangeranger, o angang an turuni; angang an ir me ken feria ta sawkun angang inisin, o ir me ken owkiowki angang sileilap.

### SOPON 36.

**P**ESALIL me Aoliap ra pue angang, o pual muan tipatrem me inisin, me Jioua a ken ngani trem o saram pue ra pue silei angang inisin an me fel, oson trek me inisin me Jioua amuramur ngani.

2 Moses a kera to Pesalil me Aoliap o muan sileilap me inisin me Jioua a ngani leluk an trem, ir inisin me leluk ar pusin mowtren etei angang pue ra pue feria ta:

3 Ir ra angai sowni Moses asawr me inisin me ekoe murimur an Israel ua to, ren feri an angang fel. Ra pual pusin ua to asawr lesor me inisin.

4 Muan tipatrem me inisin me ken feria ta angang me fel, aman, aman, ra ken fai to sowni ar angang me ra feria ta;

5 Ir ra kapas ngani Moses, apasa, Aramas me ua to me trapur sowni angang me Jioua amuramur o sa pue feri.

6 Moses a amuramur ngani ir o puara ta lawn eue telinim me inisin, apasa, A sor muan are fefin epue feri awt peirak an asawr ngani feri me fel. Ien oson ra auk tu sowni aramas ar ua to.

7 Pue peirak me nom re ir a trawmowng ngani angang inisin, o pual a uor lusun.

8 Muan tipatrem me inisin le ir me ken angang ra

ken feria ta eue fel an Kot ren mangaku engawl; ren linen mangeranger, arauarau, parapar, aramaram, atile ngani kerowp kana, angang an me sileilap a ken feri ir.

9 Aleilai an eu mangaku seing an paun rue me ualou, o trelap an eu mangaku seing an paun ruanu; mangaku me inisin aukuk eu trek.

10 Mangaku limou a ken atru fengeni, o ekoe mangaku limou a ken atru fengeni.

11 A ap feri leni an amatrun sikon araurau uawn unukun mangaku an lesopan eu mangaku: a pual feri oson trek uawn unukun mangaku an lesopan aruouan mangaku.

12 Leni an amatrun lime a ken feri uawn eu mangaku, o leni an amatrun me lime a pual feri uawn unukun mangaku an lesop an aruouan mangaku: ekoe amatrun ra pue apaluan fengen.

13 A ken feria ta akuk an kol me lime, o atru fengeni ekoe mangaku ren akuk an koe; a ap im eu etrek.

14 A ken feri mangaku an un an kout leni an feria ta im mangaku an pualuo la eue fel an Kot: mangaku engawl me eu a ken feri.

15 Aleilai an eue mangaku seing an paun ilik, o trelap an eu mangaku seing an paun ruanu: aukuk an ekoe mangaku engawl me eu, me eu trek.

16 A ken atru fengen mangaku limou lawn eu, o mangaku uownu lawn eu.

17 A ken feri leni an amatrun lime uawn mangaku lesopan eu mangaku koe, o a ken feri leni an amatrun me lime uawn unukun mangaku an lesopan aruouan ekoe mangaku.

18 A ken feri akuk an pras me lime me epue atru fengeni ekoe mangaku, pue eue im epue eu etrek.

19 A ken feri leni an pualuo la lawn eue im mangaku ren kilin ram me arama, o leni an pualuo la ren kilin ku me pue nom uawn.

20 A ken feri pap an eue fel an Kot akesia, ra u ta.

21 Aleilai an eu pap seing an paun engawl, o trelap an seing an paun eu me esop.

22 Leni an kawtup ruou uawn eu pap, me kawtup fengeni : ien oson ar feria ta pap an eue fel an Kot me inisin.

23 A ken feri pap an eue fel an Kot, pap an pali owr me rue :

24 A ken feri mawtong an silfer fan ekoe pap, me puang faik ; puang ruou fan eu pap, leni an ekoe leni an kawtup fan eu pap, o puang ruou fan eu pap leni an ekoe leni an kawtup me ruou.

25 A ken pual feri pap rue ren pali efeng an eue fel an Kot ;

26 O mawtong an silfer me faik ; ruo fan lesopon an pap eu o ruo fan lesopon an eu pap.

27 A ken feri ngani murin eue fel an Kot apinan pap uownu.

28 Pual pap ruou a ken feri ngani uawn powkuku an eue fel an Kot murin.

29 Ekoe pap ra tru fengen fan, o anuka tu uawn ngani lenikawru eu ; ien oson an feri ngani uawn powkuku ruou.

30 Ba ken pap ualou, o mawtong ar silfer, me puang engawl me uownu, puang ruou fan eu pap.

31 A ap feri ainiou an akesia ; limfawt ngani pap kana apeik eu an eue fel an Kot,

32 O limfawt ainiou an ngani eu apeik an eue fel an Kot, o limfawt ngani pap kana murin eue fel an Kot apinan.

33 Ainiou an lukalep an a ken feri, pue a pue popua ta lesop an eu tawrei lesop an eu uawn pap kana.

34 A ken trei ngani pap kana kol, o lenikawru kol, leni an ekoe ainiou an, o pual trei ngani ainiou koe kol.

35 A ken feri mangaku an atip arauarau, parapar, aramaram, o linen mangeranger ; atile ngani kerowp kana, angang an me sileilap.

36 A ap feri ur an eue atip, ur akesia me fafawt o

atrei ngani ir kol; leni an amatrun me pual kol; o a ken feri mawtong ar silfer me ruanu.

37 A ken feria ta mangaku an asam an eue im an pualuo la, arauarau, parapar, aramaram, o linen mangeranger, angang an me sileilap atile ngani;

38 Pual ur an eue asam mangaku me limfawt etei leni an amatrur; a ken trei ngani kol uawr o ar penin an; o mawtong ar me limou ra ken pras.

### SOPON 37.

**P**ESALIL a feria ta eue sop fel, pap akesia: aleilalai an seing an paun ruou me esop, o trelap an seing an paun eu me esop, o towkian seing an paun eu me esop:

2 A ken atrei ngani i kol etipuar lawn o pual lukin, o atinuk ngani i kol me pueni fetale i.

3 O a feri ngani i lenikawru kol me ruanu, uawn pitran me fafawt, lenikawru ruou uawn apeik, o lenikawru ruou uawn apeik.

4 A ken feri ainiuou an akesia, ap trei ngani ir kol.

5 O a seika lawng ekoe ainiuou an lawn ekoe lenikawru lepeik an eue sop fel, pue ra pue ekia ta eue sop fel ren.

6 A pual feri eu leni an kirakiratr, kol etipuar; aleilai an seing an paun ruou me esop, o trelap an seing an paun eu me esop.

7 A ken feri kerowp kol ruoman; angang an usi a ken feri ir ren, uawn lesopon me ruou an eue leni an kirakiratr;

8 Aman kerowp uawn lesopon eu, aman kerowp uawn eu lesopon; kifatin lenian kirakiratr a ken feri ekoe kerowp ren, uawn lesopon me ruou.

9 Ekoe kerowp ra ken auowna la paur uawn, o pualuo la eue leni an kirakiratr ren paur, uawn mas ar nana fengen: uawn mas an ekoe kerowp ra sep ngani eue leni an kirakiratr.

10 A pual feri eue tepel ren pap akesia: aleilai an seing an paun ruou, o trelap an seing an paun eu, o towkian seing an paun eu me esop;

11 A ken atrei ngani i kol etipuar, atinuk ngani kol pueni fetale i.

12 A ken feri penin pueni fetale eue tepel, trelap an ekumut, o a atinuk ngani penin kol, pueni fetale i.

13 A ken feri ngani eue tepel, lenikawru kol me ruou, o anuka tu ekoe lenikawru uawn ekis an pitran me fafawt.

14 Ekoe lenikawru me kin ngani penin, ra ken leni an ainiuou an me eue tepel epue ua la ren.

15 A ken feri ekoe ainiuou an akesia, o trei ngani ir kol, pue eue tepel epue ua la ren ir.

16 O a feri peirak an, me nom uawn eue tepel, ren kol etipuar, sepei : pol, o spun, o kowp, o pijer, leni an niena la.

17 A ken feri eue leni an lamp ren kol etipuar : kol a usi a feria ta eue leni an lamp, ren mawtong an, o sengan, o an kowp kana, penin kana, o et an kana, ir kifatin kol, nene trek.

18 Keang an uownufawt mare sowni lepeikin me ruoupeik, keang an eue leni an lamp me ulufawt sowni apeik, o keang an eue leni an lamp me ulufawt sowni apeik ;

19 Kowp ulu me oson trek et an almown lawn afawt keang an, penin me et an : pual kowp ulu me oson trek et an almown lawn aruou an keang an penin me et an ; oson ue trek keang an uownufawt me mare sowni eue leni an lamp.

20 Lawn sengan eue leni an lamp, kowp ruanu me oson trek et an almon, penin me et kana :

21 O penin fan keang an ruofawt nene trek, o penin fan pual ruofawt keang an nene trek, o penin fan keang an ruofawt nene trek ; keang an uownufawt me mare sowni eue leni an lamp.

22 Penin koe o keang an koe ra ken nene trek : me inisin feria ta nene trek ren eu kol etipuar a usi.

23 A ken feri ren kol etipuar, an lamp me fusu, o an atrip kana, o sepei an mowr an kana.

24 A ken feri eue leni an lamp me sepei an kana ren eu talent an kol.

25 A ap feria ta eue rawng an ngas an keni ren pap akesia: aleilai an seing an paun eu o trelap an seing an paun eu trelap an me oson trek aleilai an; o metran koe oson ue trek.

26 A ken trei ngani kol etipuar uawn o lepeikin pueli faile i; o a ken atinuk ngani kol, pueli fetale i.

27 A ken feri ren lenikawru kol me ruou, fan penin, uawn peikin me ruou, leni an ainiou an pue ra pue ua la ren.

28 A ken feri ainiou koe ren ira akesia, o trei ngani ir kol.

29 A ken feri le an apit me fel, o ngas an keni an spais anna, sawkun fefer an me sileilap.

#### SOPON 38.

**A** PUAL feri eue rawng an keni asawr ren pap akesia: aleilai an seing an paun limou, o trelap an seing an paun limou, trelap an oson ue trek aleilai an: o towkian seing an paun ulu.

2 A ap feri metran me fafawt uawn ekis ruanu. Ekoe metran me oson trek rawng; a ken trei ngani pras.

3 A ken feri peirak an eue rawng me inisin, pot kana, o sowfel kana, o sepei kana, o le nomun, fituk, sepei an mowr an ekei: peirak an me inisin a ken feri ren pras.

4 A ken feri ngani eue rawng, trun an pras, fan penin, towkian tawrei lukalepan eue rawng.

5 A ken feri lenikawru pras uawn lesopan ruanu an eue penin an, leni an ainiou an.

6 A ken feri ekoe ainiou an akesia, o trei ngani ir pras.

7 A ap seika lawng ekoe ainiou an, lawn ekoe lenikawru lepeikin eue rawng pue a pue ua la ren; a ken feri puang, lawn tepel.

8 A ken feri eue sepei pras, o mawtong an pras; an trawnangang fefin me ken angang le asam an eue fel an Kot, naur pipi kana.

9 A ken feri rawng: uawn paliowr etei mangaku

an rawng, ren linen mangeranger, aleilai an seing an paun apuku ;

10 Ur an me rue o mawtong ar pras rue : akuk an ekoe ur o penin an me silfer.

11 O pali efeng an, aleilai an seing an paun apuku, ur an me rue, o mawtong ar pras me rue ; akuk an ekoe ur o ainiuou an me silfer.

12 Mangaku an apilan, aleilai an seing an paun lime, ur an engawl, a mawtong ar engawl : akuk an ekoe ur o penin an me silfer.

13 O mangaku an masanran an, seing an paun lime.

14 Mangaku an apali an asam, seing an paun engawl me limou, ur an me ulufawt, o mawtong ar me ulu ;

15 Pual oson ue trek apali an eue asam an eue rawng ; apali me apali, mangaku seing an paun engawl me limou, ur ulufawt, o mawtong ar me ulu.

16 Mangaku an eue rawng pueni fetale me inisin me linen mangeranger.

17 Mawtong an ur kana me pras, akuk an ur kana o penin an me silfer : unukun uawn ekoe ur me trei ngani silfer ; o penin ekoe ur an eue rawng me inisin me silfer.

18 Mangaku an itua tu uawn asam an eue rawng me angang an trawn atile ngani, mangaku arauarau, parapar, aramaram, o linen mangeranger : aleilai an seing an paun rue, o towkian lawn trulap an seing an paun limou pne paluani mangaku an eue rawng.

19 Ur me fawt, o mawtong ar ruanu me pras ; akuk ar silfer, o uawn ir, silfer me trei ngani, o penin uawn ir pual silfer.

20 Trufel an fel an Kot me inisin, o an eue rawng me pueni fetale me pras.

21 Ekoe iteit an peirak an eue fel an Kot ut an mak an puara ta, oson ar aleani ir, oson ue trek Moses amuramur ngani ir, ren angang an ainang an Lifai, ren paun Itamar, naun Aron eue prist.

22 Pesalil naun Uri, naun Owr, ainang an Juta, a ken feri me inisin me Jioua amuramur ngani Moses.



23 A tian an Aoliap, naun Aisamak, ainang an Tan, trawn ruputi me sileilap, trawn atile ngani me arauarau, o parapar, o aramaram, o linen mangeranger.

24 Kol inisin me ra feri angang an eue fel an Kot me inisin ren, kol an ar asawr, a ken talent rue me tuou o sekel fupuku ilik, nenen sekel an fel an Kot.

25 A silfer an ir me aleani lawn eue muit a ken talent apuku, o sekel engerou fupuku fik me limou, nenen sekel an fel an Kot:

26 Eu peka, esop an sekel eu, luinin aman, nenen sekel an fel an Kot, luinin me inisin me ken fai la ren muit an me aleani kana, me manau ar tawrei, muan uownu faunipi ulengerou limopuku lime.

27 Ekoe talent an silfer apuku ir feri mawtong an ur an fel an Kot, o mawtong apeun, mawtong an apuku ren talent apuku, eu talent ren mawtong an eu.

28 A ren ekoe sekel engerou fupuku fik me limou a ken feria ta akuk an ekoe ur, o trei ngani uawn ekoe ur, o feri penin uawn ir.

29 Pras an ar asawr a ken talent fik, o sekel runderou fapuku.

30 O ren eue pras a ken feria ta mawtong an ur an asam an eue fel an Kot, o eue rawng pras, o trun an pras, o peirak an eue rawng kana,

31 O mawtong ur an eue rawng me pueni fetale eue fel an Kot, o mawtong an asam an eue rawng, o metra an trufel an eue fel an Kot, o metra an trufel an rawng me rawngei ngani.

### SOPON 39.

**R**A feria ta ren arauarau, parapar, o aramaram mangaku etipuar, faut an ar angang ekis me fel, ra feri ngani Aron faut an a fel, oson trek Jiqua kapas ngani Moses.

2 A ken feri eue efowt ren kol, arauarau, parapar, aramaram, o linen mangeranger.

3 Ra ken uisi feri tren an kol, o rei ngani sal metra, pue ra pue atile ngani me arauarau, parapar, aramaram, o linen mangeranger, angang an me sileilap.

4 Ra ken feri linen an amatru eue efowt uawn afar-an, atru fengeni; lesop an me ruou me atru fengeni.

5 Pual riri an me atile, me nom uawn, pue eue efowt epue riri ren, o angang an oson ue trek; a ken kol, arauarau, parapar, aramaram, o linen mangeranger, oson trek an Jioua kapas ngani Moses.

6 O ra feri fau oniks, anuka tu ir uawn mawtong ar kol, make tu uawn ir itan ainang an Israel kana, oson trek mak an metra an asisin.

7 A ken anuka tu ir uawn ekoe leni an amatrun uawn afar-an eue efowt, pue ra pue fau an lenlemani an ekoe murimur an Israel; oson trek an Jioua kapas ngani Moses.

8 I a feria ta muaran me epue alopa tu, angang an aramas sileilap, a oson trek angang an eue efowt; kol, arauarau, parapar, aramaram, o linen mangera-nger.

9 Aleilai an oson ue trek trelap an; ra ken feri i a numi: ekumut aleilai an, o ekumut trelap an, a numi.

10 Ir ap anuka tu uawn ruanu tetel an fau: sartiows, topas, me karpownkel eu tetel an.

11 Aruou an tetel an, eu emeralt, eu safair, o eu taimont.

12 Aulu an tetel an, eu jesint, eu akeit, o eu ametist.

13 Aruanu an tetel an, eu peril, eu oniks, o eu jasper: mawtong ar kol me ra anuka tu ren pueni fetale.

14 Ekoe fau me iteit an itan ainang an Israel kana, engawl me ruou, iteit an itar: oson trek mak an metra an asisin, itan eu ainang, eu ainang, tawrei ekoe ainang engawl me ruou.

15 Ra ken feri uawn eue muaran me alopa tu sal, metra kol etipuar me pukai.

16 Ra ken feri mawtong kol ruou, o lenikawru kol

ruou; ra ap anuka tu ekoe lenikawru ruou uawn lesop an eue muaran me ruou.

17 Ra ken anuka tu ekoe sal kol me pukai, ruofawt lawn ekoe lenikawru kol me ruou uawn lesop an eue muaran.

18 Aruou an lesop an ekoe sal metra me pukai me ruoufawt, ra ken anuka tu uawn ekoe mawtong ruou, ap anuka tu ir uawn ekoe leni an amatrun uawn afaran eue efowt mown.

19 Ir ra feri lenikawru kol me ruou, o anuka tu ir uawn lesop an ruou an eue muaran, uawn unukun me nom lawn, uawn eue efowt.

20 O ra feri pual ruou lenikawru kol o anuka tu ir uawn ekoe amatrun uawn afaran eue efowt fan lesop ar mown, arep ngani ekis ra anuka tu ie, uawn riri an eue efowt.

21 Ir anuka eue muaran ren an lenikawru, anuk ngani lenikawru an eue efowt ren sal arauarau, pue a epue nom uawn eue riri an efowt, pue eue muaran a te tina sowni eue efowt: oson trek an Jioua kapas ngani Moses.

22 A ap feria ta eue mangaku paupau, a turuni arauarau uasauas la:

23 O puang an u an eue mangaku paupau lukalep an, oson trek puang an u an jakit metra, trei ngani mangaku pueni fetale eue puang, pue a te kam.

24 Ra ken feria ta uawn lesop an unukun eue mangaku paupau powmkrant arauarau, parapar, aramaram, o linen mangeranger.

25 Ir ra feri ren kol etipuar, pel kana, o anuka tu ekoe pel lefin an ekoe powmkrant uawn lesop an unukun eue mangaku paupau, pueni fetale lefin an ekoe powmkrant.

26 Eu pel, eu powmkrant, eu pel, eu powmkrant, pueni fetale uawn lesop an unukun eue mangaku paupau, pue a angang lawn: oson trek an Jioua kapas ngani Moses.

27 O ra feria ta jakit kana ren linen mangeranger a turuni, naun Aron o naun naun muan koe,

28 O akau linen mangeranger, o lesarop etipuar linen mangeranger, o rauses linen mangeranger,

29 O riri an linen mangeranger, arauarau, parapar, o aramaram, angang an trawn atile ngani: oson trek an Jioua kapas ngani Moses.

30 Ra ken feria ta eue muar metra pue a fel, kol etipuar, o make tu uawn, oson trek mak an metran asisin, ME FEL REN JIOUA.

31 Ra pual ri ngani sal arauarau, pue a epue anuka tu uawn eue akau; oson trek an Jioua kapas ngani Moses.

32 Iei oson ar auasa la angang an eue fel an Kot: ekoe murimur an Israel ra ken feri oson trek an Jioua kapas ngani Moses, ie me ni ra feria ta.

33 Iue, ra ua to ren Moses eue fel an Kot, eue im mangaku an pualuo la, me pisek an me inisin, akuk an kana, pap kana, ainiuou an kana, ur kana, maw-tong ar kana;

34 Kilin sip muan me arama, leni an pualuo la, o leni an pualuo la kilin ku, o apeun mangaku;

35 Eue sop an puara ta, ainiuou an kana, o eue leni an kirakiratr;

36 Eue tepel, o sepei an me inisin, o pret an puara ta;

37 Eue leni an lamp kol uasauas la, an lamp kana me pue tetel la, o sepei an kana, o le an lamp:

38 Eue rawng kol, le an apit, ngas a pokus, o mangaku an eue asam an fel.

39 Eue rawng pras, o an trun an pras, ainiuou an kana, o sepei an me inisin; eue sepei mowng, o maw-tong an;

40 Mangaku an eue rawng, ur an kana, o maw-tong ar kana, eue mangaku an asam an eue rawng, sal an kana, o akuk an kana, o pisek an angang an eue fel an Kot me inisin;

41 Ekoe mangaku etipuar an angang lawn ueip fel, jakit fel an Aron, eue prist, o jakit an naun muan koe, pue ra angang uawn souani an prist.

42 Ekoe murimur an Israel ra feria ta angang

inisin oson trek me inisin me Jioua a kapas ngani Moses.

43 Moses a ken kawton ekoe angang me inisin, o atiau ra auasa la; ra feria ta oson trek kapas an Jioua; Moses ap afaiatru ir.

#### SOPON 40.

**J**IOUA a kapas ngani Moses, apasa,  
2 Ko pue aua ta eue fel an Kot le popun ran an popun maram.

3 Ko pue isa tu ie eue sop an puara ta, o apeun ngani eue sop, mangaku.

4 Ko pue ua lawng eue tepel, o enenia pisek kana me nom uawn: o ua lawng eue leni an lamp, o isa te lamp kana uawn.

5 Ko pue isa tu eue rawng kol an ngas a pokus mown eue sop an puara ta, ap aitua ta mangaku uawn asam an fel an Kot.

6 Ko pue isa tu eue rawng an keni asawr mown asam an fel an Kot.

7 Ko pual isa tu eue sepei mowng lefin an fel an Kot o eue rawng, o amasoa ngani tran.

8 Ko pue aua ta eue rawng pueni felale; ap aitua ta mangaku uawn asam an eue rawng.

9 Ko pue angai le an apit, o apiti eue fel an Kot, o pisek inisin me nom lawn, feleni i, o peirak an me inisin; a epue me fel.

10 Ko pue apiti eue rawng an keni asawr, o pisek an me inisin, feleni eue rawng: a epue fel trapur.

11 Ko pual apiti eue sepei mowng o mawtong an, feleni i.

12 Ko pue moanana to Aron me naun koe lukin asam an fel an Kot, o atutu ngani ir tran.

13 O ko pue faute ngani Aron ekoe jakit me fel; ko pue apiti i, feleni i, pue a pue tufit angang ngani iei uawn souani an prist.

14 Ko pual moanana to naun muan koe, ap faute ngani ir jakit:

15 Ko pue apiti ir oson trek om apiti sam ar, pue

ir ra tufit angang ngani iei uawn souani an prist: o ar apiti epue asinan ngani ir pue ra pue prist failfail la trek lawn pilawn murimur ir inisin.

16 Ie me ni Moses a ken feri; oson trek an Jioua kapas ngani i me inisin, ien oson an fefer.

17 Iue, lawn popun maram an aruou an iir, popun ran an eue maram, ra ken aua ta eue fel an Kot.

18 Moses a ken aua ta eue fel an Kot, isa tu maw-tong an kana, aua ta pap kana, seika lawng ainiuou an kana, o aua ta ur kana.

19 O a pualuo ngani eue fel an Kot eue im mangaku, o pualuo ngani eue im mangaku eue pisek an pualuo la; oson trek an Jioua a kapas ngani Moses.

20 O a ken angai ekoe fau an puara ta, isa lawng lawn eue sop fel, o mine ngani uawn eue sop ainiuou an, o pung ta eue leni an kirakiratr uawn eue sop fel:

21 A pual ua lawng lawn fel an Kot eue sop fel, o aitua ta mangaku an apeun, apeun ngani eue sop an puara ta: oson trek an Jioua kapas ngani Moses.

22 A ken isa tu eue tepel lawn fel an Kot, lukin eue apeun, lepeikin fel an Kot pali efeng.

23 O a ken eneia eue pret uawn tepel mown Jioua; oson trek an Jioua kapas ngani Moses.

24 O a isa tu eue leni an lamp lawn fel an Kot, paluan ngani eue tepel, lepeikin fel an Kot paliowtr.

25 A ken isa te ekoe lamp mown Jioua; oson trek an Jioua kapas ngani Moses.

26 A ken isa tu eue rawng kol lawn fel an Kot, mown eue apeun:

27 O a ken keni uawn, ngas a pokus; oson trek an Jioua kapas ngani Moses.

28 A pual aitua ta mangaku uawn asam an fel an Kot.

29 O a isa tu rawng an keni asawr lukin asam an fel an Kot, o a keni uawn asawr an keni, o asawr an mownga; oson trek an Jioua kapas ngani Moses.

30 A ken isa tu eue sepei mowng lefin an fel an Kot me eue rawng, amasoa ngani tran pue ra pue atutu ren.

31 Moses me Aron o naur koe ra ken atutu paur me pitrar ie;

32 Ra puap to lawng eue fel an Kot, o ra puap kin ngani eue rawng ra ken atutu ir; oson trek an Jioua kapas ngani Moses.

33 A ken aua ta eue rawng, rawngei ngani fel an Kot me eue rawng, o aitua ta mangaku uawn asam an eue rawng. Iue, Moses a ken auasa la ekoe angang.

34 Eue kutru a pualuo la fel an Kot, o ling an Kot a amasoa ngani eue ut.

35 Moses a se tufit to lawng lawn fel an Kot powkitan eue kutru a nom uawn, o ling an Kot amasoa ngani eue ut.

36 Eue kutru a puap fai ta sowni uawn eue fel an Kot, ekoe murimur an Israel ra ken su, lupuan ar urur me inisin :

37 Iue, are eue kutru a sap fai ta sowni, ir ra sap su tawrei ran an a ken fai ta sowni.

38 Pue eue kutru an Jioua a nom uawn eue ut leran, o ekei a nom lawn eue kutru lepuin, mown mas an ainang an Israel me inisin lupuan ar urur me inisin.

# LIFITIKOWS.

## SOPON 1.

**I**UE, Jioua a ken kowkowri Moses, sowni fel an Kot, o kapas ngani i apasa :

2 Ko pue kapas ngani naun Israel koe o fanau ir; lupuan aman le ami a ua to asawr ngani Jioua, ami au epue ua to naumi asawr sowni naumi man kana, o puin kau me puin sip.

3 Are a ua to asawran-keni sowni puin kau, a epue atamuan aman me fawkun murinna; i a epue ua to ren asam an fel an Kot pue a pue tren ren Jioua.

4 I a epue isa te paun uawn makeran eue asawran-keni, o epue tren ren o luini ti i.

5 O i a epue ni la eue pulok mown Jioua o ekoe prist naun Aron, ra pue angai tran o uitriki uawn eue rawng, pueni fetale i, me ren asam an fel an Kot.

6 O a epue uai sowni kilin eue asawran-keni o ukifikisi i.

7 Iue, naun Aron eue prist ra epue sona ta ekei uawn eue rawng o isa te amutr uawn ekei.

8 O ekoe naun Aron eue prist, ra epue isa te koe uis an, makeran o an iui uawn amutr an ekei me nom uawn eue rawng.

9 Aman a epue onna la afan o pitran koe lawn tran, o eue prist epue keni me inisin uawn eue rawng, ren asawran-keni asawr a feri ren ekei a po murinna ngani Jioua.

10 Are an asawr me aman lam me ren puin sip kana, are aman kout ren asawran-keni, a epue ua to aman atamuan me fawkun murinna.

11 O a epue ni la i pali efeng eue rawng fan masan Jioua; o naun Aron ekoe prist, ra epue uitrikitriki tran uawn eue rawng pueni fetale.

12 O aman epue ukifikisi, me makeran me an iui, o



eue prist epue isa te ir uawn amutr me ken nom uawn ekei, uawn eue rawng.

13 O aman epue onna la afan o pitran koe, o eue prist epue keni me inisin uawn rawng an keni; asawran-keni me feri ren ekei, a pokus ngani Jioua.

14 Are a epue ua to ren Jioua asawran-keni sowni man su kana, a epue ua to an asawr sowni towrtel towf, are apen an moimoi kana.

15 Eue prist a epue ua la ren rawng o ungitu sowni makeran o keni uawn eue rawng, o tran epue fie uawn le pali an eue rawng.

16 O aman epue uai la makeran o unan, o tina la ir ren eue rawng pali-masairan, ren ekis an falang;

17 O a epue tilenei paun o a sap aimu feseni, o eue prist epue keni i uawn eue rawng uawn amutr me ken nom uawn eue ekei; asawran-keni me feri ren ekei a pokus ngani Jioua.

## SOPON 2.

**I**UE, lupuan aman a ua to ren Jioua eu asawran-mownga an asawr epue sowni flaur etipuar, o a epue niena la le uawn, o pokus.

2 O i epue ua to ren naun Aron ekoe prist; o i a pue angai sowni, o amasoa ngani paun sowni eue flaur etipuar o le, etei pokus inisin, o eue prist epue keni uawn rawng, asawran-tretremani, ren ekei, amisita allim ngani Jioua.

3 A lusun eue asawran-mownga epue naun Aron o naun kana; a fel trapur lein asawr an Jioua me feri ren ekei.

4 Lupuan om ua to asawran-mownga, umuni lawn um, ko epue ua to apawsuk an flaur etipuar, a sor lefen, nenu fengen ren le, o apawsuk me tretrak, a sor lefen, a trelifi ren le.

5 Are om asawran-mownga me awt umuni lawn sepai an kapuot, a epue flaur etipuar sor lefen, nenu fengen ren le.

6 Ko pue punukisi tu, o ko pue niena la le uawn; iei me asawran-mownga.

7 Are om asawran-mownga a umuni lawn pot, ko pue feri ren flaur etipuar lawn le.

8 Iue, eue asawran-mownga me en feri ngani Jioua sowni kei, ko pue ua to ren eue prist o i epue ua la ren eue rawng.

9 O eue prist epue ekia ta sowni asawran-mownga, tretremani an, o keni uawn rawng; me asawr ren ekei, amasita allim ngani Jioua.

10 O lusun asawran-mownga epue an Aron me naun koe; a fel trapur lein asawr an Jioua me feri ren ekei.

11 Asawran-mownga me inisin me en ua to, ko sap feri ren lefen; ko sap keni lefen are puletr, asawr an Jioua, me feri ren ekei.

12 Ami au ua to ren Jioua asawran-mown-ua kana; o ra sap epue keni uawn eu rawng ren pokus.

13 Ko pue sawla ta naumi asawran-mownga inisin; ko sap pauta la sowni om asawran-mownga sawl an puon an om Kot; ko pue ua to sawl etei om asawr inisin.

14 Are en ua to ren Jioua asawran-mownga an mown ua kana, ko pue ua to sowni om mown ua koe ren asawran-mownga, sowni faun ua me ken umuni uawn ekei o poni a sepowkakak.

15 O ko pue feri le uawn, o isa te frankinsens uawn: iei oson asawran-mownga.

16 Eue prist a epue keni asawran-tretremani sowni eue faun me poni o le, etei frankinsens me inisin: iei me asawr an Jioua me feri ren ekei.

### SOPON 3.

**A**RE an lifang me asawran-kinamue, are atamuan are niafein me ren puin kau, i a epue ua to ren Jioua, aman auasauas an murinna.

2 I a epue isa tu paun uawn makeran an asawr o ni la i ren asam an fel an Kot, o ekoe prist naun Aron, ra epue uitrikitriki eue tra uawn eue rawng pueni fetale.

3 O a epue ua to sowni an asawran-kinamue, asawr a keni ngani Jioua ren ekei; iui an kawl, afan o iui me nom uawn afan koe,

4 O ekoe kitni me ruou, o iui me nom uawn, o pual uawn pitran koe, o a epue uai sowni eue trotas an anilan koe, etei kitni koe.

5 O ekoe prist, naun Aron, ra epue keni uawn rawng an keni, uawn ekoe amutr me nom uawn ekei; asawr a feri ren ekei me amasita allim ngani Jioua.

6 Are aman a ua to ren Jioua an lifang, an asawran-kinamue, i a epue ua to atamuan aman are niafehin aman auasauas an murinna, me ren puin sip.

7 Are an lifang me aman lam a epue ua to fan masan Jioua;

8 O pung tu paun uawn makeran an asawr, o ni la i ren asam an fel an Kot, o naun Aron ra epue uitri-kitriki tran uawn eue rawng pueni fetale.

9 O a epue keni uawn ekei ngani Jioua, sowni eue asawran-kinamue: an iui, likomutun a iui inisin, ukifa la arep ngani trun ikinuk an; o iui me nom uawn pualupualan afan, o iui inisin me nom uawn afan,

10 O ekoe kitni me ruou o ar iui me nom ren pitran koe, o a epue uai sowni trotas an anilan, etei kitni kana.

11 O eue prist a epue keni uawn rawng, me mownga an eue asawr a feri ngani Jioua, ren ekei.

12 Are an lifang me aman kout, i a epue ua to fan masan Jioua:

13 O i a epue pung tu paun uawn makeran, o ni la i ren asam an fel an Kot; o naun Aron koe ra epue uitrikitriki an tra uawn eue rawng pueni fetale.

14 O i a epue ua to sowni an lifang, asawr a feri ngani Jioua: ren ekei; an iui me ken nom uawn trotas an afan, o iui inisin me nom uawn afan;

15 Ekoe kitni me ruou etei ar iui me nom uawn pitran koe, o epue uai sowni eue trotas an anilan, etei kitni kana.

16 O eue prist epue keni ir uawn eue rawng; me mownga an eue asawr a feri ren ekei, me amasita allim; iui inisin me naun Jioua.

17 Iei epue amuramur a se uka tu, lawn pilawn ami,

lawn ami lenian nonom me inisin me ami sap epue momownga iui me inisin o tra me inisin.

## SOPON 4.

**J**IOUA a ken kapas ngani Moses, apasa;  
 2 Ko pue kapas ngani naun Israel koe apasa, Lupuan aman epue tipis ren an tawko sowni amuramur an Jioua inisin, me se uenauen a feri; lupuan an feri eu lein kei:

3 Are eue prist, me ken trelifi, i epue tipis, pue aramas ra ingau ren; iue, i epue ua to ren Jioua powkitan an tipis me a feri, apan an kau, aman pulok me murinna me auasauas la, ren asawran-tipis;

4 O a epue moana la eue pulok fan masan Jioua, ren asam an fel an Kot; o pung tu paun uawn makeran eue pulok, o ni la eue pulok fan masan Jioua;

5 O eue prist me ken trelifi, i a epue angai ekis tra an eue pulok o ua la ren fel an Kot;

6 O eue prist epue tiki autan lawn tra ue, o asupusupu awt eue tra fan fusu, fan masan Jioua, fan eue mangaku a fel.

7 Eue prist a epue angai ekis eue tra o talu metran eue rawng an insens a pokus, fan masan Jioua lawn fel an Kot; o a epue niena la tra an eue pulok monison uawn lowngalowngan eue rawng an keni, ren asam an fel an Kot.

8 O a epue uai sowni eue pulok an asawran-tipis an iui monison; iui me ken nom uawn trotas an afan, o iui monison me ken nom uawn afan;

9 O kitni me ruou pual iui me nom uawn, me nom ren pitran koe o a epue uai sowni eue trotas an anilan, etei ekoe kitni;

10 Oson trek a ken feri ren eue pulok an asawran-kinamue; o eue prist a epue keni uawn eue rawng an asawran-keni.

11 O kilin eue pulok, o fituk inisin etei makeran o etei pitran koe, o afan koe o umun,

12 Euar eue pulok inisin, i a epue ua la lukin telinim

ren eu masias, ekis ra ken pauta la falang uawn, o keni i uawn anutr lawn ekei; i a epue keni i uawn ekis ra ken pauta la falang uawn.

13 Are muit an Israel inisin ra pue feri mual, o ar fefer a op sowni masan koe eue muit, o ra feri mini me Jioua a fanau aramas ra te feri, o a uor ar tipis;

14 O ar tipis me ra ken feri a puepue la, eue muit ra epue moanana to pulok, aman, apan an kau, ren asawran-tipis, o moanana to i ren fel an Kot.

15 O samol koe an eue muit epue pung tu paur uawn makeran eue pulok; o epue ni la eue pulok fan masan Jioua.

16 Iue, eue prist, me ken trelifi, a epue ua to tra an eue pulok lawn fel an Kot.

17 O eue prist a epue tiki autan lawn eue tra o asupusupu fan fusu, fan masan Jioua, fan eue mangaku.

18 O a epue angai ekis eue tra o talu uawn metran koe eue rawng me nom fan masan Jioua, lawn eue fel an Kot, o niena la tra monison uawn lowngalowngan eue rawng an asawran-keni, ren asam an fel an Kot.

19 O a epue ekia ta iui an me inisin, o keni uawn eue rawng.

20 O a epue feri ngani eue pulok, oson ue trek a ken feri ngani eue pulok an asawran-tipis, iei oson a epue feri ngani i; o eue prist epue luini ti ir, o ar tipis epue amusa la.

21 O a epue ua la eue pulok lukin telinim o keni i oson ue trek a ken keni eue pulok an lom; iei oson asawran-tipis an eue muit.

22 Are samol aman a epue feri tipis me a sisilei o aleasolap eu amuramuran Jioua an Kot, me se uenauen aramas a pue feri, o i me tipis;

23 Lupuan an tipis me a ken feri a puepue ngani i, a epue ua to an asawr, kout aman atamuan a murinna auasauas la;

24 O pung tu paun uawn makeran eue kout atamuan o ni la i lawn ikue me a ken ni la asawran-keni ie, fan masan Jioua: iei me asawran-tipis.

25 O eue prist a epue angai ekis tra an eue asawran-tipis lawn autan koe o talu uawn metran koe an rawng an keni o niena la an tra uawn lowngalowngan eue rawng an keni.

26 O a epue keni iui an monison uawn eue rawng, oson ue trek iui an eue asawran-kinamue: o eue prist epue luini ngani an tipis o epue amusa la.

27 Are aman muan a feri tipis me a sisilei, lupuan a ken aleasolap eu amuramuran Jioua me se uenauen aramas ra pue feri, o a uor an tipis;

28 Lupuan an tipis me a ken feri a puepue ngani i, iue, a epue ua to an asawr, aman kout niafeffin fawkun murinna, ren an tipis me a ken feri.

29 O a epue pung tu paun uawn makeran eue asawran-tipis, o ni la eue asawran-tipis uawn ekis an asawran-keni.

30 O eue prist epue angai ngani autan ekis an tra o talu uawn metran koe eue rawng-an-keni o niena la an tra monison uawn lowngalowngan eue rawng.

31 O a epue uai sowni an iui monison oson ue trek a uai sowni an iui me uawn asawran-kinamue, o eue prist a epue keni uawn eue rawng ren amasita allim ngani Jioua: o eue prist epue luini ngani an tipis o epue amusa la.

32 Are a ua to lam aman, asawran-tipis, a epue ua to aman niafeffin murinna auasauas la;

33 O a epue pung tu paun uawn makeran eue asawran-tipis o ni la i ren asawran-tipis uawn ikue me a ken ni la eue asawran-keni ie.

34 O eue prist a epue angai ngani autan ekis tra an eue asawran-tipis, o talu uawn metran eue rawng-an-keni o niena la an tra monison uawn lowngalowngan eue rawng.

35 O a epue uai sowni an iui monison oson ue trek a ken uai sowni iui an eue lam an asawran-kinamue, o eue prist epue keni ir uawn eue rawng, oson trek asawr an Jioua a feri ren ekei; o eue prist epue luini ngani i an tipis me a ken feri o epue amusa sowni i.

## SOPON 5.

**L**UPUAN aman a pue tipis ren an rong kapas an akapel o a to ngani puara ta mini a na ngani o silei; are a sap puara ta i a epue uou an tipis.

2 Are aman a epue atowpa awt metawt me aniaput, are some an man aniaput are some an kau aniaput are some an man tete fail aniaput, o me op sowni i, o i me aniaput, iue, a uor an tipis.

3 Are aman a epue atowpa aman muan aniaput ren me inisin me a ken aniaputa la pusin i ren, o me op sowni i; iue, lupuan a silei, an tipis a pue nom ren.

4 Lupuan aman a ken akapel, apasa ta mual ren tinuauan pue a feri ingau are feri murinna (oson trek aman a akapel awt o sap rekireki pue op sowni i) a lupuan a silei, a uor an tipis ren eu le ir.

5 Iue, lupuan an tip ngani ren eu le ir i a epue puara ta an tipis me a feri;

6 O a epue ua to ren Jioua, aman lam niafehin are aman kout niafehin me ren an puin sip, asawran-tipis, powkitan an ingau me a ken feri, o eue prist epue luini ngani i an tipis.

7 Are a se tufit lam aman asawran-tip ngani ren an ingau me a feri i a epue ua to ren Jioua towf ruoman, are apen an moimoi ruoman: aman ren asawran-tipis o aman asawran-keni.

8 O a epue ua to ir ren eue prist o i epue angai eue asawran-tipis lom, ungitu makeran sowni u an, o a sap epue tilen feseni i;

9 O a epue uitrikitriki ekis me ren eue tra uawn apeun rawng, o fie la lusun tra uawn lowngalowngan eue rawng; iei asawran-tipis.

10 O a epue feri ren aman, eu asawran-keni oson trek angang an, o eue prist epue luini ngani i an tipis me a ken feri, o epue amusa sowni i.

11 Are a se tufit towf ruoman, are apen an moimoi ruoman, a epue ua to ren an ingau, an asawran-tipis, uis eu lein engawl uis an ifa an flaur etipuar, a sap epue

nenu fengen le, a sap epue isa lawng lawn frankinsens powkitan me asawran-tipis.

12 O a epue ua to ren eue prist o eue prist epue angai me ren, amasoa ngani paun afawt ren asawran tretremani o keni uawn rawng, uawn asawr an Jioua a feri ren ekei, i a asawran-tipis.

13 O eue prist a epue luini ngani i ren an tipis me a feri lein ekoe me inisin, o epue amusa sowni i; o epue an prist oson trek asawran-mownga.

14 Iue, Jioua a ken kapas ngani Moses apasa:

15 Are aman a ken feri mual ren awt metawt me fel ngani Jioua, o tipis powkitan a sisilei, i a epue ua ta ren Jioua powkitan an feri ingau, asawran-tip ngani, ram aman murinna uasauas, me ren puin sip, oson trek om rekireki luinin an silfer, sekel koe oson trek sekel an ut-a-fel;

16 Pue a epue luini ti an tipis me a feri ren awt metawt me fel, o a epue trianan ngani uis eu lein uis limou, o fang ngani eue prist, o eue prist epue luini ngani i ren eue ram, asawran-tip ngani, o epue amusa sowni i.

17 Are aman epue tipis, o feri awt lein amuramur an Kot me se murinna aramas ra feri, o a sisilei, i me ingau o epue uou an tipis;

18 O i epue ua to ren eue prist, ram aman murinna uasauas me ren puin sip, oson trek om rekireki ren asawran-ingau, o eue prist epue luini ngani i ren an ingau me a feri lupuan a sisilei, o epue amusa sowni i.

19 Iei asawran-tip ngani; atiau i me tip ngani mown Jioua.

### SOPON 6.

**J**IOUA a ken kapas ngani Moses apasa;

2 Are aman epue tipis o feri ingau ngani Jioua, o trawfana ngani muan unukun ren awt metawt me a ken angai sowni i, are ren isais are ren mawtroni, are a ken nauniamanau muan unukun;

3 Are a pinkuna awt me pauti la o atupu oson trek



ren akapel trawfana; ren eu lein inisin me aramas ra feri lupuan ar feri tipis;

4 Iue, a epue feri are i me tipis o feri ingau, a epue aluina to awt metawt me a mawtroni, are awt metawt me a ken angai ren an nauniamanau, are eue isais me ken iseni ren, are awt me pauti la me a pinkuna.

5 Are awt metawt me a ken akapel trawfana ren; i a epue aluina to me inisin, o pual trianan ngani uis eu lein uis limou: i a epue fang ngani i me naun ekoe pisek, lawn ran an a puepue la an tipis.

6 O a epue ua to ren Jioua ram aman me murinna uasauas me ren puin sip, asawran-tip ngani, oson trek om rekireki ren asawran-tip ngani ren eue prist.

7 O eue prist epue luini ngani i fan masan Jioua o a epue amusa sowni i an tipis monison me a feri, o tip ngani ren.

8 Iue, Jioua a kapas ngani Moses apasa;

9 Ko pue fanau Aron o naun kana, apasa: iei angang an asawran-keni; eue asawran-keni epue nom uawn amutr an eue rawng le puin me inisin tawrei lesor o ekei an eue rawng epue fawkun keni uawn.

10 Eue prist epue puini ta lawn an jakit linen, o a epue puini ta lawn an trousers linen uawn inisin; o a epue puisa ta falang me eue ekei an asawran-keni a feri uawn rawng o pung tu arep ngani eue rawng.

11 O a epue puini ti an mangaku o puini ta lawn eue sawkun mangaku o ua la ekoe falang lukin telinim uawn masias eu.

12 Eue ekei uawn rawng epue fawkun keni, a sap epue kunu; o eue prist epue keni amutr uawn, lesor me inisin; o epue pung tu eue asawran-keni uawn, o keni uawn iui an asawran-kinamue.

13 Eue ekei epue keni uawn eue rawng failfail la trek; a sap epue kunu.

14 O iei angang an asawran-mownga me naun Aron koe epue ua to ren eue rawng fan masan Jioua.

15 A epue angai sowni i eu paun flaur me ren flaur etipuar an asawran-mownga, o le o frankinsens monison me nom uawn asawran-mownga o keni uawn

rawng, amasita allim, an asawran-tretremani ren Jioua.

16 O Aron me naun koe ra epue mownga me lusin sowni; ra epue mownga i, a sor lefen la, uawn ekis me fel le rawng an fel an Kot.

17 A sap epue feri ren lefen, pue uis ar me ngang ngani sowni ai asawr me feri ren ekei; i me fel trapur oson trek asawran-tipis o asawran-tip ngani.

18 Muan kana inisin lein naun Aron epue mownga; iei me angang an asawr an Jioua me feri ren ekei lawn pilawn ami failfail la trek; me inisin me atowpa ir epue fel.

19 Iue, Jioua a ken kapas ngani Moses apasa;

20 Aron me naun koe ra epue ua to ren Jioua iei asawr lawn ran an trelifi: uis eu sowni engawl uis an ifa an flaur etipuar, asawran-mownga ran me inisin, esop lesor o esop lekuniol.

21 Ko pue feri lawn pan an ipuot etei le; o lupuan a petete ko pue ua to i, punukisi oson trek asawran-mownga; ko pue keni ren amasita allim ren Jioua.

22 O eue prist a trelifi, aman lein naun koe, me epue siuili i, i a epue feri i, angang an failfail la trek; epue keni inisin ngani Jioua.

23 Asawran-mownga me inisin an prist, epue keni monison; au sap epue mownga.

24 Iue, Jioua a ken kapas ngani Moses apasa;

25 Ko pue kapas ngani Aron me naun koe apasa; Iei angang an asawran-tipis. En epue ni la asawran-tipis fan masan Jioua, uawn ekis me en ni la asawran-keni uawn; i me fel trapur.

26 Eue prist me ken feri asawran-tipis i a epue mownga i; a epue mownga uawn eue ekis me fel le rawng an fel an Kot.

27 Aman me feleni etrek epue atowpa i; o aman me ken uitrikitriki an tra uawn awt mangaku, a epue onna la uawn ekis a fel, mini koe me a uitrikitriki uawn.

28 O aman epue amaripa la eue sepei an puun me a ken ipuot lawn; are a ken ipuot lawn sepei an pras epue talu o sopu lawn tran.

29 Muan kana me inisin lein prist koe ra epue mownga; i me fel trapur.

30 Lue, aramas ra sap epue ani eue asawran-tipis me an tra a ua lawng lawn fel an Kot pue luini ti tipis ren, lawn ekis a fel; i epue keni lawn ekei.

### SOPON 7.

**I**UE, iei angang an asawran-tip ngani; i me fel trapur.

2 Ir ra pue ni la asawran-tip ngani uawn eueie me ra ken ni la asawran-keni uawn. O asupusupu an tra uawn rawng pueni fetale.

3 O epue uai sowni i an iui monison o likomutun, o iui a nom uawn trotras an afan;

4 O kitni ruo o ar iui a nom uawn o pual uawn leulan afown, o a epue uai sowni eue trotras an anilan etei kitni koe.

5 O eue prist a epue keni ir ren asawr ngani Jioua me feri ren ekei uawn rawng; iei me asawran-tip ngani.

6 Muan kana inisin lein ekoe prist ra epue ani; ir ra epue ani lawn ikue me fel; i me fel trapur.

7 Asawran-tipis oson ue trek asawran-tip ngani; ar angang eu etrek; o epue an eue prist me epue luini ti ren.

8 O kilin eue asawran-keni epue an eue prist me epue keni an aman asawran-keni.

9 O asawran-mownga monison, me umuni lawn um, o ipuot lawn aion pot o uawn pan-an-frai, epue an eue prist me epue keni i.

10 O asawran-mownga monison, me etei le, are a puas, epue naun Aron kana inisin; uis ar epue nene trek.

11 O iei angang an asawran-kinamue me aman epue ua to ren Jioua.

12 Are aman epue ua to powkitan an kiaso, i a epue ua to ren an asawran-kiaso, pret a sor lefen nenu ngani le, o pret tretrak a sor lefen, a talu ngani le, o apawsuk an flaur etipuar me feri nenu ngani le.

13 O a pual epue ua to lifang an, apawsuk an pret etumaras, ren an asawran-kinamue pue a kiasaso.

14 O a epue ua to an asawran-amua ta ngani Jioua, eu sowni asawr monison; pue epue naun eue prist me epue asupusupu tra an eue asawran-kinamue.

15 O a epue ani fituk an naun asawran-kinamue pue a kiasaso, lawn ran an a ua to; i a sap epue likita la ekis etrek tawrei lesor.

16 Are an asawran-lifang me an puon are asawran-pusin lukan, a epue mownga lawn ran an a ua to an asawr; a pual epue ani mini a nom tawrei lesor.

17 A, lusun eue fituk an eue asawr me nom uawn auluat an ran, epue keni uawn ekei.

18 Are awt fituk an asawran-kinamue epue ani lawn auluat an ran, a sap epue angai o i me ua to a sap epue ueri tren ren; a epue aniaput o i me ken ani sowni i, a epue uou an tipis.

19 Au sap epue ani fituk me awt metawt aniaput a ken atowpa; a epue keni uawn ekei. O ir me ken powtrapowtr ra epue ani eue fituk:

20 A aramas aman me ken ani fituk an asawran-kinamue me naun Jioua, lupuan i me aniaput eue muan epue ukifi sowni me ren naun ainang.

21 O aman aramas me ken atowpa awt metawt aniaput, are niaput an aramas are man aniaput, are awt metawt me sa ken aput pue aniaput, o pual ani sowni fituk an asawran-kinamue me naun Jioua, i a epue ukifi sowni me ren naun ainang.

22 Iue, Jioua a ken kapas ngani Moses apasa;

23 Ko pue kapas ngani naun Israel koe, apasa; Ami au sap ani iui an kau, lam, are kout.

24 Au pue isais ren om feri, iui an mini me ken pusin me la, o iui an man me man mawtro a ni la; a atiau ami au sap mownga.

25 Powkitan aman me epue ani iui an sawkun man me ra ken fawkun ua to pue ra pue keni ngani Jioua, eue aramas me ken ani a epue ukifi sowni me ren naun ainang.

26 O ami au sap epue ani tra an man fetal o man susu, ekis ami epue nonom ie.

27 Aramas aman me epue ani tra, eue aramas a epue ukifi sowni me ren naun ainang.

28 Iue, Jioua a ken kapas ngani Moses, apasa,

29 Ko pue kapas ngani naun Israel apasa, Aman me epue ua to an asawran-kinamue ren Jioua, i a epue ua to ren Jioua an lifang sowni eue asawran-kinamue:

30 Pusin paun koe epue ua to eue asawr an Jioua me feri ren ekei; a epue ua to iui a nom uawn upuan etei upuan, pue a pue amua ta upuan ren asawran-amua fan masan Jioua.

31 O eue prist a epue keni iui uawn rawng; o eue upuan a epue an Aron me naun koe.

32 O ami au epue ngani eue prist pue a pue ekia ta eue pitran imuan an naumi asawran-kinamue.

33 O aman lein naun Aron, me ken ua to tra an asawran-kinamue o iui, a epue nauna la eue pitran imuan pue uisan.

34 Pue ngang I ken angai eue upuan an amua ta o eue pitran an ekia ta sowni me ren naun Israel kana, sowni ar asawran-kinamue, o ngang fang ngani ir Aron eue prist me naun kana pue epue angang an naun Israel failfail la trek.

35 Iei uis an trelifi an Aron o uis an trelifi an naun koe, sowni asawr an Jioua me feri ren ekei lawn eue ranan a moana to ir pue ra pue souani ar angang an prist an Jioua;

36 Me Jioua amuramur pue ra pue ngani ir sowni me ren naun Israel kana lawn ranan a trelifi ir; o epue angang an failfail la trek lawn pilawn ar.

37 O iei angang an asawran-keni o asawran-mownga o asawran-tipis o asawran-tip ngani, o asawran-feleni ren souani, o asawran-kinamue;

38 Me Jioua amuramur ngani Moses uawn trukatruk an Sainai, lawn ranan a amuramur ngani naun Israel kana pue ra pue ua to ar asawr ngani Jioua uawn eue fanu pen an Sainai.

## SOPON 8.

**I**UE, Jioua a kapas ngani Moses apasa :

2 Ko pue angai Aron me naun kana o naur mangaku, o le an trelifi, o aman pulok an asawran-tipis, ram ruoman o eu etikum pret a sor lefen la.

3 O amuitra fengeni muit me inisin ren asam an fel an Kot.

4 Iue Moses a feri oson trek an Kot amuramur ngani i o amuitra fengeni muit monison ren asam an fel an Kot.

5 O Moses a kapas ngani eue muit: iei mini me Jioua amuramur pue sa pue feri.

6 O Moses a moana to Aron me naun kana o atutu ir lawn tran.

7 O a faute ngani i an mangaku linen, o ri ngani i an riri, o puini ta lawn an mangaku trapur, o pung te uawn eue efowt, o ri ngani sal an efowt me feri sileilap a feti i uawn ren.

8 O muarinei muar an upuan o feri uawn muar an Urim o Tumim.

9 O isa te an akau uawn makeran, o isa te uawn akau, mown eue muaran kol, muar a fel, oson trek Jioua amuramur ngani Moses.

10 O Moses a angai eue le an trelifi o trelifi eue fel o me inisin a nom lawn, o a feleni ir.

11 O a uitrikitriki sowni i uawn eue rawng fan fusu, o trelifi eue rawng, o sepei an inisin, o sepei an sopu paun, o an tepel, pue a pue feleni ir.

12 O a ken niena la sowni eue le an trelifi uawn makeran Moses, o trelifi i pue a feleni i.

13 Moses a ken moana to naun Aron koe o faute ngani ir mangaku linen, o ri ngani ir ekoe riri, o feti uawn ar akau, oson ue trek Jioua amuramur ngani Moses,

14 O a moana to aman pulok an asawran-tipis; Aron o naun koe ra ken pung tu paur uawn makeran eue pulok an asawran-tipis.

15 Aman a ni la, o Moses a ken angai an tra lawn

paun o talu ngani ekoe metre an eue rawng pueni fetale, o apowtrapowtra la eue rawng, o niena la an tra uawn lowngalowngan eue rawng o feleni i pue a pue uou iaseni i.

16 O Moses a angai an iui me inisin a nom uawn afan, o trotas an anil, o kitni me ruou, o iui me nom uawr, o keni uawn eue rawng.

17 O a ken keni uawn ekei lukin telinim eue pulok o kilin, fituk an o amun, oson trek Jioua a ken kapas ngani Moses.

18 O a ken moana to eue ram an asawran-keni; o Aron me naun koe ra pung tu paur uawn makeran eue ram;

19 O a ni la i: o Moses asupusupu an tra uawn eue rawng pueni fetale.

20 O a powkukisi eue ram; o Moses a ken keni makeran, o kiftan koe o iuan.

21 O a onna la lawn tran, afan, o pitran koe; o Moses a keni eue ram inisin uawn rawng iei asawran-keni; a amasita allim, asawr me feri ren ekei ren Jioua; oson ue trek Jioua amuramur ngani Moses.

22 O a ken ua to pual aman ram, ram an feleni: o Aron me naun koe ra pung tu paur uawn makeran eue ram.

23 Aman a ni la; o Moses a angai sowni an tra o talu uawn lesopon an seilingan Aron me paliimuan o uawn autan trapur an paomuanan o uawn autan trapur an pitran paliimuan.

24 O aman a moana to naun Aron koe, o Moses a talu ekis tra ue, uawn lesopon an seilingar paliimuan, autar trapur paomuanar, o autar trapur an pitrar paliimuan; o Moses asupusupu eue tra uawn eue rawng pueni fetale.

25 O a ken angai eue iui, o likomutun, o iui monison a nom uawn afan, o trotas an anilan, ekoe kitni me ruou, o ar iui, o pitran paliimuan;

26 O a ken angai me ren truk an pret a sor lefen la, a nom fan masan Jioua, eu etikum pret a sor lefen, o eu etikum pret a uor le lawn, o eu etikum pret a

tretrak, o isa te ir uawn eue iui o eue pitran pali-  
imuan;

27 O ngani i inisin le paun Aron o le paun naun koe  
pue a pue amua ta ir ren asawran-amua fan masan  
Jioua.

28 Moses a angai ir sowni paur o keni ir, uawn  
rawng an asawran-keni: kei asawran-feleni ren pokus;  
iei me asawr me feri ren ekei ngani Jioua;

29 O Moses a angai upuan o amua ta ren asawran-  
amua fan masan Jioua; sowni eue ram an asawran-  
feleni, uisan Moses; oson trek Jioua amuramur ngani  
Moses.

30 O Moses a ken angai me ren le an trelifi, o me ren  
eue tra a nom uawn rawng ue, o uitrikitriki Aron o  
an mangaku me naun koe o naur mangaku; o feleni  
Aron o an mangaku me naun koe o naur mangaku.

31 Moses ap kapas ngani Aron o naun koe, Au pue  
aionpot eue fituk ren asam an fel an Kot; o ani i  
ie, o pual pret a nom lawn eue truk an asawran-  
feleni oson trek ai kapas, apasa; Aron o naun koe ra  
epue mownga i.

32 Ami au puap keni uawn ekei lusun fituk o  
pret.

33 O ami au sap su sowni asaman fel an Kot ran  
fusu, tawrei ran an auas ami asawran-feleni; pun lawn  
ran fusu a epue feleni ami.

34 Jioua amuramur ngani kitr sa pue feri oson trek  
a feri lawn ei ranan, pue ami tipis epue uou iaseni.

35 O ami epue nom ren asam an fel an Kot le ran  
o lepuin, ran fusu, o tumunu an Jioua tumunu pue  
au te me la; iei oson me amuramur ngani ngang.

36 Aron me naun koe ra ap feri me inisin me Jioua  
a amuramur ren paun Moses.

### SOPON 9.

**I**UE, a feri lawn aualuan ran, Moses a kowkowri Aron  
me naun koe o ekoe samol an Israel;

2 O kapas ngani Aron, Ko pue angai aman kaf ata-  
muan, ren asawran-tipis o ram aman, asawran-keni,



ir me ruoman murinna uasauas ; o ua to ir fan masan Jioua.

3 O kapas ngani naun Israel kana, apasa, ami au angai aman kout atamuan, ren asawran-tipis, o aman kaf me aman lam, manau ar lefeng eu, o murinna uasauas, ren asawran-keni ;

4 Pual pulok aman me ram aman ren asawran-kinamue pue asawr ngani Jioua ; o asawran-mownga me nenu fengen lawn le : pue ikanei Jioua epue pue to remi.

5 Iue, ra angai mini me Moses a ken fanau ir, aka-sengan fel an Kot ; o eue muit monison ra arep to o u ta fan masan Jioua.

6 O Moses a kapas, Iei alon Jioua pue ami epue feri ; o lingan Kot a puap epue pue to remi.

7 Moses ap kapas ngani Aron : Ko pue kin to ren eue rawng o feri om asawran-tipis o asawran-keni o luini ti om tipis o tipis an aramas koe ; o ua to lifang an aramas koe o luini ti ar tipis ; oson trek alon an Jioua.

8 Iue, Aron a kin to ren eue rawng o ni la eue kaf an asawran-tipis me pusin an.

9 O naun Aron koe ra ua to an tra ren ; o a tina la autan lawn eue tra, o tala la ekoe metre an rawng o niena la eue tra ren lowngalowngan eue rawng ;

10 O a ken keni uawn eue rawng, ini an asawran-tipis o an kitni o trotas an anilan ; oson trek Jioua amuramur ngani Moses.

11 I ap keni uawn ekei lukin telinim, fituk an o kilin.

12 O pual ni la eue asawran-keni ; o naun Aron koe ra ua to an tra ren, o i asupusupu uawn eue rawng pueni fetale.

13 O ra ua to ren, eue asawran-keni, apowkukisi, o pual makeran, o a ken keni uawn eue rawng.

14 O a ken onna la afan o pitran koe, o keni uawn eue asawran-keni uawn eue rawng.

15 A pual ua to lifang an aramas koe, o a angai kout an asawran-tipis an aramas koe o ni la i, o feri asawran-tipis, oson trek an lom.

16 O a ua to eue asawran-keni o feria ta i oson an angang.

17 A ua to asawran-mownga o amasoa ngani paun sowni i, ap keni i uawn eue rawng, a trianan ngani eue asawran-keni an lesor.

18 Iue a ni la eue pulok o eue ram, naun ekoe aramas asawran-kinamue; o naun Aron koe ra ua la an tra ren o i asupusupu uawn eue rawng pueni fetale.

19 O pual iui an eue pulok me eue ram o likomutun, o iuiian trotas an afan, o kitni me ruou o trotas an anilan;

20 Iui me inisin, a ken isa te uawn eue upuan o a ken keni ekoe iui uawn eue rawng.

21 O Aron a ken amua ta eue upuan o eue pitran paliimuanan ren asawran-amua fan masan Jioua, oson trek Moses a apasa.

22 O Aron a ekia ta paomuanan koe o afaiatru ekoe aramas; i a puap fai tu sowni an feri asawran-tipis, asawran-keni o asawran-kinamue.

23 Iue, Moses me Aron ra to lawng lawn fel an Kot; ra lulin la ra puap afaiatru ekoe aramas: o lingan Jioua a puepue ngani ekoe aramas inisin.

24 O ekei a fai sowni me ran fan masan Jioua o aniani me uawn eue rawng, asawran-keni o eue iui: ekoe aramas monison ra puap kuna, ra mairer ren ar puapua o trape tu uawn masar.

#### SOPON 10.

**I**UE, Netap o Apaïu, naun Aron, aman, aman, angai an senser o ise nawng lawn ekei o ua lawng le, o ua to fan masan Jioua eu sawkon ekei me sap amur-amur ngani ir.

2 O ekei a fai sowni me ren Jioua, aniani ir, ra puap me la fan masan Jioua, ir me ruoman.

3 Moses a kapas ngani Aron, iei alon Jioua apasa: Ngang epue fel ren ir me kin ngani iei, o Ngang epue lingowtr fan masan kei aramas inisin. O Aron a nauenauen la.

4 O Moses a kowkowri Misael me Elsafan, naun

Usiel puin saman Aron, o kapas ngani ir: Fai to, puisa ta puimi koe sowni akasengan ut-a-fel, lukin telinim.

5 Ir ra ken kin to, puisa la ir etei ar mangaku linen, lukin eue telinim, oson trek alon Moses.

6 Iue, Moses a kapas ngani Aron o naun koe, Elieser me Itamar: ami au sap epue uai sowni ami akau o teringei ami mangaku; pue au te me la o sawng a sap pung tu uawn aramas inisin; o puimi koe, ainang an Israel me inisin, ra pue ketrue ti ren eue ekei me Jioua a ken keni.

7 Ami au sap to ue asaman fel an Kot pue au te me la: powkitan le an trelifi an Jioua a nom uawmi: ir ra ken feri oson trek alon Moses.

8 Iue, Jioua a kapas ngani Aron, apasa:

9 En me nom koe ra sap epue unimi uain o awt metawt me aramas ra putr ren lupuan ami to lawng lawn fel an Kot pue au te me la; iei angang an failfail la trek ren pilawn ami;

10 Pue ami epue aimu feseni awt me fel sowni awt me sap fel, o limingau sowni limowtr,

11 Pue au pue asilei ngani naun Israel kana naur angang inisin me Jioua a kapas ngani ir ren paun Moses.

12 Iue, Moses a kapas ngani Aron me naun koe, Elieser me Itamar, Ami au angai lusun asawran-mownga, lusun sowni asawran-Jioua me feri ren ekei o aniani a sor lefen la, ren eue rawng: pue i me fel trapur:

13 Ami au epue aniani i uawn ekis me fel, pun uisom o uisan naun koe sowni asawran Jioua me feri ren ekei: pue iei oson a amuramur ngani iei.

14 O en, me naun koe at, o naun nengin koe et uk, au epue aniani eue upuan asawran-amua ta o pitran asawran-anusu uawn ekis a fel; pue uisom o uisan naun koe at, me lifang ngani ami sowni eue asawran-kinamue an naun Israel kana.

15 Powkitan ra pue ua to pitran asawran-anusu, o upuan amua etei asawran-iui me feri ren ekei, pue ra pue amua ta ren asawran-amua fan masan Jioua; kei

me nom o an naun koe et uk; pue angang an failfail la trek; oson trek Jioua amuramur ngani.

16 Iue Moses a ken ais fitri oson eue kout atamuan an asawran-tipis o na ngani! i me kara la; o a sawng ngani Elieser o Itamar naun Aron koe me ken nom, o apasa;

17 Puemeta ami au sap ani eue asawran-tipis uawn ekis an ut-a-fel powkitan i me fel trapur; o naumi angang au pue uou iaseni tipis an muit o luini ti ir fan masan Jioua?

18 Na ngani! an tra a sap ua lawng lawn eue ut-a-fel; atiau ami mowtren ani i lawn ikue a fel oson ai kapas.

19 O Aron a kapas ngani Moses: na ngani! Ir ra ken ua to, ikanei, naur asawran-tipis o naur asawran-keni fan masan Jioua; pual ngang me feri oson ue trek ir: Are ngang ani eue asawran-tipis ikanei trek, iei epue murinna ren Jioua?

20 Iue, Moses a puap rowng, a afitr.

#### SOPON 11.

**I**UE Jioua a ken kapas ngani Moses me Aron apasa;

2 Ami au pue kapas ngani naun Israel kana apasa; Ikei man kana me ami epue mownga lein man kana me inisin uawn fanufan.

3 Me inisin me ken tileni ukun pitran o ukun pitran a tilen o me inisin me ken lulu sefal ar mownga lein man kana ami au pue momownga.

4 Iue, ami au sap momownga ir me ken lulu sefal etrek o tileni ukun pitran etrek; oson trek eue kamel pue a ken lulu sefal an mownga o a sap tilen feseni ukun pitran; i me aniaput remi.

5 Eue koni pual epue aniaput remi, pun a ken lulu sefali o a sap tileni ukun pitran;

6 O eue eir epue aniaput remi pun a ken lulu sefali o a sap tileni ukun pitran;

7 Eue pik a pual aniaput remi pue a ken tileni ukun pitran o ukun pitran a tilen o a sap lulu sefali.

8 Ami au sap ani fitukar o au sap atowpa ar some, pue ra ken aniaput remi.

9 Iue, ami au epue momownga kei etrek sowni me inisin me nom lawn tran; ami au epue ani me inisin a uor inin ar o unar lawn tran, le set o lawn tran-pupu;

10 O ir me inisin a sor ar inin, o unar, lawn tran kana o lawn tran-pupu kana, sowni me inisin me ken mowkit lawn tran kana o sowni me inisin me manau ar a nom lawn tran; kei epue aniaput remi;

11 Euar, ra epue aniaput remi, ami au sap epue ani sowni fitukar o epue pui sowni ar some.

12 Ir me inisin a se nom ar inin o unar lawn tran kana, ra epue aniaput remi.

13 Ami au epue pui sowni ikei lein man susu kana; o au sap momownga pue me aniaput remi: eue ikel, o eue osifrak, o eue osprei,

14 Eue fowltur o kait le sawkun ar,

15 O refen inisin le sawkun ar,

16 Eue aul, o eue awk an le puin, o eue kuku, o eue awk le sawkun an.

17 O eue kukun aul, o eue kormorant, o eue aul trapur;

18 O eue suan, o eue pelikan, o eue ikel me ani fituk ponou;

19 O eue stork, o eue eron le sawkun an, o eue plofer, o eue nunupue.

20 O ami epue aput man susu monison me ken tete fail, o fail fetal uawn pitrar fafawtr.

21 Iue, ami au pue mownga, sowni man susu me ken tete fail o fail fetal uawn pitrar fafawtr, ir pitrar ra nom uawn patapat an pitrar pue ra pue lusulus uawn fanu ren.

22 Euar, ami au pue mownga sowni ir, ikei: eue lokust le sawkun an, o eue lokust a matoto le sawkun an, o eue pitel le sawkun an, o eue lusumas le sawkun an.

23 A, ir, man susu inisin, me ken tete fail o a uor pitrar fafawtr ra epue aniaput remi.

24 O ami epue aniaput ren kei: aman me ken atowpa naur some epue aniaput tawrei lekuniol.

25 O aman me ken puisa ta naur some a epue sopu an mangaku o epue aniaput tawrei lekuniol.

26 O ami epue aput man monison me ken tileni ren pitran o a sap tilen feseni pitran, o a sap lulu sefal; me inisin me atowpa ir, i a epue aniaput tawrei lekuniol.

27 O ami epue aput ir me inisin me fai la uawn paur lein man kana me fail fetal uawn pitrar fawfawtr o aman me ken atowpa naur some epue aniaput tawrei lekuniol.

28 O aman me ken puisa ta naur some, a epue sopu an mangaku o epue aniaput tawrei lekuniol, pue kei sawkun ra ken aniaput remi.

29 O ami epue aput kei lein man kana me telau fail uawn fanu: eue uisel, o sawkun nakit a kukun, o eue kuel le sawkun an;

30 Pual eu sawkun kuel o eue kuel fawkun trapur, o kukun kuel, o eue puetrar, o eue mol;

31 Ikei ra ken aniaput remi lein man telau inisin; aman a ken atowpa ir a me la, i a epue aniaput tawrei lekuniol.

32 Are awt metawt sowni naur some a paute tu uawn awt, a epue aniaput, are sawkun sepei an amutr inisin, o mangaku, o kilin, o trotras, o sepei me inisin me aman puakeni awt lawn; aman epue ua kei lawn kawnuke o ra epue aniaput tawrei lekuniol; iue, epue limowtr.

33 O ami epue aueti la sepei an puun inisin, are awt sowni ir a paute tu lawn, pue me inisin a nom lawn me aniaput.

34 O mownga me inisin me aramas aniani, are eue sawkun tran a paute tu lawn, epue aniaput, o tran me inisin me aramas fawkun unimi sowni ekoe sepei, epue aniaput.

35 O metawt sowni ekoe some a paute tu uawn awt a epue aniaput; are stof, are um, aman epue ata la pue aniaput; o ra epue aniaput remi.

36 Iue, eue lepopun tran, o puang a uor tran trapur

lawn ra epue limowtr. O aman me atowpa naur some epue aniaput.

37 Iue are awt a paute tu sowni naur some uawn faun fetoka tu, me aman a epue fetoka tu, a epue limowtr.

38 Lupuan aman a ua la kawruk uawn faun o awt sowni some a paute tu uawn, a epue aniaput.

39 Are aman lein man, me ami fawkun mownga, a pusin me la, i me ken atowpa an some, epue aniaput tawrei lekuniol;

40 O i me aniani sowni an some, a epue soppu an mangaku o epue aniaput tawrei lekuniol; o i me ken puisa ta an some a epue soppu an mangaku o epue aniaput tawrei lekuniol.

41 Man telau me inisin me ken telau fail uawn fanu, i me aniaput; aramas a sap epue mownga.

42 Ami au sap epue mownga man kana me telau uawn lukar, o man kana me telau fail uawn fafawtr are trawmowng pitrar, o man kana me tete fail uawn fanu, pue ra ken aniaput remi.

43 Ami au sap epue aniaputa la ngun ami lawn kei man telau fail o ami sap epue limingau lawn, pue au pue aniaput ren.

44 Powkitan ngang me Jioua naumi Kot. Iei mini ami au feleni pusin ami; ami au pue fel pue ngang me fel. Ami au sap aniaputa la ngun ami ren man telau inisin me ken tete fail uawn fanu.

45 Pue ngang me Jioua me moana la ami sowni fanu an Ijip pue ngang epue naumi Kot. Iei mini ami au pue fel pue ngang me fel.

46 Iei kapas oson man kana, o man susu, o sawkun man inisin a mowkit lawn tran, o sawkun man inisin a telau uawn fanu;

47 Pue aimu feseni lefinan aniaput o limowtr, o lefinan man aniaftr o man aniaput.

#### SOPON 12.

**I**UE Jioua a kapas ngani Moses apasa,

2 Ko pue kapas ngani naun Israel kana, apasa,

Lupuan fefin aman a ken uosomau o nauna la atamuan aman a epue aniaput ran fusu; lawn ran an naun somau a epue aniaput.

3 O a epue sirkomsaisi lawn fituk an kilin mown;

4 Nemin a epue nom lawn tra an alimowtr la ran elik me uluat; o a sap epue atowpa awt a fel o sap to lawn ut-a-fel tawrei fansoun an auesa la ran an alimowtr la.

5 Are a ken nauna la nengin aman a epue aniaput uik ruou oson trek a nom lawn an limingau o a epue nom lawn tra an alimowtr la ran uowne me uonou.

6 O lupuan auesa la ran an alimowtr la, ren at are nengin, i a epue ua to lam aman me manau an lefeng eu, ren asawran-keni o apen an moimoi aman are towf aman ren asawran-tipis, ren eue prist, ren asam an fel an Kot;

7 O a epue ua to fan masan Jioua, o luini ngani ir pue a pue limowtr sowni an fai sowni tra; iei angang an nauna la ren atamuan are ren liafefin.

8 Are a se tufit ua to lam aman, i a epue ua to towf ruoman are apen an moimoi me ruoman, aman ren asawran-keni, o aman ren asawran-tipis, o eue prist epue luini ngani i o a epue limowtr.

### SOPON 13.

**I**UE, Jiona a kapas ngani Moses me Aron, apasa;

2 Lupuan aman a uor uawn kilin an fitukan, eu tikimakowlakowl, o puater o tikifufu a powtr o a epue uawn kilin an fitukan somau an rupan-puater, aman epue moana la i ren Aron, eue prist, are ren aman lein naun koe prist kana.

3 O eue prist a epue pi eue mak uawn kilin an fitukan, are unan lawn mak an somau a uili ti powtra-powtr, o are masan eue mak an somau a towkisasown fan kilin fitukan, iei a rupan-puater, o eue prist epue na ngani i o aitan ngani i aniaput.

4 Iue, are a uor eue tikifufu a powtr lawn kilin fitukan o masan a sap towkisasown fan eue kilin, o



unan a sap uili ti powtr, eue prist a epue amatra la lawn im, i me uor an mak an somau, ran fusu.

5 Lawn afusuan ran eue prist epue pi, o a kunu eue mak a oson trek lom, a sap alapa la uawn kilin, eue prist a epue amatra la i pual ran fusu.

6 O eue prist a epue pual pi lawn pual afusuan ran, o are a pinkuna eue mak a trawtrawl ekis o a sap alapa la uawn kilin, eue prist a epue aitan ngani i limowtr, me puater etrek, o a epue sopus an mangaku o epue limowtr.

7 Are, murin eue muan fai la ren eue prist o a aitan ngani i limowtr, eue puater a alapa la uawn kilin a epue pual fai la ren prist.

8 O eue prist epue pi o kuna atiau eue puater a alapa la, eue prist epue puap aitan ngani i aniaput, pue lei me rupan-puater.

9 Iue, lupuan rupan-puater a nom uawn aman muan, aman epue moana la i ren eue prist.

10 O eue prist epue pi, a, na ngani! tikifufu a powtr a nom uawn kilin o unan a uili ti powtrapowtr, o fituk a par a nom lawn eue tikifufu,

11 Iei rupan-puater an lom lawn kilin fitukan, o eue prist epue aitan ngani i aniaput.

12 Are eue rupan-puater a fis te trapur uawn kilin, o pualuo la kilin inisin sowni makeran tawrei pitran; me inisin a puepue ngani masan eue prist,

13 O eue prist epue pi, a na ngani! eue rupan-puater a pualuo la fitukan monison, a epue aitan ngani eue puater, limowtr, powkitan a ken uili ti powtrapowtr; i a ken limowtr.

14 A, lupuan a kuna lawn, fituk a par, i a aniaput.

15 O eue prist a epue pi eue fituk a par o aitan ngani i aniaput; eue fituk a par me aniaput; i a rupan-puater,

16 Lupuan eue fituk a par a uili la o uili ti powtrapowtr, a epue fai la ren eue prist;

17 O eue prist epue pi o are atiau eue puater a uili ti powtrapowtr, eue prist epue aitan ngani eue puater limowtr; i a limowtr.

18 A lupuan a fis te lawn kilin fitukan eu kunun o a ken pitrakil,

19 O tikimakowlakowl a powtr a nom lawn ekis an eue kunun are tikifufu a powtr etei parapar, eue prist epue pi,

20 O, lupuan eue prist a pi, a na ngani! oson towkisasown fan kilin, o unan a uili ti powtr, eue prist epue aitan ngani i aniaput; iei a rupan-puater a fis te lawn eue kunn.

21 Are eue prist a pi, o atiau a sor unan a powtr lawn, o a sap towkisasown fan kilin o a trikar, eue prist epue amatra la i ran fusu.

22 Are a fis te trapur uawn kilin, eue prist epue aitan ngani i aniaput, pue me puater.

23 Are eue tikifufu a nom uawn eueie, o sap alapa la, iei a kinas an eue kunun o eue prist a epue aitan ngani i limowtr.

24 Iue, lupuan kar an ekei a nom lawn kilin an fitukan, o eue tikifufu a kar a powtrapowtr, o par etei powtrapowtr;

25 O eue prist a pi; o are atiau unan lawn tikifufu a uili ti powtrapowtr o a na ngani oson towkisasown fan kilin, iei me rupan-puater a fis te lawn eue a kar, o eue prist epue aitan ngani i aniaput pue me rupan-puater.

26 Iue, are eue prist a pi o atiau a sor unan a powtrapowtr lawn eue tikifufu, o a sap towkisasown fan kilin, i a trikar, o eue prist a epue amatra la i ran fusu.

27 O afusuan ran eue prist a epue pi, o are a fis te trapur lawn kilin, eu prist epue aitan ngani i aniaput: pue me rupan-puater.

28 Are eue tikifufu a nom lawn eueie o a sap fis te uawn kilin, o a trikar; iei me mak an kara la, o eue prist epue aitan ngani i limowtr powkitan kinas an kara la etrek.

29 Are muan are fefin a uor puater uawn makeran are uawn alis,

30 Eue prist epue pi eue puater; o are atiau a kuna

i me towkiason fan kilin, o unan kisakis a topatop a nom lawn, eue prist epue aitan ngani i aniaput; iei eu sawkun puater, iei a rupan-puater an makeran o alis.

31 A lupuan eue prist a pi eue sawkun puater o na ngani! a sap towkiasown fan kilin, o unan a trawl a se nom lawn, eue prist epue amatra la eue a uor an puater, ran fusu;

32 O afusuan ran eue prist epue pi eue puater; o atiau a sap fis te eue puater o a se nom lawn unan a topatop o masan eue puater a sap towkiason fan kilin,

33 I a epue nawti pusin i, a sap epue nawti eue puater o eue prist epue amatra la eue trawn-puater pual ran fusu.

34 O afusuan ran eue prist epue pi eue puater; o atiau puater a sap fis te uawn kilin o masan a sap towkiason fan kilin; iue, eue prist epue aitan ngani i limowtr: o i a epue soppu an mangaku, i me limowtr.

35 Are eue sawkun puater a fis te trapur uawn kilin, murin a ken aitan ngani limowtr;

36 O eue prist a kuna o atiau ene puater a fis te uawn kilin, eue prist a sap epue pi oson unan a topatop; pue i me aniaput.

37 Are fan masan, eue sawkun puater a nom, o a mare te unan a trawl; eue puater a mawra la o i me limowtr; o eue prist a epue aitan ngani i limowtr.

38 Are muan aman are fefin aman a uor lawn kilin fitukar tikimakowlakowl a powtr; euar tikimakowlakowl a powtr trapur;

39 O eue prist a kuna a atiau ekoe tikimakowlakowl a topatop etei powtr, iei puater a powtr a fis te uawn kilin; i me limowtr.

40 Are met an makeran aman a pauti la o makeran a matoto; a keti limowtr.

41 Are met an traman aman a pauti la, traman a matoto; a ken limowtr.

42 Are a nom uawn eueie a matoto uawn makeran are traman, awt metawt aramaram; iei a puater an makeran a matoto, are traman a matoto.

43 Eue prist a epue puap kuna i; o atiau a uor lawn matoto an makeran o matoto an traman, tikifufu an puater a aramaram o a ken oson trek puater an kilin fitukan,

44 Eue muan a ken trawn-puater aman, a ken aniaput; o atiau ene prist a epue aitan ngani i aniaput; an somau a nom uawn makeran.

45 O eue trawn-puater, i me uor ren eue sawkun somau, i a epue teringei an mangaku, o puiui ti an akau, o pualuo la tinauan o mangungu, Aniaput, aniaput.

46 Lawn ran me inisin, lupuan a uor ene somau, a epue aniaput; i me aniaput; o a epue nom aman etrek, lakin eue telinim, lawn iman.

47 Iue, lupuan mangaku a uor rupan-puater lawn, are mangaku an unan sip, are mangaku linen.

48 Are uawn sal an puisawn are uawn sal an asap an turuni, me ken linen are unan sip are kilin, are awt metawt a feri sowni kilin;

49 Lupuan somau a topatop are aramaram lawn eue mangaku are eue kilin are uawn sal an puisawn are uawn sal an asap an turuni, are lawn awt metawt a feri sowni kilin, atiau me somau an rupan-puater, o a epue puara ta ren eue prist.

50 A, lupuan eue prist a kuna ekoe me uor tiki-fufu uawn, a epue amatra la ekoe me tikifufu ran fusu.

51 Lawn afusuan ran a epue pi mangaku a tikifufu; are ekoe tikifufu ra fis te lawn mangaku, are uawn sal an puisawn are sal an asap an turuni are lawn kilin are lawn awt metawt a feri ren kilin; iei a rupan-puater lapalap an tikifufu aniaput.

52 O a epue keni eue mangaku, are eue sal an puisawn o sal an asap an turuni, are lawn linen are lawn unan sip o awt metawt an kilin, me inisin a uor ar tikifufu; pue iei a rupan-puater lapalap; i a epue keni lawn ekel.

53 Are eue prist a epue na ngani o tikifufu a sap fis te lawn eue mangaku, are uawn sal an puisawn

are uawn sal an asap an turuni, are lawn pisek an kilin inisin,

54 Eue prist a epue fanau ra pue sopu eue mini a tikifufu, o amatra la pual ran fusu :

55 O eue prist a epue pi murin ar sopu koe tikifufu o atiau ekoe tikifufu ra sap uili la fan masan, o ekoe tikifufu ra sap fis te, i me aniaput ; o ko pue keni lawn ekei ; i me puater lawn ekis a matoto makeran, o ekis a matoto traman.

56 Are eue prist a na ngani o atiau tikifufu a murinna murin ar sopu, o a epue tinen feseni i sowni eue mangaku, o sowni eue kilin, o sowni eue sal puisawn o sowni eue sal an asap ;

57 Are a pual kuna lawn mangaku, lawn sal an puisawn, lawn sal an asap o lawn pisek an kilin inisin ; iei me ingau o au pue keni lawn ekei eue me tikifufu a nom lawn.

58 O eue mangaku sal an puisawn, sal an asap, o pisek an kilin inisin me ken sopu, are tikifufu a uai sowni ir, aman epue pual sopu o ra pue limowtr.

59 Iei kapas an somau an rupan-puater lawn mangaku unan sip are linen, are sal an puisawn, are sal an asap an turuni, are pisek an kilin, pue aitan ngani i limowtr are aitan ngani i aniaput.

#### SOPON 14.

**I**UE Jioua a ken kapas ngani Moses, apasa ;

2 Iei angang an trawn-rupan-puater lawn ranan an alimowtr la ; ra epue ua to i ren eue prist.

3 O eue prist a epue fai la lukin telinim o a epue pi are atiau rupan-puater a mawra sowni eue trawn-rupan-puater ;

4 Eue prist a puap epue fanau pue ra pue angai ren eue me epue limowtr man susu me rouman me aniafitr, ira sitar o mangaku par o isop.

5 O eue prist a epue fanau ra epue ni la aman lein ekoe man su, lawn sepei an puun, asan tran a manau :

6 O a epue angai eue man su a manau, o ira sitar,

o mangaku par o isop, o tina tu ir lawn tra an eue man su a ni la asan tran a manau.

7 O uitrikitriki fan fusu uawn eue a epue alimowtr sowni an rupan-puater, o epue aitan ngani i limowtr, o asu la eue man su a manau le malemal.

8 O eue a epue limowtr, a epue sopu an mangaku o fitrafitr met an makeran, o tutu lawn tran, o i a epue limowtr; o murin a epue to lawng lawn eue telinim, o a epue nom lukin an im ran fusu.

9 Iue, lawn afusuan ran a epue nawti makeran o pual alis, o pual fatan, o a epue nawti inisin monison, o sopu an mangaku, o tutu fitukan lawn tran, o i epue limowtr.

10 O lawn aualuan ran a epue angai lam atamuan me ruoman, murinna uasauas, sip aman manau an lefeng eu, o uis uluat lein uis engawl an flaur, ren asawran-mownga a nenu fengen le, o eu per an le,

11 O eue prist me alimowtr la i, epue isa tu eue muan me epue limowtr, o mini koe, fan masan Jioua, ren asam an fel an Kot;

12 O eue prist a epue angai aman lein ekoe lam atamuan o ua to ren asawran-tip ngani, o eue per an le, o amua ta ren asawran-amua fan masan Jioua:

13 O a epue ni la eue lam lawn ikue a ken ni la eue asawran-tipis me asawran-keni, ekis a fel, puun eue asawran-tip ngani a oson trek asawran-tipis ren eue prist; i me fel trapur.

14 Eue prist a epue angai sowni tra an eue asawran-tip ngani o talu uawn lesopon seling an paliimuan i me epue alimowtr o uawn autan lapalap an paomuanan o autan lapalap an pitran paliimuan.

15 Eue prist a epue angai sowni eue per an le o niena la lawn pusin kumut an paoifefinan;

16 O eue prist epue tiki autan paoimuanan lawn eue le a nom lawn kumut an paoifefinan o asupusupu fan fusu, sowni eue le, ren autan, fan masan Jioua.

17 Eue prist a epue talu ngani eue le a lusun lawn kumut an, uawn lesopon selingan paliimuanan i me epue alimowtr, o uawn autan lapalap an paoimuanan,

o autan lapalap an pitran paliimuan, uawn tra an eue asawran-tip ngani :

18 O eue prist epue talu ngani eue le a lusun lawn kumut an, uawn makeran i me epue alimowtr; o eue prist epue luini ti an tipis fan masan Jioua.

19 Eue prist a epue feri asawran-tipis, o luini ti aniaput an eue me epue alimowtr pun i me aniaput o murin a epue ni la asawran-keni :

20 O eue prist epue ua la uawn eue rawng an asawran-keni me asawran-mownga, o eue prist epue luini ti i, o a epue limowtr.

21 Are i a uoingau pue a soto ngani, iue, a epue angai lam atamuan aman ren asawran-tip ngani pue a amua ta, o luini ti i, o uis eu lein engawl uis an flour nenu fengen le ren asawran-mownga, o pual per an le;

22 O towf ruoman are apen an moimoi ruoman me paun a tufit: aman ren asawran-tipis o aman ren asawran-keni.

23 O lawn aualuan ran, a epue ua to ir ren eue prist, ren an alimowtr, ren asam an fel an Kot fan masan Jioua.

24 Eue prist a epue angai eue lam an asawran-tip ngani, o per an le o eue prist epue amua la ir asawran-amua fan masan Jioua :

25 O a epue ni la lam an asawran-tip ngani o eue prist epue angai sowni tra an asawran-tip ngani o talu uawn lesopon seling an paliimuan an eue me epue alimowtr, o autan alap paoimuanan o autan alap pitran paliimuanan ;

26 Eue prist a epue niena la me ren eue le lawn pusin kumut an paun palifefinan ;

27 O eue prist epue uitrikitriki fan fusu fan masan Jioua, sowni le a nom kumut an paoifefin ren autan paoimuanan.

28 O eue prist epue talu uawn lesopon seling an paliimuan an eue me epue alimowtr, o autan alap paoimuan o autan alap pitran paliimuan, sowni le a nom lawn kumut an, o pual uawn ekis an tra an asawran-tip ngani :

29 O eue prist epue niena la şowni lusun le a nom lawn kumut an paun uawn makeran eue me epue alimowtr pue a pue luini ti i, fan masan Jioua.

30 A epue feri kei ren aman lein towf ruoman are aman me asawran-keni etei asawran-mownga pue eue prist a pue luini ti eue me epue alimowtr fan masan Jioua.

31 Aman le ir me paun a tufit, me asawran-tipis, o aman me asawran-keni etei asawran-mownga pue eue prist a pue luini ti eue me epue alimowtr fan masan Jioua.

32 Iei angang an trawn rupan-puater me paun a se tufit monison ren an alimowtr.

33 Iue, Jioua a kapas ngani Moses me Aron, apasa;

34 Lupuan ami pura tu fanu an Kenan me ngang ngani ami au pue fanuani o ngang tina la rupan-puater lawn eu im an fanu me ami fanuani;

35 I me naun eue im a to lawn, a epue fai la ren prist, apasa, Oson ai kuna rupan-puater lawn im;

36 Iue, eue prist epue fanau, ra pue uai lukin pisek inisin me lawn eue im mown eue prist a to lawn pue epue pi eue puater, pue a te aniaput me inisin lawn im; eue prist epue to lawng lawn murin pue a pue pi im.

37 O lupuan a kuna eue puater o atiau eue puater a nom uawn apeun im o a nom puang arauarau, are parapar, o masar towkisasown fan masan apeun,

38 Eue prist epue to ue eue im lukin asaman im o pinia la im ran fusu;

39 O afusuan ran eue prist epue luin la o pi; are atiau puater a fis ta uawn apeun eue im;

40 Eue prist epue puap fanau ir ra pue ua la fau koe me uor puater lawn, o apiepi la lukin telinim uawn ekis aniaput:

41 O i epue feri pue aman epue nene apeun eue im lawn pueni fetale, o ra epue asaw la moramor an puetr me ra nene şowni, lukin telinim uawn ekis aniaput;

42 O ra epue angai pual ekawt fau o siuili ekoe fau o i epue angai pual ekawt puetr o apuetr eue im.

43 Are eue puater a luin to o fis ta lawn eue im,



murin an uai sowni koe fau, o murin an nene sowni  
puetr, o murin a puetr sefali ;

44 Eue prist epue to lawng lawn o pi, o atiau eue  
puater a fis ta lawn im, me rupan-puater lapalap ; o i  
me aniaput.

45 O a epue amaka la eue im, o an fau o an ira o  
an puetr inisin o apiepi la lukin telinim uawn ekis  
aniaput.

46 Iue, aman a to lawn eue im lupuan a pinia la, i  
me aniaput tawrei lekuniol.

47 O aman a kakawn lawn eue im, epue soppu an  
mangaku o aman a mownga lawn eue im, a epue soppu  
an mangaku.

48 Are eue prist a to lawng o kuna o atiau eue puater  
a sap fis ta lawn eue im murin ar puetr eue im, eue  
prist epue aitan ngani eue im limowtr ; eue puater a  
mawra la.

49 I a epue angai pue alimowtr la eue im man  
susu me ruoman, o ira sitar o mangaku arauarau, o  
isop ;

50 O a epue ni la aman lein koe man su, lawn sepei  
an puun, asan tran a manau ;

51 O a epue angai ira sitar o eue isop o mangaku  
arauarau o eue man su a manau o tina la ir lawn tra  
an eue man su a ni la o lawn tran a manau o uitriki-  
triki eue im fan fusu.

52 O a epue alimowtr eue im ren tra an eue man su  
o tran a manau, o eue man su a manau o ira sitar o  
isop o mangaku arauarau ;

53 O a epue asaw la eue man su a manau lukin eue  
telinim le malemal : o ien oson i a epue luini ti eue im ;  
o i epue limowtr.

54 Iei angang an rupan-puater o puater, sawkun ar  
me inisin.

55 O puater an mangaku, o puater an im ;

56 O kunun, o matr o tikifufu ;

57 Pue epue asilei ami lupuan awt metawt a ken  
aniaput o lupuan an limowtr ; iei angang an rupan-  
puater.

## SOPON 15.

**J**I OUA a ken-kapas ngani Moses me Aron apasa;  
 2 Ami arani naun Israel kana o kapas ngani ir;  
 Muan me inisin me uor awt metawt a fai sowni fitukar,  
 iei a aniaput.

3 Iei oson a epue silei an fai sowni a aniaput; are  
 fituk an a pupu etei an fai sowni o are a pinia la fitu-  
 kan ren an fai sowni, i me naun aniaput.

4 An paw inisin, me eue muan a pupu, a kakawn  
 uawn, a epue aniaput; o awt metawt a ken mamawt  
 uawn a epue aniaput.

5 O aman me ken atowpa an paw a pue sopu an  
 mangaku o tutu lawn tran pue a ken aniaput tawrei  
 lekuniol.

6 O aman a mamawt uawn awt metawt me eue muan  
 a pupu a mawt uawn, i a epue sopu an mangaku o  
 tutu lawn tran o epue aniaput tawrei lekuniol.

7 O aman a atowpa fitukan eue muan a pupu i a  
 epue sopu an mangaku o tutu lawn tran o epue aniaput  
 tawrei lekuniol.

8 Are ene muan a pupu i a atifa uawn aman alimowtr,  
 i a epue sopu an mangaku, tutu lawn tran o epue ani-  
 aput tawrei lekuniol.

9 O satel inisin me eue muan a pupu a tete uawn, a  
 epue aniaput.

10 O aramas inisin me atowpa pisek me ken nom  
 fan i, epue aniaput tawrei lekuniol; o i me puisa ta  
 ir epue sopu an mangaku, o tutu lawn tran o epue  
 aniaput tawrei lekuniol.

11 O aramas me inisin, me eue muan a pupu a ken  
 atowpa mown an rupuri paun lawn tran, ra epue sopu  
 ar mangaku, o tutu lawn tran o epue aniaput tawrei  
 lekuniol.

12 O sepei an puun me eue muan a pupu a ken  
 atowpa epue aueti la; o sepei an amutr inisin epue  
 sopu lawn tran.

13 Are eue muan a pupu a limowtr sowni an pupu  
 sowni, a epue aleani ran fusu ren an alimowtr, o sopu

an mangaku ; o a epue tutu fitukan lawn tran a manau, o a epue limowtr,

14 O afusuan ran a epue angai ren pusin i, towf ruoman are apen an moimoi ruoman, o fai to fan masan Jioua ren asaman fel an Kot, o gani eue prist :

15 O eue prist epue feri aman ren asawran-tipis, o aman ren asawran-keni ; o eue prist epue luini ti i fan masan Jioua, ren an fai sowni.

16 Are aman muan faun nauna ta a fai sowni i lupuan a maur, a epue tutu lawn tran fitukan inisin, o epue aniaput tawrei lekuniol.

17 O aman epue sopusu lawn tran mangaku inisin, o kilin inisin me faun nauna ta a nom uawn, o epue aniaput tawrei lekuniol.

18 O puiluan eue muan me faun nauna ta a fai sowni me a kakawn ren, ir me ruoman, ra epue tutu lawn tran o epue aniaput tawrei lekuniol.

19 Are aman fefin, a uor an fai sowni, o an fai sowni a tra lawn fitukan, ran fusu a epue etu lukin, o aramas inisin me atowpa i epue aniaput tawrei lekuniol.

20 O me inisin me a ken kakawn uawn lupuan an etu lukin epue aniaput, o me inisin a mamawt uawn epue aniaput ;

21 O me inisin me atowpa an lenian kakawn, epue sopusu ar mangaku o tutu lawn tran o epue aniaput tawrei lekuniol.

22 O me inisin me atowpa mini koe a ken mamawt uawn, epue sopusu ar mangaku, tutu lawn tran o epue aniaput tawrei lekuniol.

23 O lupuan aman a atowpa awt metawt a nom uawn an paw o uawn an lenian mawt me a mamawt uawn, i a epue aniaput tawrei lekuniol.

24 Are muan aman a kakawn ren o an aniaput a nom uawn, a epue aniaput ran fusu ; o eue paw me a kakawn uawn epue aniaput.

25 Are aman fefin a uor an fai sowni tra ran traw-mowng, sap lupuan an etu lukin ; are a fai sowni murin fasoun an etu lukin ; i a epue oson trek lupuan a etu lukin ran monison a fai sowni ; i me aniaput.

26 Paw me inisin me a maur uawn ran an a fai sowni, epue oson trek an paw an etu lukin; o an leni an mawt me a mamawt uawn epue aniaput oson trek aniaput an an fai sowni.

27 O me inisin me atowpa ekoe pisek epue aniaput o a epue sopu an mangaku o tutu lawn tran o epue aniaput tawrei lekuniol.

28 Are a ken limowtr sowni an fai sowni, a epue aleani ran fusu o murin a epue limowtr.

29 O aualuan ran a epue angai ren pusin i towf ruoman are apen an moimoi ruoman o ua to ir ren eue prist ren asaman fel an Kot.

30 O eue prist epue feri ren aman asawran-tipis o ren aman asawran-keni; o eue prist epue luini ti i fan masan Jioua, sowni an aniaput an fai sowni.

31 Iei oson ami feri pue naun Israel kana ra aimu sowni ar aniaput: pue ra te mela lawn ar aniaput lupuan ar aniaputa la ai im mangaku me nom le ir.

32 Iei angang an i me faun nauna ta a fai sowni i pue a aniaput ren;

33 O somau an etu lukin, o aman a uor an pupu sowni ren muan me fefia, o ren aman a kakawn ren nemin me ken aniaput.

#### SOPON 16.

**J**IOUA a kapas ngani Moses murin naun Aron me ruomau ra mela lupuan ar kin to fan masan Jioua.

2 O Jioua a kapas ngani Moses; Ko pue arani Aron, puim, pue a te to lawng lawn ekis-a-fel fasoun me inisin, lukin eue mangaku me aitua tu mown lenian kirakiratr me nom uawn eue pawr, pue a te mela, pow-kitau ngang epue puepue la lawn kutru asan lenian kirakiratr.

3 O iei oson Aron epue to lawng lawn eue ekis-a-fel, etei aman pulok ren asawran-tipis o ram aman ren asawran-keni.

4 O a epue faute ngani an mangaku linen a fel, o trousers linen epue nom uawn fitukan, o ri ngani i eu

riri linen, o aia an akau linen : pue kei ra fel ; o a epue tutu fitukan lawn tran o faute ngani ir.

5 O a epue angai sowni muit an naun Israel kana, kout atamuan ruoman ren asawran-tipis o ram aman ren asawran-keni.

6 Aron epue ua to eue pulok an asawran-tipis me ren pusin i o luini ti pusin i o naun kana lawn iman.

7 A epue pual angai ekoe kout ruoman o isa tu ir fan masan Jioua ren asaman fel an Kot.

8 O Aron epue esisin ren kout koe pue an ia ; aman epue naun Jioua o aman epue Koutauel.

9 O Aron epue ua to eue kout a naun Jioua o feri asawran-tipis ren ;

10 O eue kout a esisin pue Koutauel, a epue ua to i a manau, fan masan Jioua, pue a uou iaseni i, o asaw la i uawn fanu pen ren Koutauel.

11 O Aron epue ua to eue pulok an asawran-tipis me ren pusin i, o naun kana lawn iman, o a epue ni la eue pulok a nom ren, pue asawran-tipis.

12 O Aron epue amasoa ngani eue senser, mowr an ekei me uawn eue rawng fan masan Jioua, o amasoa ngani paun eue le pokus a murinna, o ua lawn lukin eue mangaku.

13 O a epue ua la le pokus uawn eue ekei fan masan Jioua, o kutrun eue le pokus epue pualuo la lenian kirakiratr me nom uawn pawr an puara ta, pue a sap epue mela.

14 O a epue angai me ren tra an eue pulok o uitrikitriki ren autan mown leni an kirakiratr palimasairan ; a epue uitrikitriki ren autan, mown lenian kirakiratr fan fusu.

15 O a epue puap ni la eue kout me ren naun aramas, ren asawran-tipis o ua lawn tra an, lukin eue mangaku apeun, o feri ren eue tra oson trek a feri ren tra an eue pulok o uitrikitriki i uawn lenian kirakiratr o mown lenian kirakiratr.

16 O a epue luini ti ekis-a-fel ren aniaput an naun Israel kana o naur fefer ingau o naur tipis inisin ; o

a pue feri nene trek ren eue fel an Kot a nom le ami, lein naur aniaput.

17 A sor aman epue nom lawn eue fel an Kot, lupuan an to lawng lawn pue a pue luini ti lawn ekis-a-fel, tawrei an to ue o luini ti pusin i o naun lawn iman, o muit an Israel inisin.

18 O a epue fai la ren eue rawng a nom fan masan Jioua, o luini ti i; o angai sowni tra an eue pulok, o tra an kout atamuan, o talu ngani metran eue rawng pueni fetale i.

19 O uitrikitriki uawn, ekis sowni eue tra, ren autan, fan fusu o alimowtra la i, o feleni i sowni aniaput an naun Israel kana.

20 Auesa la an luini ti ekis-a-fel, o fel an Kot, o eue rawng, a epue moana to eue kout atamuan a manau:

21 O, Aron epue pung tu paun ruofawt uawn maker an eue kout atamuan a manau, o puara ta uawn fefer ingau inisin an naun Israel kana, o naur fefer mual, o naur tipis inisin; o isa te ir me inisin uawn makeran eue kout muan, o asaw la i, ren paun aman a fitr ngani, uawn fanu pen:

22 Eue kout atamuan epue uou ar fefer ingau inisin uawn fanu a pen, o a epue asu la eue kout muan uawn fanu pen.

23 O Aron epue to lawng lawn eue fel an Kot o puini ti an mangaku linen, me a ken faute ngani lupuan an to lawn eue ekis a fel o likita la ir ie:

24 O a epue tutu inisin lawn tran lawn ekis-a-fel, puini ta lawn an mangaku o to sowni, o feri an asawran-keni o an aramas asawran-keni pue a pue luini ti ren pusin i o ren ekoe aramas.

25 O a epue keni uawn rawng iui an asawran-tipis.

26 O i me ua la eue Koutanel a epue sopu an mangaku, o tutu inisin lawn tran; iue, murin a epue to lawng lawn eue telinim.

27 O aman epue ua la lukin telinim eue pulok an asawran-tipis o kout an asawran-tipis me ar tra ra ua

lawn ekis-a-fel pue ra luini ti ren; o a ra epue keni lawn ekei unutar me fitukar me umun ar.

28 O i me keni ir a epue sopu an mangaku o tutu inisin lawn tran; iue, murin a epue to lawng lawn eue telinim.

29 Iei epue ami angang failfail la trek; lawn ran engawl an afusuan maram, ami epue atrou ngun ami o uku tu ami angang inisin, trawn fanu ami o re uawn me nom ngani ami:

30 Powkitan lawn ran ei ami tipis uou iaseni pue ami limowtr; o ami a limowtr sowni ami tipis inisin fan masan Jioua.

31 Iei me Sapat an asese remi, ami au pue atrou ngun ami; angang an failfail la trek.

32 O eue prist me a epue trelifi o feleni pue a siuili saman ren angangan souani an prist, a epue luini ti o faute ngani mangaku linen, mangaku a fel:

33 O a epue luini ti eueie a fel trapur, o fel an Kot, o eue rawng a epue luini ti; o a pual epue luini ti prist koe o aramas inisin an eue muit.

34 Iue,iei epue ami angang failfail la trek pue luini ti naun Israel kana ren ar tipis inisin, fan eu lawn iir eu: o a feri oson trek Jioua a amuramur ngani Moses.

#### SOPON 17.

**I**UE, Jioua a kapas ngani Moses, apasa;

2 Ko pue arani Aron me naun koe, o naun Israel kana inisin o kapas ngani ir;iei alon Jioua, a apasa;

3 Muan aman lein ainang an Israel, a ni la kau aman are lam aman are kout aman lawn telinim are lukin telinim,

4 O a sap ua to ren asaman fel an Kot pue a pue ngani Jioua, eu lifang, mown im-an-Jioua; tra an epue tip ngani i, a ken niens la tra o eue muan epue ukifi me ren lein naun aramas.

5 Pue naun Israel kana ra ua to ar asawr, me ra asawr uawn masan malemal, pue ra ua to ir fan

masan Jioua, ren asaman fel an Kot, ren eue prist, o ra epue ua to ir ren asawran-kinamue ren Jioua.

6 O eue prist epue niena la tra uawn eue rawng an Jioua ren asaman fel an Kot; o keni ini ren pokus ngani Jioua.

7 Ir ra sap epue pual asawr ngani anu an petauel ar asawr o fai la murin ir; iei epue naumi angang lawn pilawn ami failfail la trek.

8 O ko pue kapas ngani ir, aman lein ainang an Israel o lein re uawn kana me nom ngani ami, me epue feri asawr are asawran-keni,

9 Are a sap ua to ren asaman fel an Kot, pue a asawr ngani Jioua, eue muan epue ukifi me ren naun aramas.

10 Aman lein ainang an Israel, o lein re uawn kana me nom ngani ami, me ken aui tra, ngang epue sele to masai ngani i me ken aniani tra o ukifi i me ren lein naun aramas.

11 Powkitan tra a manau an fituk, o ngang ngani ami uawn eue rawng pue luini ti manau ami; pue tra epue luini ti powkitan manau.

12 Ie mi ne ngang kapas ngani naun Israel kana, ami me inisin au sap ani tra, o pual re uawn kana me nom ngani ami, ra sap epue ani tra.

13 Iue, aman lein naun Israel kana, are re uawn me nom ngani ami, lupuan a kitta lein petauel a liape to aman man are matrangatrang me a epue ani, a epue niena la tra an o ireir la le puun.

14 Pue oson ue trek manau an fituk inisin; an tra o an manau me eu etrek; o ngang kapas ngani naun Israel kana, ami a sap aniani tra an fituk me inisin, pue manau an fituk inisin me an tra. Aman a aniani epue ukifi sowni.

15 O aman tawn-fanu ami are re uawn, a aniani man a pusin mela, are tinen feseni, i a epue sopu an mangaku o tutu lawn tran o nom aniaput tawrei leku-niol; iue, a puap epue limowtr.

16 Are a sap sopu o sap tutu fitukan, a epue pusin uou an tipis.



## SOPON 18.

**O** JIOUA a kapas ngani Moses, apasa ;  
 2 Ko pue arani naun Israel kana o kapas ngani  
 ir ; Ngang Jioua naumi Kot.

3 Ami au sap feri oson trek angang an fanu an Ijip,  
 me ami nom uawn ; o au sap feri oson trek angang an  
 fanu an Kenan me ngang epue ua la ami ie ; o au sap  
 apiru ar fefer kana.

4 Iue, ami au pue feri ai kapas o amatru ai amura-  
 mur pue an pue fail fetal lawn : Ngang Jioua naumi  
 Kot.

5 Ami au pue amatru ai amuramur o ai apungu, pue  
 aman a feri ir a epue manau lawn ; Ngang me Jioua.

6 Aman a sap epue fai la ren aramas a fitukan, aselei  
 la ir ; Ngang me Jioua.

7 Ko sap aselei la samom me inom pue i me inom ;  
 ko sap aselei la.

8 Ko sap aselei la pulluan samom, pue iei falowngase-  
 lengan samom.

9 Ko sap aselei la mowngai om naun samom are  
 naun inom, are upu tu lawn inom are upu tu lukin,  
 atiau ko sap aselei la ir.

10 Ko sap aselei la naun nom muan, are naun nom  
 nengin, pue iei om falowngaseleng.

11 Eue nengin naun puiluan samom, me ken mowngai  
 om ; ko sap aselei la i.

12 Ko sap aselei la mowngai an samom, pue fitukan  
 samom.

13 Ko sap aselei la mowngai an inom, pue fitukan  
 inom.

14 Ko sap aselei la puin samom ; ko sap kiu ngani  
 puiluan pue a ken inom.

15 Ko sap aselei la nom nengin, puiluan nom at  
 aman ; ko sap aselei la i.

16 Ko sap aselei la puiluan puim, pue iei falowngase-  
 leng an puim.

17 Ko sap aselei la aman fefin etei naun nengin ;  
 ko sap angai nengin an naun at, o nengin an naun

nengin, ko sap angai pue aselei la; pue fitukan: pue iei a tipis angawl.

18 Ko sap angai puin puiluom pue a te amangau i; ko sap aselei la i fan mas an eue fefn (puiluom) lupuan an manau.

19 Ko sap fai la ren puiluom lupuan an aniaput ren an somau tra pue ko pue aselei la i.

20 Ko sap kakawn ren puiluan muan unukum pue ko pue aniaputa la pusin en ren.

21 Ko sap asawr ngani Molek nom kana pue ra fai la lawn ekei, pue ko te aniaputa la itan nom Kot; Ngang me Jioua.

22 Ko sap kakawn ren muan aman oson trek ren fefn; pue iei fefer angawl trapur.

23 Ko sap urumawt mual ren aman man, pue ko te aniaputa la pusin en ren; pual aman fefn a sap epue urumawt mual ren man pue iei fefer angawl trapur.

24 Ami au sap aniaputa la pusin ami ren kei inisin pue aramas rotopuak, me ngang asu la mown ami, ra ken aniaputa la ir ren kei inisin.

25 O fanu a aniaput ren, o ngang epue tina la an tipis uawn i; o eue fanu epue kusufa ue ir me nom uawn.

26 Iue, ami au amatra ai kapas o ai amuramur, o au sap feri kei fefer angawl, trawn ami fanu o re uawn me nom ngani ami.

27 Pue aramas uawn eue fanu a nom mowmi ra ken feri kei fefer angawl me inisin, aniaputa la eue fanu.

28 Pue eue fanu a sap pual epue kusufa ue ami lupuan ami aniaputa la i, oson trek a ken kusufa ue aramas rotopuak me ken nom mowmi.

29 O aramas inisin me feri kei fefer angawl, ir inisin me feri ra epue ukifi me ren lein naun aramas.

30 Iue, ami au amatra ai amuramur pue au te feri kei ngang angawl me ra ken feri mowmi, pue ami au sap aniaputa la pusin ami ren; Ngang me Jioua naumi Kot.

## SOPON 19.

**I**UE, Jioua a kapas ngani Moses, apasa ;  
 2 Ko pue arani muit an naun Israel kana inisin, apasa, Ami au pue fel pue ngang, Jioua naumi Kot, I a fel.

3 Muan inisin a epue nueiti saman me inan o amatru ai ranan fel ; pue ngang me Jioua naumi Kot.

4 Ami au sap tawko la ren anu kana, au sap feri ngani ami ununun anu a metre, pue ngang me Jioua naumi Kot.

5 Lupuan ami asawr ngani Jioua asawran-kinamue au pue asawr ngani mini I epue etreni.

6 Iue, ami au pue aniani lawn ran an ami asawr ngani, o aruoan ran o ami au pue keni lawn ekei lusun a nom auluatan ran.

7 Are aman a aniani lawn ran uluat, iei a ingau trapur ; a o sap epue tren ren :

8 O aman a aniani, i a epue uou an tipis, a ken aniaputa la awt a fel ngani Jioua ; o eue muan epue ukifi me ren lein' naun aramas.

9 Lupuan ami kinikini uan naumi fanu, au sap epue kinikini me inisin lawn om malemal o ko sap epue rusi fengeni lusun om kinikini.

10 Ko sap rusi fengeni lusun ami malemal an kreip, o ko sap rusi fengeni ua an a mor la. Ko pue likita la ir ren uingau kana o ren re uawn: Ngang me Jioua naumi Kot.

11 Ami au sap solei ; ami au sap kapas trawfana ; au sap atupu fengen aman ren aman.

12 Ami au sap akapel trawfana fan itai, o aniaputa la itan naumi Kot ; Ngang me Jioua.

13 Ko sap nauniamanau muan unukum ; ko sap mawtroni sowni i ; ko sap amatru lulinin angang an nom trawn-angang, tawrei lesor.

14 Ko sap turunufasi aman seling a pin ; ko sap isa tu awt metawt mown aman masatron ; ko pue nueiti nom Kot ; Ngang me Jioua.

15 Ko sap feri mual lupuan enleta ta ; ko sap afitr

masan uoingau kana; ko sap lowlilin me pisekasek; ko pue enleta ta uenauen trawn unukum.

16 Ko sap etipatipa faile lein nom aramas: ko sap u te ngani tra an muan unukum; Ngang me Jioua.

17 Ko sap aput puim leluk om; atiau ko pue apungu trawn-unukum; ko sap nou tipis powkitan i.

18 Ko sap kitta luinin, ko sap amatru sawng ren naun nom aramas, ko pue tongei muan unukum oson trek pusin en; Ngang me Jioua.

19 Ami au pue amatru ai kapas. Ko sap likit ngani nom man kakawn ren awt sawkun man; ko sap fetoka tu ruo sawkun faun lawn malemal om. Ko sap faute ngani mangaku a uor ruo sawkun tret lawn.

20 Lupuan aman kakawn ren fefin aman me aman nengin trawn-angang a kafawt ngani muan aman, o a sap luini ti pue a sap amusa la; ir ra epue nini; ra sap epue mela pue nemin a sap musa la.

21 O i epue moana to powkitan an tipis, ren Jioua, ren asaman fel an Kot, ram aman asawran-tip ngani.

22 O eue prist epue luini ti an tipis a ken feri ren eue ram an asawran-tip ngani, fan masan Jioua; o an tipis a ken feri epue amusa la.

23 Lupuan ami au to lawng uawn eue fanu o fetoka tu sawkun ira inisin ren mownga, au pue reki-reki uan oson trek a sap sirkomsais; lefeng uluat a epue remi oson trek a sap sirkomsais o au sap epue mownga.

24 O lawn aruanuan lefeng uan inisin epue fel, pue ami langafauti Jioua ren.

25 O lawn lefeng alimouan ami epue aniani uan, pue a pue alapa la remi; Ngang me Jioua naumi Kot.

26 Ami au sap epue ani awt etei tra; au sap epue auarauar; au sap feri anu.

27 Ami au sap fitrafitr maker ami lepali eu etrek, au sap ata la ami alis.

28 Au sap rei fituk ami powkitan me mela kana; au sap make tu mak uawn ami; Ngang me Jioua.

29 Ko sap aniaputa la nom nengin pue a epue fefin me ingau pue fanu a sap lisou o ur an tipis angawl.

30 Ami au pue amatru ai sapat kana, o nueiti ren ai ut-a-fel; Ngang me Jioua.

31 Au sap tawko la ren trawn-feri anu, o trawn-auar kana; pue au te tipis ren; Ngang me Jioua naumi Kot.

32 Ko pue u te mown makeran a powtr, o lowlilin aramas a muk la; Ko pue nueiti naumi Kot; Ngang me Jioua.

33 Au sap nauni amanau re uawn a nom remi uawn ami fanu.

34 Eue re uawn epue nom ngani ami oson ue trek trawn-fanu; ko pue tongei i oson trek pusin en; pue ami au ken re uawn kana uawn fanu an Ijip: Ngang me Jioua naumi Kot.

35 Au sap atupu ren aukuk, ren atroun, o ren sepei an aukuk.

36 A me remi atroun epue uenauen, pi epue uenauen, efa epue uenauen, in epue uenauen: Ngang me Jioua naumi Kot, me uei ami me uawn fanu an Ijip.

37 Ami au pue amatru ai kapas inisin, o ai amur-amur inisin o feria ta ir; Ngang me Jioua.

#### SOPON 20.

**I**UE Jioua a ken kapas ngani Moses, apasa;

2 Ko pue kapas ngani naun Israel kana, Aman lein naun Israel kana o re uawn a nom ngani Israel, me ken fang ngani Molok, me ren naun kana; atiau a epue mela; aramas an fanu ra epue atrei i ngani fau.

3 Ngang epue sele la masai ngani eue muan o ukifi i sowni lein naun aramas; pue a ken fang ngani Molok me ren naun kana, pue aniaputa la ai ut-a-fel o aingan la itai a fel.

4 Are aramas uawn fanu ra tripuang pue ra sap ni la i lupuan an fang ngani Molok me ren naun kana;

5 Ngang epue sele la masai ngani eue muan me naun ainang, pue ukifi i o ir me inisin me feri nu ingau etei i pue ra pue feri nuuelauen ren Molok, sowni lein aramas kana.

6 O eue muan me epue tawko la ren souanu o trawn-

auar kana pue a pue motraisou murir, Ngang epue sele la masai ngani eue muan pue ukifi i sowni lein naun aramas.

7 Ami au feleni pusin ami o au pue fel; Ngang me Jioua naumi Kot.

8 Ami au amatru ai kapas o pual feria ta ir; pue Ngang me Jioua a feleni ami.

9 Aman me kapas anumamau ngani saman o inan au epue atiau ni la i; a ken kapas anumamau ngani saman o inan; an tra epue nom uawn i;

10 A aman a ken lisou ren puiluan aman, euar i me ken lisou ren puiluan muan unukun, atiau au epue ni la eue muan trawn-lisou o eue fefin trawn-lisou, ir me ruoman.

11 Aman a ken kakawn ren puiluan saman, a ken aselei la saman; atiau ami epue ni la ir me ruoman: ar tra epue nom uawn ir.

12 Aman a kakawn ren puiluan naun muan, atiau au pue ni la ir me ruoman; ra ken feri tipis angawl; ar tra epue nom uawn ir.

13 Aman a kakawn ren muan oson trek a kakawn ren fefin, ir me ruoman ra ken feri tipis angawl; atiau au epue ni la ir; ar tra epue nom uawn ir.

14 Aman a angai ren puiluan aman fefin etei inan, iei fefer angawl; ami au pue keni i lawn ekei o pual koe fefin me ruoman; pue a sap epue fefer angawl le ami.

15 Aman me ken kakawn ren man aman, atiau ami pue ni la i; o au pue ni la eue man.

16 Iue, aman fefin a ken arep ngani man aman pue a kakawn ren; ko pue ni la eue fefin o eue man; atiau au pue ni la ir; naur tra epue nom uawr.

17 Aman a angai mowngai an, naun saman, are naun inan, o a pue kuna an selei la, o nemin a kuna an selei la; iei fefer angawl; ir ra epue ukifi sowni mown masan naun naur aramas; a ken aselei la mowngai an; a epue uou pusin an tipis.

18 Aman a kakawn ren fefin aman lupuan an etu lukin o aselei la i; a ken apuepue an pupu sowni, o

nenim apuepue au pupu sowni tra; o ami pue ukifi ir me ruoman me ren naur aramas.

19 Ko sap aselei la puin inom, o mowngai an samom; pue i me aselei la fitukan; o ra epue uou ar tipis.

20 Aman a kakawn ren puiluan puin saman, a ken aselei la puin saman; ra epue uou ar tipis; o ra epue mela a sor nauna la.

21 O aman a angai puiluan puin, iei tipis angawl; a ken aselei la puin; ra sap epue nauna la.

22 Ami au pue amatru ai kapas o ai amuramur o feria ta ir; pue fanu ei me ngang uei ami uawn pue au pue nom uawn, a sap epue kusufa ue ami.

23 Au sap epue apiru ngang an ekoe aramas a rotopuak me ngang I tapue la sowni fan masami; pue ra ken feri kei inisin, o ngang I aput ir trapur.

24 Iue, Ngang I kapas ngani ami: au pue fanuanai ar fanu, pue ngang epue ngani ami pue au pue fanuanai i, eu fanu a pupu la ren tran aupan o puletr; Ngang me Jioua naumi Kot me aimu ami sowni ekoe aramas.

25 Pue ami au pue aimu man aniafitr sowni man aniaput, man su aniaput sowni man su aniafitr; o au sap aniaputa la pusin ami ren man, man susu, o me inisin me tete fail uawn puun, me ngang aimu sowni ami, pue aniaput.

26 O ami epue nai aramas a fel: pue ngang me Jioua a fel, o ngang aimu la ami sowni ekoe aramas pue au pue nai.

27 Lupuan muan aman are fefin aman a epue souanu are trawn-auar, ra epue ni la ir; ra epue atrei ren fau. Naur tra epue nom uawr.

#### SOPON 21.

**I**UE, Jioua a kapas ngani Moses; Ko pue kapas ngani ekoe prist naun Aron o fanau ir, aman a sap epue aniaputa la pusin i ren aman lein naun aramas me me la ;

2 Are a sap ren aman fitukan, ren inan o ren saman, o ren naun muan, o ren naun nengin, o ren puin;

3 I a epue aniaputa la pusin i ren mowngai an a fapuul lipit, a samo uor puiluan, o auasauas an mowngai an.

4 I a sap epue aniaputa la pusin i me samol' aman pue a ingau la ren.

5 Ir ra sap epue nawti makerar pue matoto are palian alis; ra sap epue make tu mak uawn fitukar.

6 Ir ra pue fel ren naur Kot; ra sap epue ingau la itan naur Kot; pue ra ken ua to asawran Jioua me feri ren ekei, me ken pret an naur Kot; o kei epue fel.

7 Ir ra sap epue angai ren puiluar fefin aman nu ingau, o a lisou, fefin me puiluan a pauta la i; pue a ken fel ngani an Kot.

8 Ko pue feleni i; pue a asawr ngani pret an om Kot: o a epue fel ngani ami; pue ngang me Jioua a fel, me feleni ami.

9 Lupuan aman nengin naun prist a popna ta lisou, a ken aniaputa la saman; a epue keni uawn ekei.

10 O eue prist a lap lein puin kana, me ra ken niena la le an apit uawn makeran, o feleni i pue a pue faute ngani ekoe mangaku, a sap epue uai sowni an akau o teringei an mangaku;

11 O a sap epue fai to ren aman a me, a sap epue aniaputa la pusin i ren saman o inan;

12 O a sap epue to ue eue ut-a-fel o ingau la eue ut-a-fel an naun Kot; pue eue muar an le an trelifi an Kot a nom uawn i. Ngang me Jioua.

13 I a epue angai ren puiluan aman fapuul a lipit.

14 A sap epue angai kei: aman fefin me puiluan a me, aman fefin me puiluan asu la, aman fefin me aniaput o aman fefin nu ingau; pue a pue angai puiluan fapuul lipit an naun aramas;

15 Pue a sap epue aniaputa la muramuran lein naun aramas; pue ngang me Jioua a feleni i.

16 Iue, Jioua a kapas ngani Moses, apasa;

17 Ko pue kapas ngani Aron, apasa; a uor aman lein naun kana lawn ar ainang me nom uawn tikifufu



ingau, a sap epue kin to ua to asawr an pret an naun Kot.

18 Powkitan a sor aman a uor tikifufu ingau uawn me epue kin to; are masapon, are rikarik, are puawta-motr, are awt metawt a se owtr ngani;

19 Are aman me pitran are paun a punu;

20 Are sawkeran a pawr, are a peramuk, are a tiki-fufu lawn faun masan, are arakak, are puater, are faun koe a ta;

21 Aramas me inisin lein naun Aron eue prist a nom uawn i tikifufu ingau, a sap epue kin to ua to asawr an Jioua, pue a uor an tikifufu, ie me ne a sap epue kin to, ua to pret an Kot.

22 Iue, a epue aniani eue pret an Jioua, sowni eue a fel trapur o pual sowni eue a fel.

23 Iei etrek a sap epue eta la lukin eue mangaku a aitua tu, o arep ngani eue rawng pue i a uor an tiki-fufu uawn; a sap epue aniaputa la nai a fel pue ngang me Jioua a feleni ir.

24 Iei oson Moses a arani Aron me naun koe o naun Israel kana me inisin.

#### SOPON 22.

**J**IOUA a kapas ngani Moses, apasa;

2 Ko pue arani Aron me naun koe, pue ra pue pui sowni mini koe a fel an naun Israel kana, me ra ken feleni rei pue ra sap aniaputa la itai a fel; Ngang me Jioua.

3 Ko pue kapas ngani ir, aman lawn pilawn ar, me ren naur kana inisin, me ken kin ngani mini koe me fel, me naun Israel kana ra feleni ren Jioua, lupuan a uor uawn limingau, eue muan epue ukifi sowni fan masai. Ngang me Jioua.

4 Aman a nom lein naun Aron koe, o a ken rupan-puater, are muan apupu; a sap epue aniani ekoe me fel; tawrei an limowtr la. Aman a atowpa awt me aniaput ren me la kana, are aman me faun an nauna ta a fai sowni i;

5 Are aman a atowpa man tete fail a aniaput ngani

i, are muan aman me aniaput ngani i, o me inisin me aniaput ngani i;

6 Aman a atowpa eu lein ekoe, a ken aniaput tawrei lekuniol, o a sap epue ani sowni ekoe a fel are a sap tutu inisin lawn tran lom.

7 Iue, lupuan akar a tup tu i a epue limowtr; a epue ani sowni ekoe a fel, pun me an mownga.

8 A sap epue aniani man me pusin mela are man me man mawtro a ken tinen feseni, pue a te aniaput ren; Ngang me Jioua.

9 O ra epue amatru ai kapas, pue ra te uou pusin ar tipis ren, o ra pue mela ren pun ra aniaputa la i; Ngang me Jioua a feleni ir.

10 Re uawn me inisin ra sap epue ani eue a fel; re uawn an eue prist o trawn angang a sap epue ani eue a fel.

11 Aman naun prist me a ken mowna to ren naun silfer, i a epue mownga; o ir ra upu tu lawn an im, ra epue mownga an pret.

12 O an eue prist nengin me apupuilu ngani aman re uawn, a sap epue aniani sowni asawran-ekia ta an eue me fel.

13 Iue, naun prist nengin, puiluan a me, o puiluan asu la i, a sor naun samireit, o a luini ti iman saman oson trek aman fapuil, a epue ani sowni pret an saman; o aman re uawn a sap epue ani sowni.

14 Aman me ken ani eue a fel o a sisilei, a epue apatr ngani uis eu lein uis limou, o ngani eue prist, eue a fel.

15 Pue ra sap aniaputa la ekoe me fel an naun Israel kana, me ra ken ekia ta ren Kot;

16 Pue ra te epue uou ar tipis an ar ingau ren ar mownga ekoe me fel; pue Ngang me Jioua a feleni ir.

17 Iue, Jioua a kapas ngani Moses, apasa,

18 Ko pue arani Aron me naun koe o naun Israel kana monison, o kapas ngani ir, aramas aman sowni im an Israel o sowni re uawn lein Israel, me epue ua to an lifang; are ren ar puon, are ren lelukar ra mowtren, me ra epue ua to ren Jioua ren asawran-keni;

19 Pue ami epue etreni; ami epue ua to aman atamuan murinna uasauas, sowni kau kana, lam kana, kout kana;

20 Ami au sap ua to me inisin a uor tikifufu ingau uawn; pue au sap etreni ren.

21 Lupuan aman a ua to ren Jioua asawran-kinamue pue a luini ti an puon, are ren lelukan etrek, me ren puin kau are puin sip, a epue murinna uasauas pue epue etreni; a sor tikifufu ingau uawn.

22 Ami au sap epue ua to ren Jioua aman masatron, are a punu, are a powku, are a matr, are a arakak, are a puater; ami au sap epue asawr ngani Jioua ren ekei me ren kei, uawn eue rawng.

23 Aman kau are sip a nom uawn awt a se owtr, are a ken motramotr, au pue feri sowni kei asawran-mowtren, o asawran-puon au sap epue etreni ren.

24 Ami au sap ua to ren Jioua man kitrutru o fituk an ata, o a tinen feseni, o a rei ngani; o au sap feri oson trek uawn naumi fanu.

25 O pual sowni paun aman re uawn, ami au sap epue ua to mownga an Kot sowni kei inisin pue a nom uawn ir awt ingau, o tikifufu ingau; ami sap epue etreni ren.

26 Iue, Jioua a kapas ngani Moses, apasa;

27 Lupuan aman pulok are lam are kout a upu tu, a epue likit ngani i a nom ren inan ran fusu; aualuan ran o murin epue owtr ngani asawr an Jioua me feri ren ekei,

28 Are kau are sip; au sap ni la i me naun, lawu ran eu.

29 Lupuan ami asawr ngani Jioua asawran-kisasou, ami au pue asawr ngani pue ami epue kuna tren ren.

30 Ami au pue aniani lawn ran iei trek, au sap likita la awt sowni i tawrei leso; Ngang me Jioua.

31 Ami au pue amatru ai amuramur kana o feria ta ir; Ngang me Jioua.

32 Ami au sap aniaputa la itai a fel; o ngang epue feleni lein naun Israel kana; ngang me Jioua a feleni ami,

33 A ken moanana la ami sowni fanu an Ijip pue U pue nom Kot; Ngang me Jioua.

## SOPON 23.

**J**IOUA a puap kapas ngani Moses, apasa;  
2 Ko arani naun Israel kana, o kapas ngani ir: ikei aulau an Jioua ami epue aitan ngani ir aulau me fel, ikei trek me ai aulau.

3 Ami au pue angang ran uownu: o afusuan ran a sapat an asese o muit a fel; ami au sap feri awt angang lawn; pue sapat an Jioua le ini ami inisin.

4 Kei aulau an Jioua me muit a fel; me ami au pue kowkowri lawn fasoun ar.

5 Pasofer an Jioua a feri lefinan lekuniol o lesautik, lawn lepopun maram, ran engawl me ruanu.

6 Iue, aulau an pret a sor lefen, an Jioua, a feri lawn eue maram etrek, lawn ran engawl me limou; ami epue aniani pret a sor lefen ran fusu.

7 Lepopun ran epue ami muit a fel; au sap epue feri awt angang lawn.

8 Ami epue asawr ngani Jioua asawr me feri ren ekei, ran fusu: o lawn afusuan ran epue muit a fel; au sap epue feri awt angang lawn.

9 Iue, Jioua a kapas ngani Moses, apasa;

10 Ko pue arani naun Israel kana o kapas ngani ir; Lupuan ami to lawng lawn eue fanu me ngang ngani ami, o kinikini ras an, au pue ua to ren eue prist eu pinukun le popun kini an naumi ras:

11 I epue amua la eue pinukun fan masan Jioua pue ami epue kuna tren ren: saraun fel eue prist a epue amua la i.

12 Ami epue feri, lawn ran an amua la eue pinukun, asawran-keni ngani Jioua, lam aman a murinna uasa-uas manau an lefeng eu.

13 O asawran-mownga epue ruo uis an flaur etipuar lein uis engawl, nenu fengen le, asawr a feri ren ekei ngani Jioua, a pokus: o eu uis an uain lein uis ruanu, asawran-un.

14 Ami au sap epue mownga pret, o korn a um, o

uan malemal, tawrei ran au puap ua to asawr ren naumi Kot; iei angang an failfail la trek le im ami me inisin lawn pilawn ami inisin.

15 Iue, ami epue aleani sowni saraun eue fel, sowni ran an ami ua to eue pinukun ren asawran-amua; fusu ran an fel etrek;

16 Au pue aleani ran lime saraun eue afusuan ran an fel; o ua to asawran-mownga a sefa ren Jioua.

17 Ami epue ua to me lawn im ami ruou pret-an-amua sowni uis ruou an flaur lein uis engawl; ra epue flaur etipuar, umuni ren lefen, lepopun ua ren Jioua.

18 O ami epue ua to etei eue pret, lam fuman murinna uasauas, lefeng eu, o pulok aman me ren puin kau, o ram ruoman; ra epue asawran-keni ngani Jioua, etei naur asawran-mownga o asawran-un me feri ren ekei, ra pokus ngani Jioua.

19 O ami epue feri asawran-tipis kout a muan aman, o asawran-kinamue ruoman lam an iir eu.

20 O eue prist epue amua la ir etei eue pret an lepopun ua, ren asawran-amua fan masan Jioua, etei ekoe lam me ruoman; ra epue fel ngani Jioua ren eue prist.

21 O ami epue amuit fengen lawn ran iei, muit a fel remi; o ami sap epue feri awt angang lawn; iei angang failfail la trek le imami lawn pilawn ami.

22 O le ras, ami au sap epue kini me inisin ras an ami fanu lawn om malemal an om ras; o ko sap rusi fengeni ekawt lusin om ras; Ko pue likita la ren me uoingau o re uawn; Ngang me Jioua naumi Kot.

23 Iue, Jioua a kapas ngani Moses, apasa;

24 Ko pue kapas ngani naun Israel kana, apasa, Lawn lepopun ran an maram fusu epue asese an kinamue, aulau an saui koe, ren tretremani, muit a fel.

25 Au sap epue feri angang inisin; ami epue ua to asawr ren Jioua me feri ren ekei.

26 Iue, Jioua a kapas ngani Moses, apasa;

27 Atiau lawn engawl an ran an iei maram fusu, a

ran an luini ti tipis : epue muit a fel remi, ami epue atrou ngun ami ; o ua to asawr ren Jioua me feri ren ekei.

28 Lawn ran ei ami an sap feri awt angang ; pue ran an luini ti tipis, a luini ti ami fan masan Jioua naumi Kot.

29 O muan inisin me sap atrou ngun an lawn ran ei, a'epue ukifi me ren an aramas.

30 O muan inisin me feri awt angang lawn ran ei, ngang epue ukifi sowni lein naun aramas.

31 Ami au sap epue feri awt angang ; iei angang an failfail la trek lawn pilawn ami, le imami me inisin.

32 Iei naumi sapat an asése a kinamue o ami epue atrou ngun ami ; lekuniol, lawn atuoan ranan lepopun maram, sowni lekuniol tawrei lekuniol au pue amatru naumi sapat.

33 O Jioua a kapas ngani Moses, apasa ;

34 Ko pue kapas ngani naun Israel kana, apasa ; Lawn engawl me limouan ranan iei afusuan maram epue aulau an im ngani Jioua, a ran fusu.

35 Lepopun ran epue muit a fel ; au sap epue feri awt angang lawn.

36 Ran fusu ami epue ua to asawr ren Jioua me feri ren ekei : o aualuan ran epue muit a fel remi ; o ami epue ua to asawr me feri ren ekei ren Jioua ; iei me trulap a fel, au sap epue feri awt angang.

37 Ikei aulau an Jioua, me ami epue amuit fengeni ren muit a fel ; pue ua to asawr me feri ren ekei ngani Jioua ; asawran-keni me asawran-mownga, asawran-tra me asawran-un, ir me inisin lawn ran ar.

38 O pual ekoe sapat an Jioua, o naumi lifang, o naumi asawr a puon, me asawran-mowtren inisin me ami epue fang ngani Jioua.

39 Iue, lawn engawl me limouan ran an afusuan maram, lupuan ami iown fengen uan eue fanu, ami epue aulaua la aulau an Jioua ran fusu. Lepopun ran me sapat o aualuan me sapat.

40 Lepopun ran, ami epue angai remi uan ira murinna, keangan rupung, o panan ira a faufau, o ira uilo

an tran pupu o puapua fan masan Jioua naumi Kot ran fusu.

41 O ami epue aulaua la aulau ren Jioua ran fusu lawn iir eu, angangan failfail la trek lawn pilawn ami ; lawn afusuan maram ami epue aulaua i.

42 Ami epue nom lawn im an keang ran fusu ; i me auasauasan aman re Israel a epue nom lawn im an keang.

43 Pue muramur ami ra pue silei me ngang feri pue naun Israel kana ra pue nom lawn im an keang, lupuan ai uai ir sowni fanu an Ijip ; Ngang me Jioua naumi Kot.

44 Iue, Moses a puap kapas ngani naun Israel kana onson kei aulau an Jioua.

#### SOPON 24.

**I**UE, Jioua a kapas ngani Moses, apasa ;

2 Ko pue fanau naun Israel kana ra pue ua to rem le olif, limowtr, a uutri, ren eue saram, pue feri uawn lamp ran inisin.

3 Lukin mangaku an puara ta lawn fel an Kot ; pue Aron epue feri sowni lekuniol tawrei lekuniol ran inisin fan masan Jioua ; a angang failfail la trek lawn pilawn ami.

4 O a epue anuka tu lamp uawn leni ar a limowtr, fan masan Jioua ran inisin.

5 O ko pue angai flaur o umuni engawl me ruo apawsuk ren ; uis ruo an ifa lein uis engawl epue nom lawn apawsuk eu.

6 O isa tu ir lawn tetel ruo, uownu lawn tetel eu, uawn eue tepel a limowtr fan masan Jioua.

7 O ko pue isa tu uawn ekoe tetel frankinsens allim ; pue epue pret ren asawran-tretremani, o asawr me feri ren ekei ngani Jioua.

8 Ran an fel inisin a feri ir fan masan Jioua ran inisin ; mown naun Israel kana, ren puon a se uku tu.

9 Iue angang an Aron me naun koe, ra pue mownga i lawn ekis a fel : powkitan a fel trapur sowni asawran Jioua inisin me feri ren ekei, o angang failfail la trek.

10 Iue aman muan naun fin an Israel o sam an re Ijip aman, a fai la lein naun Israel kana; o eue naun fin an Israel a fiu ren aman re Israel lawn telinim,

11 O eue naun fin an Israel a mo ren eue itan, o aniaputa la; iue ra ua la i ren Moses, o itan inan Silomit naun Tipri, ainang an Tan.

12 Ra ken likita la i lawn im an fetok pue auan Jioua epue aitan ngani ir.

13 Iue, Jioua a kapas ngani Moses, apasa;

14 Ko pue moana la eue trawn-mo lukin telinim; o me inisin a rong ra pue pung tu paura uawn makeran, o muit an Israel monison ra pue atrei i.

15 O ko pue kapas ngani naun Israel kana apasa; aman, aman, a ken mo ren Kot a epue uou pusin an tipis.

16 O aman a ken mo itan Jioua, atiau a epue ni la; muit monison ra pue fawkun atrei i; re uawn oson trek trawn-fanu lupuan an mo itan a epue ni la;

17 O aman a ni la muan aman, atiau ko pue ni la i;

18 O aman a ni la aman man, a epue luini ti; manau ren manau.

19 O aman a feri auingau uawn muan unukun, a epue feri ngani i oson trek a feri.

20 Takai ren takai, masan ren masan, nin ren nin; oson trek aman a ngani muan aman auingau, epue ngani i oson ue trek.

21 Aman a ni la man aman a epue luini ti; aman a ni la muan aman a epue ni la.

22 Angang eu epue nom remi; oson trek eue re uawn epue oson ue trek eue trawn-fanu, pue ngang me Jioua naumi Kot.

23 Iue, Moses a kapas ngani naun Israel kana, o ra ua la eue trawn-mo lukin telinim, o ra atrei i ren fau; pue naun Israel kana ra ken feri oson trek Jioua a amuramur ngani Moses.

#### SOPON 25.

**J**IOUA a puap kapas ngani Moses uawn trukatrukta Sainai o apasa;



2 Ko pue arani naun Israel kana o kapas ngani ir; Lupuan ami to lawng lawn eue fanu me Ngang epue ngani ami, eue fanu epue asese, eue sapat, ren Jiona.

3 Ko pue fetoka tu om malemal lefeng uownu o awtawt om mal an kreip lefeng uownu; o rusi fengen uan;

4 O lawn afusuan lefeng epue sapat an sapat kana ren eue fanu—eu sapat ren Jioua: Ko sap fetoka tu om malemal; ko sap awtawt om mal an kreip.

5 Ko sap kinikini a pusin mare ta, o ko sap rusi fengen kreip sowni uawn om ira kreip; pue sapat an sapat kana ren eue fanu.

6 Sapat an eue fanu epue remi, ren mownga; a epue rem, o ren nom trawn-angang muan o nom trawn-angang fefin, o nom trawn-angang ren luinin, o ren eue re uawn a nom ngan uk:

7 O ren nom kau kana, o man kana a nom uawn om fanu: uan me inisin epue naur ra pue mownga.

8 Iue, ko pue aleani rem, fusu iir an sapat kana; fusu iir fan fusu; o epue remi sapat fusu an iir kana, me iir faik me tuou;

9 O ko pue usi saui lawn ran engawl an afusuan maram; lawn ran an luini ti tipis, au pue usi saui uawn ami fanu inisin.

10 O eue iir lime, ami epue feleni, o au pue afau faile angasa la uawn eue fanu ren trawn-fanu inisin, epue puapua remi; pue ami me inisin aman, aman epue luin la uawn fanu an, o ami me inisin aman, aman epue luin la ren an traw.

11 Iir lime a epue iir an puapua remi: au sap epue fetoka tu, sap epue talu an pusin mare ta, o au sap epue rusi fengen an kreip me a se awtawt.

12 Pue iei puapua; o epue fel remi; iue, ami au pue ani uan malemal.

13 Lawn iei iir an puapua, ami me inisin luin la, aman, aman, uawn fanuan.

14 O lupuan ami mowna la awt metawt ngani muan unukumi, are angai sowni paun muan unukumi, au sap epue nauni amauau aman puim koe.

15 Ko pue angai sowni muan unukum ren iteit an iir murin iir an puapua: o i a epue mowna ngan uk ren iteit an iir me epue fai to.

16 Oson trek iteit an iir; a iir trawmowng ko pue alapa la luinin, a iir traw kiskas ko pue kiskas tu luinin, puun a mowna ngan uk oson trek iir me epue fai to.

17 Au sap nauniamanau, aman muan unukum; ko pue nueiti om Kot; pue Ngang me Jioua naumi Kot.

18 O ami au pue feri ai kapas o amatru ai amuramur o feria ta ir; pue au pue nonom trek uawn fanu a sor nuokus.

19 O eue fanu epue mare ta uan, o ami epue mownga met, o ami epue nom uawn, a sor nuokus.

20 Are ami apasa ta meita sa pue mownga lawn afusuan lefeng? pue sa sap epue fetoka tu o sap talu ua ar:

21 Iue, Ngang epue tina to ai faiatr uawn ami lawn auownuan lefeng, a epue ua ren lefeng uluat.

22 Pue ami epue fetoka tu lawn aualuan lefeng o ani ua an lom, tawrei atuouan lefeng, tawrei ua a pual mare ta, ami epue ani ua an lom.

23 Ie me ne ko sap mowna la eue fanu failfail la trek, pue eue fanu me nai; o ami au ken re uawn o trawn-siamu mowai.

24 O lawn ami fanu me inisin me ami fanuani ami epue feri ren fanu pue to ngani luini ti.

25 Lupuan puim a uoingau o a mowtren amowna ngan uk an fanu, o auasauas an puin a fai to ren pue a luini ti, a epue luini ti mini puin amowna la.

26 O lupuan eue muan, a sor a trawn-luini ti, o pusin paun a ueri luinin a uenauen;

27 O a pue aleani iir sowni an mowna la, o luini ngani eue muan a mowna ngani i oson trek lusun a nom; pue a to ngani luin la uawn an fanu.

28 Are paun a se kuna luinin trapur pue a se tufit aluin to ren, pusin i metawt a mowna la epue nom le paun eue me angai, tawrei iir an puapua; iue, lawn iir an puapua a epue a la o i a epue luin la uawn fanu an.

29 O lupuan muan aman a mowna la iman lawn

oror an telinim, o lawn eue iir an mowna la inisin a to ngani luini ti; lawn eu iir a to ngani luini ti.

30 Are a sap luini ti lawn fansoun eue iir, eue im a nom lawn telinim, lawn oror, epue naun me amowna to i failfail la trek o naun muramur an; a sap epue pauta la lawn iir an puapua.

31 Ekoe im a nom lukin telinim, a sor oror pueni fetale ir, a epue rekireki ir oson trek malemal an fanu; ra pue to ngani luini ti o ra epue pauta la lawn iir an puapua.

32 O telinim an re Lifai, o im am telinim an ar fanu, re Lifai epue to ngani luini ti failfail la trek.

33 Are aman re Lifai a luini ti, eue im me amowna la o telinim uawn fanu an, epue pauta la iir an puapua; powkitan iman telinim an Lifai me fanu ar, lein naun Israel kana.

34 Eue malemal arep ngani ar telinim a sap epue amowna la; pue fanu ar failfail la trek.

35 Lupuan puim a uoingau o paun a trettep rem, ko pue alisi i oson trek aman re uawn o trian om pue a pue manau rem.

36 Ko sap angai sowni i luinin o mowni; ko pue nueiti om Kot, pue puim a nom rem.

37 Ko sap ngani i om silfer ren luinin, o ko sap ngani i om mownga pue alapa la ren.

38 Ngang me Jioua naumi Kot, me uei ami me ren fanu an Ijip, pue U pue ngani ami fanu an Kenan, pue Ngang epue naumi Kot.

39 Iue, lupuan puim a uoingau rem, o amowna la inisin rem, ko sap feri pue a pue angang ngan uk angang aiingau.

40 O a epue nom rem oson trek trawn-angang ren luinin o trian om, o a epue angang ngan uk tawrei iir an puapua.

41 O fansoun ue a epue angasa la me rem, i me naun kana etei i, o a epue luin la ren ainang an o uawn fanu an saman kana.

42 Pue kei ra nai trawn-angang me Ngang uei sowni fanu an Ijip; ami au sap amowna la ren angangau.

43. Ko sap nauni amanau ; ko pue nueiti Jioua.

44 Iue, au pue amowna to nom trawn-angang muan, o trawn-angang fefin, sowni ainang kana ra nom pueni fetale ami, sowni ir etrek.

45 O pual au pue amowna to sowni naur me nom ngani ami, o re uawn koe etei ami, o sowni muramur ar me etei ami me ken upu tu uawn naumi fanu : ir ra epue naumi kana.

46 O ami epue nauna la ren pusin ami, o ren naumi muramur murin ami ; pue ra pue naumi failfail la trek o ra pue angang ngani ami ; a ami au sap epue nemani pitrakil uawn puim kana aman, aman, naun Israel kana.

47 A lupuan aman re-uawn are aman me nom ngan uk a pisekasek la o puim a ken uoingau ren o a ken amowna la pusin en ren re-uawn are muan me nom ngan uk, are aman naun ainang an uawn,

48 Murin an amowna la a to ngani luini ti ren luinin ; aman lein puin kana a to ngani luini ti i ;

49 Are puin saman, are naun puin saman a epue luini ti i, are aman fitukan sowni an ainang a epue luini ti ; are pusin i a tuft, i epue luini ti pusin i.

50 A epue rekireki ren i amowna to i, sowni iir an amowna la i, tawrei iir an puapua ; o silfer an an amowna la epue oson trek iteit an iir, oson trek ran an a epue angang ngani i.

51 Are lusin iir me trawmowng, oson trek kei a epue luini ngani luinin a luini ti ren, sowni silfer an an amowna to.

52 Are a pual uor iir traw kisakis tawrei iir an puapua, a epue luini ngani i ; a epue aluini ngani luinin a luini ti ren oson trek iteit an iir.

53 I a epue nom ngani i oson trek trawn-angang aman me angai an luinin iteit an iir ; a sap epue nau-niamanau fan masom.

54 Are a sap luini ti ren kei, iue, a epue angasa la lawn ran an puapua ; i me naun kana etei i.

55 Pue naun Israel kana ra ken nai trawn-angang ; me ngang uei sowni fanu an Ijip ; Ngang me Jioua naumi Kot.

## SOPON 26.

**A**MI au sap feri ngani ami ununun anu, o au sap auata remi ira a ruputi o ur an anu, o au sap isa tu uawn fanu ami fau a ruputi ununun anu uawn; pue au pue trape tu mown; pue Ngang me Jioua naumi Kot.

2 Au pue amatru ai ran an fel, o nueiti ai ut-a-fel.

3 Are ami fail fetal lawn ai kapas, o amatru ai amuramur kana, o feria ta ir;

4 Ngang epue ngani ami ut lawn fasoun an, o fanu ami epue mare ta uan, o ira an malemal epue ngani uan.

5 O ami kini an uit epue nom tawrei ami kini an kreip, o ami kini an kreip epue nom tawrei otun fetoka tu, o ami epue ani met naumi mownga, o epue nom uawn naumi fanu sor nuokus.

6 O ngang epue ngani ami kinamue uawn fanu, o ami epue kakawn, a sor aman epue enua, o ngang epue amawra la man ingau sowni eue fanu, o kowtlas a sap epue fai la uawn naumi fanu.

7 O ami epue tapue la me aput ami o ra epue pauti tu ren kowtlas fan mas ami.

8 O lime, le ami, epue tapue la apuku, o apuku, le ami, epue asu la eu kit o me aput ami epue pauti tu ren kowtlas fan mas ami.

9 O Ngang epue tumunu ami, o aupua to ami, o anutra la ami; o anuka tu ai poun remi.

10 O ami epue mownga eue uan lom, a lupuan ua sefa a fai to, eue an lom epue fai la.

11 O ai im-a-fel epue nom le ami o nguni a sap epue aput ami.

12 O Ngang epue fail fetal le ami, o epue naumi Kot o ami epue nai aramas.

13 Ngang me Jioua naumi Kot me uei ami sowni fanu an Ijip, pue au te naur trawn-angang; o apunu ami iok, o alisi ami au pue fail fetal uenanen.

14 Are ami au sap auseling iei, o sap feri kei amuramur me iuisin;

15 Are ami aleasolap aloi o ngunami epue aput ai apungu pue au sap feri ai kapas inisin, o epue ata la ai puon ;

16 Ngang epue feri ngani ami kei: Ngang epue ua to uawn ami nuokus trapur, o kitrutru, o somau puitrikar, o masami epue trun, o ngun ami epue kisakis tu; o ami epue fetoka tu naumi faun sor lomot an o me aput ami epue ani.

17 O Ngang epue sele ngani ami masai, o ami epue ni la fan masan trawn-apat ami; o ir me aput ami ra epue nemani ami; o ami epue su lupuan a sor aman a tapue la ami.

18 Are ami pual sap aleasotrik Ngang powkitan kei, Ngang epue alapa la ai nini ami fan fusu, ren naumi tipis.

19 O Ngang epue punu naumi lamalam tokia ren ami pitrakil; o Ngang epue feri naumi lang oson trek metre aion o naumi fanu oson metre pras;

20 Ami pitrakil epue auesa da a sor lomot an, o naumi fanu sap epue mare ta, o ira an fanu ra sap epue ua.

21 Are ami fail fetal nukumatr ngani iei, o uet ause-ling iei, Ngang epue alapa la ai nini ami fan fusu ren naumi tipis.

22 O Ngang epue tina uawmi man mawtro a epue aniani naumi samireit kana, o tinen feseni naumi man kana, o kisakis tu ami o a sor aramas epue nom uawn naumi al kana.

23 Are ami au sap luin to rei ren kei, o ami epue fail fetal nukumatr;

24 Ngang I puap epue fail fetal nukumatr ngani ami; o Ngang epue uutri ami, euar ngang, fan fusu ren naumi tipis;

25 O Ngang epue ua to uawmi kowtlas an apungu a epue apungu ren puon; o lupuan ami muit fengen lawn ami telinim, Ngang epue tina la somau lein ami o ami epue fang la le peur me aput ami.

26 Lupuan ai punu uawk an ami pret, fefin engawl epue umuni naumi pret lawn ofen eu, o ra epue aluina

la remi ami pret ren atroun; o ami epue mownga au sap epue met.

27 Are ami sap epue auseling iei powkitau kei inisin, o ami epue fail fetal nukumatr ngani iei;

28 Iue Ngang epue fail fetal nukumatr ngani ami ren ai sawng; o Ngang epue apungu ami, atiau Ngang, fan fusu ren ami tipis.

29 O ami epue aniani fitukan naumi muan, o fituk an naumi nengin.

30 O Ngang epue ata la naumi ekis a towkia, o ukifikisi ami ununun anu an akar, o mowna la naumi some uawn naumi ununun koe; o nguni epue aput ami.

31 O Ngang epue uili ti naumi telinim fanu pen, o ami fel an Kot a sor aramas lawn, o Ngang sap epue amasita ami pokus.

32 O atiau Ngang epue uili ti naumi fanu, fanu pen; pue trawn-aput ami ra nom uawn, ra epue ueitifengeni,

33 O Ngang epue atawropasa la ami lein trawn-rotopuak, o uasi kowtlas murin ami; o naumi fanu epue pen, o naumi telinim epue fanu pen.

34 Iue, eue fanu epue meseik ren an sapat lupuan fanu a nom pen, o ami epue nom uawn fanu ar me aput ami; iue, eue fanu epue asese, o meseik ren an sapat;

35 A epue asese lupuan a nom pen; euar fasoun a sap asese lawn naumi sapat lupuan ami nom uawn.

36 O lusin lein ami, Ngang epue ngani ir leluakar a nuokus uawn fanu an trawn-aput ir; o ngungun tren ira a mor tu epue asu la ir; o ir ra epue su sowni i, oson trek sowni afawt kowtlas; o ra epue paute tu lupuan a sor tapue la ir.

37 Aman epue likatutum uawn aman oson trek ar su fan mas an kowtlas, o a sor a tapue la ir; o a sor naumi pitrakil pue ami u ta mown trawn-aput ami.

38 O ami epue fai la lein trawn-rotopuak, o fanu an trawn-aput ami epue ani ami;

39 Lusir, le ami, epue kisakis tu lawn ar tipis uawn fanu an trawn-aput ir; atiau ra pue pual kisakis tu lawn tipis an samar:

40 Iue, ra epue puara ta ar tipis o tipis an samar ren ar atupu, me ra atupu Ngang ren, o ar fail fetal nukumatr ngani iei.

41 Ngang I pual fail fetal nukumatr ngani ir o tina la ir uawn fanu an trawn-aput ir; iue, lelukar a sap sirkomsais, epue lamalam la, o ra epue luini ti ar tipis.

42 Iue Ngang epue puap tretremani ai puon ren Jepkop, o pual ai puon ren Aisak, o pual ai puon ren Epream, o Ngang epue tretremani eue fanu:

43 Eue fanu a paut sowni ir o meseik ren an sapat kana lupuan a pen, o ra epue luini ti ar tipis; powkitan, euar powkitan ra ken turunufasi ai kapas o ngunir ra aput aloi;

44 Iue powkitan kei inisin: lupuan ar nom uawn fanu an trawn-aput ir, Ngang sap epue pauta la ir o sap epue aput ir pue U pue fawkun ata la ir o kusua la ai puon rer; pue Ngang me Jioua naur Kot.

45 O Ngang epue tretremani ai puon an samar powkitan ir, lupuan ai uei ir sowni fanu an Ijip fan masan trawn-rotopuak, pue U pue naur Kot: Ngang me Jioua.

46 Ikei me kapas, amuramur kana o apungu kana me Jioua a ngani lefinan I o naun Israel kana, uawn trukatrakta Sainai ren paun Moses.

### SOPON 27.

**I**UE, Jioua a kapas ngani Moses, apasa,  
2 Ko pue arani naun Israel o kapas ngani ir, Lupuan muan aman a epue apuanua ta eu akapel, ekoe aramas ra epue naun Jioua oson trek om rekireki.

3 O om rekireki luinin aman atamuan, manau an me sowni iir rue tawrei iir uowne; euar, om rekireki epue silfer sekel lime, oson trek sekel an ut-a-fel.

4 Are me fefin aman, om rekireki epue sekel ilik.

5 Are me manau an sowni iir limou tawrei etrek iir rue; iue, om rekireki epue sekel rue ren atamuan o sekel engawl ren niafeffin.

6 Are me manau an sowni maram eu tawrei etrek iir limou; iue, om rekireki epue silfer sekel limou ren



atamuan o om rekireki ren niafefin epue silfer sekel uluat.

7 Are manau an epue iir uowne soma ; iue, om reki-reki epue sekel engawl me limou ren atamuan, o sekel engawl ren niafefin.

8 Are i me uoingau o an moni kisakis fan om reki-reki luinin, iue epue isa tu i fan masan eue prist o eue prist epue rekireki luinin ; oson trek i me akapel a tufit, eue prist epue rekireki luinin an.

9 Are i me man aman sawkun aniafitr me aramas ra fang ngani Jioua, me inisin me aramas aman a ngani Jioua epue fel.

10 I a sap epue feri i awt sawkun are siuili i—aman me murinna ren aman me ingau, aman m'ingau ren aman me murinna ; are i a ken siuili eue man, i o pual eue man me a ken angai lupuan an siuili, ir me ruoman, ra epue fel.

11 Are i me man sawkun aniaput me aramas ra sap fang ngani Jioua, iue, a epue isa tu man ue fan masan eue prist ;

12 O eue prist epue rekireki luinin i are me murinna are m'ingau : oson trek en, eue prist, a rekireki luinin, iei etrek luinin.

13 Are i mowtren luini ti i a epue trianan ngani luinin, me om rekireki, uis eu lein uis limou an.

14 Lupuan aman a feleni an im pue epue fel ren Jioua, iue, eue prist epue rekireki luinin are me murinna are m'ingau ; oson trek eue prist a rekireki luinin, iei trek luinin :

15 Are i me feleni i, a mowtren luini ti an im, iue, a epue trianan ngani luinin, me om rekireki, uis eu lein uis limou an, o i epue an.

16 Lupuan aman a epue feleni ngani Jioua uis an malemal an naun fanu, iue, om rekireki luinin epue oson trek me fetoka tu i ; luinin eu omer parli me fetoka tu epue silfer sekel lime.

17 Are i a feleni an malemal sowni iir an puapua, i epue nukutrar oson trek om rekireki.

18 O are a ken feleni an malemal murin. . . an pua-

pua, iue, eue prist epue rekireki an moni oson trek iir me nom tawrei pual eu iir an puapua, o a epue kisakis tu luinin an om rekireki.

19 Are i me ken feleni malemal, a enlet mowtren luini ti, a epue puap trianan ngani uis eu lein uis limou an moni me om rekireki, o atiau epue an.

20 Are a sap mowtren luini ti eue malemal, o are a ken amowna la ren aman eue malemal, a sap epue luini ti failfail la trek :

21 O eue malemal, lupuan a angasa la lawn iir an puapua, epue fel ren Jioua, oson trek eu malemal me feleni ; o eue fanu epue an eue prist.

22 Are a ken feleni ren Jioua eu malemal me a ken amowna to me sap malemal an fanu an ;

23 Iue, eue prist epue rekireki an luinin me om reki-reki tawrei iir an puapua : o i a epue ngani luinin om rekireki lawn ran ue, oson trek awt metawtr a fel ngani Jioua.

24 Lawn ran an puapua, eue malemal epue luin to ren muan ue me ken amowna la i, euar ren i me naun uis an eue fanu.

25 Om rekireki me inisin epue oson trek sekel an ut-a-fel: kira rue epue sekel eu.

26 Mown naunau lein man kana, me le popun naun ren Jioua, a sor aman epue feleni i : are kau are sip : i me an Jioua.

27 Are me aman man aniaput, i a epue luini ti oson trek om rekireki luinin, o pual trianan ngani uis eu lein uis limou ; are a sap luini ti, i a puap epue amowna la oson trek om rekireki luinin.

28 Iue, au sap epue amowna la are luini ti awt metawt a fel, are muan are man, me aman a feleni ren Jioua sowni an pisek inisin ; awt metawt me inisin a feleni, me fel trapur ren Jioua.

29 Au sap epue luini ti awt metawt a fel me aman a feleni ; au pue atiau ni la i.

30 O uisafel inisin an fanu, are sowni faun eue fanu are sowni ua an ira, i me an Jioua : i me fel ren Jioua.

31 Are aman a mowtren luini ti awt sowni an uisafel, i a epue trianan ngani uis eu lein uis limou.

32 O uisafel inisin an puin kau, are puin sip, me inisin me fai la fan uawk, aman lein engawl epue fel ren Jioua.

33 I a sap epue kitta are me murinna are m'ingau, o a sap epue siuli; are a atiau siuli i, iue, i o pual eue me a angai lupuan a siuli, ir me ruoman ra epue fel: au sap epue luini ti.

34 Ikei me ekoe amuramur, me Jioua a ken kapas ngani Moses uawn truk Sainai ren naun Israel kana.

# PUK AN RUT.

## SOPON 1.

**A** PUANUA ta lawn ran an ekoe trawn-apung ra apungu, lupuan a leng ta uawn eue fanu, aman muan re Pet-liem-juta, a fai la siamu uawn fanu an Moap; i me puiluan o naun muan me ruoman.

2 Itan eue muan Ilimilek, o itan puiluan Neomi, o itan naun ruoman at Malon o Kilion, re Efrat an Pet-liem-juta; o ir ra etto uawn fanu an Moap o nonom trek ie.

3 O Ilimilek, puiluan Neomi, a me la o i nonom alaman etrek, o an ruoman at.

4 O ir ra angai puiluar, finen Moap; itan aman Orpa o itan pual aman Rut; o ir ra nom fengen ie arep iir engawl.

5 O Malon me Kilion ra me la, ir me ruoman; o eue fefin a nom a sor naun ruoman at, a sor puiluan.

6 Iue, a u te etei koe puiluan naun atamuan pue a pue luin ue sowni fanu an Moap; pue a ken rong uawn fanu an Moap, ifa oson Jioua a fai la ren naun aramas, ngani ir mownga.

7 I a fai sowni ekis a nonom ie, o ruoman puiluan naun atamuan ra fitei; o ir ra fai la, fai la uawn al an ar luin la fanu an Juta.

8 Iue, Neomi a kapas ngani naun ruoman puiluan at koe: Ami au fai la, aman, aman, luin ue ren iman inan; Jioua a kiasaso ngani ami oson ue trek ami au ken kiasaso ngani ir ra mela, o ngang.

9 Jioua a feri pue ami au pue ueri kinamue, aman, aman, lawn iman puiluan. O ir ra ngira ta mangungu o ketru.

10 O ir ra kapas ngani i, Apui, sa pue et uk fai la ren nom aramas.

11 Neomi a apasa: Luin ue, nai nengin; renmet ami etei iei la? A uor rei pual at koe lelukai ra pue puiluami?

12 Luin sefal, nai nengin, fai la uawn al ami, pue ngang i niamuk, soto puiluai. Are ngang apasa a uor ai apalikalik murinna, eli epue puiluai lepuin ei; o pual naunau la atamuan kana;

13 Ie me ami epue uitait ar lapalap la? Ami epue nom sowni apupuiluani ami muan? Apui nai nengin, pue lelukai a fawkun trou powkitan ami, pue an Jioua paun a aiti la, ariafau ngang.

14 O ir ra ngira ta mangungu o pual ketru: o Orpa a ken metiri inan puiluan o Rut a apatr ngani i.

15 O a apasa, Na ngani! puim a luin ue ren naun aramas o naun anu; ko pue luin la murin puim.

16 Iue, Rut apasa, Ko sap tungor rei U pue pauta la en, o luin sowni ai fit uk; pue ia om fai la ie, ngang epue fai la; o ia om nonom ie, ngang epue nonom trek; nom aramas epue nai aramas, nom Kot epue nai Kot;

17 Ekis om me la ie ngang epue mela uawn o epue ireir la ie; Jioua a pue feri ngani iei onson trek o pual awt, are awt metawt, me la etrek, epue aimu feseni en me ngang.

18 Lupuan a kuna lelukan a atrotro etei i, a nom sowni an kapas ngani i.

19 Iue, ir me ruoman ra fai la, fai la, tawra la Pet-liem. O a puanua ta lupuan ar etta la Pet-liem, telinim inisin a mowkit powkitan ir. Nemin koe apasa, I me Neomi?

20 O i a kapas ngani ir, Ami au sap aitan ngani iei Neomi, au aitan ngani iei Mara; pue I Me Manaman Mown Inisin a ken feri pitrakil trapur ngani iei.

21 Ngang i fai la masoan, a Jioua a ken aluin to ngang pen, pual lawn imai; puemeita ami aitan ngani iei Neomi lupuan Jioua a afaiingau iei o I Me Manaman Mown Inisin a ken ariafau ngang?

22 Iei onson Neomi a luin to, o Rut finen Moap,

puiluan naun, me luin sowni fanu an Moap, a etei i ;  
o ir ra fai la Pet-liem, fansoun kinikini parli.

## SOPON 2.

**A** UOR puin puiluan Neomi aman muan lapalap  
a pisekasek, an Ilimilek traw; o itan Poas.

2 O Rut, re Moap, a kapas ngani Neomi, Ko se  
mowtren ngang pue fai la le malemal o rusi fengeni  
lein pinukin koe, murin i me ngang epue kuna ai tren  
ren? O a kapas ngani i, Fai la nai nengin.

3 I a fai la, o et to, o rusi fengeni lawn malemal  
murin ekoe trawn-rei. O an feri a etto lawn sopon  
malemal naun Poas, me an Ilimilek traw.

4 Iue, na ngani, Poas a fai sowni Pet-liem o kapung  
ngani trawn-rei: Jioua pue etei ami. O ir ra paluani:  
Jioua pue afaiatru en.

5 Iue, Poas a kapas ngani naun trawn-angang, me  
souani pue a pue nemani ekoe trawn-rei: Naun ia  
fapuil ei?

6 O eue trawn-angang me seika ta a nemani trawn-  
rei a paluani, apasa: I me fapuil an Moap a luin to  
etei Neomi sowni fanu an Moap.

7 O a ken apasa: Mout ngani ai pue rusi fengeni,  
ngang tungor uk o iown fengeni murin trawn-rei kana  
lein pinukin koe: iue a ken etto o a ken nonom sowni  
lesor tawrei ikanei, fansoun kisakis etrek a nom le im.

8 Iue, Poas a kapas ngani Rut, Ko se rong, nai  
nengin? Ko sap fai la rusi fengeni lawn eu malemal,  
are su sowni iei; Ko nom ngani nai trawn-angang  
nengin koe.

9 Masom koe ra pue na ngani me ra ken rei, ko  
pue fai la murir; ngang I sap fanau alual koe ra te  
suku en? Lupuan ko ken ka, ko pue fai la ren ekoe  
per o unimi me alual koe ra ken ufi.

10 I a ken trape tu uawn masan o pung tu le puun,  
o kapas ngani i, Renmet ngang ueri ai tren me rem  
pue en lowlilin ngang re uawn aman?

11 O Poas a paluani o kapas ngani i, Me fawkun  
puar ngani iei me inisin om feri ngani inan puiluom

murin puiluum a mela; o oson en likita 'Ja samom o inom, o poputan fanu om o en fai to ren aramas me en sisilei lom.

12 Jioua pue setritri om fefer, o epue ngan uk luinin an Jioua, Kot an Israel, me en fai to ko pue nom kinamue fan paun koe.

13 Iue, nemin apasa; Ngang pue ueri ai tren me rem, nai samol; pue en atripa ngang ren om kapas ngani lukan nom trawn-angang o ngang sap aman nom trawn-angang fefin.

14 Iue, fansoun ar mownga, Poas a kapas ngani i, Fai to ikei ani pret o etifa tu om mownga lawn finekar. O nemin a mawt tu le palian trawn-rei kana o ra aiti la ren, korn a kapuot, o i a mownga mat o a uku tu.

15 Lupuan nemin a u te pue a pue rusi fengeni, Poas a fanau naun alual apasa: Au mout ngani i a pue rusi fengeni pual lein pinukin koe; au sap apungu.

16 O pual ui sowni pinukin koe ekawt, o likita la, o mout ngani i rusi fengeni; au sap apungu.

17 Iue a ken rusi fengeni tawrei lekuniol; o a ken uitri sowni faun mini a ken rusi fengeni o a uor arep ngani eu efa an faun parli.

18 O a ken puisa ta o fai la lawn telinim o inan puiluan a kawton mini a rusi fengeni o nemin a ua to fang ngani i lusin an, murin a ken mat.

19 Iue, inan puiluan a kapas ngani i, Ia en rusi fengeni ikanei o ia en angang ief? Me faiatr i me ken lowlilin en. O nemin a puar ngani inan puiluan ia a ken angang ren o apasa, Itan eue muan me ngang angang ren ikanei me Poas.

20 O Neomi a kapas ngani puiluan naun, Jioua pue afaiatru i me sa uk sowni an kirakiratr ngani me manau o me mela. O Neomi a kapas ngani i, Eue muan me aman am traw, me to ngani luini ti ren kitr.

21 O Rut eue re Moap apasa, Euar, i a kapas ngani iei, Ko pue nom ren nai alual tawrei ar auasa la ai kini inisin.

22 O Neomi a kapas ngani Rut, puiluan naun, Me

etipuar, nai nengin, ko pue fitei naun nengin kana, o ra sap truri en lawn eu malemal.

23 Iue nemin a nom ren naun Poas nengin koe pue a rusi fengeni tawrei auasa la kini an parli o kini an uit, o a ken nom ren inan puiluan.

## SOPON 3.

**O** NEOMI, inan puiluan a kapas ngani i, Nai nengin, ngang sap epue kitta kinamue rem, pue epue etipuar rem?

2 O Poas, aman am traw a se nom? me en angang ren naun nengin? Na ngani a ken saipa parli lepuin ei uawn lenian uitri sowni faun.

3 Ie me ko pue tutu o trelifi pusin en, o fai tu ren lenian uitri sowni faun, a ko sap puar ngani i pusin en, a puap auasa la an mownga o unimi.

4 O epue feri lupuan an kawm la, ko pue na ngani ekis a ken kawm ie, o ko pue fai lawn, a uai sowni pitran, kusan o kawm la, o i a epue kapas ngan uk mini o pue feri.

5 O nemin a kapas ngani i, Ngang epue feri me inisin om apasa ta.

6 O a fai tu ren lenian uitri sowni faun o feria ta me inisin inan puiluan a fanau i.

7 Poas a ken mownga o unimi, o lukan a puapua, a puap fai la kawm la lesopon an ioian an parli, o nemin a anifa to, uai sowni kusan pitran o kakawm la.

8 Iue a puanua ta lukan a puin eue muan a nueiti o sukupan, o na ngani! aman fefin a kakawm ren pitran.

9 O a apasa, En ia? o nemin a paluani, Ngang Rut, nom trawn-angang. Ko pue enena la kusom uawn nom trawn-angang; pue en aman am traw.

10 O a apasa, Faiatr an Jioua pue nom uawm nai nengin; om kirakiratr a trapur le sopon an mown le popun, pue en sap fai la murin alual kana are uoingau are pisekasek.

11 Iue, nai nengin, ko sap nuokus, ngang epue feri ngan uk me inisin om apasa ta, pue telinim inisin nai aramas ra silei en aman fefin murinna.



13 Iue Poas angai Rut i me puiluan o a ken etto ren, o Jioua a apuopuo i, o a ken naunau la aman muan.

14 O fefin koe ra kapas ngani Neomi, Me faiatr Jioua, me sap likita la en, a sor nom; o itan epue fau la lawn Israel.

15 O I a epue apuanua ta manau om o tumunu en lupuan om reikoe, pue puiluan nom, me ken tong uk, me ken murinna sowni at engawl, i a ken naunau la i.

16 O Neomi a ken angai ene menkol, o tainawla i o me an trawn-tumun.

17 O koe fefin ra nom unukun, ra ken itani i, apasa ta, A uor ren Neomi aman atamuan; o ra ken aitan ngani i Opet, i me saman Jesi, saman Tefit.

18 Iue, kei me tuelikin Peres: Peres naunau ta Eron;

19 O Eron naunau ta Ram, o Ram naunau ta Aminatap.

20 O Aminatap naunau ta Nason, o Nason naunau ta Salmon;

21 O Salmon naunau ta Poas, o Poas naunau ta Opet;

22 O Opet naunau ta Jesi, o Jesi naunau ta Tefit.

# PUK AN ESTER.

---

## SOPON 1.

**A** PUANUA ta lawn ran an Aasueros, (i me eue Aasueros me oleni sowni Intia, atiau tawrei Itiopia, uawn apuku rue me fusu eif an fanu:)

2 Lawn koe ran an, lupuan eue king a mawmawt uawn lenian mawt an meun me lawn Susan, lawn eue im etipuar,

3 I a feri eu fetelalap, lawn auluat an iir an naun oleni, ren naun samol o ren naun trawn-angang; nemani an Persia me Mitia, aramas lapalap o samol an eif an fanu kana ir ra nom fan mas an;

4 Eue fansoun a puara ta pisek an meun a lingowtr o autrei an angawlangawl an trapur, ran trawmowng, euar apuku me ualik ran.

5 Iue, ekoe ran ra auesa la, eue king a fetelapa la aramas inisin me nonom lawn eue im lapalap lawn Susan, ir me lapalap o pual me kiskakis, ran fusu, lawn rawng an ira murinna, an im etipuar an eue king;

6 Me aitua tu mangaku powtr, o arauarau trapur, o arauarau, me ken ri ngani nenikawru an silfer o ur an marpel, ren sal an mangaku etipuar me parapar a trawtrawl ekis: naur paw ra feri ren kol me silfer, ra nom uawn set saran me parapar, o powtrapowtr, o aramaram o marpel a trawl.

7 O ra aun ngani ir sowni sepei an kol, (ekoe sepei ra sap nene trek pue eu sepei a ken awt sawkun sowni eu,) o me uor uain an king trawmowng, nenen an king sorasoratr.

8 O ra ken unimi oson ue trek naur angang; a sor aman ariani; pue eue king a ken kapas ngani naun souan kana an naun im, iei etrek, pue aramas inisin ra pue feri pusin leluk ar.

9 Fasti, eue kuin, a pual feri fetelalap ren fefn kana lawn im etipuar me naun Aasueros.

10 Lawn afusuan ran, lupuan leluk an eue king a puapua ren uain, a ken kapas ngani Meuman, Pista, Arpona, Pikta, o Apakta, Sitar me Karkas, ir me fuman trawn-souani an ueip, me ken angang fan mas an Aasueros eue king, apasa,

11 Ra pue ua to Fasti eue kuin, ren eue king, etei muaran king, pue puar ngani aramas o samol kana an owtr, pue i me liowtr pue nana ngani uawn.

12 Iue, Fasti a uet fai to oson trek kapas an eue king ren ekoe trawn-souani an ueip; ie me eue king a sawng trapur o an sawng a keni leluk an.

13 O a ken kapas ngani ekoe aramas tipatrem me ken silei fansoun, (pue iei me angang an eue king ren ir inisin me silei amuramur o apung;

14 O arep ngani i me Karsina, Sitar, Atmata, Tarsis, Miris, Marsina, Memukan, fuman samol an Persia me Mitia, me fawkun nana ngani uawn mas an eue king, o me seika ta pue ra pue lapalap lawn meun:)

15 Meita kitr sa epue feri ren eue kuin Fasti nenen amuramuran, powkitan a sap feri oson trek kapas an eue king ren ekoe trawn-souani an ueip?

16 O Memukan a paluani mown eue king o ekoe samol, Fasti eue kuin a sap feri ingau ngani eue king etrek, a pual ngani samol inisin o aramas inisin me ken nom uawn eif an fanu inisin, naun eue king Aasueros.

17 Pue feri an kuin epue asilei faili ren fefn inisin, pue puiluar epue turunufasi fan mas ar, lupuan ra epue apasa, Eue king Aasueros a fanau Fasti eue kuin a pue ua to fan mas an, o i a sap fai to.

18 O lawn ran ei, koe samol finan Persia me Mitia me ken rong feri an eue kuin, epue kapas ngani samol an king inisin oson ue trek; iue epue puanua ta turunufasi trapur o sawng.

19 Are eue king a afitr, epue fai sowni i eu amuramur an king o epue make tu lein amuramur an re Persia me re Mitia pue a soto ngani siulli, pue Fasti a sap pual fai to fan mas an eue king Aasueros; o

eue king a pue fang ngani ren aman me murinna sowni i, an pisek o lingowtr me naun eue king.

20 Iue, lupuan amuramuran eue king me a epue feri, a asilei faili uawn meun inisin, (pue me lapalap,) puiluan muan inisin epue lowlilin trawnimar, ir me lapalap o ir me kisakis.

21 O eue king o samol kana ra afitr kei kapas; o eue king a feri nene trek kapas an Memukan:

22 Pue a ken tina la tawropue uawn eif an fanu an king inisin, uawn eif inisin oson trek ar mak, o ren aramas inisin sawkun naur kapas, pue muan inisin a epue nemani lawn im an o epue asilei faili i nenen kapas an naun aramas.

## SOPON 2.

**M**MURIN kei, lupuan sawng an eue king Aasueros a mawra la, i a tretremani Fasti o an feri o mini a ken amuramur ngani i.

2 Iue, trawn-souan eue king me ken angang ngani i, ra kapas ngani i, Fapuul owtr me iir traw kisakis ra pue kitta ren king:

3 O eue king a epue sineli trawn-souan uawn eif an fanu an king inisin, pue ra pue amuit fengeni fapuul owtr me iir traw kisakis me inisin ren Susan, eue im etipuar, ren im an fefu, ren tumunu an Eikai, naun king trawn-souani an ueip, me ken tumunu fefin kana; o ra pue ngani ir pisek pue ra pue alimowtr pusin ir ren:

4 O eue fapuul me king a afitr a epue kuin, siuili Fasti. O eue king a afitr me; o a ken feri oson ue trek.

5 A nom aman re Juta lawn Susan eue im etipuar, itan Mortikai, naun Sair, naun Simai, naun Kis, re Penjamin aman;

6 I a ken uai sowni me ren Jerusalem etie ekoe trawntur, me ra ken ua la etei Sekonaia king an Juta, me Nepukatnesar, king an Papilon, a ken ua la.

7 O i a ken tumunu Atasa, iei me Ester, naun puin saman nengin: pue a sor saman o inan; o eue fapuul

a liowtr o etipuar; o otun saman o inan ra me la, Mortikai a ken nauna la i ren pusin an nengin.

8 Iue a puanua ta lupuan alon eue king o an amur-amur me rongarong, o fapuul trawmowng ra ken amuit fengeni ren Susan eue im etipuar, ren tumunu an Eikai, Ester me ua lawng lawn im an king, ren tumunu an Eikai, me trawn-tumunu an fefin.

9 O a ken sani i, o nemin a kuna an tren me ren; O i a muitir fang ngani i an pisek an alimowtr etei uisan kana o fuman fapuul me owtr, ra pue ngani i, me ren im an eue king; o i a ua la i me naun fapuul, ren ekis me etipuar mown me inisin lawn iman fefin.

10 Ester a sap puara ta an aramas o an traw; pue Mortikai a ken fanau i pue a sap puara ta.

11 O Mortikai a ken fetal fail ran inisin, asengan rawng an iman fefin pue a pue silei meita me ren Ester o meita epue feri ren.

12 Iue, lupuan a tawrei otun ekoe fapuul me inisin ra epue fai lawng lawn ren eue king Aasueros, murin ra ken auas ar feri ngani ir oson trek angang an fefin, me engawl me ruo maram, (pue ien oson auasa la ran an alimowtr la: uonu maram ren le an mowr, o uonou maram ren pokus o etei mini koe me alimowtr la fefin ren,)

13 Iei me angang an fapuul me fai la ren king, metawt me inisin a mowtren ra ngani i pue etei i fai sowni eue iman fefin lawn eue iman king.

14 Lekuniol a fai la o lesor a luin to ren pual eu iman fefin, fan tumunu an Saaskas, naun king eue trawn-souani an ueip, me ken tumunu konkupain kana; o i a sap pual fai la ren eue king are eue king a sap afitr i o kera to i ren itan.

15 A puap tarei fansoun me Ester, naun Apiaail puin saman Mortikai me nauni i ren an nengin, i a epue fai lawng lawn ren eue king, i a samo ais awt metawt, iei etrek me Eikai, trawn-souani an ueip an eue king, trawn-tumunu an fefin, a ken asina ta; O Ester a ueri an tren me ren me inisin me nana ngani i.

16 Iue, Ester a ken ua la ren king Aasueros lawn an

im etipuar, lawn maram engawl, a itan Tipit, lawn afusuan irr an oleni an.

17 O eue king a ken tongei Ester sowni fefin inisin, o i a ken ueri sorasoratr o an tren me ren, trapur sowni ekoe fapuul inisin; ie me eue king a ken isa te muaran, sawkun an king, uawn makeran, o seika ta i kuin, siuili Fasti.

18 Iue, eue king a ken feri fetelalap trapur ren naun samol o naun trawn-angang inisin, euar, eu fetelalap an Ester; o a ken kisaso ngani eif an fanu inisin o tina la fangan kana, nenen an king sorasoratr.

19 O lupuan ekoe fapuul ra ken amuit fengen fan ruo, Mortikai a puap mawt tu lawn asam an king.

20 Ester a sap puara ta an traw are an aramas; oson ue trek Mortikai a ken fanau i; pue Ester a ken seilingatrotis alon Mortikai, oson ue trek a ken feri lupuan i a tumunu.

21 Lawn koe ranan, lupuan Mortikai a mawmawt lawn asam an eue king, ruoman naun king trawn-souani an ueip, Piktan me Tires, ir me ruoman ra sawng, o ra ken atrutru faili Aasueros eue king pue ra pue pung tu paur uawn.

22 O Mortikai a ken silei ar fefer, o a puar ngani Ester eue kuin; o Ester a ken arani eue king fan itan Mortikai.

23 O lupuan ra ais fitri oson me o silei me enlet, ra ken fawrosa la uawn ira, ir me ruoman, o make tu kei lawn puk an mak an eue king.

### SOPON 3.

**M**URIN kei, Aasueros king a ken apuanua ta Eiman naun Amitata re Akak aman, o seika ta i o atowkia ta an lenian mawt mown ekoe samol inisin me nom ren.

2 O naun king ekoe trawn-angang inisin, me ken nonom lawn asam an eue king, ra ken trape tu o fel ngani Eiman; pue eue king a ken fanau ir ra pue feri iei oson. O Mortikai a sap trape tu o fel ngani.

3 Iue, ekoe trawn-angang an king me ken nonom lawn asam an king, ir ra kapas ngani Mortikai, Puemeita en aleasolapa alon king?

4 Iue a puap feri, lupuan ar kapas ngani i ran inisin o i a sap rongarong ir, ra ken arani Eiman pue ra pue ueri are an Mortikai kapas epue enlet are sap pue i a kapas ngani ir me i me Jus aman.

5 Lupuan Eiman a kuna me Mortikai a sap trape tu are fel ngani Eiman a puap ur an sawng.

6 I a ken aput liape to Mortikai etrek; pue ra ken puar ngani i an Mortikai aramas: ie me Eiman a mowtren kitere la Jus inisin me ken nom ngani meun Aasueros inisin; euar, aramas an Mortikai.

7 Lawn maram eu, me maram Nisan, lawn engawl me ruo an iir an king Aasueros, ra ken feri Pur, iei me asisinin fengen pue an ia, fan mas an Eiman ran inisin o maram inisin, tawrei maram engawl me ruo an, me maram Eitar.

8 O Eiman a kapas ngani eue king, A uor eu aramas me ken nom ngani o tawropasa la uawn eif an fanu inisin an meum; o ar angang me awt sawkun sowni aramas inisin; o ir ra sap aniatrotis alon king: ie mine a sap murinna ren king a pue mout ngani ir ra nonom trek.

9 Are king a afitr, a pue make tu ra pue kitere la: o ngang epue fang ngani ir me ken souani angang an king, silfer talent eu kit, pue ra pue ua lawng lawn im an isaïs an king.

10 O eue king a ken puini ti an lele me ren uawn paun, o fang ngani Eiman, naun Amitata re Akak, trawn-apat an Jus.

11 O eue king a kapas ngani Eiman, apasa, Silfer me fang ngan uk o pual aramas, pue ko pue feri ngani ir oson leluk om etrek.

12 Iue, ra ken kera to naun king ekoe trawn-mak le popun maram, lawn ran engawl me uluat an, o ra ken make tu me inisin me Eiman a fanau trawn-oleni an king, o trawn-nemani an eif an fanu inisin, o samol an aramas inisin, ren eif an fanu inisin nene trek

mak an, o ren aramas inisin nenen ar kapas; me make tu fanasingowkin it an king Aasueros o asina ta ren lele an king.

13 O ra ken tina la tawropue ren trawn-tine, uawn eif an fanu an king inisin, pue kitere la, o ni la, o ata la Jus inisin, me alual kana o pual me muk la, samireit kana me fefin kana, lawn eu ran, euar lawn ran engawl me uluat an maram engawl me ruo, me maram Eitar, o asarakunu ir ren liap an.

14 Eu tawropue an iei mak, me fang ue uawn eif an fanu inisin ren amuramur an, me asilei faili ren aramas inisin pue ra pue amowla ta ren eue ran.

15 Ekoe trawn-tine ra failakai ue ren alon king, o eue amuramur a puepue la lawn Susan, im etipuar: O eue king me Eiman ra mawmawt ra pue unimi: a telinim an Susan a apinkuueiuei.

## SOPON 4.

**I**UE, Mortikai a silei me inisin a feri, a puap teringei an mangaku o faute ngani an mangaku an ngungures me falang, o fai la lawn eue telinim o ketru, o mangungu leuamowng, o putrer;

2 O a etto asengan asaman eue king: pue a sor aman a tufit to lawng lawn asaman king lupuan a faute ngani mangaku an ngungures.

3 O ekoe Jus ra ken trou trapur lelukar, o pin mownga, o ketru o muti, uawn eif an fanu inisin, ikue inisin me kapas an king o amuramur an asilei faili uawn; o ir me trawmowng ra ken iuel la uawn mangaku an ngungures o falang.

4 O naun Ester ekoe fapuul, o naun trawn-souani an ueip, ra fai to arani i; o eue kuin a trou lelukan trapur; o a tina la mangaku ren Mortikai pue a pue faute ngani o puini ti an mangaku an ngungures; o i a uet a pue angai.

5 Iue, Ester a ken kera to Atak, aman lein an king trawn-souani an ueip, me seika ta pue a pue tumunu i, o fanau i a pue fai la ren Mortikai, pue a pue silei meita me ren, o puemeita a feri.



6 Atak a puap to ue ren Mortikai uawn masias a tremowng lawn telinim, asengan asaman king.

7 O Mortikai a fawse te me inisin me feri ren o fitu moni Eiman apasa ta a epue ua la lawn im an isais an king, luinin ekoe Jus pue a pue kitere la ir.

8 I a pual fang ngani i eue tawropue an mak an amuramur an, me ken asilei faili uawn Susan pue kitere la ir, pue a pue puar ngani Ester o kapas ngani i; o fanau i a pue fai la ren king pue tungo-rai ren naun aramas.

9 O Atak a fai la arani Ester kapas an Mortikai.

10 Eue, Ester a kapas ngani Atak mini a pue arani Mortikai: Apasa,

11 Naun king trawn-angang inisin, o aramas uawn eif an fanu an king, ir ra silei, me inisin are muan are fefin, me fai lawng eue rawng lawn, are a sap kera to, angang eu etrek ren; i a epue ni la, are eue king a sap aiti la ren, uawk an kol pue a epue manau; a ngang I sap kera to pue U pue fai lawng ren king lawn kei ran an elik me uluat.

12 Ir ra puar ngani Mortikai an Ester kapas.

13 Iue, Mortikai a kapas ngani ir ra pue paluani Ester, Ko sap rekireki lelukom me en epue ngas la lawn im an king o me en sap oson trek Jus inisin.

14 Are en fawkun nauenauen la lawn fansoun ei, amanau o angasa la an Jus epue puap pue ta ekis eu, o en me im an samom, ra epue me la: o ia silei? a sap en seika ta lawn meun powkitan fansoun ei etrek?

15 Iue, Ester a fanau ir ra pue paluani Mortikai,

16 Ami au fai la amuit fengeni Jus inisin me nom ngani Susan, o ami au pin mownga ren ngang, o au sap aniani are unimi ran uluat, le ran o lepuin; ngang o pual nai fapuil, kitr sa epue pin mownga oson ue trek; o ngang puap epue fai lawng ren king me sap osou trek angang an: are ngang epue me la, ngang puap epue me la.

17 Mortikai a fai la, o i a feri oson ue trek kapas an Ester me inisin.

## SOPON 5.

**I**UE a puap feri lawn auluat an ran, Ester a faute ngani an mangaku sawkun an king o a u ta lawn rawng an im an king, asengan im an king: o king ue a mawmawt uawn lenian mawt an king lawn iman king.

2 O a puanua ta, lupuan king ue a na ngani Ester eue kuin, me u te lawn rawng ue, nemin a ueri an tren me ren; o eue king a aiti la ren Ester eue uawk an kol a nom lawn paun, o Ester a kin to atowpa le spon ene uawk.

3 O eue king a kapas ngani Ester, Meita ko mowtren, Ester kuin? o meita en tungor? epue ngan uk are esop an meun.

4 O Ester apasa, Are king a afitr, ngang I mowtren king me Eiman, ra pue et to ikanei ren aulau me ngang amowla ta ren.

5 Eue king a puap apasa, o arani Eiman a pue muitir, pue epue feri oson ue trek kapas an Ester. Iue king me Eiman ra etta la ren aulau me Ester a amowla ta.

6 O eue king a kapas ngani Ester lupuan eue aulau an uain, Meita ko mowtren? o epue ngan uk; o meita en tungor? atiau epue puanua ta are esop an meun.

7 Iue, Ester a paluani o apasa ta, Ngang I mowtren o ngang tungor;

8 Are ngani I ueri ai tren fan masan eue king, o are king a afitr auseling ai tungor, o apuanua ta lelukai, king me Eiman ra pue etto pual eu aulau me ngang epue amowla ta rer, o lao ngang epue feri oson trek kapas an king.

9 Eiman a to ue ran ue, i a puapua o meseik lelukan: o lupuan a kuna Mortikai lawn asam an king me a sap u te are tretretr mown, i a ur an sawng ngani Mortikai.

10 Iue, i a atrotro amatru pusin lelukan o fai la lawn an im. O a tina la aselpa to trian kana o Sires puiluan.

11 O Eiman a ura ngani ir lingowtr an naun pisek, o me trawmowng an samireit, o me inisin me eue king a ken alapa la i ren, o ia oson eue king a seika ta i mown samol inisin o an king trawn-angang.

12 O Eiman a pual apasa, Euar, Ester eue kuin i a samo mout ngani aman a fiti king etto ren an aulau me a amowla ta, ngang etrek; o i a pual kowkowri ngang lao, etei eue king.

13 O ikei a sor lomot an rei, lepuan ai na ngani eue Jus Mortikai, mawmawt lawn asaman king.

14 Iue, Sires puiluan o trian koe me inisin ra kapas ngani i, Epue aua ta afawt iran-fawrosi, towkian lime seingan paun, o lesor ko pue kapas ngani eue king pue Mortikai a pue fawrosa la uawn; murin ko pue puapua etei king ren aulau. O Eiman a afitr trapur, o a ken feri pue ra pue aua ta afawt iran-fawrosi.

## SOPON 6.

**L**EPUIN ue trek eue king a soto ngani maur; o a kapas pue ra pue ua to eue puk an mak an fefer kana; o ra aleani mown king.

2 I a kuna make tu lawn, me Mortikai a ken puara ta fefer an Piktana o Tires, me ruoman naun king trawn-souani an ueip, me trawnmas an asaman; ir ra atrutru faili pue ra pue pung tu pair uawn Aasueros.

3 O eue king a apasa, Meita a etipuar me ken feri ren Mortikai? Meita a ken seika ta ren powkitan me? Ekoe trawn-angang an king me angang ngani i ra puap apasa, A sor awt metawt me feri ngani i.

4 O king ue apasa, Ia me nom lawn rawng? Iue, Eiman a ken to lawng lawn eue rawng lukin im an king, pue a pue kapas ngani king pue a pue fawrosa la Mortikai uawn eue iran-fawrosi me a ken aua ta ren.

5 O ekoe trawn-angang an king ra kapas ngani i, Na ngani, Eiman a u te lawn rawng. O king apasa, A pue to lawn.

6 Iue, Eiman a to lawn. O king ue a kapas ngani i, Meita epue feri ren eue muan me king a afitr alapa la ?

Eiman a puap apasa ta lelukan, Ia i me eue' king a afitr alapa la, are sap pusin ngang etrek ?

7 O Eiman a kapas ngani king, Ren eue muan me king a afitr alapa la,

8 Ra pue ua to mangaku, sawkun an king, me eue king a fawkun faute ngani, o eue ors me king a fawkun tete uawn, o eue muaran sawkun an king a isa tu uawn makeran ;

9 O ekoe mangaku o eue ors ra pue fang ue ren paun aman naun king samol lapalap mown inisin, pue ra pue faute ngani eue muan me king a afitr alapa la, o atete i uawn ors pue fai la lawn al an telinim, o ra pue mangungu mown, Iei oson epue feri ren muan aman me king a afitr alapa la.

10 Eue king a puap kapas ngani Eiman, Ko pue muitir, o angai mangaku o ors aman, oson trek om kapas, o feri iei etrek ren Mortikai, aman Jus me ken mawmawt lawn asaman king: me inisin om apasa ta epue puanua ta.

11 O Eiman a angai mangaku o ors aman, o faute ngani Mortikai, o atete i pue a fai la lawn al an telinim o mangungu mown, Iei oson epue feri ren muan aman me king a afitr alapa la.

12 O Mortikai a luin to ren asam an king. O Eiman a failakai la ren im an, a ketru o makeran pualuo la.

13 O Eiman a ura ngani Tires puiluan o trian koe me inisin, awt metawt me inisin me ken fis ta ren. O an aramas tipatrem o Tires, puiluan, ra kapas ngani i, Are Mortikai, me en popua ta kisakis tu mown, me aman lein faun ekoe Jus, en sap epue puaratro i, o enlet en epue pung tu mown.

14 Lupuan ar kapas ngani i, ekoe trawn-souani an ueip an king, ra fai to ra pue amuitira to Eiman ren aulan an Ester me a ken amowla ta.

#### SOPON 7.

**I**UE, eue king me Eiman ra etta la ren aulan etei Ester eue kuin.

2 O eue king a kapas ngani Ester lawn aruoan ran an aulau an uain, Meita ko mowtren Ester kuin ? o epue ngan uk ; o meita en tungor ? euar, epue puanua ta are esop an meun.

3 Iue, Ester eue kuin a paluani apasa, Are ngang I ueri ai tren me fan masom, O king, o are king a afitr, ko pue ngani iei ai manau ren ai tungor, o nai aramas ren ai ais me rem ;

4 Pue kitr sa ken amowna la, am me nai aramas, pue ra pue kitere la, o pue ra pue ni la, pue sa pue me la. Are kitr sa ken amowna la pue sa pue trawn-angang muan me trawn-angang fefn, a sor ai kapas ; pue atr riafau a sap nene trek an king faingau.

5 Eue king Aasueros a apasa o kapas ngani Ester eue kuin, Ifa i ? O ia a nonom ie ? eue me outro lelukan pue a epue feri me ?

6 O Ester apasa ta, Muan aman me fiu ngani kitr, aman trawn-apat ; euar enan i, Eiman eue me ingau. Iue, Eiman a nuokus fan masan king me kuin.

7 O eue king a u te lawn an sawng, sowni me ren eue aulau an uain, o a fai la lawn eue rawng an im etipuar ; o Eiman a u te pue a tungor manau me ren Ester eue kuin ; pue a kuna me king a rekireki ingau ngani i.

8 Eue king a luin to me lawn rawng an im etipuar ren ikue an aulau an uain ; o Eiman a ken pung tu uawn paw me Ester a nom uawn. O eue king a apasa ta, Atiau i a epue atupu kuin fan masai lawn im ? Lupuan kapas a fai sowni auan king ir ra pualuo la masan Eiman.

9 Iue, Arpona, aman lein ekoe trawn-souani an ueip me nonom mown king, a apasa, Ami au pual na ngani eue iran-fawrosi me towkian seingan paun lime, me Eiman a aua ta ren Mortikai me kapas faiatr ren king ; ira a u te lawn iman Eiman. O king ue a apasa, Ami au fawrosa la i uawn.

10 Iue, ir ra fawrosa la Eiman uawn eue iran-fawrosi me a ken amowla ta ren Mortikai. Sawng an eue king a puap mawra la.

## SOPON 8.

**L**AWN ran ue trek, king Aasueros a fang ngani Ester kuin, iman Eiman, eue trawn-apat Jus. O Mortikai a fai to fan masan king; pue Ester a puara ta ia i me ren.

2 O king a puini ti an lele me a ken angai me ren Eiman, o fang ngani Mortikai; O Ester a seika ta Mortikai uawn iman Eiman.

3 O Ester a pual fan eu, kapas ngani king o trape tu ren pitran o tungorai etei ketru pue i a asu la faiingau an Eiman re Akak o an owk ingau me a ken lamana ta oson koe Jus.

4 Eue king a puap aiti la eue uawk an kol. O Ester a pue ta o u te fan masan king.

5 O nemin apasa, Are king a afitr, o are ngang I ueri ai tren me fan masan, o are king a rekireki iei me uenauen, o are ngang me etipuar fan masan, a pue make tu pue siuli ekoe tawropue me Eiman, naun Amitata re Akak aman, a ken feri, me a make tu pue ra pue kitere le Jus me nom uawn eif an fanu an king inisin;

6 Pue ia oson ngang I tufit na ngani me ingau me epue pung tu uawn nai aramas? Are ia oson ngang I tufit na ngani nai traw ra kitere la?

7 Iue, king Aasueros a kapas ngani Ester kuin, o Mortikai Jus aman, Na ngani, ngang I fang ngani Ester iman Eiman o ra ken fawrosa la i uawn iran-fawrosi powkitan a pung tu paun uawn Jus koe.

8 O ami a pual make tu pusin lelukami etrek, fan itan king, o asisina ta ren lele an king: pue eue tawropue an lom me make tu fan itan king o asisina ta ren lele an king, a sor aman me to ngani aniena la.

9 Ir ra kowkowri ekoe trawn-mak an king, fansoun ue trek, lawn auluat an maram me maram Sifan, lawn ran rue me uluat an; o me make tu oson ue trek Mortikai a kapas ngani ekoe Jus, o ekoe trawn-oleni, o trawn-nemani, o samol an eif an fauu me nom sowni

Intia tawrei Itiopia, apuku rue me fusu eif an fanu, ren iteit an eif an fanu oson ue trek an mak, o ren aramas inisin nenen ar kapas o ren ekoe Jus nenen ar mak o nenen ar kapas.

10 O i a make tu fan itan eue king Aasueros, o asisina ta i ren lele an king o tina la tawropue ren trawn-tine me tete uawn ors; ra ken tete uawn ors failakai me fawkun feri angang an king me an ors kana ra nauna ta:

11 Me make tu lawn kei me eue king a mout ngani ekoe Jus me nonom telinim inisin, ra pue tru fengen o u te ren ar manau, o kitere la, o ni la o ata la me inisin nemani an aramas o eif an fanu me epue fiu ngani ir, o naur samireit, o naur fefin, o asarakunu ir ren liap ar;

12 Lawn ran eu etrek, uawn eif an fanu an king Aasueros, lawn engawl me uluat an ran an maram engawl me ruo me maram Eitar.

13 Eu tawropue an iei mak, me fang ue ren amur-amur uawn eif an fanu inisin, a ken asilei faili ren aramas inisin, o pue ekoe Jus ra epue amowla ta pue ra pue ni la trawn-aput ir.

14 Iue, ekoe trawn-tine, me tete uawn ors failakai, me fawkun feri angang an king, ir ra fai la, pue alon king amuitira la ir o apatrau la ir; o eue amuramuran, a asilei faili lawn Susan, im etipuar.

15 O Mortikai a to ue sowni fan masan eue king, o i a faute ngani mangaku sawkun an king, me arauarau o powtrapowtr, o eu muaran kol me trapur, o eu lukumou an linen etipuar me aramaram; o telinim an Susan ra mairer o puapua.

16 A uor ren Jus saram, o trengel, o puapua, o it ar fau la.

17 O uawn eif an fanu inisin, o lawn telinim inisin, eueie me inisin me alon king o amuramuran ra fai la ie, me uor ren Jus trengel, o puapua, o fetelalap o ran eu me etipuar. O trawmowng lein aramas trawn fanu koe, ra uili ti Jus, pue nuokus an Jus a pung tu uawn ir.

## SOPON 9.

**I**UE, lawn maram engawl me ruo, me maram Eitar, lawn ran engawl me uluat an maram ei etrek, lu-puan arep to otun alon king o amuramuran ra epue puanua ta; lawn eue ran me trawn-aput an Jus ra rekireki ra epue puaratro ir; o a samo puanua ta pue me anieni, pue ekoe Jus ra ken puaratro trawn-aput ir;

2 Ekoe Jus ra muit fengeni lawn naur telinim, uawn eif an fanu inisin an Aasueros eue king, pue ra pue pung tu pair uawn ir me mowtren kitere la ir; a se i nom aman me tufit u te mowr; pue ar nuokus a pung tu uawn aramas inisin.

3 O samol an eif an fanu inisin, o ekoe trawn-oleni me trawn-nemani, o ir me feri angang an king, ra ken alisi ekoe Jus; powkitan nuokus an Mortikai a pung tu uawr.

4 Pue Mortikai a ken lapalap lawn iman king, o itan a fau la uawn eif an fanu inisin; pue eue muan Mortikai a ken lapalap la o pual lapalap la.

5 O ekoe Jus ra ken powku ngani sapasap trawn-aput ir me inisin, o ni la o kitere la, o feri pusin leluar ngani ir me apud ir.

6 O lawn Susan eue im etipuar, Jus koe ra ken ni o kitere la aramas muan limoupuku.

7 O ir ra ni la engawl at me naun Eiman naun Amitata eue trawn-apud Jus koe;

8 Itar Parsatata, o Talfon, o Aspata, o Porata, o Atalia,

9 O Aritata, o Parmasta, o Arisai,

10 O Aritai, o Faisata; a, ra sap pung tu pair uawn asarakunu an.

11 Lawn ran ue ra ken puar ngani king iteit an ir me ra ni la lawn Susan, eue im etipuar.

12 O eue king a kapas ngani Ester eue kuin, Ekoe Jus ra ken ni la o kitere la lawn Susan eue im etipuar, limoupuku muan, o naun Eiman engawl at; meita ra pual feri uawn ekoe eif an fanu an king! Iue, meita



ko mowtren ? o epue ngan uk ; o meita en pual tungor ?  
o epue puanua ta.

13 Ester a puap apasa, Are king a afitr, epue mout  
ngani Jus koe, me ken nom lawn Susan, pue ra pue feri  
lao oson ue trek amuramuran ran ei, o pual ra fawrosa  
la uawn iran-fawrosi naun Eiman engawl at.

14 O king ue a kapas ra pue feri ; o eue amuramur  
a asilei faili uawn Susan ; o ir ra fawrosa la naun  
Eiman engawl at.

15 O Jus koe me nom ngani Susan, ra muit fengeni  
lawn ran engawl me ruanu an maram Eitar, o ni la ulu-  
puku muan lawn Susan ; o ra sap pung tu pair uawn  
asarakunu an.

16 O ekoe Jus me nonom uawn eif an fanu an king,  
ra muit fengeni o u te ren manau ar o asese sowni  
trawn-aput ir, o ni la, leir me apud ir, fik engerou me  
limengerou ; o ra sap pung tu pair uawn asaraku-  
nu an.

17 Iei me feri lawn ran engawl me uluat an maram  
Eitar ; o lawn ran engawl me ruanu an maram ei etrek,  
ra ken asese ir, o feri i ran an aulau o puapua.

18 O ekoe Jus me nom ngani Susan, ra muit fengeni  
lawn ran engawl me uluat au, o lawn ran engawl me  
ruanu an ; o lawn ran engawl me limou ra ken asese  
ir, o feri ran an aulau o puapua.

19 Ie mine Jus koe me nom ngani pinim kana, o  
telinim a sor oror me pueni fengeni ir, ra ken feri ran  
engawl me ruanu an maram Eitar, ran an aulau o  
puapua, o ran etipuar, o ran me ra tina la fengen  
uisar.

20 Iue, Mortikai i a make tu kei, o tina la tawropue  
ren Jus inisin me nonom eif an fanu inisin an king  
Aasueros, me kuku to o kuku la,

21 Pue ra pinia la ran engawl me ruanu an maram  
Eitar o pual ran engawl me limou an eue trek maram,  
iir inisin.

22 Ran koe me Jus kana ra ken asese sowni trawn-  
apud ir, o eue maram me uili sowni riafau, o uili ngani  
puapua, powkitan ir, o sowni ran an ngungures, ngani

ran etipuar: ir ra pue feri ir ran an aulau o puapua, o tina fengen uisar, o kiaso ngani uoingau kana;

23 O ekoe Jus ra atrotro feri oson trek ra ken popua ta, o nene trek Mortikai a make tu ren ir.

24 Powkitan Eiman naun Amitata, re Akak eue trawn-aput Jus inisin, i a ken rekireki uawn Jus pue a pue kitere la ir, o i a feri Pur, iei me asisinin, pue ata la ir o kitere la ir;

25 A lupuan mini koe ra puar ngani eue king, i a amuramur ren tawropue me an owkiowk ingau, me a owkiowki uawn ekoe Jus, epue luin, to uawn pusin makeran, o i me naun at ra pue fawrosa la uawn iran-fawrosi.

26 Ie mine ra ken aitan ngani koe ran, Pur koe, me ren itan Pur. Ie me powkitan kapas an iei tawropue inisin, o mini me ra ken na ngani ren iei fefer, o mini me pung tu uawr,

27 Ekoe Jus ra ken amuramur ngani pusin ir me naur kana, o ir me nom ngani ir, o angai ren ar angang pue a te mawr la, pue ra pue amatru kei ranan, ir me ruo, oson ue trek mak an, o lawn fansoun an iir inisin.

28 O ra pue tretremani kei ranan, o amatru ir lawn pilawn aramas inisin o lawn traw inisin, o uawn eif an fanu inisin, o lawn telinim inisin; pue kei ran an Pur koe ra sap epue mawr la lein Jus kana, o tretremanian a sap epue uku tu lein naur kana.

29 Iue, Ester eue kuin, naun Apiail nengin, o Mortikai Jus aman, ra ken make tu ren uownar inisin, pue anuka tu tawropue an Pur koe.

30 O i a tina la tawropue ren Jus inisin uawn eif an fanu apuku rue me fusu an meun Aasueros,

31 Kapas a kinamue o enlet, pue anuka tu kei ran an Pur koe lawn fansoun ar, oson ue trek Mortikai Jus aman o Ester eue kuin, ra ken amuramur ngani ir, o nene trek pusin ir ra amuramur ngani ir me naur kana ren angang an pin mownga o ketru.

32 O alon Ester a anuka tu mini kei an Pur koe; o me make tu lawn eue puk.

## SOPON 10.

**O** EUE king Aasueros a ken amuramur ngani fanu ra pue ngani i ekawt moni an nemani, o pual ta kana an matau.

2 O fefer inisin an uownan o an pitrakil, o faws me inisin an Mortikai me lapalap, me eue king a seika ta i ren; kei me inisin ra sap make tu lawn puk an mak an ekoe king an Mitia me Persia?

3 Pue Mortikai eue Jus, a ken nom arep ngani eue king o i me lapalap lein Jus koe, o me etipuar lein puin koe me trawmow'ng: i a kitta faiatr ren naun aramas o a kapas kinamue ngani naun kana me inisin.